

宿雨清幾句

朝陽展帝城

望奔人樂業

瓊上踏歌行



全唐詩

十五

中华古典精华文库

全 唐 诗

(第十五部)

第五百四十一卷

卷 541_1 【正月十五夜闻京有灯，恨不得观】

李商隐

月色灯光满帝都，香车宝辇隘通衢。
身闲不睹中兴盛，羞逐乡人赛紫姑。

卷 541_2 【赠赵协律皙】

李商隐

俱识孙公与谢公，二年歌哭处还同。已叨邹马声华末，
更共刘卢族望通。南省恩深宾馆在，东山事往妓楼空。
不堪岁暮相逢地，我欲西征君又东。

卷 541_3 【摇落】

李商隐

摇落伤年日，羁留念远心。水亭吟断续，月幌梦飞沉。

古木含风久，疏萤怯露深。人闲始遥夜，地迥更清砧。
结爱曾伤晚，端忧复至今。未谙沧海路，何处玉山岑。
滩激黄牛暮，云屯白帝阴。遥知沾洒意，不减欲分襟。

卷 541_4 【滞雨】

李商隐

滞雨长安夜，残灯独客愁。故乡云水地，归梦不宜秋。

卷 541_5 【偶题二首】

李商隐

小亭闲眠微醉消，山榴海柏枝相交。
水文簟上琥珀枕，傍有堕钗双翠翘。

清月依微香露轻，曲房小院多逢迎。
春丛定见饶栖鸟，饮罢莫持红烛行。

卷 541_6 【月】

李商隐

过水穿楼触处明，藏人带树远含清。

初生欲缺虚惆怅，未必圆时即有情。

卷 541_7 【夜冷】

李商隐

树绕池宽月影多，村砧坞笛隔风萝。
西亭翠被余香薄，一夜将愁向败荷。

卷 541_8 【正月崇让宅】

李商隐

密锁重关掩绿苔，廊深阁迥此徘徊。先知风起月含晕，
尚自露寒花未开。蝙拂帘旌终展转，鼠翻窗网小惊猜。
背灯独共余香语，不觉犹歌起夜来。

卷 541_9 【城外】

李商隐

露寒风定不无情，临水当山又隔城。
未必明时胜蚌蛤，一生长共月亏盈。

卷 541_10 【撰彭阳公志文毕有感】

李商隐

延陵留表墓，岷首送沈碑。敢伐不加点，犹当无愧辞。
百生终莫报，九死谅难追。待得生金后，川原亦几移。

卷 541_11 【北青萝】

李商隐

残阳西入崦，茅屋访孤僧。落叶人何在，寒云路几层。
独敲初夜磬，闲倚一枝藤。世界微尘里，吾宁爱与憎。

卷 541_12 【戏赠张书记】

李商隐

别馆君孤枕，空庭我闭关。池光不受月，野气欲沉山。
星汉秋方会，关河梦几还。危弦伤远道，明镜惜红颜。
古木含风久，平芜尽日闲。心知两愁绝，不断若寻环。

卷 541_13 【幽人】

李商隐

丹灶三年火，苍崖万岁藤。樵归说逢虎，棋罢正留僧。
星斗同秦分，人烟接汉陵。东流清渭苦，不尽照衰兴。

卷 541_14 【念远】

李商隐

日月淹秦甸，江湖动越吟。苍桐应露下，白阁自云深。
皎皎非鸾扇，翘翘失凤簪。床空鄂君被，杵冷女媧砧。
北思惊沙雁，南情属海禽。关山已摇落，天地共登临。

卷 541_15 【过故崔兗海宅与崔明秀才话旧因寄旧僚杜赵李三掾】

李商隐

绛帐恩如昨，乌衣事莫寻。诸生空会葬，旧掾已华簪。
共入留宾驿，俱分市骏金。莫凭无鬼论，终负托孤心。

卷 541_16 【微雨】

李商隐

初随林霭动，稍共夜凉分。窗迥侵灯冷，庭虚近水闻。

卷 541_17 【南山赵行军新诗盛称游宴之洽，因寄一绝】

李商隐

莲幕遥临黑水津，囊鞬无事但寻春。
梁王司马非孙武，且免宫中斩美人。

卷 541_18 【曲江】

李商隐

望断平时翠辇过，空闻子夜鬼悲歌。金舆不返倾城色，
玉殿犹分下苑波。死忆华亭闻唳鹤，老忧王室泣铜驼。
天荒地变心虽折，若比阳春意未多。

卷 541_19 【景阳井】

李商隐

景阳宫井剩堪悲，不尽龙鸾誓死期。
肠断吴王宫外水，浊泥犹得葬西施。

卷 541_20 【故番禺侯以赃罪致不辜，事觉，母者他日过其门】

李商隐

饮鸩非君命，兹身亦厚亡。江陵从种橘，交广合投香。
不见千金子，空余数仞墙。杀人须显戮，谁举汉三章。

卷 541_21 【咏云】

李商隐

捧月三更断，藏星七夕明。才闻飘迥路，旋见隔重城。
潭暮随龙起，河秋压雁声。只应惟宋玉，知是楚神名。

卷 541_22 【夜出西溪】

李商隐

东府忧春尽，西溪许日曛。月澄新涨水，星见欲销云。
柳好休伤别，松高莫出群。军书虽倚马，犹未当能文。

卷 541_23 【效长吉】

李商隐

长长汉殿眉，窄窄楚宫衣。镜好鸾空舞，帘疏燕误飞。
君王不可问，昨夜约黄归。

卷 541_24 【柳】

李商隐

江南江北雪初消，漠漠轻黄惹嫩条。灞岸已攀行客手，
楚宫先骋舞姬腰。清明带雨临官道，晚日含风拂野桥。
如线如丝正牵恨，王孙归路一何遥。

卷 541_25 【九月於东逢雪】

李商隐

举家忻共报，秋雪堕前峰。岭外他年忆，於东此日逢。
粒轻还自乱，花薄未成重。岂是惊离鬓，应来洗病容。

卷 541_26 【四皓庙】

李商隐

本为留侯慕赤松，汉庭方识紫芝翁。
萧何只解追韩信，岂得虚当第一功。

卷 541_27 【送阿龟归华】

李商隐

草堂归意背烟萝，黄绶垂腰不奈何。
因汝华阳求药物，碧松根下茯苓多。

卷 541_28 【九日】

李商隐

曾共山翁把酒时，霜天白菊绕阶墀。十年泉下无人问，
九日樽前有所思。不学汉臣栽苜蓿，空教楚客咏江蓠。
郎君官贵施行马，东阁无因再得窥。

卷 541_29 【僧院牡丹】

李商隐

薄叶风才倚，枝轻雾不胜。开先如避客，色浅为依僧。
粉壁正荡水，绡帟初卷灯。倾城惟待笑，要裂几多缯。

卷 541_30 【赠司勋杜十三员外】

李商隐

杜牧司勋字牧之，清秋一首杜秋诗。前身应是梁江总，
名总还曾字总持。心铁已从干镆利，鬓丝休叹雪霜垂。
汉江远吊西江水，羊祜韦丹尽有碑。

卷 541_31 【高花】

李商隐

花将人共笑，篱外露繁枝。宋玉临江宅，墙低不碍窥。

卷 541_32 【嘲桃】

李商隐

无赖夭桃面，平时露井东。春风为开了，却拟笑春风。

卷 541_33 【送丰都李尉】

李商隐

万古商於地，凭君泣路岐。固难寻绮季，可得信张仪。
雨气燕先觉，叶阴蝉遽知。望乡尤忌晚，山晚更参差。

卷 541_34 【天平公座中呈令狐令公，时蔡京在坐，京曾为僧徒，故有第五句】

李商隐

罢执霓旌上醺坛，慢妆娇树水晶盘。更深欲诉蛾眉敛，

衣薄临醒玉艳寒。白足禅僧思败道，青袍御史拟休官。
虽然同是将军客，不敢公然子细看。

卷 541_35 【江上忆严五广林】

李商隐

征南幕下带长刀，梦笔深藏五色毫。
逢著澄江不敢咏，镇西留与谢功曹。

卷 541_36 【钱席重送从叔余之梓州】

李商隐

莫叹万重山，君还我未还。武关犹怅望，何况百牢关。

卷 541_37 【访隐】

李商隐

路到层峰断，门依老树开。月从平楚转，泉自上方来。
薤白罗朝馔，松黄暖夜杯。相留笑孙绰，空解赋天台。

卷 541_38 【寓兴】

李商隐

薄宦仍多病，从知竟远游。谈谐叨客礼，休浣接冥搜。
树好频移榻，云奇不下楼。岂关无景物，自是有乡愁。

卷 541_39 【东南】

李商隐

东南一望日中乌，欲逐羲和去得无。
且向秦楼棠树下，每朝先觅照罗敷。

卷 541_40 【归来】

李商隐

旧隐无何别，归来始更悲。难寻白道士，不见惠禅师。
草径虫鸣急，沙渠水下迟。却将波浪眼，清晓对红梨。

卷 541_41 【子直晋昌李花】

李商隐

吴馆何时熨，秦台几夜熏。绡轻谁解卷，香异自先闻。
月里谁无姊，云中亦有君。樽前见飘荡，愁极客襟分。

卷 541_42 【河清与赵氏昆季宴集得拟杜工部】

李商隐

胜概殊江右，佳名逼渭川。虹收青嶂雨，鸟没夕阳天。
客鬓行如此，沧波坐渺然。此中真得地，漂荡钓鱼船。

卷 541_43 【寓目】

李商隐

园桂悬心碧，池莲饫眼红。此生真远客，几别即衰翁。
小幌风烟入，高窗雾雨通。新知他日好，锦瑟傍朱栊。

卷 541_44 【题道静院，院在中条山，故王颜中丞所置，虢州刺史舍官居此，今写真存焉】

李商隐

紫府丹成化鹤群，青松手植变龙文。壶中别有仙家日，
岭上犹多隐士云。独坐遗芳成故事，褰帷旧貌似元君。
自怜筑室灵山下，徒望朝岚与夕曛。

卷 541_45 【赋得桃李无言】

李商隐

夭桃花正发，秾李蕊方繁。应候非争艳，成蹊不在言。
静中霞暗吐，香处雪潜翻。得意摇风态，含情泣露痕。
芬芳光上苑，寂默委中园。赤白徒自许，幽芳谁与论。

卷 541_46 【登霍山驿楼】

李商隐

庙列前峰迥，楼开四望穷。岭巇岚色外，陂雁夕阳中。
弱柳千条露，衰荷一面风。壶关有狂孽，速继老生功。

卷 541_47 【寄和水部马郎中题兴德驿，时昭义已平】

李商隐

仙郎倦去心，郑驿暂登临。水色潇湘阔，沙程朔漠深。
鹢舟时往复，鸥鸟恣浮沉。更想逢归马，悠悠岳树阴。

卷 541_48 【题小松】

李商隐

怜君孤秀植庭中，细叶轻阴满座风。桃李盛时虽寂寞，
雪霜多后始青葱。一年几变枯荣事，百尺方资柱石功。
为谢西园车马客，定悲摇落尽成空。

卷 541_49 【行次昭应县道上，送户部李郎中充昭义攻讨】

李商隐

将军大旆扫狂童，诏选名贤赞武功。暂逐虎牙临故绛，
远含鸡舌过新丰。鱼游沸鼎知无日，鸟覆危巢岂待风。
早勒勋庸燕石上，伫光纶綍汉廷中。

卷 541_50 【水斋】

李商隐

多病欣依有道邦，南塘宴起想秋江。卷帘飞燕还拂水，
开户暗虫犹打窗。更阅前题已披卷，仍斟昨夜未开缸。
谁人为报故交道，莫惜鲤鱼时一双。

卷 541_51 【奉同诸公题河中任中丞新创河亭四韵之作】

李商隐

万里谁能访十洲，新亭云构压中流。河蛟纵玩难为室，
海蜃遥惊耻化楼。左右名山穷远目，东西大道锁轻舟。
独留巧思传千古，长与蒲津作胜游。

卷 541_52 【过故府中武威公交城旧庄感事】

李商隐

信陵亭馆接郊畿，幽象遥通晋水祠。日落高门喧燕雀，
风飘大树撼熊羆。新蒲似笔思投日，芳草如茵忆吐时。
山下只今黄绢字，泪痕犹堕六州儿。

卷 541_53 【赠田叟】

李商隐

荷筱衰翁似有情，相逢携手绕村行。烧畲晓映远山色，
伐树暝传深谷声。鸥鸟忘机翻浹洽，交亲得路昧平生。
抚躬道地诚感激，在野无贤心自惊。

卷 541_54 【赠别前蔚州契苾使君】

李商隐

何年部落到阴陵，奕世勤王国史称。夜卷牙旗千帐雪，
朝飞羽骑一河冰。蕃儿襁负来青冢，狄女壶浆出白登。
日晚鹈鹕泉畔猎，路人遥识郅都鹰。

卷 541_55 【和人题真娘墓】

李商隐

虎丘山下剑池边，长遣游人叹逝川。冢树断丝悲舞席，
出云清梵想歌筵。柳眉空吐效颦叶，榆荚还飞买笑钱。
一自香魂招不得，只应江上独婵娟。

卷 541_56 【人日即事】

李商隐

文王喻复今朝是，子晋吹笙此日同。舜格有苗旬太远，
周称流火月难穷。镂金作胜传荆俗，翦彩为人起晋风。
独想道衡诗思苦，离家恨得二年中。

卷 541_57 【春日寄怀】

李商隐

世间荣落重逡巡，我独丘园坐四春。纵使有花兼有月，
可堪无酒又无人。青袍似草年年定，白发如丝日日新。
欲逐风波千万里，未知何路到龙津。

卷 541_58 【和刘评事永乐闲居见寄】

李商隐

白社幽闲君暂居，青云器业我全疏。看封谏草归鸾掖，
尚贲衡门待鹤书。莲耸碧峰关路近，荷翻翠扇水堂虚。
自探典籍忘名利，欹枕时惊落蠹鱼。

卷 541_59 【和马郎中移白菊见示】

李商隐

陶诗只采黄金实，郢曲新传白雪英。素色不同篱下发，
繁花疑自月中生。浮杯小摘开云母，带露全移缀水精。
偏称含香五字客，从兹得地始芳荣。

卷 541_60 【喜闻太原同院崔侍御台拜兼寄在台三二同年之什】

李商隐

鹏鱼何事遇屯同，云水升沉一会中。刘放未归鸡树老，
邹阳新去兔园空。寂寥我对先生柳，赫奕君乘御史骢。
若向南台见莺友，为传垂翅度春风。

卷 541_61 【喜雪】

李商隐

朔雪自龙沙，呈祥势可嘉。有田皆种玉，无树不开花。
班扇慵裁素，曹衣讵比麻。鹅归逸少宅，鹤满令威家。
寂寞门扉掩，依稀履迹斜。人疑游面市，马似困盐车。
洛水妃虚妒，姑山客漫夸。联辞虽许谢，和曲本惭巴。

粉署闱全隔，霜台路正赊。此时倾贺酒，相望在京华。

卷 541_62 【柳枝五首】

李商隐

花房与蜜脾，蜂雄蛱蝶雌。同时不同类，那复更相思。

本是丁香树，春条结始生。玉作弹棋局，中心亦不平。

嘉瓜引蔓长，碧玉冰寒浆。东陵虽五色，不忍值牙香。

柳枝井上蟠，莲叶浦中干。锦鳞与绣羽，水陆有伤残。

画屏绣步障，物物自成双。如何湖上望，只是见鸳鸯。

卷 541_63 【燕台四首 · 春】

李商隐

风光冉冉东西陌，几日娇魂寻不得。蜜房羽客类芳心，
冶叶倡条遍相识。暖蔼辉迟桃树西，高鬟立共桃鬟齐。
雄龙雌凤杳何许，絮乱丝繁天亦迷。醉起微阳若初曙，
映帘梦断闻残语。愁将铁网罟珊瑚，海阔天翻迷处所。
衣带无情有宽窄，春烟自碧秋霜白。研丹擘石天不知，

愿得天牢锁冤魄。夹罗委篋单绡起，香肌冷衬琤琤珮。
今日东风自不胜，化作幽光入西海。

卷 541_64 【燕台四首·夏】

李商隐

前阁雨帘愁不卷，后堂芳树阴阴见。石城景物类黄泉，
夜半行郎空柘弹。绡扇唤风闾阖天，轻帷翠幕波渊旋。
蜀魂寂寞有伴未，几夜瘴花开木棉。桂宫留影光难取，
嫣薰兰破轻轻语。直教银汉堕怀中，未遣星妃镇来去。
浊水清波何异源，济河水清黄河浑。安得薄雾起缃裙，
手接云軿呼太君。

卷 541_65 【燕台四首·秋】

李商隐

月浪冲天天宇湿，凉蟾落尽疏星入。云屏不动掩孤嚟，
西楼一夜风筝急。欲织相思花寄远，终日相思却相怨。
但闻北斗声回环，不见长河水清浅。金鱼锁断红桂春，
古时尘满鸳鸯茵。堪悲小苑作长道，玉树未怜亡国人。
瑶琴愔愔藏楚弄，越罗冷薄金泥重。帘钩鹦鹉夜惊霜，
唤起南云绕云梦。双珰丁丁联尺素，内记湘川相识处。
歌唇一世衔雨看，可惜馨香手中故。

卷 541_66 【燕台四首·冬】

李商隐

天东日出天西下，雌凤孤飞女龙寡。青溪白石不相望，
堂中远甚苍梧野。冻壁霜华交隐起，芳根中断香心死。
浪乘画舸忆蟾蜍，月娥未必婵娟子。楚管蛮弦愁一概，
空城舞罢腰支在。当时欢向掌中销，桃叶桃根双姊妹。
破鬟矮堕凌朝寒，白玉燕钗黄金蝉。风车雨马不持去，
蜡烛啼红怨天曙。

卷 541_67 【河内诗二首】

李商隐

鼙鼓沉沉虬水咽，秦丝不上蛮弦绝。常娥衣薄不禁寒，
蟾蜍夜艳秋河月。碧城冷落空蒙烟，帘轻幕重金钩栏。
灵香不下两皇子，孤星直上相风竿。八桂林边九芝草，
短襟小鬓相逢道。入门暗数一千春，愿去闰年留月小。
栀子交加香蓼繁，停辛伫苦留待君。

阊门日下吴歌远，陂路绿菱香满满。后溪暗起鲤鱼风，
船旗闪断芙蓉干。轻身奉君畏身轻，双桡两桨樽酒清。
莫因风雨罢团扇，此曲断肠惟北声。低楼小径城南道，
犹自金鞍对芳草。

卷 541_68 【赠送前刘五经映三十四韵】

李商隐

建国宜师古，兴邦属上庠。从来以儒戏，安得振朝纲。
叔世何多难，兹基遂已亡。泣麟犹委吏，歌凤更佯狂。
屋壁余无几，焚坑逮可伤。挟书秦二世，坏宅汉诸王。
草草临盟誓，区区务富强。微茫金马署，狼藉斗鸡场。
尽欲心无窍，皆如面正墙。惊疑豹文鼠，贪窃虎皮羊。
南渡宜终否，西迁冀小康。策非方正士，贡绝孝廉郎。
海鸟悲钟鼓，狙公畏服裳。多岐空扰扰，幽室竟伉伉。
凝邈为时范，虚空作士常。何由羞五霸，直自眚三皇。
别派驱杨墨，他鑪并老庄。诗书资破冢，法制困探囊。
周礼仍存鲁，隋师果禅唐。鼎新麾一举，革故法三章。
星宿森文雅，风雷起退藏。縲囚为学切，掌故受经忙。
夫子时之彦，先生迹未荒。褐衣终不召，白首兴难忘。
感激殊非圣，栖迟异异粮。片辞褒有德，一字贬无良。
燕地尊邹衍，西河重卜商。式间真道在，拥彗信谦光。
获预青衿列，叨来绛帐旁。虽从各言志，还要大为防。
勿谓孤寒弃，深忧讪直妨。叔孙谗易得，盗跖暴难当。
雁下秦云黑，蝉休陇叶黄。莫逾巾屨念，容许后升堂。

卷 541_69 【哭遂州萧侍郎二十四韵】

李商隐

遥作时多难，先令祸有源。初惊逐客议，旋骇党人冤。
密侍荣方入，司刑望愈尊。皆因优诏用，实有谏书存。
苦雾三辰没，穷阴四塞昏。虎威狐更假，隼击鸟逾喧。
徒欲心存阙，终遭耳属垣。遗音和蜀魄，易箠对巴猿。
有女悲初寡，无男泣过门。朝争屈原草，庙馁莫敖魂。
迴阁伤神峻，长江极望翻。青云宁寄意，白骨始沾恩。
早岁思东阁，为邦属故园。登舟惭郭泰，解榻愧陈蕃。
分以忘年契，情犹锡类敦。公先真帝子，我系本王孙。
啸傲张高盖，从容接短辕。秋吟小山桂，春醉后堂萱。
自叹离通籍，何尝忘叫阍。不成穿圉入，终拟上书论。
多士还鱼贯，云谁正骏奔。暂能诛倏忽，长与问乾坤。
蚁漏三泉路，蛩啼百草根。始知同泰讲，微福是虚言。

卷 541_70 【送千牛李将军赴阙五十韵】

李商隐

照席琼枝秀，当年紫绶荣。班资古直阁，勋伐旧西京。
在昔王纲紊，因谁国步清。如无一战霸，安有大横庚。
内竖依凭切，凶门责望轻。中台终恶直，上将更要盟。
丹陛祥烟灭，皇闱杀气横。喧阗众狙怒，容易八蛮惊。

棹机宽之久，防风戮不行。素来矜异类，此去岂亲征。
舍鲁真非策，居邠未有名。曾无力牧御，宁待雨师迎。
火箭侵乘石，云桥逼禁营。何时绝刁斗，不夜见欃枪。
屡亦闻投鼠，谁其敢射鲸。世情休念乱，物议笑轻生。
大卤思龙跃，苍梧失象耕。灵衣沾愧汗，仪马困阴兵。
别馆兰薰酷，深宫蜡焰明。黄山遮舞态，黑水断歌声。
纵未移周鼎，何辞免赵坑。空拳转斗地，数板不沈城。
且欲凭神算，无因计力争。幽囚苏武节，弃市仲由缨。
下殿言终验，增埤事早萌。蒸鸡殊减膳，屑麴异和羹。
否极时还泰，屯余运果亨。流离几南渡，仓卒得西平。
神鬼收昏黑，奸凶首满盈。官非督护贵，师以丈人贞。
覆载还高下，寒暄急改更。马前烹莽卓，坛上揖韩彭。
扈跸三才正，回军六合晴。此时惟短剑，仍世尽双旌。
顾我由群从，逢君叹老成。庆流归嫡长，贻厥在名卿。
隼击须当要，鹏抟莫问程。趋朝排玉座，出位泣金茎。
幸藉梁园赋，叨蒙许氏评。中郎推贵婿，定远重时英。
政已标三尚，人今伫一鸣。长刀悬月魄，快马骇星精。
披豁惭深眷，睽离动素诚。蕙留春畹晚，松待岁峥嵘。
异县期回雁，登时已饭鯖。去程风刺刺，别夜漏丁丁。
庾信生多感，杨朱死有情。弦危中妇瑟，甲冷想夫箏。
会与秦楼凤，俱听汉苑莺。洛川迷曲沼，烟月两心倾。

卷 541_71 【咏怀寄秘阁旧僚二十六韵】

李商隐

年鬓日堪悲，衡茅益自嗤。攻文枯若木，处世钝如锤。

敢忘垂堂戒，宁将暗室欺。悬头曾苦学，折臂反成医。
仆御嫌夫懦，孩童笑叔痴。小男方嗜栗，幼女漫忧葵。
遇炙谁先啖，逢齏即便吹。官衔同画饼，面貌乏凝脂。
典籍将蠹测，文章若管窥。图形翻类狗，入梦肯非罴。
自哂成书簏，终当咒酒卮。懒沾襟上血，羞镊镜中丝。
橐籥言方喻，樗蒲齿讵知。事神徒惕虑，佞佛愧虚辞。
曲艺垂麟角，浮名状虎皮。乘轩宁见宠，巢幕更逢危。
礼俗拘嵇喜，侯王忻戴逵。途穷方结舌，静胜但支颐。
粝食空弹剑，亨衢讵置锥。柏台成口号，芸阁暂肩随。
悔逐迁莺伴，谁观择虱时。瓮间眠太率，床下隐何卑。
奋迹登弘阁，摧心对董帷。校讎如有暇，松竹一相思。

卷 541_72 【戊辰会静中出贻同志二十韵】

李商隐

大道谅无外，会越自登真。丹元子何索，在己莫问邻。
蒨璨玉琳华，翱翔九真君。戏掷万里火，聊召六甲旬。
瑶简被灵诰，持符开七门。金铃摄群魔，绛节何飏飏。
吟弄东海若，笑倚扶桑春。三山诚迢视，九州扬一尘。
我本玄元胄，禀华由上津。中迷鬼道乐，沉为下土民。
托质属太阴，炼形复为人。誓将覆宫泽，安此真与神。
龟山有慰荐，南真为弥纶。玉管会玄圃，火枣承天姻。
科车遏故气，侍香传灵氛。飘飘被青霓，婀娜佩紫纹。
林洞何其微，下仙不与群。丹泥因未控，万劫犹逡巡。
荆芜既以薅，舟壑永无湮。相期保妙命，腾景侍帝宸。

卷 541_73 【和郑愚赠汝阳王孙家筝妓二十韵】

李商隐

冰雾怨何穷，秦丝娇未已。寒空烟霞高，白日一万里。
碧嶂愁不行，浓翠遥相倚。茜袖捧琼姿，皎日丹霞起。
孤猿耿幽寂，西风吹白芷。回首苍梧深，女萝闭山鬼。
荒郊白鳞断，别浦晴霞委。长杓压河心，白道连地尾。
秦人昔富家，绿窗闻妙旨。鸿惊雁背飞，象床殊故里。
因令五十丝，中道分宫徵。斗粟配新声，娣侄徒纤指。
风流大堤上，怅望白门里。蠹粉实雌弦，灯光冷如水。
羌管促蛮柱，从醉吴宫耳。满内不扫眉，君王对西子。
初花惨朝露，冷臂凄愁髓。一曲送连钱，远别长于死。
玉砌衔红兰，妆窗结碧绮。九门十二关，清晨禁桃李。

卷 541_74 【四年冬以退居蒲之永乐，渴然有农夫望岁之志，遂作忆雪，又作残雪诗各一百言以寄情于游旧·忆雪】

李商隐

爱景人方乐，同雪候稍愆。徒闻周雅什，愿赋朔风篇。
欲俟千箱庆，须资六出妍。咏留飞絮后，歌唱落梅前。
庭树思琼蕊，妆楼认粉绵。瑞邀盈尺日，丰待两岐年。
预约延枚酒，虚乘访戴船。映书孤志业，披篋阻神仙。
几向霜阶步，频将月幌褰。玉京应已足，白屋但颀然。

卷 541_75【四年冬以退居蒲之永乐，渴然有农夫望岁之志，遂作忆雪，又作残雪诗各一百言以寄情于游旧·残雪】

李商隐

旭日开晴色，寒空失素尘。绕墙全剥粉，傍井渐消银。
刻兽摧盐虎，为山倒玉人。珠还犹照魏，璧碎尚留秦。
落日惊侵昼，余光误惜春。檐冰滴鹅管，屋瓦镂鱼鳞。
岭霁岚光坼，松暄翠粒新。拥林愁拂尽，著砌恐行频。
焦寝忻无患，梁园去有因。莫能知帝力，空此荷平均。

卷 541_76【大卤平后移家到永和县居，书怀十韵寄刘韦二前辈，二公尝于此县寄居】

李商隐

驱马绕河干，家山照露寒。依然五柳在，况值百花残。
昔去惊投笔，今来分挂冠。不忧悬磬乏，乍喜覆盂安。
甑破宁回顾，舟沉岂暇看。脱身离虎口，移疾就猪肝。
鬓入新年白，颜无旧日丹。自悲秋获少，谁惧夏畦难。
逸志忘鸿鹄，清香披蕙兰。还持一杯酒，坐想二公欢。

卷 541_77 【河阳诗】

李商隐

黄河摇溶天上来，玉楼影近中天台。龙头泻酒客寿杯，
主人浅笑红玫瑰。梓泽东来七十里，长沟复堑埋云子。
可惜秋眸一陂光，汉陵走马黄尘起。南浦老鱼腥古涎，
真珠密字芙蓉篇。湘中寄到梦不到，衰容自去抛凉天。
忆得蛟丝裁小卓，蛱蝶飞回木绵薄。绿绣笙囊不见人，
一口红霞夜深嚼。幽兰泣露新香死，画图浅缥松溪水。
楚丝微觉竹枝高，半曲新辞写绵纸。巴西夜市红守宫，
后房点臂斑斑红。堤南渴雁自飞久，芦花一夜吹西风。
晓帘串断蜻蜓翼，罗屏但有空青色。玉湾不钓三千年，
莲房暗被蛟龙惜。湿银注镜井口平，鸾钗映月寒铮铮。
不知桂树在何处，仙人不下双金茎。百尺相风插重屋，
侧近嫣红伴柔绿。百劳不识对月郎，湘竹千条为一束。

卷 541_78 【自桂林奉使江陵途中感怀寄献尚书】

李商隐

下客依莲幕，明公念竹林。纵然膺使命，何以奉徽音。
投刺虽伤晚，酬恩岂在今。迎来新琐闥，从到碧瑶岑。
水势初知海，天文始识参。固惭非贾谊，惟恐后陈琳。
前席惊虚辱，华樽许细斟。尚怜秦痔苦，不遣楚醪沈。

既载从戎笔，仍披选胜襟。流通伏波柱，帘对有虞琴。
宅与严城接，门藏别岫深。阁凉松冉冉，堂静桂森森。
社内容周续，乡中保展禽。白衣居士访，乌帽逸人寻。
佞佛将成传，耽书或类淫。长怀五羖赎，终著九州箴。
良讯封鸳绮，余光借玳簪。张衡愁浩浩，沈约瘦恹恹。
芦白疑粘鬓，枫丹欲照心。归期无雁报，旅抱有猿侵。
短日安能驻，低云只有阴。乱鸦冲晒网，寒女簇遥砧。
东道违宁久，西园望不禁。江生魂黯黯，泉客泪涔涔。
逸翰应藏法，高辞肯浪吟。数须传庾翼，莫独与卢谌。
假寐凭书簏，哀吟叩剑铉。未尝贪偃息，那复议登临。
彼美回清镜，其谁受曲针。人皆向燕路，无乃费黄金。

卷 541_79 【送从翁从东川弘农尚书幕】

李商隐

大镇初更帅，嘉宾素见邀。使车无远近，归路更烟霄。
稳放骅骝步，高安翡翠巢。御风知有在，去国肯无聊。
早忝诸孙末，俱从小隐招。心悬紫云阁，梦断赤城标。
素女悲清瑟，秦娥弄玉箫。山连玄圃近，水接绛河遥。
岂意闻周铎，翻然慕舜韶。皆辞乔木去，远逐断蓬飘。
薄俗谁其激，斯民已甚忉。鸾皇期一举，燕雀不相饶。
敢共颓波远，因之内火烧。是非过别梦，时节惨惊飙。
未至谁能赋，中干欲病痁。屡曾纡锦绣，勉欲报琼瑶。
我恐霜侵鬓，君先绶挂腰。甘心与陈阮，挥手谢松乔。
锦里差邻接，云台闭寂寥。一川虚月魄，万崦自芝苗。

瘴雨泷间急，离魂峡外销。非关无烛夜，其奈落花朝。
几处逢鸣佩，何筵不翠翘。蛮童骑象舞，江市卖鲛绡。
南诏知非敌，西山亦屡骄。勿贪佳丽地，不为圣明朝。
少减东城饮，时看北斗杓。莫因乖别久，遂逐岁寒凋。
盛幕开高宴，将军问故僚。为言公玉季，早日弃渔樵。

卷 541_80 【李肱所遗画松诗书两纸得四十韵】

李商隐

万草已凉露，开图披古松。青山遍沧海，此树生何峰。
孤根邈无倚，直立撑鸿濛。端如君子身，挺若壮士胸。
樛枝势夭矫，忽欲蟠空。又如惊螭走，默与奔云逢。
孙枝擢细叶，旖旎狐裘茸。邹颠蓍发软，丽姬眉黛浓。
视久眩目睛，倏忽变辉容。竦削正稠直，婀娜旋敷峰。
又如洞房冷，翠被张穹笼。亦若暨罗女，平旦妆颜容。
细疑袭气母，猛若争神功。燕雀固寂寂，雾露常冲冲。
香兰愧伤暮，碧竹惭空中。可集呈瑞凤，堪藏行雨龙。
淮山桂偃蹇，蜀郡桑重童。枝条亮眇脆，灵气何由同。
昔闻咸阳帝，近说稽山侬。或著仙人号，或以大夫封。
终南与清都，烟雨遥相通。安知夜夜意，不起西南风。
美人昔清兴，重之犹月钟。宝笏十八九，香缙千万重。
一旦鬼瞰室，稠叠张羸罇。赤羽中要害，是非皆匆匆。
生如碧海月，死践霜郊蓬。平生握中玩，散失随奴童。
我闻照妖镜，及与神剑锋。寓身会有地，不为凡物蒙。
伊人秉兹图，顾眄择所从。而我何为者，开颜捧灵踪。

报以漆鸣琴，悬之真珠栊。是时方暑夏，座内若严冬。
忆昔谢四骑，学仙玉阳东。千株尽若此，路入琼瑶宫。
口咏玄云歌，手把金芙蓉。浓蕖深霓袖，色映琅玕中。
悲哉堕世网，去之若遗弓。形魄天坛上，海日高瞳瞳。
终骑紫鸾归，持寄扶桑翁。

卷 541_81 【戏题枢言草阁三十二韵】

李商隐

君家在河北，我家在山西。百岁本无业，阴阴仙李枝。
尚书文与武，战罢幕府开。君从渭南至，我自仙游来。
平昔苦南北，动成云雨乖。逮今两携手，对若床下鞋。
夜归碣石馆，朝上黄金台。我有苦寒调，君抱阳春才。
年颜各少壮，发绿齿尚齐。我虽不能饮，君时醉如泥。
政静筹画简，退食多相携。扫掠走马路，整顿射雉翳。
春风二三月，柳密莺正啼。清河在门外，上与浮云齐。
欹冠调玉琴，弹作松风哀。又弹明君怨，一去怨不回。
感激坐者泣，起视雁行低。翻忧龙山雪，却杂胡沙飞。
仲容铜琵琶，项直声凄凄。上贴金捍拨，画为承露鸡。
君时卧振触，劝客白玉杯。苦云年光疾，不饮将安归。
我赏此言是，因循未能谐。君言中圣人，坐卧莫我违。
榆荚乱不整，杨花飞相随。上有白日照，下有东风吹。
青楼有美人，颜色如玫瑰。歌声入青云，所痛无良媒。
少年苦不久，顾慕良难哉。徒令真珠胝，裹入珊瑚腮。
君今且少安，听我苦吟诗。古诗何人作，老大徒伤悲。

卷 541_82 【偶成转韵七十二句赠四同舍】

李商隐

沛国东风吹大泽，蒲青柳碧春一色。我来不见隆准人，
沥酒空余庙中客。征东同舍鸳与鸾，酒酣劝我悬征鞍。
蓝山宝肆不可入，玉中仍是青琅玕。武威将军使中侠，
少年箭道惊杨叶。战功高后数文章，怜我秋斋梦蝴蝶。
诘旦九门传奏章，高车大马来煌煌。路逢邹枚不暇揖，
腊月大雪过大梁。忆昔公为会昌宰，我时入谒虚怀待。
众中赏我赋高唐，回看屈宋由年辈。公事武皇为铁冠，
历厅请我相所难。我时憔悴在书阁，卧枕芸香春夜阑。
明年赴辟下昭桂，东郊恸哭辞兄弟。韩公堆上跋马时，
回望秦川树如荠。依稀南指阳台云，鲤鱼食钩猿失群。
湘妃庙下已春尽，虞帝城前初日曛。谢游桥上澄江馆，
下望山城如一弹。鹧鸪声苦晓惊眠，朱槿花娇晚相伴。
顷之失职辞南风，破帆坏桨荆江中。斩蛟断璧不无意，
平生自许非匆匆。归来寂寞灵台下，著破蓝衫出无马。
天官补吏府中趋，玉骨瘦来无一把。手封狴牢屯制囚，
直厅印锁黄昏愁。平明赤帖使修表，上贺嫖姚收贼州。
旧山万仞青霞外，望见扶桑出东海。爱君忧国去未能，
白道青松了然在。此时闻有燕昭台，挺身东望心眼开。
且吟王粲从军乐，不赋渊明归去来。彭门十万皆雄勇，
首戴公恩若山重。廷评日下握灵蛇，书记眠时吞彩凤。
之子夫君郑与裴，何甥谢舅当世才。青袍白简风流极，
碧沼红莲倾倒开。我生粗疏不足数，梁父哀吟鸛鹄舞。

横行阔视倚公怜，狂来笔力如牛弩。借酒祝公千万年，
吾徒礼分常周旋。收旗卧鼓相天子，相门出相光青史。

卷 541_83 【五言述德抒情诗一首四十韵，献上杜七兄仆射相公】

李商隐

帝作黄金阙，仙开白玉京。有人扶太极，惟岳降元精。
耿贾官勋大，荀陈地望清。旂常悬祖德，甲令著嘉声。
经出宣尼壁，书留晏子楹。武乡传阵法，践土主文盟。
自昔流王泽，由来仗国桢。九河分合沓，一柱忽峥嵘。
得主劳三顾，惊人肯再鸣。碧虚天共转，黄道日同行。
后饮曹参酒，先和傅说羹。即时贤路辟，此夜泰阶平。
愿保无疆福，将图不朽名。率身期济世，叩额虑兴兵。
感念殽尸露，咨嗟赵卒坑。傥令安隐忍，何以赞贞明。
恶草虽当路，寒松实挺生。人言真可畏，公意本无争。
故事留台阁，前驱且旆旌。芙蓉王俭府，杨柳亚夫营。
清啸频疏俗，高谈屡析醒。过庭多令子，乞墅有名甥。
南诏应闻命，西山莫敢惊。寄辞收的博，端坐扫欃枪。
雅宴初无倦，长歌底有情。槛危春水暖，楼迥雪峰晴。
移席牵缃蔓，回桡扑绛英。谁知杜武库，只见谢宣城。
有客趋高义，于今滞下卿。登门惭后至，置驿恐虚迎。
自是依刘表，安能比老彭。雕龙心已切，画虎意何成。
岂有曾黔突，徒劳不倚衡。乘时乖巧宦，占象合艰贞。
废忘淹中学，迟回谷口耕。悼伤潘岳重，树立马迁轻。

陇鸟悲丹觜，湘兰怨紫茎。归期过旧岁，旅梦绕残更。
弱植叨华族，衰门倚外兄。欲陈劳者曲，未唱泪先横。

卷 541_84 【今月二日不自量度辄以诗一首四十韵干渎尊严，
伏蒙仁恩俯赐，披览奖逾，其实情溢于辞，顾惟疏芜，曷用
酬戴，辄复五言四十韵诗献上，亦诗人咏叹不足之义也】

李商隐

家擅无双誉，朝居第一功。四时当首夏，八节应条风。
涤濯临清济，巉岩倚碧嵩。鲍壶冰皎洁，王佩玉丁东。
处剧张京兆，通经戴侍中。将星临迥夜，卿月丽层穹。
下令销秦盗，高谈破宋聋。含霜太山竹，拂雾峯阳桐。
乐道乾知退，当官蹇匪躬。服箱青海马，入兆渭川熊。
固是符真宰，徒劳让化工。凤池春潋艳，鸡树晓曈曨。
愿守三章约，还期九译通。薰琴调大舜，宝瑟和神农。
慷慨资元老，周旋值狡童。仲尼羞问阵，魏绛喜和戎。
款款将除蠹，孜孜欲达聪。所求因渭浊，安肯与雷同。
物议将调鼎，君恩忽赐弓。开吴相上下，全蜀占西东。
锐卒鱼悬饵，豪胥鸟在笼。疲民呼杜母，邻国仰羊公。
置驿推东道，安禅合北宗。嘉宾增重价，上士悟真空。
扇举遮王导，樽开见孔融。烟飞愁舞罢，尘定惜歌终。
岸柳兼池绿，园花映烛红。未曾周顗醉，转觉季心恭。
系滞喧人望，便蕃属圣衷。天书何日降，庭燎几时烘。
早岁乖投刺，今晨幸发蒙。远途哀跛鳖，薄艺奖雕虫。
故事曾尊隗，前修有荐雄。终须烦刻画，聊拟更磨礲。

蛩岭晴留雪，巴江晚带枫。营巢怜越燕，裂帛待燕鸿。
自苦诚先槩，长飘不后蓬。容华虽少健，思绪即悲翁。
感激淮山馆，优游碣石宫。待公三入相，丕祚始无穷。

卷 541_85 【骄儿诗】

李商隐

衮师我骄儿，美秀乃无匹。文葆未周晬，固已知六七。
四岁知名姓，眼不视梨栗。交朋颇窥观，谓是丹穴物。
前朝尚器貌，流品方第一。不然神仙姿，不尔燕鹤骨。
安得此相谓，欲慰衰朽质。青春妍和月，朋戏浑甥侄。
绕堂复穿林，沸若金鼎溢。门有长者来，造次请先出。
客前问所须，含意下吐实。归来学客面，闇败乘爷笏。
或谑张飞胡，或笑邓艾吃。豪鹰毛削劣，猛马气估僂。
截得青筴笋，骑走恣唐突。忽复学参军，按声唤苍鹘。
又复纱灯旁，稽首礼夜佛。仰鞭冒蛛网，俯首饮花蜜。
欲争蛱蝶轻，未谢柳絮疾。阶前逢阿姊，六甲颇输失。
凝走弄香奁，拔脱金屈戌。抱持多反侧，威怒不可律。
曲躬牵窗网，伧唾拭琴漆。有时看临书，挺立不动膝。
古锦请裁衣，玉轴亦欲乞。请爷书春胜，春胜宜春日。
芭蕉斜卷笺，辛夷低过笔。爷昔好读书，愚苦自著述。
憔悴欲四十，无肉畏蚤虱。儿慎勿学爷，读书求甲乙。
穰苴司马法，张良黄石术。便为帝王师，不假更纤悉。
况今西与北，羌戎正狂悖。诛赦两未成，将养如痼疾。
儿当速成大，探雏入虎穴。当为万户侯，勿守一经帙。

卷 541_86 【行次西郊作一百韵】

李商隐

蛇年建午月，我自梁还秦。南下大散关，北济渭之滨。
草木半舒坼，不类冰雪晨。又若夏苦热，焦卷无芳津。
高田长檟枥，下田长荆榛。农具弃道旁，饥牛死空墩。
依依过村落，十室无一存。存者皆面啼，无衣可迎宾。
始若畏人问，及门还具陈。右辅田畴薄，斯民常苦贫。
伊昔称乐土，所赖牧伯仁。官清若冰玉，吏善如六亲。
生儿不远征，生女事四邻。浊酒盈瓦缶，烂谷堆荆囷。
健儿庇旁妇，衰翁舐童孙。况自贞观后，命官多儒臣。
例以贤牧伯，徵入司陶钧。降及开元中，奸邪挠经纶。
晋公忌此事，多录边将勋。因令猛毅辈，杂牧升平民。
中原遂多故，除授非至尊。或出幸臣辈，或由帝戚恩。
中原因屠解，奴隶厌肥豚。皇子弃不乳，椒房抱羌浑。
重赐竭中国，强兵临北边。控弦二十万，长臂皆如猿。
皇都三千里，来往同雕鹗。五里一换马，十里一开筵。
指顾动白日，暖热回苍旻。公卿辱嘲叱，唾弃如粪丸。
大朝会万方，天子正临轩。采旂转初旭，玉座当祥烟。
金障既特设，珠帘亦高褰。捋须蹇不顾，坐在御榻前。
忤者死艰屣，附之升顶颠。华侈矜递衒，豪俊相并吞。
因失生惠养，渐见征求频。奚寇西北来，挥霍如天翻。
是时正忘战，重兵多在边。列城绕长河，平明插旗幡。
但闻虏骑入，不见汉兵屯。大妇抱儿哭，小妇攀车轡。
生小太平年，不识夜闭门。少壮尽点行，疲老守空村。

生分作死誓，挥泪连秋云。廷臣例瘴怯，诸将如羸奔。
为贼扫上阳，捉人送潼关。玉辇望南斗，未知何日旋。
诚知开辟久，遘此云雷屯。送者问鼎大，存者要高官。
抢攘互间谍，孰辨枭与鸾。千马无返辔，万车无还辕。
城空鼠雀死，人去豺狼喧。南资竭吴越，西费失河源。
因今左藏库，摧毁惟空垣。如人当一身，有左无右边。
筋体半痿痺，肘腋生臊膻。列圣蒙此耻，含怀不能宣。
谋臣拱手立，相戒无敢先。万国困杼轴，内库无金钱。
健儿立霜雪，腹歉衣裳单。馈饷多过时，高估铜与铅。
山东望河北，爨烟犹相联。朝廷不暇给，辛苦无半年。
行人推行资，居者税屋椽。中间遂作梗，狼藉用戈鋌。
临门送节制，以锡通天班。破者以族灭，存者尚迁延。
礼数异君父，羁縻如羌零。直求输赤诚，所望大体全。
巍巍政事堂，宰相厌八珍。敢问下执事，今谁掌其权。
疮疽几十载，不敢扶其根。国蹙赋更重，人稀役弥繁。
近年牛医儿，城社更扳援。盲目把大旆，处此京西藩。
乐祸忘怨敌，树党多狂狷。生为人所憐，死非人所怜。
快刀断其头，列若猪牛悬。凤翔三百里，兵马如黄巾。
夜半军牒来，屯兵万五千。乡里骇供亿，老少相扳牵。
儿孙生未孩，弃之无惨颜。不复议所适，但欲死山间。
尔来又三岁，甘泽不及春。盗贼亭午起，问谁多穷民。
节使杀亭吏，捕之恐无因。咫尺不相见，旱久多黄尘。
官健腰佩弓，自言为官巡。常恐值荒迥，此辈还射人。
愧客问本末，愿客无因循。郿坞抵陈仓，此地忌黄昏。
我听此言罢，冤愤如相焚。昔闻举一会，群盗为之奔。
又闻理与乱，在人不在天。我愿为此事，君前剖心肝。
叩头出鲜血，滂沱污紫宸。九重黯已隔，涕泗空沾唇。

使典作尚书，厮养为将军。慎勿道此言，此言未忍闻。

卷 541_87【井泥四十韵】

李商隐

皇都依仁里，西北有高斋。昨日主人氏，治井堂西陲。
工人三五辈，辇出土与泥。到水不数尺，积共庭树齐。
他日井甃毕，用土益作堤。曲随林掩映，缭以池周回。
下去冥冥穴，上承雨露滋。寄辞别地脉，因言谢泉扉。
升腾不自意，畴昔忽已乖。伊余掉行鞅，行行来自西。
一日下马到，此时芳草萋。四面多好树，旦暮云霞姿。
晚落花满地，幽鸟鸣何枝。萝幄既已荐，山樽亦可开。
待得孤月上，如与佳人来。因兹感物理，惻怆平生怀。
茫茫此群品，不定轮与蹄。喜得舜可禅，不以瞽瞍疑。
禹竟代舜立，其父吁咈哉。嬴氏并六合，所来因不韦。
汉祖把左契，自言一布衣。当涂佩国玺，本乃黄门携。
长戟乱中原，何妨起戎氐。不独帝王耳，臣下亦如斯。
伊尹佐兴王，不藉汉父资。磻溪老钓叟，坐为周之师。
屠狗与贩缯，突起定倾危。长沙后封土，岂是出程姬。
帝问主人翁，有自卖珠儿。武昌昔男子，老苦为人妻。
蜀王有遗魄，今在林中啼。淮南鸡舂药，翻向云中飞。
大钧运群有，难以一理推。顾于冥冥内，为问秉耒者谁。
我恐更万世，此事愈云为。猛虎与双翅，更以角副之。
凤凰不五色，联翼上鸡栖。我欲秉钓者，竭来与我偕。
浮云不相顾，寥泝谁为梯。悵怏夜将半，但歌井中泥。

卷 541_88 【夜思】

李商隐

银箭耿寒漏，金缸凝夜光。彩鸾空自舞，别燕不相将。
寄恨一尺素，含情双玉瑯。会前犹月在，去后始宵长。
往事经春物，前期托报章。永令虚粲枕，长不掩兰房。
觉动迎猜影，疑来浪认香。鹤应闻露警，蜂亦为花忙。
古有阳台梦，今多下蔡倡。何为薄冰雪，消瘦滞非乡。

卷 541_89 【思贤顿】

李商隐

内殿张弦管，中原绝鼓鼙。舞成青海马，斗杀汝南鸡。
不见华胥梦，空闻下蔡迷。宸襟他日泪，薄暮望贤西。

卷 541_90 【无题】

李商隐

万里风波一叶舟，忆归初罢更夷犹。碧江地没元相引，
黄鹤沙边亦少留。益德冤魂终报主，阿童高义镇横秋。
人生岂得长无谓，怀古思乡共白头。

卷 541_91 【有怀在蒙飞卿】

李商隐

薄宦频移疾，当年久索居。哀同庾开府，瘦极沈尚书。
城绿新阴远，江清返照虚。所思惟翰墨，从古待双鱼。

卷 541_92 【春深脱衣】

李商隐

睥睨江鸦集，堂皇海燕过。减衣怜蕙若，展帐动烟波。
日烈忧花甚，风长奈柳何。陈遵容易学，身世醉时多。

卷 541_93 【怀求古翁】

李商隐

何时粉署仙，傲兀逐戎旃。关塞犹传箭，江湖莫系船。
欲收棋子醉，竟把钓车眠。谢朓真堪忆，多才不忌前。

卷 541_94 【五月六日夜忆往岁秋与彻师同宿】

李商隐

紫阁相逢处，丹岩议宿时。堕蝉翻败叶，栖鸟定寒枝。
万里飘流远，三年问讯迟。炎方忆初地，频梦碧琉璃。

卷 541_95 【城上】

李商隐

有客虚投笔，无憀独上城。沙禽失侣远，江树著阴轻。
边遽稽天讨，军须竭地征。贾生游刃极，作赋又论兵。

卷 541_96 【如有】

李商隐

如有瑶台客，相难复索归。芭蕉开绿扇，菡萏荐红衣。
浦外传光远，烟中结响微。良宵一寸焰，回首是重帏。

卷 541_97 【朱槿花二首】

李商隐

莲后红何患，梅先白莫夸。才飞建章火，又落赤城霞。
不卷锦步障，未登油壁车。日西相对罢，休浣向天涯。

勇多侵路去，恨有碍灯还。嗅自微微白，看成沓沓殷。
坐疑忘物外，归去有帘间。君问伤春句，千辞不可删。

卷 541_98 【寓怀】

李商隐

彩鸾餐颢气，威凤入卿云。长养三清境，追随五帝君。
烟波遗汲汲，矰缴任云云。下界围黄道，前程合紫氛。
金书惟是见，玉管不胜闻。草为回生种，香缘却死熏。
海明三岛见，天迥九江分。攀树无劳援，神禾岂用耘。
斗龙风结阵，恼鹤露成文。汉岭霜何早，秦宫日易曛。
星机抛密绪，月杵散灵氛。阳鸟西南下，相思不及群。

卷 541_99 【木兰】

李商隐

二月二十二，木兰开坼初。初当新病酒，复自久离居。

愁绝更倾国，惊新闻远书。紫丝何日障，油壁几时车。
弄粉知伤重，调红或有余。波痕空映袜，烟态不胜裾。
桂岭含芳远，莲塘属意疏。瑶姬与神女，长短定何如。

卷 541_100 【细雨成咏献尚书河东公】

李商隐

洒砌听来响，卷帘看已迷。江间风暂定，云外日应西。
稍稍落蝶粉，班班融燕泥。飏萍初过沼，重柳更缘堤。
必拟和残漏，宁无晦暝颰。半将花漠漠，全共草萋萋。
猿别方长啸，乌惊始独栖。府公能八咏，聊且续新题。

卷 541_101 【病中闻河东公乐营置酒口占寄上】

李商隐

闻驻行春旆，中途赏物华。缘忧武昌柳，遂忆洛阳花。
嵇鹤元无对，荀龙不在夸。只将沧海月，长压赤城霞。
兴欲倾燕馆，欢终到习家。风长应侧帽，路隘岂容车。
楼迴波窥锦，窗虚日弄纱。锁门金了鸟，展障玉鸦叉。
舞妙从兼楚，歌能莫杂巴。必投潘岳果，谁掺柎衡挝。
刻烛当时忝，传杯此夕赊。可怜漳浦卧，愁绪独如麻。

卷 541_102 【回中牡丹为雨所败二首】

李商隐

下苑他年未可追，西州今日忽相期。水亭暮雨寒犹在，
罗荐春香暖不知。舞蝶殷勤收落蕊，佳人惆怅卧遥帷。
章台街里芳菲伴，且问宫腰损几枝。

浪笑榴花不及春，先期零落更愁人。玉盘迸泪伤心数，
锦瑟惊弦破梦频。万里重阴非旧圃，一年生意属流尘。
前溪舞罢君回顾，并觉今朝粉态新。

卷 541_103 【拟意】

李商隐

怅望逢张女，迟回送阿侯。空看小垂手，忍问大刀头。
妙选茱萸帐，平居翡翠楼。云屏不取暖，月扇未遮羞。
上掌真何有，倾城岂自由。楚妃交荐枕，汉后共藏阄。
夫向羊车觅，男从凤穴求。书成祓禊帖，唱杀畔牢愁。
夜杵鸣江练，春刀解若榴。象床穿幃网，犀帖钉窗油。
仁寿遗明镜，陈仓拂彩球。真防舞如意，佯盖卧箜篌。
濯锦桃花水，溅裙杜若洲。鱼儿悬宝剑，燕子合金瓯。
银箭催摇落，华筵惨去留。几时销薄怒，从此抱离忧。
帆落啼猿峡，樽开画鹢舟。急弦肠对断，翦蜡泪争流。

璧马谁能带，金虫不复收。银河扑醉眼，珠串咽歌喉。
去梦随川后，来风贮石邮。兰丛衔露重，榆荚点星稠。
解佩无遗迹，凌波有旧游。曾来十九首，私谥咏牵牛。

卷 541_104 【谢往桂林至彤庭窃咏】

李商隐

辰象森罗正，句陈翊卫宽。鱼龙排百戏，剑佩俨千官。
城禁将开晚，宫深欲曙难。月轮移杵诣，仙路下栏干。
共贺高禡应，将陈寿酒欢。金星压芒角，银汉转波澜。
王母来空阔，羲和上屈盘。凤凰传诏旨，獬廌冠朝端。
造化中台座，威风上将坛。甘泉犹望幸，早晚冠呼韩。

卷 541_105 【烧香曲】

李商隐

钿云蟠蟠牙比鱼，孔雀翘尾蛟龙须。漳宫旧样博山炉，
楚娇捧笑开芙蕖。八蚕茧绵小分炷，兽焰微红隔云母。
白天月泽寒未冰，金虎含秋向东吐。玉佩呵光铜照昏，
帘波日暮冲斜门。西来欲上茂陵树，柏梁已失栽桃魂。
露庭月井大红气，轻衫薄细当君意。蜀殿琼人伴夜深，
金銮不问残灯事。何当巧吹君怀度，襟灰为土填清露。

卷 541_106 【送从翁东川弘农尚书幕】

李商隐

昔帝回冲眷，维皇恻上仁。三灵迷赤气，万汇叫苍旻。
刊木方隆禹，陟阼始创殷。夏台曾圯闭，汜水敢逡巡。
拯溺休规步，防虞要徙薪。蒸黎今得请，宇宙昨还淳。
纘祖功宜急，贻孙计甚勤。降灾虽代有，稔恶不无因。
宫掖方为蛊，边隅忽遘迍。献书秦逐客，间谍汉名臣。
北伐将谁使，南征决此辰。中原重板荡，玄象失钩陈。
诘旦违清道，衔枚别紫宸。兹行殊厌胜，故老遂分新。
去异封于巩，来宁避处幽。永嘉几失坠，宣政遽酸辛。
元子当传后，皇孙合授询。时非三揖让，表请再陶钧。
旧好盟还在，中枢策屡遵。苍黄传国玺，违远属车尘。
雏虎如凭怒，獫龙性漫驯。封崇自何等，流落乃斯民。
逗挠官军乱，优容败将频。早朝披草莽，夜缒达丝纶。
忘战追不及，长驱气益振。妇言终未易，庙算况非神。
日驭难淹蜀，星旄要定秦。人心诚未去，天道亦无亲。
锦水湔云浪，黄山扫地春。斯文虚梦鸟，吾道欲悲麟。
断续殊乡泪，存亡满席珍。魂销季羔寤，衣化子张绅。
建议庸何所，通班昔滥臻。浮生见开泰，独得咏汀蘋。

卷 541_107 【晋昌晚归马上赠】

李商隐

西北朝天路，登临思上才。城闲烟草遍，村暗雨云回。
人岂无端别，猿应有意哀。征南予更远，吟断望乡台。

卷 541_108 【哭虔州杨侍郎】

李商隐

汉网疏仍漏，齐民困未苏。如何大丞相，翻作弛刑徒。
中宪方外易，尹京终就拘。本矜能弭谤，先议取非辜。
巧有凝脂密，功无一柱扶。深知狱吏贵，几迫季冬诛。
叫帝青天阔，辞家白日晡。流亡诚不吊，神理若为诬。
在昔恩知忝，诸生礼秩殊。入韩非剑客，过赵受钳奴。
楚水招魂远，邙山卜宅孤。甘心亲垤蚁，旋踵戮城狐。
阴鹭今如此，天灾未可无。莫凭牲玉请，便望救焦枯。

卷 541_109 【寄太原卢司空三十韵】

李商隐

隋舰临淮甸，唐旗出井陉。断鳌支四柱，卓马济三灵。

祖业隆盘古，孙谋复大庭。从来师俊杰，可以焕丹青。
旧族开东岳，雄图奋北溟。邪同獬廌触，乐伴凤凰听。
酣战仍挥日，降妖亦斗霆。将军功不伐，叔舅德惟馨。
鸡塞谁生事，狼烟不暂停。拟填沧海鸟，敢竞太阳萤。
内草才传诏，前茅已勒铭。那劳出师表，尽入大荒经。
德水萦长带，阴山绕画屏。只忧非紧肯，未觉有膻腥。
保佐资冲漠，扶持在杳冥。乃心防暗室，华发称明廷。
按甲神初静，挥戈思欲醒。羲之当妙选，孝若近归宁。
月色来侵幌，诗成有转櫜。罗含黄菊宅，柳恽白蘋汀。
神物龟酬孔，仙才鹤姓丁。西山童子药，南极老人星。
自顷徒窥管，于今愧挈瓶。何由叨末席，还得叩玄扃。
庄叟虚悲雁，终童漫识鼙。幕中虽策画，剑外且伶俜。
侯侯行忘止，鰓鰓卧不瞑。身应瘠于鲁，泪欲溢为荥。
禹贡思金鼎，尧图忆土钁。公乎来入相，王欲驾云亭。

卷 541_110 【安平公诗】

李商隐

丈人博陵王名家，怜我总角称才华。华州留语晓至暮，
高声喝吏放两衙。明朝骑马出城外，送我习业南山阿。
仲子延岳年十六，面如白玉欹乌纱。其弟炳章犹两髻，
瑶林琼树含奇花。陈留阮家诸侄秀，迺迺出拜何骅罗。
府中从事杜与李，麟角虎翅相过摩。清词孤韵有歌响，
击触钟磬鸣环珂。三月石堤冻销释，东风开花满阳坡。
时禽得伴戏新木，其声尖咽如鸣梭。公时载酒领从事，

踊跃鞍马来相过。仰看楼殿撮清汉，坐视世界如恒沙。
面热脚掉互登陟，青云表柱白云崖。一百八句在贝叶，
三十三天长雨花。长者子来辄献盖，辟支佛去空留靴。
公时受诏镇东鲁，遣我草诏随车牙。顾我下笔即千字，
疑我读书倾五车。呜呼大贤苦不寿，时世方士无灵砂。
五月至止六月病，遽颓泰山惊逝波。明年徒步吊京国，
宅破子毁哀如何。西风冲户卷素帟，隙光斜照旧燕窠。
古人常叹知己少，况我沦贱艰虞多。如公之德世一二，
岂得无泪如黄河。沥胆咒愿天有眼，君子之泽方滂沱。

卷 541_111 【赤壁】

李商隐

折戟沈沙铁未销，自将磨洗认前朝。
东风不与周郎便，铜雀春深锁二乔。

卷 541_112 【垂柳】

李商隐

垂柳碧鬋茸，楼昏雨带容。思量成夜梦，束久废春慵。
梳洗凭张敞，乘骑笑稚恭。碧虚随转笠，红烛近高舂。
怨目明秋水，愁眉淡远峰。小阑花尽蝶，静院醉醒蛩。
旧作琴台凤，今为药店龙。宝奁抛掷久，一任景阳钟。

卷 541_113 【清夜怨】

李商隐

含泪坐春宵，闻君欲度辽。绿池荷叶嫩，红砌杏花娇。
曙月当窗满，征云出塞遥。画楼终日闭，清管为谁调。

卷 541_114 【定子】

李商隐

檀槽一抹广陵春，定子初开睡脸新。
却笑吃虚隋炀帝，破家亡国为何人。

卷 541_115 【木兰花】

李商隐

洞庭波冷晓侵云，日日征帆送远人。
几度木兰舟上望，不知元是此花身。

卷 541_116 【游灵伽寺】

李商隐

碧烟秋寺泛湖来，水打城根古堞摧。
尽日伤心人不见，石榴花满旧琴台。

卷 541_117 【龙丘途中】

李商隐

汉苑残花别，吴江盛夏来。惟看万树谷，不见一枝开。
水色饶湘浦，滩声怯建溪。泪流回月上，可得更猿啼。

卷 541_118 【句】

李商隐

兰膏熬处心犹浅，银烛烧残焰不馨。好向书生窗畔种，
免教辛苦更囊萤。
遥想故园陌，桃李正酣酣。

· 全唐诗 ·

头上金雀钗，腰珮翠琅玕。

芦洲客雁报春来。 .

第五百四十二卷

卷 542_1 【送友人归宜春】

纪唐夫

落花兼柳絮，无处不纷纷。远道空归去，流莺独自闻。
墅桥喧碓水，山郭入楼云。故里南陔曲，秋期欲送君。

卷 542_2 【骢马曲】

纪唐夫

连钱出塞蹋沙蓬，岂比当时御史骢。逐北自谙深磧路，
连嘶谁念静边功。登山每与青云合，弄影应知碧草同。
今日虏平将换妾，不如罗袖舞春风。

卷 542_3 【送温庭筠尉方城】

纪唐夫

何事明时泣玉频，长安不见杏园春。凤凰诏下虽沾命，

鸚鵡才高却累身。且尽绿醺销积恨，莫辞黄绶拂行尘。
方城若比长沙路，犹隔千山与万津。

卷 542_4 【及第后宿平康里】

裴思谦

银缸斜背解鸣珰，小语偷声贺玉郎。
从此不知兰麝贵，夜来新染桂枝香。

卷 542_5 【都堂试贡士日庆春雪】

李衢

锡瑞来丰岁，旌贤入贡辰。轻摇梅共笑，飞袅柳知春。
绕砌封琼屑，依阶喷玉尘。蜉蝣吟更古，科斗映还新。
鹤毳迷难辨，冰壶鉴易真。因歌大君德，率舞咏陶钧。

卷 542_6 【都堂试贡士日庆春雪】

李损之

春雪昼悠扬，飘飞试士场。缀毫疑起草，沾字共成章。
匝地如铺练，凝阶似截肪。鹅毛萦树合，柳絮带风狂。

息疫方殊庆，丰年已报祥。应知郢上曲，高唱出东堂。

卷 542_7 【除夜长安作】

李景

长安朔风起，穷巷掩双扉。新岁明朝是，故乡何路归。
鬓丝饶镜色，隙雪夺灯辉。却羡秦州雁，逢春尽北飞。

卷 542_8 【都堂试贡士日庆春雪】

李景

密雪分天路，群才坐粉廊。霭空迷昼景，临宇借寒光。
似暖花消地，无声玉满堂。洒池偏误曲，留砚忽因方。
几处曹风比，何人谢赋长。春晖早相照，莫滞九衢芳。

卷 542_9 【登景云寺阁】

张元宗

胡马饮河洛，我家从此迁。今来独垂泪，三十六峰前。

卷 542_10 【望终南山】

张元宗

红尘白日长安路，马足车轮不暂闲。
唯有茂陵多病客，每来高处望南山。

卷 542_11 【省试霓裳羽衣曲】

李肱

开元太平时，万国贺丰岁。梨园献旧曲，玉座流新制。
凤管递参差，霞衣竞摇曳。宴罢水殿空，辇余春草细。
蓬壶事已久，仙乐功无替。讵肯听遗音，圣明知善继。

卷 542_12 【句】

李肱

水光先见月，露气早知秋。

卷 542_13 【永州送侄归宜春】

郑史

宋玉正秋悲，那堪更别离。从来襟上泪，尽作鬓边丝。
永水清如此，袁江色可知。到家黄菊坼，亦莫怪归迟。

卷 542_14 【秋日零陵与幕下诸宾游河夜饮】

郑史

湘月蘋风乍畅襟，烛前江水练千寻。新秋宋玉能为赋，
永夕袁安好共吟。辇下翠蛾须强展，尊中绿蚁且徐斟。
汀沙渐有珠凝露，缓棹兰桡任夜深。

卷 542_15 【赠妓行云诗】

郑史

最爱铅华薄薄妆，更兼衣著又鹅黄。
从来南国名佳丽，何事今朝在北行。

卷 542_16 【纪梦】

许瀍

晚入瑶台露气清，天风飞下步虚声。
尘心未尽俗缘在，十里下山空月明。

卷 542_17 【题朝阳岩】

牛丛

蹑石攀萝路不迷，晓天风好浪花低。
洞名独占朝阳号，应有梧桐待凤栖。

卷 542_18 【咸阳有怀】

陈上美

山连河水碧氛氲，瑞气东移拥圣君。秦苑有花空笑日，
汉陵无主自侵云。古槐堤上莺千啭，远渚沙中鹭一群。
赖与渊明同把菊，烟郊西望夕阳曛。

卷 542_19 【晴望九华山】

杨鸿

九华闲望簇清虚，气象群峰尽不如。
惆怅都南挂冠吏，无人解向此山居。

卷 542_20 【正月】

赵璜

正月今朝半，阳台信未回。水芹寒不食，山杏雨应开。
世网留三宿，真源寄一杯。因声谢猿鸟，岁晏会归来。

卷 542_21 【七夕诗】

赵璜

乌鹊桥头双扇开，年年一度过河来。莫嫌天上稀相见，
犹胜人间去不回。欲减烟花饶俗世，暂烦云月掩楼台。
别时旧路长清浅，岂肯离情似死灰。

卷 542_22 【曲江上巳】

赵璜

长堤十里转香车，两岸烟花锦不如。
欲问神仙在何处，紫云楼阁向空虚。

卷 542_23 【题七夕图】

赵璜

帝子吹箫上翠微，秋风一曲凤凰归。
明年七月重相见，依旧高悬织女机。

卷 542_24 【登明成堡】

潘咸

来经古城上，极目思无穷。寇尽烟萝外，人归蔓草中。
峰峦当阙古，堞垒对云空。不见昔名将，徒称有战功。

卷 542_25 【送陈明府之任】

潘咸

客见天台县，闾阎树色间。
骖回几临水，带缓独开山。
吏散落花尽，人居远岛闲。
过于老莱子，端简独承颜。

卷 542_26 【长安春暮】

潘咸

客在关西春暮夜，还同江外已清明。
三更独立看花月，惟欠子规啼一声。

卷 542_27 【舟行】

潘咸

平沙极浦无人度，犹系孤舟寒草西。
半夜起看潮上月，万山中有一猿啼。

卷 542_28 【送僧】

潘咸

阙下僧归山顶寺，却看朝日下方明。
莫道野人寻不见，半天云里有钟声。

卷 542_29 【句】

潘咸

栈踏猿声暮，江看剑影秋。
僧老白云上，磬寒高鸟边。
心已同猿狖，不闻人是非。
行人渡流水，白马入前山。
秋深雪满黄金塞，夜夜鸿声入汉阳。

卷 542_30 【秋晚同友人闲步】

薛莹

藉草与行莎，相看日未斜。断崖分鸟道，疏树见人家。

望远临孤石，吟余落片霞。野情看不足，归路思犹赊。

卷 542_31 【宿仙都观阴王二君修道处】

薛莹

十载别仙峰，峰前千古踪。阴王修道处，云雪满高松。
洞口风雷异，池心星汉重。明朝下山去，片月落残钟。

卷 542_32 【宿东岩寺晓起】

薛莹

野寺寒塘晓，游人一梦分。钟残数树月，僧起半岩云。
宿鸟惊初见，幽泉落不闻。吟余凭前槛，红叶下纷纷。

卷 542_33 【秋日湖上】

薛莹

落日五湖游，烟波处处愁。沈浮千古事，谁与问东流。

卷 542_34 【江山闲望】

薛莹

渺渺无穷尽，风涛几日平。年光与人事，东去一声声。

卷 542_35 【访武陵道者不遇】

薛莹

花发鸟仍啼，行行路欲迷。二真无问处，虚度武陵溪。

卷 542_36 【寄旧山隐侣】

薛莹

旧山诸隐沦，身在苦无身。莫锁白云路，白云多误人。

卷 542_37 【羡僧】

薛莹

处世曾无著，生前事尽非。一瓶兼一衲，南北去如归。

卷 542_38 【锦】

薛莹

轧轧弄寒机，功多力渐微。惟忧机上锦，不称舞人衣。

卷 542_39 【中秋月】

薛莹

三十六旬盈复缺，百年堪喜又堪伤。
劝君莫惜登楼望，云放婵娟不久长。

卷 542_40 【句】

薛莹

单棹横疏雨，江滩秋泊时。

花留身住越，月递梦还秦。

卷 542_41 【赠毛仙翁】

崔元略

莫将凡圣比云泥，椿菌之年本不齐。度世无劳大稻米，
升天只用半刀圭。人间嗟对黄昏槿，海上闲听碧落鸡。
旌节行中令引道，便从尘外踏丹梯。

卷 542_42 【太学创置石经】

冯涯

圣唐复古制，德义功无替。奥旨悦诗书，遗文分篆隶。
银钩互交映，石壁靡尘翳。永与乾坤期，不逐日月逝。
儒林道益广，学者心弥锐。从此理化成，恩光遍遐裔。 .

第五百四十三卷

卷 543_1 【赠李商隐】

喻鳧

羽翼恣抟扶，山河使笔驱。月疏吟夜桂，龙失咏春珠。
草细盘金勒，花繁倒玉壶。徒嗟好章句，无力致前途。

卷 543_2 【元日即事】

喻鳧

敛板贺交亲，称觞讵有巡。年光悲掷旧，景色喜呈新。
水柳烟中重，山梅雪后真。不知将白发，何以度青春。

卷 543_3 【送贾岛往金州谒姚员外】

喻鳧

山光与水色，独往此中深。溪沥椒花气，岩盘漆叶阴。

潇湘终共去，巫峡羨先寻。几夕江楼月，玄晖伴静吟。

卷 543_4 【送友人罢举归蜀】

喻皀

憔悴满衣尘，风光岂属身。卖琴红粟贵，看镜白髭新。
栈畔谁高步，巴边自问津。凄然莫滴血，杜宇正哀春。

卷 543_5 【送卫尉之延陵】

喻皀

草木正花时，交亲触雨辞。一官之任远，尽室出城迟。
乳滴茅君洞，鸦鸣季子祠。想知佐理暇，日有咏怀诗。

卷 543_6 【送越州高录事】

喻皀

官曹权纪纲，行李半舟航。浦溆潮来广，川源鸟去长。
笋成稽岭岸，莲发镜湖香。泽国还之任，鲈鱼浪得尝。

卷 543_7 【送潘咸】

喻皀

时时赍破囊，访我息闲坊。煮雪问茶味，当风看雁行。
心齐山鹿逸，句敌柳花狂。坚苦今如此，前程岂渺茫。

卷 543_8 【送友人下第归宁】

喻皀

紫阁雪未尽，杏园花亦寒。灞西辞旧友，楚外忆新安。
细雨猿啼榭，微阳鹭起滩。旋应赴秋贡，讵得久承欢。

卷 543_9 【游北山寺】

喻皀

烟冈影畔寺，游步此时孤。庭静众药在，鹤闲双桧枯。
蓝峰露秋院，灞水入春厨。便可栖心迹，如何返旧途。

卷 543_10 【冬日题无可上人院】

喻鳗

入户道心生，茶间踏叶行。泻风瓶水涩，承露鹤巢轻。
阁北长河气，窗东一桧声。诗言与禅味，语默此皆清。

卷 543_11 【游云际寺】

喻鳗

涧壑吼风雷，香门绝顶开。阁寒僧不下，钟定虎常来。
鸟啄林梢果，鼯跳竹里苔。心源无一事，尘界拟休回。

卷 543_12 【题翠微寺】

喻鳗

沿溪又涉巖，始喜入前轩。钟度鸟沈壑，殿扃云湿幡。
凉泉堕众石，古木彻疏猿。月上僧阶近，斯游岂易言。

卷 543_13 【广德官舍二松】

喻崑

杨公休簿领，二木日坚牢。直甚彰吾节，清终庇尔曹。
幽阴月里细，冷树雪中高。谁见干霄后，枝飘白鹤毛。

卷 543_14 【浴马】

喻崑

解控复收鞭，长津动细涟。空蹄沈绿玉，阔臆没连钱。
沫漩桥声下，嘶盘柳影边。常闻禀龙性，固与白波便。

卷 543_15 【和段学士南亭春日对雨】

喻崑

晨飞晚未休，兰阁客吟愁。萧飒柳边挂，萦纤花底流。
声繁乍离籁，洒急不成沍。经夕江湖思，烟波一钓舟。

卷 543_16 【书怀】

喻崱

只是守琴书，僧中独寓居。心唯务鹤静，分合与名疏。
暮雨啼蛩次，凉风落木初。家山太湖渌，归去复何如。

卷 543_17 【一公房】

喻崱

幽深谁掩关，清净自多闲。一雨收众木，孤云生远山。
花萎绿苔上，鸽乳翠楼间。岚霭燃香夕，容听半偈还。

卷 543_18 【晚次临泾】

喻崱

路入犬羊群，城寒雉堞曛。居人只尚武，过客谩投文。
马怯奔浑水，雕沈葬苍云。沙田积蒿艾，竟夕见烧焚。

卷 543_19 【王母祠前写望】

喻凫

云霞千古事，桃李旧花颜。芳信沈青鸟，空祠掩暮山。
香传一座暗，柳匝万家闲。那复伤神所，河昏落日间。

卷 543_20 【游暖泉精舍】

喻凫

坞木殿前空，山河泽国同。鸟闲沙影上，泉落树阴中。
缆舸蒲花水，萦幡柳絮风。邈然方寸地，何事更悲蓬。

卷 543_21 【怀乡】

喻凫

秋风江上家，钓艇泊芦花。断岸绿杨荫，疏篱红槿遮。
鼉鸣积雨窟，鹤步夕阳沙。抱疾僧窗夜，归心过月斜。

卷 543_22 【岫禅师南溪兰若】

喻鳗

锡影配瓶光，孤溪照草堂。水悬青石磴，钟动白云床。
树色含残雨，河流带夕阳。唯应无月夜，瞑目见他方。

卷 543_23 【龙翔寺寄李频】

喻鳗

钟声南北寺，不道往来遥。人事因循过，时光荏苒销。
悬灯洒砌雨，上阁绕云雕。即是洲中柳，嘶蝉急暮条。

卷 543_24 【送武穀之邠宁】

喻鳗

戍路少人踪，边烟淡复浓。诗宁写别恨，酒不上离容。
燕拂沙河柳，鸦高石窟钟。悠然一睎阻，山叠虏云重。

卷 543_25 【夏日题岫禅师房】

喻鳧

朝朝声磬罢，章子扫藤阴。花过少游客，日长无事心。
回山闭院直，落水下桥深。安得开方便，容身老此林。

卷 543_26 【夏日因怀阳羡旧游寄裴书记】

喻鳧

落日太湖西，波涵万象低。藕花熏浦溆，菱蔓匝凫鹭。
树及长桥尽，滩回七里迷。还应坐筹暇，时一梦荆溪。

卷 543_27 【呈薛博士】

喻鳧

辛勤长在学，一室少曾开。时忆暮山寺，独登衰草台。
名期五字立，迹愧九年来。此意今聊写，还希君子哀。

卷 543_28 【即事】

喻崱

抱杖立溪口，迎秋看塞门。连山互苍翠，二水各清浑。
笛发孤烟戍，鸦归夕照村。萋萋芳草色，终是忆王孙。

卷 543_29 【龙翔寺阁夜怀渭南张少府】

喻崱

春城带病别，秋塞见除书。况是神仙吏，仍非尘土居。
河风吹鸟迥，岳雨滴桐疏。坐阁驰思夕，沙东凉月虚。

卷 543_30 【夏日龙翔寺居即事寄崔侍御】

喻崱

古刹一幡斜，吹门水过沙。数声钟里饭，双影树间茶。
落日穷荒雨，微风古堑花。何当戴豸客，复此问生涯。

卷 543_31 【龙翔寺居喜胡权见访因宿】

喻鳦

林栖无异欢，煮茗就花栏。雀啅北冈晓，僧开西阁寒。
冲桥二水急，扣月一钟残。明发还分手，徒悲行路难。

卷 543_32 【宿石窟寺】

喻鳦

一刹古冈南，孤钟撼夕岚。客闲明月阁，僧闭白云庵。
野鹤立枯枿，天龙吟净潭。因知不生理，合自此中探。

卷 543_33 【夏日龙翔寺寄张侍御】

喻鳦

沙西林杪寺，殿倚石棱开。晓月僧汲井，残阳钟殷台。
河冲绿野去，鸟背白云来。日夕唯增思，京关未想回。

卷 543_34 【秋日将归长安留别王尚书】

喻皀

朔漠正秋霖，西风传夕砧。沧洲未归迹，华发受恩心。
露色冈莎冷，蝉声坞木深。清晨鈇钺内，只献白云吟。

卷 543_35 【龙翔寺言怀】

喻皀

眠云喜道存，读易过朝昏。乔木青连郭，长河白泻门。
钟沈残月坞，鸟去夕阳村。搜此成闲句，期逢作者论。

卷 543_36 【龙翔寺居夏日寄献王尚书】

喻皀

那期高旆下，得遇重臣知。泉石容居止，风沙免路岐。
河兼落下望，句入大荒思。无复愁烦暑，回山翠阁危。

卷 543_37 【题弘济寺不出院僧】

喻鳗

楚鞋应此世，只绕砌苔休。色相栽花视，身心坐石修。
声寒通节院，城黑见烽楼。欲取闲云并，闲云有去留。

卷 543_38 【寄刘录事】

喻鳗

城西青岛寺，累夏漱寒泉。今在提纲所，应难扫石眠。
风沙榆塞迥，波浪橘洲偏。重整潇湘棹，心期更几年。

卷 543_39 【酬王檀见寄】

喻鳗

驰心栖杳冥，何物比清冷。夜月照巫峡，秋风吹洞庭。
酬难尘鬓皓，坐久壁灯青。竟晚苍山咏，乔枝有鹤听。

卷 543_40 【寺居秋日对雨有怀】

喻鳧

修修复震震，黄叶此时飞。隐几客吟断，邻房僧话稀。
鸽寒栖树定，萤湿在窗微。即事潇湘渚，渔翁披草衣。

卷 543_41 【答刘录事夜月怀湘西友人见寄】

喻鳧

相逢仍朔漠，相问即波涛。江思苇花折，笛声关月高。
簿书君阅倦，章句我吟劳。竟夕空凭阁，长河滟石壕。

卷 543_42 【上高侍御】

喻鳧

旧隐白云峰，生涯落叶同。关河一栖旅，杨柳十东风。
迹处龙钟内，声居汨没中。酬恩若有地，宁止杀微躬。

卷 543_43 【冬日寄友人】

喻崱

空为梁甫吟，谁竟是知音。风雪坐闲夜，乡园来旧心。
沧江孤棹迥，落日一钟深。君子久忘我，此诚甘自沈。

卷 543_44 【冬夜宿余正字静恭里闲居】

喻崱

每来多便宿，不负白云言。古木朔风动，寒城疏雪翻。
微灯悬刻漏，旧梦返湘沅。先是琴边起，知为阁务繁。

卷 543_45 【得子侄书】

喻崱

远书来阮巷，阙下见江东。不得经史力，枉抛耕稼功。
雁天霞脚雨，渔夜苇条风。无复琴杯兴，开怀向尔同。

卷 543_46 【献知己】

喻崱

亦忝受恩身，当殊投刺新。竟蒙分玉石，终不离埃尘。
大谷非无暖，幽枝自未春。昏昏过朝夕，应念苦吟人。

卷 543_47 【赠张瀆处士】

喻崱

露白覆棋宵，林青读易朝。道高天子问，名重四方招。
许鹤归华顶，期僧过石桥。虽然在京国，心迹自逍遥。

卷 543_48 【早秋寺居酬张侍御六韵见寄】

喻崱

六十上清冥，晓城东越藤。山光紫衣陟，寺影白云凝。
湿叶起寒鸟，深林惊古僧。微风窗静展，细雨阁吟登。
清韵岳磬远，佳音湖水澄。却思前所献，何以豸冠称。

卷 543_49 【和段学士对雪】

喻皀

盈尺知丰稔，开窗对酒壶。飘当大野匝，洒到急流无。
密际西风尽，凝间朔气扶。干摧鸟栖桠，冷射夜残垆。
赞月登斜汉，兼沙搅北湖。惭于郢客坐，一此调巴歊。

卷 543_50 【监试夜雨滴空阶】

喻皀

霏霏复淅淅，飘松又洒槐。气濛蛛网槛，声叠藓花阶。
古壁青灯动，深庭湿叶埋。徐垂旧鸳瓦，竟历小茅斋。
冷与阴虫间，清将玉漏谐。病身唯展转，谁见此时怀。

卷 543_51 【春雨如膏】

喻皀

幂幂敛轻尘，濛濛湿野春。细光添柳重，幽点溅花匀。
惨淡游丝景，阴沈落絮辰。回低飞蝶翅，寒滴语禽身。
洒岳摧余雪，吹江叠远蘋。东城与西陌，晴后趣何新。

卷 543_52 【送友人南中访旧知】

喻崱

春尽大方游，思君便白头。地蒸川有毒，天暖树无秋。
水急三巴险，猿分五岭愁。为缘知己分，南国必淹留。

卷 543_53 【玄都观李尊师】

喻崱

藓帻翠髯公，存思古观空。晓坛怪叶露，晴圃柳花风。
寿已将椿并，棋难见局终。何当与高鹤，飞去海光中。

卷 543_54 【送石贲归吴兴】

喻崱

同志幸同年，高堂君独还。齐荣恩未报，共隐事皆闲。
访寺临河岸，开楼见海山。洛中推二陆，莫久恋乡关。

卷 543_55 【感遇】

喻皀

江乡十年别，京国累日同。在客几多事，俱付酒杯中。

卷 543_56 【晚思】

喻皀

鹤下紫阁云，沈沈翠微雨。独坐正无言，孤庄一声杵。

卷 543_57 【赠空禅师】

喻皀

虎见修行久，松知夏腊高。寒堂坐风雨，瞑目尚波涛。

卷 543_58 【西山寒日逢韦侍御】

喻皀

獬豸霜中貌，龙钟病后颜。惨伤此身事，风雪动江山。

卷 543_59 【题禅院】

喻皀

无花地亦香，有鹤松多直。向此奚必孤，山僧尽相识。

卷 543_60 【惊秋】

喻皀

莺啭才间关，蝉鸣旋萧屑。如何两鬓毛，不作千枝雪。

卷 543_61 【经刘校书墓】

喻皀

远冢松回曲渚风，一官闻是校书终。
霜情月思今何在，零落人间策子中。

卷 543_62 【蒋处士宅喜闲公至】

喻皀

绝杯夏别螺江渡，单钵春过处士斋。

尝茗议空经不夜，照花明月影侵阶。

卷 543_63 【绝句】

喻 𡵓

银地无尘金菊开，紫梨红枣堕莓苔。
一泓秋水一轮月，今夜故人来不来。

卷 543_64 【句】

喻 𡵓

颜凋明镜觉，思苦白云知。
沧洲迷钓隐，紫阁负僧期。

第五百四十四卷

卷 544_1 【听歌】

刘得仁

朱槛满明月，美人歌落梅。忽惊尘起处，疑是有风来。
一曲听初彻，几年愁暂开。东南正云雨，不得见阳台。

卷 544_2 【青龙寺僧院】

刘得仁

常多簪组客，非独看高松。此地堪终日，开门见数峰。
苔新禽迹少，泉冷树阴重。师意如山里，空房晓暮钟。

卷 544_3 【夏夜会同人】

刘得仁

沈沈清暑夕，星斗俨虚空。岸帻栖禽下，烹茶玉漏中。

形骸忘已久，偃仰趣无穷。日汲泉来漱，微开密筱风。

卷 544_4 【游崔监丞城南别业】

刘得仁

门与青山近，青山复几重。雪融皇子岸，春浥翠微峰。
地有经冬草，林无未老松。竹寒溪隔寺，晴日直闻钟。

卷 544_5 【答韦先辈春雨后见寄】

刘得仁

风散五更雨，鸟啼三月春。轩窗透初日，砚席绝纤尘。
帝里峰头出，邻家树色新。怜君高且静，有句寄闲人。

卷 544_6 【题吴先生山居】

刘得仁

先生此幽隐，便可谢人群。潭底见秋石，树间飞霁云。
山居心已惯，俗事耳憎闻。念我要多疾，开炉药许分。

卷 544_7 【晚游慈恩寺】

刘得仁

寺去幽居近，每来因采薇。伴僧行不困，临水语忘归。
磬动青林晚，人惊白鹭飞。堪嗟浮俗事，皆与道相违。

卷 544_8 【题王处士山居】

刘得仁

茅堂入谷远，林暗绝其邻。终日有流水，经年无到人。
溪云常欲雨，山洞别开春。自得仙家术，栽松独养真。

卷 544_9 【宿僧院】

刘得仁

禅地无尘夜，焚香话所归。树摇幽鸟梦，萤入定僧衣。
破月斜天半，高河下露微。翻令嫌白日，动即与心违。

卷 544_10 【晓别吕山人】

刘得仁

疏钟兼漏尽，曙色照青氛。栖鹤出高树，山人归白云。
月盈期重宿，丹熟约相分。羨入秋风洞，幽泉仔细闻。

卷 544_11 【送知全禅师南游】

刘得仁

师誉振京城，谈空万乘听。北行山已雪，南去木犹青。
夜岳禅销月，秋潭汲动星。回期不可定，孤鹤在高冥。

卷 544_12 【上张水部】

刘得仁

出入门阑久，儿童亦有情。不须将姓字，长说向公卿。
每许连床坐，时容并马行。恩深转无语，怀抱自分明。

卷 544_13 【塞上行作】

刘得仁

乡井从离别，穷边触目愁。生人居外地，塞雪下中秋。
雁举之衡翅，河穿入虏流。将军心莫苦，向此取封侯。

卷 544_14 【赠江夏卢使君】

刘得仁

诗人中最屈，无与使君俦。白发虽求退，明时合见收。
登山犹自健，纵酒可多愁。好是能骑马，相逢见鄂州。

卷 544_15 【冬夜寄白阁僧】

刘得仁

营营不自息，暌阔数年情。林下期难遂，人间事旋生。
鸟栖寒水迥，月映积冰清。石室焚香坐，悬知不为名。

卷 544_16 【送姚合郎中任杭州】

刘得仁

水陆中分程，看花一月行。会稽山隔浪，天竺树连城。
候吏赍鱼印，迎船载旆旌。渡江春始半，列屿草初生。

卷 544_17 【西园】

刘得仁

夏圃秋凉入，树低逢帻欹。水声翻败堰，山翠湿疏篱。
绿滑莎藏径，红连果压枝。幽人更何事，旦夕与僧期。

卷 544_18 【昊天观新栽竹】

刘得仁

清风枝叶上，山鸟已栖来。根别古沟岸，影生秋观苔。
遍思诸草木，惟此出尘埃。恨为移君晚，空庭更拟栽。

卷 544_19 【晚步曲江因谒慈恩寺恭上人】

刘得仁

岂曰趣名者，年年待命通。坐令青嶂上，兴起白云中。
岸浸如天水，林含似雨风。南宗犹有碍，西寺问恭公。

卷 544_20 【送姚处士归亳州】

刘得仁

白发麻衣破，还谿别弟回。首垂听乐泪，花落待歌杯。
石路寻芝熟，柴门有鹿来。明王下征诏，应就碧峰开。

卷 544_21 【寄楼子山云栖上人】

刘得仁

一室凿崔嵬，危梯叠薜苔。永无尘事到，时有至人来。
涧谷冬深静，烟岚日午开。修身知得地，京寺未言回。

卷 544_22 【秋夜喜友人宿】

刘得仁

莫说春闱事，清宵且共吟。频年遗我辈，何日遇知音。
逼曙天倾斗，将寒叶坠林。无将簪绂意，只损壮夫心。

卷 544_23 【秋日同僧宿西池】

刘得仁

菡萏遍秋水，隔林香似焚。僧同池上宿，霞向月边分。
渚鸟栖蒲立，城砧接曙闻。来宵莫他约，重此话孤云。

卷 544_24 【宿韦津山居】

刘得仁

永夕见招宿，诗书盈草堂。静吟倾美酒，高论出名场。
窗飒松篁韵，庭兼雪月光。心期身未老，一去泛潇湘。

卷 544_25 【夜携酒访崔正字】

刘得仁

只应芸阁吏，知我僻兼愚。吟兴忘饥冻，生涯任有无。
惨云埋远岫，阴吹吼寒株。忽起围炉思，招携酒满壶。

卷 544_26 【送蔡京东归迎侍】

刘得仁

高堂惟两别，此别是荣归。薄俸迎亲远，平时知己稀。
郾郊秋木见，鲁寺夜钟微。近腊西来日，多逢霰雪飞。

卷 544_27 【中秋】

刘得仁

尘里兼尘外，咸期此夕明。一年惟一度，长恐有云生。
露洗微埃尽，光濡是物清。朗吟看正好，惆怅又西倾。

卷 544_28 【池上宿】

刘得仁

事事不求奢，长吟省叹嗟。无才堪世弃，有句向谁夸。
老树呈秋色，空池浸月华。凉风白露夕，此境属诗家。

卷 544_29 【秋夕即事】

刘得仁

永夕坐暝久，萧萧猿狖啼。漏微砧韵隔，月落斗杓低。
危叶无风坠，幽禽并树栖。自怜在岐路，不醉亦沉迷。

卷 544_30 【晚夏】

刘得仁

日夕是西风，流光半已空。山光渐凝碧，树叶即翻红。
学浅惭多士，秋成羨老农。谁怜信公道，不泣路岐中。

卷 544_31 【夏日即事】

刘得仁

到晓改诗句，四邻嫌苦吟。中宵横北斗，夏木隐栖禽。
天地先秋肃，轩窗映月深。幽庭多此景，惟恐曙光侵。

卷 544_32 【夏日通济里居酬诸先辈见访】

刘得仁

君子远相寻，联镳到敝林。有诗谁索和，无酒可赊斟。
门列晴峰色，堂开古木阴。何因驻清听，惟恐日西沉。

卷 544_33 【寄姚谏议】

刘得仁

鸣鞭静路尘，籍籍谏垣臣。函疏封还密，炉香侍立亲。
篋多临水作，窗宿卧云人。危坐开寒纸，灯前起草频。

卷 544_34 【和厉玄侍御题户部相公庐山草堂】

刘得仁

白云居创毕，诏入凤池年。林长双峰树，潭分并寺泉。
石溪盘鹤外，岳室闭猿前。柱史题诗后，松前更肃然。

卷 544_35 【题山中故静禅师】

刘得仁

寂灭身何在，门人隔此生。影悬尘已厚，塔种柏初成。
溪院秋先雪，山堂古有精。当时挂锡处，树老几枝倾。

卷 544_36 【夏日游慈恩寺】

刘得仁

何处消长日，慈恩精舍频。僧高容野客，树密绝嚣尘。
闲上凌虚塔，相逢避暑人。却愁归去路，马迹并车轮。

卷 544_37 【题终南麻先生寂禅师石室】

刘得仁

因居石室贫，五十二回春。拥褐冥心客，穷经暮齿人。
翠沉空水定，雨绝片云新。危细秋峰径，相随到顶频。

卷 544_38 【送灵武朱书记】

刘得仁

灵帅与谁善，得君宾幕中。从容应尽礼，赞画致元功。
连塞云长惨，才秋树半空。相如偏自惬，掌记复乘骢。

卷 544_39 【吊草堂禅师】

刘得仁

杖履疑师在，房关四壁蛰。贮瓶经腊水，响塔隔山钟。
乳鸽沿苔井，斋猿散雪峰。如何不相见，倚遍寺前松。

卷 544_40 【早春送湘潭李少府之任】

刘得仁

柳新春水湄，春岸草离离。祖席觞云尽，离人泪各垂。
业文传不朽，作尉岂多时。公退琴堂上，风吹斑竹枝。

卷 544_41 【送越客归】

刘得仁

霜薄东南地，江枫落未齐。众山离楚上，孤棹宿吴西。
渚客留僧语，笼猿失子啼。到家冬即是，荷尽若耶溪。

卷 544_42 【送周钺往江夏】

刘得仁

东西南北郡，自说遍曾游。人世终多故，皇都不少留。
郢城帆过夜，汉水月方秋。此谒亲知去，闻猿岂解愁。

卷 544_43 【送河池李明府之任】

刘得仁

河池安所理，种柳与弹琴。自合清时化，仍资白首吟。
程余行片月，公退入遥林。想得询民瘼，方称单父心。

卷 544_44 【送蔡京侍御赴大梁幕】

刘得仁

同城各多故，会面亦稀疏。及道须相别，临岐恨有余。
梁园飞楚鸟，汴水走淮鱼。众说裁军檄，陈琳远不如。

卷 544_45 【哭鲍溶有感】

刘得仁

寥落故人宅，今来身已亡。古苔封墨沼，深竹映书堂。
秋色池馆静，雨声云水凉。无因展交道，日暮剖心肠。

卷 544_46 【送僧归玉泉寺】

刘得仁

玉泉归故刹，便老是僧期。乱木孤蝉后，寒山绝鸟时。
若寻流水去，转出白云迟。见说千峰路，溪深复顶危。

卷 544_47 【宣义池上】

刘得仁

修篁夹绿池，幽絮此中飞。何必青山远，仍将白发归。
鸟啼亦有恨，鸥习总无机。树起秋风细，西林磬入微。

卷 544_48 【回中夜访独孤从事】

刘得仁

满庭霜月魄，风静绝纤闻。边境时无事，州城夜访君。
拥裘听塞角，酌醴话湘云。赞佐元戎美，恩齐十万军。

卷 544_49 【宿宣义池亭】

刘得仁

暮色绕柯亭，南山幽竹青。夜深斜舫月，风定一池星。
岛屿无人迹，菰蒲有鹤翎。此中足吟眺，何用泛沧溟。

卷 544_50 【送智玄首座归蜀中旧山】

刘得仁

像教得重兴，因师说大乘。从来悟明主，今去证高僧。
蜀国烟霞异，灵山水月澄。乡间诸善友，喜似见南能。

卷 544_51 【贺顾非熊及第其年内索文章】

刘得仁

愚为童稚时，已解念君诗。及得高科晚，须逢圣主知。
花前翻有泪，鬓上却无丝。从此东归去，休为坠叶期。

卷 544_52 【冬日骆家亭子】

刘得仁

亭台腊月时，松竹见贞姿。林积烟藏日，风吹水合池。
恨无人此住，静有鹤相窥。是景吟诗遍，真于野客宜。

卷 544_53 【题邵公禅院】

刘得仁

无事门多掩，阴阶竹扫苔。劲风吹雪聚，渴鸟啄冰开。
树向寒山得，人从瀑布来。终期天目老，擎锡逐云回。

卷 544_54 【忆鹤】

刘得仁

自尔归仙后，经秋又过春。白云寻不得，紫府去无因。
此地空明月，何山伴羽人。终期华表上，重见令威身。

卷 544_55 【听夜泉】

刘得仁

静里层层石，潺湲到鹤林。流回出几洞，源远历千岑。
寒助空山月，清兼此夜心。幽人听达曙，相和藓床吟。

卷 544_56 【乐游原春望】

刘得仁

乐游原上望，望尽帝都春。始觉繁华地，应无不醉人。
云开双阙丽，柳映九衢新。爱此频来往，多闲逐此身。

卷 544_57 【赠雍陶博士】

刘得仁

腹是群书笥，官为六义师。情高少尘事，朝下足闲时。
有句同人伏，无私胄子知。汉庭公议在，正与触邪宜。

卷 544_58 【夏日感怀寄所知】

刘得仁

了了见岐路，欲行难负心。趋时不圆转，自古易湮沉。
日正林方合，蜩鸣夏已深。中郎今远在，谁识爨桐音。

卷 544_59 【陈情上知己】

刘得仁

性与才俱拙，名场迹甚微。久居颜亦厚，独立事多非。
刻骨搜新句，无人悯白衣。明时自堪恋，不是不知机。

卷 544_60 【秋夜寄友人二首】

刘得仁

永夜无他虑，长吟毕二更。暗灯摇碧影，滞雨滴阶声。
道进愁还浅，年加睡自轻。如何得深术，相与舍浮名。

所思同海岱，所梦亦烟波。默坐看山久，闲行值寺过。
独吟黄叶乱，相去碧峰多。我有归心在，君行竟若何。

卷 544_61 【寄春坊顾校书】

刘得仁

宁因不得志，寂寞本相宜。冥目冥心坐，花开花落时。
数畦蔬甲出，半梦鸟声移。只恐龙楼吏，归山又见违。

卷 544_62 【寄雍陶先辈】

刘得仁

久别青云士，幽人分固然。愁心不易去，蹇步卒难前。
尽落经霜叶，频阴欲雪天。归山自有限，岂待白头年。

卷 544_63 【对月寄雍陶】

刘得仁

圆明寒魄上，天地一光中。临水通宵坐，知君此兴同。
华凝衣有露，静极树无风。若向湘江见，湘江彻底空。

卷 544_64 【寄谢观】

刘得仁

十五余年苦，今朝始遇君。无惭于白日，不枉别孤云。
得失天难问，称扬鬼亦闻。此恩销镂骨，吟坐叶纷纷。

卷 544_65 【送鄂州崔大夫赴镇】

刘得仁

廉问帝难人，朝廷辍重臣。入山初有雪，登路正无尘。
去国鸣驺缓，经云住旆频。千峰与万木，清听雨情新。

卷 544_66 【送钱给事赴虢州】

刘得仁

帝心忧虢俗，暂辍掖垣臣。疲瘵初承制，乡闾似得春。
化成应有瑞，位重转闻贫。用作盐梅日，争回卧辙人。

卷 544_67 【送雍陶侍御赴兖州裴尚书命】

刘得仁

纶阁知孤直，翻论北巷贤。且縻莲幕里，会致玉阶前。
洙泗秋微动，龟蒙月正圆。元戎军务息，清句待君联。

卷 544_68 【送新罗人归本国】

刘得仁

鸡林隔巨浸，一住一年行。日近国先曙，风吹海不平。
眼穿乡井树，头白渺瀰程。到彼星霜换，唐家语却生。

卷 544_69 【送车涛罢举归山】

刘得仁

朝是暮还非，人情冷暖移。浮生只如此，强进欲何为。
要路知无援，深山必遇师。怜君明此理，休去不迟疑。

卷 544_70 【送王书记归邠州】

刘得仁

陈琳轻一别，马上意超然。来日行烦暑，归时听早蝉。
阴云翳城郭，细雨紊山川。从事公刘地，元戎旧礼贤。

卷 544_71 【送谢观之剑南从事】

刘得仁

迢递从知己，他人敢更言。离京虽未腊，到府已应暄。
飞急奔行雁，啼酸忆子猿。江山无限思，君拟共谁论。

卷 544_72 【送顾非熊作尉盱眙】

刘得仁

一名兼一尉，未足是君伸。历数为诗者，多来作谏臣。
路翻平楚阔，草带古淮新。天下虽云大，同声有几人。

卷 544_73 【送高湘及第后东归觐叔】

刘得仁

此去几般荣，登科鼎足名。无惭入南巷，高价耸东京。
窗对嵩山碧，庭来洛水声。门前桃李树，一径已阴成。

卷 544_74 【送友人下第归觐】

刘得仁

君此卜行日，高堂应梦归。莫将和氏泪，滴著老莱衣。
岳雨连河细，田禽出麦飞。到家调膳后，吟苦落蝉晖。

卷 544_75 【送友人下第归扬州觐省】

刘得仁

新柳间花垂，东西京路岐。园林知自到，寝食计相思。
雨断淮山出，帆扬楚树移。晨昏心已泰，蝉发是回时。

卷 544_76 【早行】

刘得仁

万类半已动，此心宁自安。月沉平野尽，星隐曙空残。
马渡横流广，人行湛露寒。还思犹梦者，不信早行难。

卷 544_77 【通济里居酬卢肇见寻不遇】

刘得仁

衡门掩绿苔，树下绝尘埃。偶赴高僧约，旋知长者来。
云山堪眺望，车马必裴回。问以何为待，惭无酒一杯。

卷 544_78 【赠王尊师】

刘得仁

为道常日损，尊师修此心。挂肩黄布被，穿发白蒿簪。
符札灵砂字，弦弹古素琴。囊中曾有药，点土亦成金。

卷 544_79 【冬夜与蔡校书宿无可上人院】

刘得仁

儒释偶同宿，夜窗寒更清。忘机于世久，晤语到天明。
月倒高松影，风旋一磬声。真门犹是幻，不用觉浮生。

卷 544_80 【冬日喜同志宿】

刘得仁

相逢话清夜，言实转相知。共道名虽切，唯论命不疑。
吟身坐霜石，眠鸟握风枝。别忆天台客，烟霞昔有期。

卷 544_81 【逢吕上山人】

刘得仁

尘里正愁老，相逢眼益明。从前枉多病，此后鲜疏名。
古柏今收子，深山许事兄。长生如有分，愿逐到蓬瀛。

卷 544_82 【春暮对雨】

刘得仁

春暮雨微微，翻疑坠叶时。气蒙杨柳重，寒勒牡丹迟。
未夕鸟先宿，望晴人有期。何当廓阴闭，新暑竹风吹。

卷 544_83 【长信宫】

刘得仁

簟凉秋气初，长信恨何如。拂黛月生指，解鬟云满梳。
一从悲画扇，几度泣前鱼。坐听南宫乐，清风摇翠裾。

卷 544_84 【初夏题段郎中修竹里南园】

刘得仁

高人游息处，与此曲池连。密树才春后，深山在目前。
远峰初绝雨，片石欲生烟。数有僧来宿，应缘静好禅。

卷 544_85 【题景玄禅师院】

刘得仁

古僧精进者，师复是谁流。道贵行无我，禅难说到头。
汲泉羸鹤立，拥褐老猿愁。曾住深山院，何如此院幽。

卷 544_86 【夏日樊川别业即事】

刘得仁

无事称无才，柴门亦罕开。脱巾吟永日，著屐步荒台。
风卷微尘上，霆将暴雨来。终南云渐合，咫尺失崔嵬。

卷 544_87 【寄无可上人】

刘得仁

省事为诗日，宵吟每达晨。十年期是梦，一事未成身。
枉别山中客，殊非世上人。今来已如此，须得桂荣新。

卷 544_88 【和范校书赠造微上人】

刘得仁

得性见微公，何曾执著空。修心将佛并，吐论与儒通。
晓漱松杉下，宵禅雪月中。他生有缘会，君子亦应同。

卷 544_89 【访曲江湖处士】

刘得仁

何况归山后，而今已似仙。卜居天苑畔，闲步禁楼前。
落日明沙岸，微风上纸鸢。静还林石下，坐读养生篇。

卷 544_90 【慈恩寺塔下避暑】

刘得仁

古松凌巨塔，修竹映空廊。竟日闻虚籁，深山只此凉。
僧真生我静，水淡发茶香。坐久东楼望，钟声振夕阳。

卷 544_91 【秋晚与友人游青龙寺】

刘得仁

高视终南秀，西风度阁凉。一生同隙影，几处好山光。
暮鸟投羸木，寒钟送夕阳。因居话心地，川冥宿僧房。

卷 544_92 【春日雨后作】

刘得仁

朝来微有雨，天地爽无尘。北阙明如画，南山碧动人。
车舆终日别，草树一城新。枉是吾君戚，何门谒紫宸。

卷 544_93 【别王山人】

刘得仁

旨甘虽自足，未是禄荣亲。尚逐趋时伴，多离有道人。
山居衣以草，生药随身。不食长无疾，年知出十旬。

卷 544_94 【赠陶山人】

刘得仁

处士例营营，惟君纵此生。闲能资寿考，健不换公卿。
药圃妻同耨，山田子共耕。定知丹熟后，无姓亦无名。

第五百四十五卷

卷 545_1 【禁署早春晴望】

刘得仁

御林闻有早莺声，玉槛春香九陌晴。寒著霁云归紫阁，
暖浮佳气动芳城。宫池日到冰初解，辇路风吹草欲生。
鸳侣此时皆赋咏，商山雪在思尤清。

卷 545_2 【山中寻道人不遇】

刘得仁

年过弱冠风尘里，常拟随师学炼形。石路特来寻道者，
云房空见有仙经。棋于松底留残局，鹤向潭边退数翎。
便欲此居闲到老，先生何日下青冥。

卷 545_3 【赠敬睦助教二首】

刘得仁

到来常听说清虚，手把玄元七字书。仙籍不知名姓有，

道情惟见往来疏。已能绝粒无饥色，早晚休官买隐居。
便欲去随为弟子，片云孤鹤可相于。

街西静观求居处，不到权门到寺频。禁掖人知连状荐，
国庠官满一家贫。清仪称是蓬瀛客，直气堪为谏诤臣。
自顾无成年渐长，报恩惟愿杀微身。

卷 545_4 【送祖山人归山】

刘得仁

独来朝市笑浮云，却忆烟霞出帝城。不说金丹能点化，
空教弟子学长生。壶中泻酒看云影，洞里逢师下鹤迎。
料得仙家玉牌上，已镌白日上升名。

卷 545_5 【监试莲花峰】

刘得仁

太华万余重，峩峩只此峰。当秋倚寥泬，入望似芙蓉。
翠拔千寻直，青危一朵秾。气分毛女秀，灵有羽人踪。
倒影侵官路，流香激庙松。尘埃终不及，车马自憧憧。

卷 545_6 【京兆府试目极千里】

刘得仁

献赋多年客，低眉恨不前。此心常郁矣，纵目忽超然。
送骥登长路，看鸿入远天。古墟烟幂幂，穷野草绵绵。
树与金城接，山疑桂水连。何当开霁日，无物翳平川。

卷 545_7 【寻陈处士山堂】

刘得仁

步溪凡几转，始得见幽踪。路隐千根树，门开万仞峰。
片云生石窦，浅水卧枯松。穷谷风光冷，深山翠碧浓。
鹤看空里过，仙向坐中逢。底露秋潭水，声微暮观钟。
他年来此定，异日愿相容。且喜今归去，人间事更慵。

卷 545_8 【题从伯舍人道正里南园】

刘得仁

帝里余新第，朱门面碧岑。曙堂增爽气，乔木动清阴。
直去亲瑶陛，朝回在竹林。风流才子调，好尚古人心。
薜荔遮窗暗，莓苔近井深。礼无青草隔，诗共白衣吟。

轩静留孤鹤，庭虚到远砧。掩关裁凤诏，开镜理琼簪。
种植今如此，尘埃永不侵。云奔投刺者，日日待为霖。

卷 545_9 【赋得听松声】

刘得仁

庭际微风动，高松韵自生。听时无物乱，尽日觉神清。
强与幽泉并，翻嫌细雨并。拂空增鹤唳，过牖合琴声。
况复当秋暮，偏宜在月明。不知深涧底，萧瑟有谁听。

卷 545_10 【宿普济寺】

刘得仁

京寺数何穷，清幽此不同。曲江临阁北，御苑自墙东。
广陌车音急，危楼夕景通。乱峰沉暝野，毒暑过秋空。
幡飏虚无里，星生杳霭中。月光笼月殿，莲气入莲宫。
缀草凉天露，吹人古木风。饮茶除假寐，闻磬释尘蒙。
童子眠苔净，高僧话漏终。待鸣晓钟后，万井复朦胧。

卷 545_11 【和郑校书夏日游郑泉】

刘得仁

太虚悬畏景，古木蔽清阴。爰有泉堪挹，闲思日可寻。

来闻鸣滴滴，照竦碧沈沈。几脉成溪壑，何人测浅深。
澄时无一物，分处历千林。净溉灵根药，凉浮玉翅禽。
饮疑蠲宿疾，见自失烦襟。僧共云前濑，龙和月下吟。
叠光轻吹动，彻底晓霞侵。不用频游去，令君少进心。

卷 545_12 【和段校书冬夕寄题庐山】

刘得仁

名高身未到，此恨蓄多时。是夕吟因话，他年必去随。
尝闻庐岳顶，半入楚江湄。几处悬崖上，千寻瀑布垂。
炉峰松淅沥，湓浦柳参差。日色连湖白，钟声拂浪迟。
烟梯缘薜荔，岳寺步欹危。地本饶灵草，林曾出祖师。
石楼霞耀壁，猿树鹤分枝。细径萦岩末，高窗见海涯。
嵌空寒更极，寂寞夜尤思。阴谷冰埋术，仙田雪覆芝。
乱泉禅客濑，异迹逸人知。藓室新开灶，桎潭未了棋。
如何遂闲放，长得在希夷。空务渔樵事，方无道路悲。
谢公台尚在，陶令柳潜衰。尘外难相许，人间贵迹遗。
虽怀丹桂影，不忘白云期。仁者终携手，今朝预赋诗。

卷 545_13 【书事寄万年厉员外】

刘得仁

帝城皆剧县，令尹美居东。遂拜赵张下，暂离星象中。

拥归从北阙，送上动南宫。紫禁黄山绕，沧溟素浚通。
封疆亲日月，邑里出王公。赋税充天府，歌谣入圣聪。
土膏寒麦覆，人海昼尘蒙。廨宇松连翠，朝街火散红。
文场新桂茂，粉署旧兰崇。留客挥盈爵，抽毫咏早鸿。
前驺潘岳贵，故里邵平穷。劝隐莲峰久，期耕树谷同。
鳧飞将去叶，剑气尚埋丰。何必华阴土，方垂拂拭功。

卷 545_14 【上姚谏议】

刘得仁

高文与盛德，皆谓古无伦。圣代生才子，明庭有谏臣。
已瞻龙衮近，渐向凤池新。却忆波涛郡，来时岛屿春。
名因诗句大，家似布衣贫。曾暗投新轴，频闻奖滞身。
照吟清夕月，送药紫霞人。终计依门馆，何疑不化鳞。

卷 545_15 【上翰林丁学士】

刘得仁

今代如尧代，征贤察众情。久聆推行实，然后佐聪明。
官自文华重，恩因顾问生。词人求作称，天子许和羹。
御柳凋霜晚，宫泉滴月清。直庐寒漏近，秋烛白麻成。
玉殿移时对，金舆数侍行。赐衣香未散，借马色难名。
时辈何偏美，儒流此最荣。终当闻燮理，寰宇永升平。

卷 545_16 【二绝句】

刘得仁

何处访岐路，青云但忆归。风尘数年限，门馆一生依。
外族帝王是，中朝亲旧稀。翻令浮议者，不许九霄飞。

卷 545_17 【山中舒怀寄上丁学士】

刘得仁

五字投精鉴，惭非大雅词。本求闲赐览，岂料便蒙知。
幽拙欣殊幸，提携更不疑。弱苗须雨长，懒翼在风吹。
砺镞端杨叶，光门待桂枝。计闻尘里誉，因和禁中诗。

卷 545_18 【莺出谷】

刘得仁

东风潜启物，动息意皆新。此鸟从幽谷，依林报早春。
出寒虽未及，振羽渐能频。稍类冲天鹤，多随折桂人。
尊前喧有语，花里昼藏身。若向秣华处，余禽不见亲。

卷 545_19 【哭翰林丁侍郎】

刘得仁

相知出肺腑，非旧亦非亲。每见云霄侣，多扬鄙拙身。
即期扶泰运，岂料哭贤人。应是随先帝，依前作近臣。
平生任公直，爱弟尚风尘。宅闭青松古，坟临赤水新。
官清仍齿壮，儿小复家贫。惆怅天难问，空流泪满巾。

卷 545_20 【陈情上李景让大夫】

刘得仁

一被浮名误，旋遭白发侵。裴回恋明主，梦寐在秋岑。
遇物唯多感，居常只是吟。待时钳定口，经事压低心。
辛苦文场久，因缘戚里深。老迷新道路，贫卖旧园林。
晴赏行闻水，宵棋坐见参。龟留闲去问，僧约偶来寻。
望喜潜凭鹄，娱情愿有琴。此生如遂意，誓死报知音。
上德怜孤直，唯公拔陆沉。丘山恩忽被，蝼蚁力难任。
作鉴明同日，听言重若金。从兹更无限，翘足俟为霖。

卷 545_21 【和郑先辈谢秩闲居寓书所怀】

刘得仁

西风日夜吹，万木共离披。近甸新晴后，高人得意时。

暂闲心亦泰，论道面难欺。把笔还诗债，将琴当酒资。
蓝衫悬竹桁，乌帽挂松枝。名占文章重，官归谏宪迟。
生涯贫帝里，公议到台司。室冷沾苔藓，门清绝路岐。
莫言邻白屋，即贺立丹墀。岂虑尘埃久，云霄故有期。

卷 545_22 【病中晨起即事寄场中往还】

刘得仁

昨日离尘里，今朝懒已成。岂能为久隐，更欲泥浮名。
虚牖晨光白，幽园晓气清。戴沙寻水去，披雾入林行。
叠叶孤禽在，初阳半树明。桑麻新雨润，芦荻古波声。
易向田家熟，元于世路生。病多三径塞，吟苦四邻惊。

卷 545_23 【悲老宫人】

刘得仁

白发宫娃不解悲，满头犹自插花枝。
曾缘玉貌君王宠，准拟人看似旧时。

卷 545_24 【村中闲步】

刘得仁

闲共野人临野水，新秋高树挂清晖。

不知尘里无穷事，白鸟双飞入翠微。

卷 545_25 【上巳日】

刘得仁

未敢分明赏物华，十年如见梦中花。
游人过尽衡门掩，独自凭栏到日斜。

卷 545_26 【省试日上崔侍郎四首】

刘得仁

衣上年年泪血痕，只将怀抱诉乾坤。
如今主圣臣贤日，岂致人间一物冤。

如病如痴二十秋，求名难得又难休。
回看骨肉须堪耻，一著麻衣便白头。

戚里称儒愧小才，礼闈公道此时开。
他人何事虚相指，明主无私不是媒。

方寸终朝似火然，为求白日上青天。
自嗟辜负平生眼，不识春光二十年。

卷 545_27 【秋夜】

刘得仁

秋气满堂孤烛冷，清宵无寐忆山归。
窗前月过三更后，细竹吟风似雨微。

卷 545_28 【长门怨】

刘得仁

争得一人闻此怨，长门深夜有妍姝。
早知雨露翻相误，只插荆钗嫁匹夫。

卷 545_29 【贾妇怨】

刘得仁

嫁与商人头欲白，未曾一日得双行。
任君逐利轻江海，莫把风涛似妾轻。

卷 545_30 【寄友人】

刘得仁

风飒沉思眼忽开，尘埃污得是庸才。
那堪更见巢松鹤，飞入青云不下来。

卷 545_31 【晏起】

刘得仁

日过辰时犹在梦，客来应笑也求名。
浮生自得长高枕，不向人间与命争。

卷 545_32 【马上别单于刘评事】

刘得仁

庙谋宏远人难测，公主生还帝感深。
天下底平须共喜，一时闲事莫惊心。

卷 545_33 【赠从弟谷】

刘得仁

此世荣枯岂足惊，相逢惟要眼长青。
从来不爱三闾死，今日凭君莫独醒。

卷 545_34 【别山居】

刘得仁

万壑千岩景象开，登临未足又须回。
凭师莫断松间路，秋月圆时弟子来。

卷 545_35 【赠道人】

刘得仁

长在城中无定业，卖丹磨镜两途贫。
三山来往寻常事，不省曾惊市井人。

卷 545_36 【对月寄同志】

刘得仁

霜满中庭月在林，塞鸿频过又更深。
支颐不语相思坐，料得君心似我心。

卷 545_37 【忆鹤】

刘得仁

白丝翎羽丹砂顶，晓度秋烟出翠微。
来向孤松枝上立，见人吟苦却高飞。

卷 545_38 【云门寺】

刘得仁

上方僧又起，清磬出林初。吟苦晓灯暗，露零秋草疏。
旧山多梦到，流水送愁余。寄寺欲经岁，惭无亲故书。

卷 545_39 【中秋宿邓逸人居】

刘得仁

偶与山僧宿，吟诗坐到明。夜凉耽月色，秋渴漱泉声。
涧木如竿耸，窗云作片生。白衣闲自贵，不揖汉公卿。

卷 545_40 【句】

刘得仁

外家虽是帝，当路且无亲。

白日只如哭，黄泉免恨无。

身闲甘旨下，白发太平人。

同游芳草寺，见示白云诗。

犹祈启金口，一为动文权。

深山寺路千层石，竹杖棕鞋便可登。

第五百四十六卷

卷 546_1 【题山院】

权审

万叶风声利，一山秋气寒。晓霜浮碧瓦，落日度朱栏。

卷 546_2 【绝句】

权审

得即高歌失即休，多悲多恨谩悠悠。
今朝有酒今朝醉，明日愁来明日愁。

卷 546_3 【郡中有怀寄上睦州员外杜十三兄】

邢群

城枕溪流更浅斜，丽谯连带邑人家。经冬野菜青青色，
未腊山梅处处花。虽免嶂云生岭上，永无音信到天涯。

如今岁晏从羈滞，心喜弹冠事不赊。

卷 546_4 【早发灵芝望九华寄杜员外使君】

曹汾

戴月早辞三秀馆，迟明初识九华峰。嵯峨玉剑寒铓利，
袅袅青莲翠叶重。奇状却疑人画出。岚光如为客添浓。
行春若到五溪上，此处褰帷正面逢。

卷 546_5 【落花】

严恽

春光冉冉归何处，更向花前把一杯。
尽日问花花不语，为谁零落为谁开。

卷 546_6 【题筹笔驿】

殷潜之

江东矜割据，邺下夺孤嫠。霸略非匡汉，宏图欲佐谁。
奏书辞后主，仗剑出全师。重袭褒斜路，悬开反正旗。
欲将苞有截，必使举无遗。沈虑经谋际，挥毫决胜时。

圖觚当分画，前箸此操持。山秀扶英气，川流入妙思。
算成功在穀，运去事终亏。命屈天方厌，人亡国自随。
艰难推旧姓，开创极初基。总叹曾过地，宁探作教资。
若归新历数，谁复顾衰危。报德兼明道，长留识者知。

卷 546_7 【送高遂赴举】

祝元膺

句曲旧宅真，自产日月英。既涵岳渎气，安无神仙名。
松桂迢迢色，与君相送情。

卷 546_8 【寄道友】

祝元膺

两颌凝清霜，玉炉焚天香。为我延岁华，得入不死乡。

卷 546_9 【梦仙谣】

祝元膺

蟾蜍夜作青冥烛，螭蜥晴为碧落梯。
好个分明天上路，谁教深入武陵溪。

卷 546_10 【句】

祝元膺

雾纹斑似豹，水力健如龙。

卷 546_11 【贺邓璠使君正拜袁州】

彭蠡

六年惠爱及黎甿，大府论功俟陟明。尺一诏书天上降，
二千石禄世间荣。新添画戟门增峻，旧蹑青云路转平。
更待皇恩醒善政，碧油幢到郡斋迎。

卷 546_12 【和严恽落花诗】

王枢

花落花开人世梦，衰荣闲事且持杯。
春风底事轻摇落，何似从来不要开。

卷 546_13 【咏宣律和尚袈裟】

张希复

共覆三衣中夜寒，披时不镇尼师坛。
无因盖得龙宫地，畦里尘飞叶相残。

卷 546_14 【莺出谷】

钱可复

玉律阳和变，时禽羽翮新。载飞初出谷，一啭已惊人。
拂柳宜烟暖，冲花觉露春。抟风翻翰疾，向日弄吭频。
求友心何切，迁乔幸有因。华林高玉树，栖托及芳晨。

卷 546_15 【莺出谷】

张鹭

弱柳随侔匹，迁莺正及春。乘风音响远，映日羽毛新。
已得辞幽谷，还将脱俗尘。鸳鸾方可慕，燕雀迥无邻。
游止知难屈，翻飞在此伸。一枝如借便，终冀托深仁。

卷 546_16 【莺出谷】

刘庄物

幸因辞旧谷，从此及芳晨。欲语如调舌，初飞似畏人。
风调归影便，日暖吐声频。翔集知无阻，联绵贵有因。
喜迁乔木近，宁厌对花新。堪念微禽意，关关也爱春。

第五百四十七卷

卷 547_1 【题吕食新水阁兼寄南商州郎中】

朱景玄

丹槛初结构，孤高冠清川。庭临谷中树，檐落山上泉。
晓色挂残月，夜声杂繁弦。青春去如水，康乐归何年。

卷 547_2 【华山南望春】

朱景玄

灵岳多异状，巉巖出虚空。闲云恋岩壑，起灭苍翠中。
皓气澄野水，神光秘琼宫。鹤巢前林雪，瀑落满涧风。
春尽花未发，川回路难穷。何因著山屐，鹿迹寻羊公。

卷 547_3 【水阁】

朱景玄

楼居半池上，澄影共相空。谢守题诗处，莲开净碧中。

卷 547_4 【迎风亭】

朱景玄

山雨留清气，溪飙送早凉。时回石门步，阶下碧云光。

卷 547_5 【双楹亭】

朱景玄

连檐对双树，冬翠夏无尘。未肯惭桃李，成阴不待春。

卷 547_6 【莲亭】

朱景玄

回塘最幽处，拍水小亭开。莫怪阑干湿，鵙鹳夜宿来。

卷 547_7 【中峰亭】

朱景玄

中峰上翠微，窗晓早霞飞。几引登山屐，春风踏雪归。

卷 547_8 【飞云亭】

朱景玄

上结孤圆顶，飞轩出泰清。有时迷处所，梁栋晓云生。

卷 547_9 【四望亭】

朱景玄

高亭群峰首，四面俯晴川。每见晨光晓，阶前万井烟。

卷 547_10 【望莲台】

朱景玄

秋台好登望，菡萏发清池。半似红颜醉，凌波欲暮时。

卷 547_11 【茶亭】

朱景玄

静得尘埃外，茶芳小华山。此亭真寂寞，世路少人闲。

卷 547_12 【宿新安村步】

朱景玄

淅淅寒流涨浅沙，月明空渚遍芦花。
离人偶宿孤村下，永夜闻砧一两家。

卷 547_13 【远闻本郡行春到旧山二首】

朱景玄

一身从宦留京邑，五马遥闻到旧山。
已领烟霞光野径，深惭老幼候柴关。

清风借响松筠外，画隼停晖水石间。
定掩溪名在图传，共知轩盖此登攀。

卷 547_14 【和崔使君临发不得观积雪】

朱景玄

贫居稍与池塘近，旬日轩车不降来。
一树琼花空有待，晓风看落满青苔。

卷 547_15 【句】

朱景玄

塞鸿先秋去，边草入夏生。

卷 547_16 【别青州妓段东美】

薛宜僚

经年邮驿许安栖，一会他乡别恨迷。
今日海帆飘万里，不堪肠断对含啼。

阿母桃花方似锦，王孙草色正如烟。
不须更向沧溟望，惆怅欢情恰一年。

卷 547_17 【咏韦皋】

郭圆

宣父从周又适秦，昔贤谁少出风尘。
当时甚讶张延赏，不识韦皋是贵人。

卷 547_18 【进宣宗收复河湟诗】

崔铉

边陲万里注恩波，宇宙群芳洽凯歌。右地名王争解辫，
远方戎垒尽投戈。烟尘永息三秋戍，瑞气遥清九折河。
共遇圣明千载运，更观俗阜与时和。

卷 547_19 【咏架上鹰】

崔铉

天边心胆架头身，欲拟飞腾未有因。
万里碧霄终一去，不知谁是解绦人。

卷 547_20 【越亭二十韵】

元晦

乏才叨八使，徇禄非三顾。南服颁诏条，东林证迷误。
未闻述职效，偶脱嚣烦趣。激水浚坳塘，缘崖欹磴步。
西岩焕朝旭，深壑囊宿雾。影气爽衣巾，凉飈轻杖履。
临高神虑寂，远眺川原布。孤帆逗汀烟，翻鸦集江树。
独探洞府静，恍若偃佺遇。一瞬契真宗，百年成妄故。

孱颜石户启，杳霭溪云度。松籁韵宫商，鸳蕙势翔溯。
津梁危杓架，济物虚舟渡。环流驰羽觞，金英妒妆嫭。
笳吟寒垒迥，鸟噪空山暮。怅望麋鹿心，低回车马路。
悬冠谢陶令，褫珮怀疏傅。遐想蛻纓綬，徒惭恤襦袴。
福盈祸之倚，权胜道所恶。何必栖禅关，无言自冥悟。

卷 547_21 【除浙东留题桂郡林亭】

元晦

紫泥远自金銮降，朱旆翻驰镜水头。陶令风光偏畏夜，
子牟衰鬓暗惊秋。西邻月色何时见，南国春光岂再游。
莫遣艳歌催客醉，不堪回首翠蛾愁。

卷 547_22 【句】

元晦

石静如开镜，山高若耸莲。笋竿抽玉管，花蔓缀金钿。

卷 547_23 【和元常侍除浙东留题】

路贯

谢安致理逾三载，黄霸清声彻九重。犹辍珮环归凤阙，

且将仁政到稽峰。林间立马罗千骑，池上开筵醉一钟。
共喜甘棠有新咏，独惭霜鬓又攀龙。

卷 547_24 【赠巩畴】

郑薰

密雪松桂寒，书窗导余清。风撼冰玉碎，阶前琴磬声。
榻静几砚洁，帙散缣缃明。高论展僧肇，精言资巩生。
立意加玄虚，析理分纵横。万化悉在我，一物安能惊。
江海何所动，丘山常自平。迟速不相阂，后先徒起争。
镜照分妍丑，秤称分重轻。颜容宁入鉴，铢两岂关衡。
蕴微道超忽，剖镫音泠泠。纸上掣牢键，舌端摇利兵。
圆澈保直性，客尘排妄情。有住即非住，无行即是行。
疏越舍朱弦，哇淫鄙秦筝。淡薄贵无味，羊斟惭大羹。
洪远包乾坤，幽眇潜沈冥。罔烦跬步举，顿达万里程。
庐远尚莫晓，隐留曾误听。直须持妙说，共诣毗耶城。

卷 547_25 【句】

郑薰

项斯逢水部，谁道不关情。

第五百四十八卷

卷 548_1 【镊白曲】

薛逢

去年镊白鬓，镜里犹堪认年少。今年镊白发，
两眼昏昏手战跳。满酌浓醪假颜色，颜色不扬翻自笑。
少年曾读古人书，本期独善安有余。虽盖长安一片瓦，
未遑卒岁容宁居。前年依亚成都府，月请俸缗六十五。
妻儿骨肉愁欲来，偏梁阁道归得否？长安六月尘亘天，
池塘鼎沸林欲燃。合家恸哭出门送，独驱匹马陵山巅。
到官只是推诚信，终日兢兢幸无吝。丞相知怜为小心，
忽然奏佩专城印。专城俸入一倍多，况兼职禄霜峨峨。
山妻稚女悉迎到，时列绿樽酣酒歌。醉来便向樽前倒，
风月满头丝皓皓。虽然减得阖门忧，又加去国五年老。
五年老，知奈何？来日少，去日多。金锤锤碎黄金镊，
更唱樽前老去歌。

卷 548_2 【君不见】

薛逢

君不见，马侍中，气吞河朔称英雄；君不见，韦太尉，

二十年前镇蜀地。一朝冥漠归下泉，功业声名两憔悴。
奉诚园里蒿棘生，长兴街南沙路平。当时带砺在何处，
今日子孙无地耕。或闻羁旅甘常调，簿尉文参各天表。
清明纵便天使来，一把纸钱风树杪。碑文半缺碑堂摧，
祁连冢象狐兔开。野花似雪落何处，棠梨树下香风来。
马侍中，韦太尉，盛去衰来片时事。人生倏忽一梦中，
何必深深固权位！

卷 548_3 【老去也】

薛逢

惆怅人生不满百，一事无成头雪白。回看幼累与老妻，
俱是途中远行客。匣中旧镜照胆明，昔曾见我髭未生。
朝巾暮栉不自省，老皮皱皱文纵横。合掌髻子蒜许大，
此日方知非是我。暗数七旬能几何，不觉中肠热如火。
老去也，争奈何？敲酒盏，唱短歌。短歌未竟日已没，
月映西南庭树柯。

卷 548_4 【追昔行】

薛逢

朝光如飞犹尚可，暮更如箭不容卧。犍为穿城更漏频，
一一皆从枕边过。一夕凡几更，一更凡几声。

青春枉向镜中老，白发虚从愁里生。曾窥帝里东邻女，
自比桃花镜中许。一朝嫁得征戍儿，荷戈千里防秋去。
去时只作旦暮期，别后生死俱不知。风惊粉色入蝉鬓，
愁送镜花潜堕枝。前年因出长安陌，见一女人头雪白。
日中扶杖憩树阴，仿佛形容认相识。向予吁嗟还独语，
曾与君家邻舍住。当时妾嫁与征人，几向墙头诮夫主。
花开叶落何推迁，屈指数当三十年。眉头薤叶同枯叶，
琴上朱弦成断弦。嫁时宝镜依然在，鹊影菱花满光彩。
梦里长嗟离别多，愁中不觉容颜改。叹息人生能几何，
喜君颜貌未蹉跎。因君下马重相顾，请奏青门肠断歌。

卷 548_5 【醉春风】

薛逢

去年春似今年春，依旧野花愁杀人。犍为县里古城上，
开是好花飞是尘。戏蝶狂蜂相往返，一枝花上声千万。
时节先从暖处开，北枝未发南枝晚。江城太守须髯苍，
忽然置酒开华堂。歌儿舞女亦随后，暂醉始知天地长。
顷年曾作东周掾，同舍寻春屡开宴。斗门亭上柳如丝，
洛水桥边月如练。洛阳风俗不禁街，骑马夜归香满怀。
坐客争吟云碧句，美人醉赠珊瑚钗。日往月来何草草，
今年又校三年老。槽中骏马不能骑，惆怅落花开满道。
为报时人知不知，看花对酒定无疑。君看野外孤坟下，
石羊石马是谁家？

卷 548_6 【邻相反行】

薛逢

东家有儿年十五，只向田园独辛苦。夜开沟水绕稻田，
晓叱耕牛垦埧土。西家有儿才弱龄，仪容清峭云鹤形。
涉书猎史无早暮，坐期朱紫如拾青。东家西家两相诮，
西儿笑东东又笑。西云养志与荣名，彼此相非不同调。
东家自云虽苦辛，躬耕早暮及所亲。男婚女爨二十载，
堂上未为衰老人。朝机暮织还充体，余者到兄还及弟。
春秋伏腊长在家，不许妻奴暂违礼。尔今二十方读书，
十年取第三十余。往来途路长离别，几人便得升公车。
纵令得官身须老，衔恤终天向谁道？百年骨肉归下泉，
万里粉榆长秋草。我今躬耕奉所天，耘锄刈获当少年。
面上笑添今日喜，肩头薪续厨中烟。纵使此身头雪白，
又有儿孙还稼穡。家藏一卷古孝经，世世相传皆得力。
为报西家知不知，何须谩笑东家儿。生前不得供甘滑，
殁后扬名徒尔为。

卷 548_7 【灵台家兄古镜歌】

薛逢

一尺圆潭深黑色，篆文如丝人不识。耕夫云住赫连城，
赫连城下亲耕得。镜上磨莹一月余，日中渐见菱花舒。

金膏洗拭銚涩尽，黑云吐出新蟾蜍。人言此是千年物，
百鬼闻之形暗栗，玉匣曾经龙照来，岂宜更鉴农夫质。
有时霹雳半夜惊，窗中飞电如晦明。盘龙鳞胀玉匣溢，
牙爪触风时有声。耕夫不解珍灵异，翻惧赫连神作祟。
十千卖与灵台兄，百丈灵湫坐中至。溢匣水色如玉倾，
儿童不敢窥泓澄。寒光照人近不得，坐愁雷电湫中生。
吾兄吾兄须爱惜，将来慎勿虚抛掷。兴云致雨会有时，
莫遣红妆秽灵迹。

卷 548_8 【观竞渡】

薛逢

三月三日天清明，杨花绕江啼晓莺。使君未出郡斋内，
江上已闻齐和声。使君出时皆有引，马前已被红旗阵。
两岸罗衣破鼻香，银钗照日如霜刃。鼓声三下红旗开，
两龙跃出浮水来。擢影干波飞万剑，鼓声劈浪鸣千雷。
雷声冲急波相近，两龙望标目如瞬。江上人呼霹雳声，
竿头彩挂虹霓晕。前船抢水已得标，后船失势空挥橈。
疮眉血首争不定，输岸一朋心似烧。只将标示输赢赏，
两岸十舟五来往。须臾戏罢各东西，竟脱文身请书上。
吾今细观竞渡儿，何殊当路权相持。不思得所各休去，
会到摧舟折楫时。

卷 548_9 【酬牛秀才登楼见示】

薛逢

旅馆再经秋，心烦懒上楼。年光同过隙，人事且随流。
骨肉凭书问，乡关托梦游。所嗟山郡酒，倾尽只添忧。

卷 548_10 【夏夜宴明月湖】

薛逢

夏夜宴南湖，琴觞兴不孤。月摇天上桂，星泛浦中珠。
助照萤随舫，添盘笋进厨。圣朝思静默，堪守谷中愚。

卷 548_11 【大水】

薛逢

暴雨逐惊雷，从风忽骤来。浪驱三岛至，江拆二仪开。
势恐圆枢折，声疑厚轴摧。冥心问元化，天眼几时回。

卷 548_12 【席上酬东川严中丞叙旧见赠】

薛逢

昔记披云日，今逾二十年。声名俱是梦，恩旧半归泉。
朱绂惭衰齿，红妆惨别筵。离歌正凄切，休更促危弦。

卷 548_13 【禁火】

薛逢

日日冒烟尘，忽忽禁火辰。塞榆关水湿，边草贼回春。
岁月伤风迈，疮痍念苦辛。沙中看白骨，肠断故乡人。

卷 548_14 【咏柳】

薛逢

弱植惊风急自伤，暮来翻遣思悠扬。曾飘紫陌随高下，
敢拂朱阑竞短长。萦砌乍飞还乍舞，扑池如雪又如霜。
莫令岐路频攀折，渐拟垂阴到画堂。

卷 548_15 【宫词】

薛逢

十二楼中尽晓妆，望仙楼上望君王。锁衔金兽连环冷，
水滴铜龙昼漏长。云髻罢梳还对镜，罗衣欲换更添香。
遥窥正殿帘开处，袍袴宫人扫御床。

卷 548_16 【长安春日】

薛逢

穷途日日困泥沙，上苑年年好物华。荆棘不当车马道，
管弦长奏绮罗家。王孙草上悠扬蝶，少女风前烂熳花。
懒出任从游子笑，入门还是旧生涯。

卷 548_17 【韦寿博书斋】

薛逢

玄晏先生已白头，不随鸂鶒狎群鸥。元卿谢免开三径，
平仲朝归卧一裘。醉后独知殷甲子，病来犹作晋春秋。
尘缨未濯今如此，野水无情处处流。

卷 548_18 【潼关河亭】

薛逢

重冈如抱岳如蹲，屈曲秦川势自尊。天地并功开帝宅，
山河相凑束龙门。橹声呕轧中流渡，柳色微茫远岸村。
满眼波涛终古事，年来惆怅与谁论。

卷 548_19 【送衢州崔员外】

薛逢

笑分铜虎别京师，岭下山川想到时。红树暗藏殷浩宅，
绿萝深覆偃王祠。风茅向暖抽书带，露竹迎风舞钓丝。
休指岩西数归日，知君已负白云期。

卷 548_20 【开元后乐】

薛逢

莫奏开元旧乐章，乐中歌曲断人肠。邠王玉笛三更咽，
虢国金车十里香。一自犬戎生蓟北，便从征战老汾阳。
中原骏马搜求尽，沙苑年来草又芳。

卷 548_21 【汉武宫辞】

薛逢

汉武清斋夜筑坛，自斟明水醮仙官。殿前玉女移香案，
云际金人捧露盘。绛节几时还入梦，碧桃何处更骖鸾。
茂陵烟雨埋弓箭，石马无声蔓草寒。

卷 548_22 【潼关驿亭】

薛逢

河上关门日日开，古今名利旋堪哀。终军壮节埋黄土，
杨震丰碑翳绿苔。寸禄应知沾有分，一官常惧处非才。
犹惊往岁同袍者，尚逐江东计吏来。

卷 548_23 【五峰隐者】

薛逢

烟霞壁立水溶溶，路转崖回旦暮中。鸂鶒畏人沈涧月，
山羊投石挂岩松。高斋既许陪云宿，晚稻何妨为客舂。
今日见君嘉遁处，悔将名利役疏慵。

卷 548_24 【上吏部崔相公】

薛逢

龙门曾共战惊澜，雷电浮云出浚湍。紫府有名同羽化，
碧霄无路却泥蟠。公车未结王生袜，客路虚弹贡禹冠。
今日垆锤任真宰，暂回风水不应难。

卷 548_25 【送刘郎中牧杭州】

薛逢

一州横制浙江湾，台榭参差积翠间。楼下潮回沧海浪，
枕边云起剡溪山。吴江水色连堤阔，越俗春声隔岸还。
圣代牧人无远近，好将能事济清闲。

卷 548_26 【贫女吟】

薛逢

残妆满面泪阑干，几许幽情欲话难。云髻懒梳愁拆凤，
翠蛾羞照恐惊鸾。南邻送女初鸣珮，北里迎妻已梦兰。
惟有深闺憔悴质，年年长凭绣床看。

卷 548_27 【夜宴观妓】

薛逢

灯火荧煌醉客豪，卷帘罗绮艳仙桃。纤腰怕束金蝉断，
鬓发宜簪白燕高。愁傍翠蛾深八字，笑回丹脸利双刀。
无因得荐阳台梦，愿拂余香到缊袍。

卷 548_28 【送西川杜司空赴镇】

薛逢

黑眉玄发尚依然，紫绶金章五十年。三入凤池操国柄，
八分龙节付兵权。东周城阙中天外，西蜀楼台落日边。
莫遣洪垆旷真宰，九流人物待陶甄。

卷 548_29 【长安夜雨】

薛逢

滞雨通宵又彻明，百忧如草雨中生。心关桂玉天难晓，
运落风波梦亦惊。压树早鸦飞不散，到窗寒鼓湿无声。
当年志气俱消尽，白发新添四五茎。

卷 548_30 【猎骑】

薛逢

兵印长封入卫稀，碧空云尽早霜微。浣川桑落雕初下，
渭曲禾收兔正肥。陌上管弦清似语，草头弓马疾如飞。
岂知万里黄云戍，血迸金疮卧铁衣。

卷 548_31 【金城宫】

薛逢

忆昔明皇初御天，玉舆频此驻神仙。龙盘藻井喷红艳，
兽坐金床吐碧烟。云外笙歌岐薛醉，月中台榭后妃眠。
自从戎马生河雒，深锁蓬莱一百年。

卷 548_32 【惊秋】

薛逢

露竹风蝉昨夜秋，百年心事付东流。明霜义分成虚话，
阜俗文章惜暗投。长笑李斯称溷鼠，每多庄叟喻牺牛。
五湖烟水盈归梦，芦荻花中一钓舟。

卷 548_33 【六街尘】

薛逢

六街尘起鼓冬冬，马足车轮在处通。百役并驱衣食内，
四民长走路岐中。年光与物随流水，世事如花落晓风。
名利到身无了日，不知今古旋成空。

卷 548_34 【悼古】

薛逢

细推今古事堪愁，贵贱同归土一丘。汉武玉堂人岂在，
石家金谷水空流。光阴自旦还将暮，草木从春又到秋。
闲事与时俱不了，且将身暂醉乡游。

卷 548_35 【九华观废月池】

薛逢

曾发箫声水槛前，夜蟾寒沼两婵娟。微波有恨终归海，
明月无情却上天。白鸟带将林外雪，绿荷枯尽渚中莲。
荣华不肯人间住，须读庄生第一篇。

卷 548_36 【社日游开元观】

薛逢

松柏当轩蔓桂篱，古坛衰草暮风吹。荒凉院宇无人到，
寂寞烟霞只自知。浪渍法堂余像设，水存虚殿半科仪。
因求天宝年中梦，故事分明载折碑。

卷 548_37 【九日曲池游眺】

薛逢

陌上秋风动酒旗，江头丝竹竞相追。正当海晏河清日，
便是修文偃武时。绣毂尽为行乐伴，艳歌皆属太平诗。
微臣幸忝颁尧历，一望郊原惬所思。

卷 548_38 【九日郡斋有感】

薛逢

白日贪长夜更长，百般无意更思量。三冬不见秦中雪，
九日惟添鬓畔霜。霞泛水文沈暮色，树凌金气发秋光。
楼前野菊无多少，一雨重开一番黄。

卷 548_39 【九日嘉州发军亭即事】

薛逢

三江分注界平沙，何处云山是我家。舞鹤洲中翻白浪，
掬金滩上折黄花。不愁故国归无日，却恨浮名苦有涯。
向暮酒酣宾客散，水天狼藉变余霞。

卷 548_40 【九日雨中言怀】

薛逢

糕果盈前益自愁，那堪风雨滞刀州。单床冷席他乡梦，
紫楸黄花故国秋。万里音书何寂寂，百年生计甚悠悠。
潜将满眼思家泪，洒寄长江东北流。

卷 548_41 【题剑门先寄上西蜀杜司徒】

薛逢

峭壁横空限一隅，划开元气建洪枢。梯航百货通邦计，
键闭诸蛮屏帝都。西蹙犬戎威北狄，南吞荆郢制东吴。
千年管钥谁熔范，只自先天造化炉。

卷 548_42 【八月初一驾幸延喜楼看冠带降戎】

薛逢

城头旭日照阑干，城下降戎彩仗攒。九陌尘埃千骑合，
万方臣妾一声欢。楼台乍仰中天易，衣服初回左衽难。
清水莫教波浪浊，从今赤岭属长安。

卷 548_43 【送司徒相公赴阙】

薛逢

丞相衔恩赴阙时，锦城寒菊始离披。龙媒旧识朝天路，
鸡树长虚入梦枝。十载殿廷连步武，两来庸蜀抚疲羸。
莫愁中土无人识，自有明明圣主知。

卷 548_44 【送灵州田尚书】

薛逢

阴风猎猎满旗竿，白草飏飏剑气攒。九姓羌浑随汉节，
六州蕃落从戎鞍。霜中入塞雕弓硬，月下翻营玉帐寒。
今日路傍谁不指，穰苴门户惯登坛。

卷 548_45 【座中走笔送前萧使君】

薛逢

笙歌惨惨咽离筵，槐柳阴阴五月天。未学苏秦荣佩印，
却思平子赋归田。芙蓉欲绽溪边蕊，杨柳初迷渡口烟。
自笑无成今老大，送君垂泪郭门前。

卷 548_46 【重送徐州李从事商隐】

薛逢

晓乘征骑带犀渠，醉别都门惨袂初。莲府望高秦御史，
柳营官重汉尚书。斩蛇泽畔人烟晓，戏马台前树影疏。
尺组挂身何用处，古来名利尽丘墟。

卷 548_47 【醉中闻甘州】

薛逢

老听笙歌亦解愁，醉中因遣合甘州。行追赤岭千山外，
坐想黄河一曲流。日暮岂堪征妇怨，路傍能结旅人愁。
左绵刺史心先死，泪满朱弦催白头。

卷 548_48 【北亭醉后叙旧赠东川陈书记】

薛逢

二十年前事尽空，半随波浪半随风。谋身喜断韩鸡尾，
辱命羞携楚鹊笼。符竹谬分锦水外，妻孥犹隔散关东。
临岐莫怪朱弦绝，曾是君家入爨桐。

卷 548_49 【宣政殿前陪位观册顺宗宪宗皇帝尊号】

薛逢

楼头钟鼓递相催，曙色当衙晓仗开。孔雀扇分香案出，
袞龙衣动册函来。金泥照耀传中旨，玉节从容引上台。
盛礼永尊徽号毕，圣慈南面不胜哀。

卷 548_50 【元日楼前观仗】

薛逢

千门曙色锁寒梅，五夜疏钟晓箭催。宝马占堤朝阙去，
香车争路进名来。天临玉几班初合，日照金鸡仗欲回。
更傍紫微瞻北斗，上林佳气满楼台。

瞳瞳初日照楼台，漠漠祥云雉扇开。星驻冕旒三殿晓，
云翻珠翠六宫来。山呼圣寿烟霞动，风转金章鸟兽回。
欲识普恩无远近，万方欢忭一声雷。

卷 548_51 【醉中看花因思去岁之任】

薛逢

去岁乘轺出上京，军机旦暮促前程。狂花野草途中恨，
春月秋风剑外情。愁见瘴烟遮路色，厌闻溪水下滩声。
不辞醉伴诸年少，羞对红妆白发生。

卷 548_52 【题白马驿】

薛逢

晚麦芒干风似秋，旅人方作蜀门游。家林渐隔梁山远，
客路长依汉水流。满壁存亡俱是梦，百年荣辱尽堪愁。
胸中愤气文难遣，强指丰碑哭武侯。

卷 548_53 【题筹笔驿】

薛逢

天地三分魏蜀吴，武侯崛起赞訃谟。身依豪杰倾心术，

目对云山演阵图。赤伏运衰功莫就，皇纲力振命先祖。
出师表上留遗恳，犹自千年激壮夫。

卷 548_54 【贺杨收作相】

薛逢

阙下憧憧车马尘，沈浮相次宦游身。须知金印朝天客，
同是沙堤避路人。威凤偶时因瑞圣，应龙无水漫通神。
立门不是趋时客，始向穷途学问津。

卷 548_55 【元日田家】

薛逢

南村晴雪北村梅，树里茅檐晓尽开。蛩榼出门儿妇去，
乌龙迎路女郎来。相逢但祝新正寿，对举那愁暮景催。
长笑士林因宦别，一官轻是十年回。

卷 548_56 【送庆上人归湖州因寄道儒座主】

薛逢

上人今去白蘋洲，雪水苕溪我旧游。夜雨暗江渔火出，

夕阳沈浦雁花收。闲听别鸟啼红树，醉看归僧棹碧流。
若见儒公凭寄语，数茎霜鬓已惊秋。

卷 548_57 【早发剡山】

薛逢

正怀何谢俯长流，更览余封识嵊州。树色老依官舍晚，
溪声凉傍客衣秋。南岩气爽横郭郭，天姥云晴拂寺楼。
日暮不堪还上马，蓼花风起路悠悠。

卷 548_58 【题春台观】

薛逢

殿前松柏晦苍苍，杏绕仙坛水绕廊。垂露额题精思院，
博山炉袅降真香。苔侵古碣迷陈事，云到中峰失上方。
便拟寻溪弄花去，洞天谁更待刘郎。

卷 548_59 【春晚东园晓思】

薛逢

剑外春余日更长，东园留醉乐高张。松杉露滴无情泪，

桃杏风飘不语香。莺恋叶深啼绿树，燕窥巢稳坐雕梁。
也知留滞年华晚，争那樽前乐未央。

卷 548_60 【芙蓉溪送前资州裴使君归京宁拜户部裴侍郎】

薛逢

桑柘林枯荞麦干，欲分离袂百忧攒。临溪莫话前途远，
举酒须歌后会难。薄宦未甘霜发改，夹衣犹耐水风寒。
遥知阮巷归宁日，几院儿童候马看。

卷 548_61 【伏闻令公疾愈对见延英，因有贺诗远封投献】

薛逢

吉语云云海外传，令公疾愈起朝天。皇风再扇寰区内，
人镜重开日月边。光启四门通寿域，深疏万顷溉情田。
陪臣自讶迷津久，愿识方舟济巨川。

卷 548_62 【题独孤处士村居】

薛逢

江上园庐荆作扉，男驱耕犊妇鸣机。林峦当户茑萝暗，

桑柘绕村姜芋肥。几亩稻田还谓业，两间茆舍亦言归。
何如一被风尘染，到老云云相是非。

卷 548_63 【题上皇观】

薛逢

狂寇穷兵犯帝畿，上皇曾此振戎衣。门前卫士传清警，
砌下奚官扫翠微。云驻寿宫三洞后，日回仙仗六龙归。
当时丹凤衔书处，老柏苍苍已合围。

卷 548_64 【奉和仆射相公送东川李支使归使府夏侯相公】

薛逢

两地交通布政和，上台深喜使星过。欢留白日千钟酒，
调入青云一曲歌。寒柳翠添微雨重，腊梅香绽细枝多。
平津万一言卑散，莫忘高松寄女萝。

卷 548_65 【送封尚书节制兴元】

薛逢

大封茅土镇褒中，醉出都门杀气雄。陌上晚花迎虎节，

马前新月学弯弓。珂临响涧声先合，旆到春山色更红。
欲识真心报天子，满旗全是发生风。

卷 548_66 【送西川梁常侍之新筑龙山城，并锡赉两州刺史及部落酋长等】

薛逢

圣主忧夷貊，屯师剪束欽。皇家思眷祐，星使忽登临。
用命期开国，违天必衅碇。化须均草树，恩不间飞沈。
束马凌苍壁，扪萝上碧岑。瘴川风自热，剑阁气长阴。
迅濂从天急，乔松入地深。仰观唯一径，俯瞰即千寻。
水作新城带，山为故垒襟。东开洞君听，南辟纳蛮心。
渥泽濡三部，衣冠化雨林。带文雕白玉，符理篆黄金。
鸟道经邛樊，星缠过觜参。回轩如睿奖，休作苦辛吟。

卷 548_67 【河满子】

薛逢

系马宫槐老，持杯店菊黄。故交今不见，流恨满川光。

卷 548_68 【题黄花驿】

薛逢

孤戍迢迢蜀路长，鸟鸣山馆客思乡。
更看绝顶烟霞外，数树岩花照夕阳。

卷 548_69 【凉州词】

薛逢

昨夜蕃兵报国仇，沙州都护破凉州。
黄河九曲今归汉，塞外纵横战血流。

卷 548_70 【嘉陵江】

薛逢

备问嘉陵江水湄，百川东去尔西之。
但教清浅源流在，天路朝宗会有期。

卷 548_71 【观猎】

薛逢

马缩寒毛鹰落膘，角弓初暖箭新调。
平原踏尽无禽出，竟日翻身望碧霄。

卷 548_72 【狼烟】

薛逢

三道狼烟过碛来，受降城上探旗开。
传声却报边无事，自是官军入抄回。

卷 548_73 【侠少年】

薛逢

绿眼胡鹰踏锦鞯，五花骢马白貂裘。
往来三市无人识，倒把金鞭上酒楼。

卷 548_74 【感塞】

薛逢

满塞旌旗镇上游，各分天子一方忧。
无因得见歌舒翰，可惜西山十八州。

卷 548_75 【听曹刚弹琵琶】

薛逢

禁曲新翻下玉都，四弦振触五音殊。
不知天上弹多少，金凤衔花尾半无。

卷 548_76 【定山寺】

薛逢

十里松萝映碧苔，一川晴色镜中开。
遥闻上界翻经处，片片香云出院来。

卷 548_77 【越王楼送高梓州入朝】

薛逢

乘递初登建外州，倾心喜事富人侯。让当游艺依仁日，
便到攀辕卧辙秋。容听巴歌消子夜，许陪仙躅上危楼。
欲知恨恋情深处，听取长江旦暮流。

卷 548_78 【送李蕴赴郑州因献卢郎中】

薛逢

仆射陂西想到时，满川晴色见旌旗。马融闲卧笛声远，
王粲醉吟楼影移。几日赋诗秋水寺，经年草诏白云司。
唯君此去人多美，却是恩深自不知。

卷 548_79 【送裴评事】

薛逢

塞垣从事识兵机，只拟平戎不拟归。入夜笳声含白发，
报秋榆叶落征衣。城临战垒黄云晚，马渡寒沙夕照微。
此别不应书断绝，满天霜雪有鸿飞。

卷 548_80 【送沈单作尉江都】

薛逢

炀帝都城春水边，笙歌夜上木兰船。三千宫女自涂地，
十万人家如洞天。焰焰花枝官舍晚，重重云影寺墙连。
少年作尉须矜慎，莫向楼前坠马鞭。

卷 548_81 【送薛耽先辈归谒汉南】

薛逢

云绕千峰驿路长，谢家联句待檀郎。手持碧落新攀桂，
月在东轩旧选床。几日旌幢延骏马，到时冰玉动华堂。
孔门多少风流处，不遣颜回识醉乡。

卷 548_82 【送同年郑祥先辈归汉南】

薛逢

年来惊喜两心知，高处同攀次第枝。人倚绣屏闲赏夜，
马嘶花径醉归时。声名本自文章得，藩溷曾劳笔砚随。
家去恩门四千里，只应从此梦旌旗。

卷 548_83 【李先辈擢第东归有赠送】

薛逢

金榜前头无是非，平人分得一枝归。正怜日暖云飘路，
何处宴回风满衣。门掩长淮心更远，渡连芳草马如飞。
茂陵自笑犹多病，空有书斋在翠微。

卷 548_84 【送韩绛归淮南寄韩绰先辈】

薛逢

岛上花枝系钓船，隋家宫畔水连天。江帆自落鸟飞外，
月观静依春色边。门巷草生车辙在，朝廷恩及雁行联。
相逢且问昭州事，曾鼓庄盆对逝川。

卷 548_85 【送卢纶归扬州】

薛逢

曾向雷塘寄掩扉，荀家灯火有余辉。关河日暮望空极，
杨柳渡头人独归。隋苑荒台风袅袅，灞陵残雨梦依依。
今年春色还相误，为我江边谢钓矶。

卷 548_86 【送剡客】

薛逢

两重江外片帆斜，数里林塘绕一家。门掩右军余水石，
路横诸谢旧烟霞。扁舟几处逢溪雪，长笛何人怨柳花。
若到天台洞阳观，葛洪丹井在云涯。

卷 548_87 【凉州词】

薛逢

千里东归客，无心忆旧游。挂帆游□水，高枕到青州。
君住孤山下，烟深夜径长。辕门渡绿水，游苑绕垂杨。
树发花如锦，莺啼柳若丝。更游欢宴地，愁见别离时。

卷 548_88 【送萧俛相公归山】

薛逢

眼前轩冕是鸿毛，天上人情谩自劳。
脱却朝衣便东去，青云不及白云高。

卷 548_89 【石膏枕】

薛逢

表里通明不假雕，冷于春雪白于瑶。
朝来送在凉床上，只怕风吹日炙销。

卷 548_90 【句】

薛逢

草荒留客院，泥卧喂生台。

碧碎鸳鸯瓦，香埋菡萏垆。

初日晖晖上彩旂。

金鞍俯鞚尘开处，银镝离弦中处声。

昨日鸿毛万钧重，今朝山岳一朝轻。

第五百四十九卷

卷 549_1 【汾上宴别】

赵嘏

云物如故乡，山川知异路。年来未归客，马上春色暮。
一尊花下酒，残日水西树。不待管弦终，摇鞭背花去。

卷 549_2 【书斋雪后】

赵嘏

拥褐坐茅檐，春晴喜初日。微风入桃径，爽气归缥帙。
频时苦风雪，就景理巾栉。树暖高鸟来，窗闲曙云出。
乡遥路难越，道蹇时易失。欲静又不能，东山负芝朮。

卷 549_3 【寄道者】

赵嘏

洞庭先生归路长，海云望极春茫茫。

别来几度向蓬岛，自傍瑶台折灵草。

卷 549_4 【虎丘寺赠渔处士】

赵嘏

兰若云深处，前年客重过。岩空秋色动，水阔夕阳多。
早负江湖志，今如鬓发何。唯思闲胜我，钓艇在烟波。

卷 549_5 【陪崔璞侍御和崔璘春日有怀】

赵嘏

诗家本多感，况值广陵春。暖驻含窗日，香余醉袖尘。
浮名皆有分，一笑最关身。自此容依托，清才两故人。

卷 549_6 【昔昔盐二十首·垂柳覆金堤】

赵嘏

新年垂柳色，袅袅对空闺。不畏芳菲好，自缘离别啼。
因风飘玉户，向日映金堤。驿使何时度，还将赠陇西。

卷 549_7【昔昔盐二十首·靡芜叶复齐】

赵嘏

提筐红叶下，度日采靡芜。掬翠香盈袖，看花忆故夫。
叶齐谁复见，风暖恨偏孤。一被春光累，容颜与昔殊。

卷 549_8【昔昔盐二十首·水溢芙蓉沼】

赵嘏

渌沼春光后，青青草色浓。绮罗惊翡翠，暗粉妒芙蓉。
云遍窗前见，荷翻镜里逢。将心托流水，终日渺无从。

卷 549_9【昔昔盐二十首·花飞桃李蹊】

赵嘏

远期难可托，桃李自依依。花径无容迹，戎裘未下机。
随风开又落，度日扫还飞。欲折枝枝赠，那知归不归。

卷 549_10 【昔昔盐二十首 · 采桑秦氏女】

赵嘏

南陌采桑出，谁知妾姓秦。独怜倾国貌，不负早莺春。
珠履荡花湿，龙钩折桂新。使君那驻马，自有侍中人。

卷 549_11 【昔昔盐二十首 · 织锦窦家妻】

赵嘏

当年谁不羨，分作窦家妻。锦字行行苦，罗帏日日啼。
岂知登陇远，只恨下机迷。直候阳关使，殷勤寄海西。

卷 549_12 【昔昔盐二十首 · 关山别荡子】

赵嘏

那堪闻荡子，迢递涉关山。肠为马嘶断，衣从泪滴斑。
愁看塞上路，讵惜镜中颜。傥见征西雁，应传一字还。

卷 549_13 【昔昔盐二十首 · 风月守空闺】

赵嘏

良人犹远戍，耿耿夜闺空。绣户流宵月，罗帏坐晚风。
魂飞沙帐北，肠断玉关中。尚自无消息，锦衾那得同。

卷 549_14 【昔昔盐二十首 · 恒敛千金笑】

赵嘏

玉颜恒自敛，羞出镜台前。早惑阳城客，今悲华锦筵。
从军人更远，投喜鹊空传。夫婿交河北，迢迢路几千。

卷 549_15 【昔昔盐二十首 · 长垂双玉啼】

赵嘏

双双红泪堕，度日暗中啼。雁出居延北，人犹辽海西。
向灯垂玉枕，对月洒金闺。不惜罗衣湿，惟愁归意迷。

卷 549_16 【昔昔盐二十首 · 蟠龙随镜隐】

赵嘏

鸾镜无由照，蛾眉岂忍看。不知愁发换，空见隐龙蟠。
那惬红颜改，偏伤白日残。今朝窥玉匣，双泪落阑干。

卷 549_17 【昔昔盐二十首 · 彩凤逐帷低】

赵嘏

巧绣双飞凤，朝朝伴下帷。春花那见照，暮色已频欺。
欲卷思君处，将啼裛泪时。何年征戍客，传语报佳期。

卷 549_18 【昔昔盐二十首 · 惊魂同夜鹊】

赵嘏

万里无人见，众情难与论。思君常入梦，同鹊屡惊魂。
孤寝红罗帐，双啼玉箸痕。妾心甘自保，岂复暂忘恩。

卷 549_19 【昔昔盐二十首 · 倦寝听晨鸡】

赵嘏

去去边城骑，愁眠掩夜闺。披衣窥落月，拭泪待鸣鸡。
不愤连年别，那看长夜啼。功成应自恨，早晚发辽西。

卷 549_20 【昔昔盐二十首 · 暗牖悬蛛网】

赵嘏

暗中蛛网织，历乱绮窗前。万里终无信，一条徒自悬。
分从珠露滴，愁见隙风牵。妾意何聊赖，看看剧断弦。

卷 549_21 【昔昔盐二十首 · 空梁落燕泥】

赵嘏

春至今朝燕，花时伴独啼。飞斜珠箔隔，语近画梁低。
帷卷闲窥户，床空暗落泥。谁能长对此，双去复双栖。

卷 549_22 【昔昔盐二十首 · 前年过代北】

赵嘏

代北几千里，前年又复经。燕山云自合，胡塞草应青。
铁马喧鼙鼓，蛾眉怨锦屏。不知羌笛曲，掩泪若为听。

卷 549_23 【昔昔盐二十首 · 今岁往辽西】

赵嘏

万里飞书至，闻君已渡辽。只谙新别苦，忘却旧时娇。
烽戍年将老，红颜日向凋。胡沙兼汉苑，相望几迢迢。

卷 549_24 【昔昔盐二十首 · 一去无还意】

赵嘏

良人征绝域，一去不言还。百战攻胡虏，三冬阻玉关。
萧萧边马思，猎猎戍旗闲。独抱千重恨，连年未解颜。

卷 549_25 【昔昔盐二十首·那能惜马蹄】

赵嘏

云中路杳杳，江畔草凄凄。妾久垂珠泪，君何惜马蹄。
边风悲晓角，营月怨春鼙。未道休征战，愁眉又复低。

卷 549_26 【送韦处士归省朔方】

赵嘏

映柳见行色，故山当落晖。青云知己殁，白首一身归。
满袖萧关雨，连沙塞雁飞。到家翻有喜，借取老莱衣。

卷 549_27 【送权先辈归觐信安】

赵嘏

衣彩独归去，一枝兰更香。马嘶芳草渡，门掩百花塘。
野色亭台晚，滩声枕簟凉。小斋松岛上，重叶覆书堂。

卷 549_28 【风蝉】

赵嘏

风蝉旦夕鸣，伴夜送秋声。故里客归尽，水边身独行。
噪轩高树合，惊枕暮山横。听处无人见，尘埃满甌生。

卷 549_29 【重寄卢中丞】

赵嘏

贱子来还去，何人伴使君。放歌迎晚醉，指路上高云。
此夜雁初至，空山雨独闻。别多头欲白，惆怅惜余醺。

卷 549_30 【晓发】

赵嘏

旅行宜早发，况复是南归。月影缘山尽，钟声隔浦微。
星残萤共映，叶落鸟惊飞。去去渡南渚，村深人出稀。

卷 549_31 【送友人郑州归觐】

赵嘏

为有趋庭恋，应忘道路赊。风消荥泽冻，雨静圃田沙。
古陌人来远，遥天雁势斜。园林新到日，春酒酌梨花。

卷 549_32 【洛中逢卢郢石归觐】

赵嘏

不堪俱失意，相送出东周。缘切倚门恋，倍添为客愁。
春山和雪静，寒水带冰流。别后期君处，灵源紫阁秋。

卷 549_33 【赠越客】

赵嘏

故国波涛隔，明时心久留。献书双阙晚，看月五陵秋。
南棹何当返，长江忆共游。定知钓鱼伴，相望在汀州。

卷 549_34 【经无锡县醉后吟】

赵嘏

客过无名姓，扁舟系柳阴。穷秋南国泪，残日故乡心。
京洛衣尘在，江湖酒病深。何须觅陶令，乘醉自横琴。

卷 549_35 【东归道中二首】

赵嘏

平生事行役，今日始知非。岁月老将至，江湖春未归。
传家有天爵，主祭用儒衣。何必劳知己，无名亦息机。

未明唤僮仆，江上忆残春。风雨落花夜，山川驱马人。
星星一镜发，草草百年身。此日念前事，沧洲情更亲。

卷 549_36 【旅次商山】

赵嘏

役役依山水，何曾似问津。断崖如避马，芳树欲留人。
日夕猿鸟伴，古今京洛尘。一枝甘已失，辜负故园春。

卷 549_37 【长洲】

赵嘏

扁舟殊不系，浩荡路才分。范蠡湖中树，吴王苑外云。
悲心人望月，独夜雁离群。明发还驱马，关城见日曛。

卷 549_38 【江边】

赵嘏

终日劳车马，江边款行扉。残花春浪阔，小酒故人稀。
戍鼓客帆远，津云夕照微。何由兄与弟，俱及暮春归。

卷 549_39 【宿灵岩寺】

赵嘏

明月溪头寺，虫声满橘洲。倚栏香径晚，移石太湖秋。
古树云归尽，荒台水更流。无人见惆怅，独上最高楼。

卷 549_40 【越中寺居】

赵嘏

迟客疏林下，斜溪小艇通。野桥连寺月，高竹半楼风。
水静鱼吹浪，枝闲鸟下空。数峰相向绿，日夕郡城东。

卷 549_41 【赠金刚三藏】

赵嘏

心法云无住，流沙归复来。锡随山鸟动，经附海船回。
洗足柳遮寺，坐禅花委苔。惟将一童子，又欲过天台。

卷 549_42 【长安晚秋】

赵嘏

云物凄凉拂曙流，汉家宫阙动高秋。残星几点雁横塞，
长笛一声人倚楼。紫艳半开篱菊静，红衣落尽渚莲愁。
鲈鱼正美不归去，空戴南冠学楚囚。

卷 549_43 【齐安早秋】

赵嘏

流年堪惜又堪惊，砧杵风来满郡城。高鸟过时秋色动，
征帆落处暮云平。思家正叹江南景，听角仍含塞北情。
此日沾襟念岐路，不知何处是前程。

卷 549_44 【东望】

赵嘏

楚江横在草堂前，杨柳洲西载酒船。两见梨花归不得，
每逢寒食一潸然。斜阳映阁山当寺，微绿含风月满川。
同郡故人攀桂尽，把诗吟向沅寥天。

卷 549_45 【长安月夜与友人话故山】

赵嘏

宅边秋水浸苔矶，日日持竿去不归。杨柳风多潮未落，
蒹葭霜冷雁初飞。重嘶匹马吟红叶，却听疏钟忆翠微。
今夜秦城满楼月，故人相见一沾衣。

卷 549_46 【题横水驿双峰院松】

赵嘏

故园溪上雪中别，野馆门前云外逢。白发渐多何事苦，
清阴长是好相容。迎风几拂朝天骑，带月犹含度岭钟。
更忆葛洪丹井畔，数株临水欲成龙。

卷 549_47 【发剡中】

赵嘏

正怀何谢俯长流，更览余封识嵊州。树色老依官舍晚，
溪声凉傍客衣秋。南岩气爽横郛郭，天姥云晴拂寺楼。
日暮不堪还上马，蓼花风起路悠悠。

卷 549_48 【登安陆西楼】

赵嘏

楼上华筵日日开，眼前人事只堪哀。征车自入红尘去，
远水长穿绿树来。云雨暗更歌舞伴，山川不尽别离杯。
无由并写春风恨，欲下郢城首重回。

卷 549_49 【九日陪越州元相燕龟山寺】

赵嘏

佳晨何处泛花游，丞相筵开水上头。双影旆摇山雨霁，
一声歌动寺云秋。林光静带高城晚，湖色寒分半槛流。
共贺万家逢此节，可怜风物似荆州。

卷 549_50 【经汉武泉】

赵嘏

芙蓉苑里起清秋，汉武泉声落御沟。他日江山映蓬鬓，
二年杨柳别渔舟。竹间驻马题诗去，物外何人识醉游。
尽把归心付红叶，晚来随水向东流。

卷 549_51 【曲江春望怀江南故人】

赵嘏

杜若洲边人未归，水寒烟暖想柴扉。故园何处风吹柳，
新雁南来雪满衣。目极思随原草遍，浪高书到海门稀。
此时愁望情多少，万里春流绕钓矶。

卷 549_52 【上令狐相公】

赵嘏

鶚在卿云冰在壺，代天才業奉訏謨。榮同伊陟傳朱戶，
秀比王商入畫圖。昨夜星辰回劍履，前年風月滿江湖。
不知機務時多暇，猶許詩家屬和無。

卷 549_53 【憶山陽】

趙嘏

家在枚皋舊宅邊，竹軒晴與楚坡連。菱荷香繞垂鞭袖，
楊柳風橫弄笛船。城碍十洲烟島路，寺臨千頃夕陽川。
可憐時節堪歸去，花落猿啼又一年。

卷 549_54 【二】

趙嘏

折柳城邊起暮愁，可憐春色獨懷憂。傷心正嘆人間事，
回首更慚江上鷗。鶻鴂聲中寒食雨，芙蓉花外夕陽樓。
憑高滿眼送清渭，去傍故山山下流。

卷 549_55 【送僧归庐山】

赵嘏

禅栖忽忆五峰游，去著方袍谢列侯。经启楼台千叶曙，
锡含风雨一枝秋。题诗片石侵云在，洗钵香泉覆菊流。
却忆前年别师处，马嘶残月虎溪头。

卷 549_56 【赠天卿寺神亮上人】

赵嘏

五看春尽此江濱，花自飄零日自曛。空有慈悲随物念，
已无踪迹在人群。迎秋日色檐前见，入夜钟声竹外闻。
笑指白莲心自得，世间烦恼是浮云。

卷 549_57 【降虏】

赵嘏

广武溪头降虏稀，一声寒角怨金微。河湟不在春风地，
歌舞空裁雪夜衣。铁马半嘶边草去，狼烟高映塞鸿飞。
扬雄尚白相如吃，今日何人从猎归。

卷 549_58 【平戎】

赵嘏

边声一夜殷秋鼙，牙帐连烽拥万蹄。武帝未能忘塞北，
董生才足使胶西。冰横晓渡胡兵合，雪满穷沙汉骑迷。
自古平戎有良策，将军不用倚云梯。

卷 549_59 【宿楚国寺有怀】

赵嘏

风动衰荷寂寞香，断烟残月共苍苍。寒生晚寺波摇壁，
红堕疏林叶满床。起雁似惊南浦棹，阴云欲护北楼霜。
江边松菊荒应尽，八月长安夜正长。

卷 549_60 【早发剡中石城寺】

赵嘏

暂息劳生树色间，平明机虑又相关。吟辞宿处烟霞去，
心负秋来水石闲。竹户半开钟未绝，松枝静霁鹤初还。
明朝一倍堪惆怅，回首尘中见此山。

卷 549_61 【寄归】

赵嘏

三年踏尽化衣尘，只见长安不见春。马过雪街天未曙，
客迷关路泪空频。桃花坞接啼猿寺，野竹庭通画鹢津。
早晚相酬身事了，水边归去一闲人。

卷 549_62 【献淮南李相公】

赵嘏

傅岩高静见台星，庙略当时讨不庭。万里有云归碧落，
百川无浪到沧溟。军中老将传兵术，江上诸侯受政经。
闻道国人思再入，熔金新铸鹤仪形。

卷 549_63 【宛陵寓居上沈大夫二首】

赵嘏

满耳歌谣满眼山，宛陵城郭翠微间。人情已觉春长在，
溪户仍将水共闲。晓色入楼红蔼蔼，夜声寻砌碧潺潺。
幽云高鸟俱无事，晚伴西风醉客还。

溪树参差绿可攀，谢家云水满东山。能忘天上他年贵，
来结林中一日闲。醉叩玉盘歌袅袅，暖鸣幽涧鸟关关。
觥筹不尽须归去，路在春风缥缈间。

卷 549_64 【淮信贺滕迈台州】

赵嘏

凋瘵民思太古风，上贤绥辑副宸衷。舟移清镜禹祠北，
路转翠屏天姥东。旌旆影前横竹马，咏歌声里乐樵童。
遥知到郡沧波晏，三岛离离一望中。

卷 549_65 【下第寄宣城幕中诸公】

赵嘏

一醉曾将万事齐，暂陪欢去便如泥。黄花李白墓前路，
碧浪桓彝宅后溪。九月霜中随计吏，十年江上灌春畦。
莫言春尽不惆怅，自有闲眠到日西。

卷 549_66 【送令狐郎中赴郢州】

赵嘏

佐幕才多始拜侯，一门清贵动神州。霜蹄晓驻秦云断，

野旆晴翻郢树秋。几处尘生随候骑，半江帆尽见分流。
大冯罢相吟诗地，莫惜频登白雪楼。

卷 549_67 【送卢纶归扬州】

赵嘏

曾向雷塘寄掩扉，荀家灯火有余辉。关河日暮望空极，
杨柳渡头人独归。隋苑荒台风袅袅，灞陵残雨梦依依。
今年春色还相误，为我江边谢钓矶。

卷 549_68 【送李裴评事】

赵嘏

塞垣从事识兵机，只拟平戎不拟归。入夜笳声含白发，
报秋榆叶落征衣。城临战垒黄云晚，马渡寒沙夕照微。
此别不应书断绝，满天霜雪有鸿飞。

卷 549_69 【别麻氏】

赵嘏

晓哭呱呱动四邻，于君我作负心人。出门便涉东西路，

回首初惊枕席尘。满眼泪珠和语咽，旧窗风月更谁亲。
分离况值花时节，从此东风不似春。

卷 549_70 【代人赠别】

赵嘏

月自斜窗梦自惊，衷肠中有万愁生。清猿处处三声尽，
碧落悠悠一水横。平子定情词丽绝，诗人匪石誓分明。
会须携手乘鸾去，箫史楼台在玉京。

卷 549_71 【寒食新丰别友人】

赵嘏

一百五日家未归，新丰鸡犬独依依。满楼春色傍人醉，
半夜雨声前计非。缭绕沟塍含绿晚，荒凉树石向川微。
东风吹泪对花落，憔悴故交相见稀。

卷 549_72 【李侍御归山同宿华严寺】

赵嘏

家有青山近玉京，风流柱史早知名。园林手植自含绿，

霄汉眼看当去程。处处白云迷驻马，家家红树近流莺。
相逢一宿最高寺，夜夜翠微泉落声。

卷 549_73 【今年新先辈以遏密之际，每有宴集，必资清谈，
书此奉贺】

赵嘏

天上高高月桂丛，分明三十一枝风。满怀春色向人动，
遮路乱花迎马红。鹤驭回飘云雨外，兰亭不在管弦中。
居然自是前贤事，何必青楼倚翠空。

卷 549_74 【自遣】

赵嘏

晚树疏蝉起别愁，远人回首忆沧洲。江连故国无穷恨，
日带残云一片秋。久客转谙时态薄，多情只共酒淹留。
到头生长烟霞者，须向烟霞老始休。

卷 549_75 【浙东陪元相公游云门寺】

赵嘏

松下山前一径通，烛迎千骑满山红。溪云乍敛幽岩雨，

晓气初高大旆风。小槛宴花容客醉，上方看竹与僧同。
归来吹尽岩城角，路转横塘乱水东。

卷 549_76 【陪韦中丞宴扈都头花园】

赵嘏

门下烟横载酒船，谢家携客醉华筵。寻花偶坐将军树，
饮水方重刺史天。几曲艳歌春色里，断行高鸟暮云边。
分明听得與人语，愿及行春更一年。

卷 549_77 【花园即事呈常】

赵嘏

烟暖池塘柳覆台，百花园里看花来。烧衣焰席三千树，
破鼻醒愁一万杯。不肯为歌随拍落，却因令舞带香回。
山公仰尔延宾客，好傍春风次第开。

卷 549_78 【宿何书记先辈延福新居】

赵嘏

松下有琴闲未收，一灯高为石丛留。诗情似到山家夜，

树色轻含御水秋。小榼提携终永日，半斑容鬓漫生愁。
因君抚掌问时俗，紫阁堆檐不举头。

卷 549_79 【秦中逢王处士】

赵嘏

万水东流去不回，先生独自负仙才。蕊宫横浪海边别，
鹤翅驻云天上来。几处吹箫森羽卫，谁家残月下楼台。
春风正好分琼液，乞取当时白玉杯。

卷 549_80 【江上逢许逸人】

赵嘏

是非处处生尘埃，唯君襟抱无嫌猜。收帆依雁湓浦宿，
带雨别僧衡岳回。芳樽稍驻落日唱，醉袖更拂长云开。
清秋华发好相似，却把钓竿归去来。

卷 549_81 【和令狐补阙春日独游西街】

赵嘏

左掖初辞近侍班，马嘶寻得过街闲。映鞭柳色微遮水，

随步花枝欲碍山。暖泛鸟声来席上，醉从诗句落人间。
此时失意哀吟客，更觉风流不可攀。

卷 549_82 【广陵答崔琛】

赵嘏

棹倚隋家旧院墙，柳金梅雪扑檐香。朱楼映日重重晚，
碧水含光滟滟长。八斗已闻传姓字，一枝何足计行藏。
声名官职应前定，且把旌麾入醉乡。

卷 549_83 【答友人】

赵嘏

诗家才子酒家仙，游宦曾依积水边。窗户动摇三岛树，
琴尊安稳五湖船。罗浮道士分琼液，锦席佳人艳楚莲。
今日相逢朗吟罢，满城砧杵一灯前。

卷 549_84 【送张又新除温州】

赵嘏

东晋江山称永嘉，莫辞红旆向天涯。凝弦夜醉松亭月，

歇马晓寻溪寺花。地与剡川分水石，境将蓬岛共烟霞。
却愁明诏徵非晚，不得秋来见海槎。

卷 549_85 【送滕迈郎中赴睦州】

赵嘏

郡斋秋尽一江横，频命郎官地更清。星月去随新诏动，
旌旗遥映故山明。诗寻片石依依晚，帆挂孤云杳杳轻。
想到钓台逢竹马，只应歌咏伴猿声。

卷 549_86 【送剡客】

赵嘏

两重江外片帆斜，数里林塘绕一家。门掩右军余水石，
路横诸谢旧烟霞。扁舟几处逢溪雪，长笛何人怨柳花。
若到天台洞阳观，葛洪丹井在云涯。

卷 549_87 【李先辈擢第东归有赠送】

赵嘏

金榜前头无是非，平人分得一枝归。正怜日暖云飘路，

何处宴回风满衣。门掩长淮心更远，渡连芳草马如飞。
茂陵自笑犹多病，空有书斋在翠微。

卷 549_88 【送同年郑祥先辈归汉南】

赵嘏

年来惊喜两心知，高处同攀次第枝。人倚绣屏闲赏夜，
马嘶花径醉归时。声名本是文章得，藩阃曾劳笔砚随。
家去恩门四千里，只应从此梦旌旗。

卷 549_89 【送沈单作尉江都】

赵嘏

炀帝都城春水边，笙歌夜上木兰船。三千宫女自涂地，
十万人家如洞天。焰焰花枝官舍晚，重重云影寺墙连。
少年作尉须矜慎，莫向楼前坠马鞭。

卷 549_90 【送李蕴赴郑州因献卢郎中俶】

赵嘏

仆射陂西想到时，满川晴色见旌旗。马融闲卧笛声远，

王粲醉吟楼影移。几日赋诗秋水寺，经年草诏白云司。
唯君此去人多羨，却是恩深自不知。

卷 549_91 【送韩绛归淮南寄韩绰先辈】

赵嘏

岛上花枝系钓船，隋家宫畔水连天。江帆自落鸟飞外，
月观静依春色边。门巷草生车辙在，朝廷恩及雁行联。
相逢且问昭州事，曾鼓庄盆对逝川。

卷 549_92 【送薛耽先辈归谒汉南】

赵嘏

雪绕千峰驿路长，谢家联句待檀郎。手持碧落新攀桂，
月在东轩旧选床。几日旌幢延骏马，到时冰玉动华堂。
孔门多少风流处，不遣颜回识醉乡。

卷 549_93 【送陈嘏登第作尉归觐】

赵嘏

千峰归去旧林塘，溪县门前即故乡。曾把桂夸春里巷，

重怜身称锦衣裳。洲迷翠羽云遮檻，露湿红蕉月满廊。
就养举朝人共羨，清资让却校书郎。

卷 549_94 【送裴延翰下第归觀滁州】

赵嘏

失意何曾恨解携，问安归去秣陵西。郡斜杨柳春风岸，
山映楼台明月溪。江上诗书悬素业，日边门户倚丹梯。
一枝攀折回头是，莫向清秋惜马蹄。

卷 549_95 【题崇圣寺简云端僧录】

赵嘏

暮尘飘尽客愁长，来扣禅关月满廊。宋玉逢秋空雪涕，
净名无地可容床。高云覆檻千岩树，疏磬含风一夜霜。
回首故园红叶外，只将多病告医王。

卷 549_96 【越中寺居寄上主人】

赵嘏

野寺初容访静来，晚晴江上见楼台。中林有路到花尽，

一日无人看竹回。自晒诗书经雨后，别留门户为僧开。
苦心若是酬恩事，不敢吟春忆酒杯。

卷 549_97 【早出洞仙观】

赵嘏

露浓如水洒苍苔，洞口烟萝密不开。残月色低当户后，
晓钟声迥隔山来。春生药圃芝犹短，夜醮斋坛鹤未回。
愁是独寻归路去，人间步步是尘埃。

卷 549_98 【题昭应王明府溪亭】

赵嘏

靖节何须彭泽逢，菊洲松岛水悠溶。行人自折门前柳，
高鸟不离溪畔峰。晓渭度檐帆的的，晚原含雨树重重。
轩车过尽无公事，枕上一声长乐钟。

卷 549_99 【赠王先生】

赵嘏

太一真人隐翠霞，早年曾降蔡经家。羽衣使者峭于鹤，

鸟爪侍娘飘若花。九鼎栏干归马齿，三山窈窕步云涯。
时因弟子偷灵药，散落人间驻物华。

卷 549_100 【赠道者】

赵嘏

华盖飘飘绿鬓翁，往来朝谒蕊珠宫。几年山下阴阳鼎，
尽日涧边桃李风。野迹似云无处著，仙容如水与谁同。
应怜有客外妻子，思在长生一顾中。

卷 549_101 【王先生不别而去】

赵嘏

仙翁归袖拂烟霓，一卷素书还独携。劂药满囊身不病，
抱琴何处鹤同栖。沾衣尽日看山坐，搔首残春向路迷。
树树白云幽径绝，短船空倚武陵溪。

卷 549_102 【山阳卢明府以双鹤寄遗，白氏以诗回答，因寄和】

赵嘏

缙山双去羽翰轻，应为仙家好弟兄。茅固枕前秋对舞，

陆云溪上夜同鸣。紫泥封处曾回首，碧落归时莫问程。
自笑沧江一渔叟，何由似尔到层城。

卷 549_103 【赠李秘书】

赵嘏

束带临风气调新，孔门才业独谁伦。杉松韵冷雪溪暗，
鸾鹤势高天路春。美玉韞来休问价，芳枝攀去正无尘。
莫将芸阁轻科第，须作人间第一人。

卷 549_104 【回于道中寄舒州李珣相公】

赵嘏

都无鄙吝隔尘埃，昨日丘门避席来。静语乍临清庙瑟，
披风如在九层台。几烦命妓浮溪棹，再许论诗注酒杯。
从此微尘知感恋，七真台上望三台。

卷 549_105 【舒州献李相公】

赵嘏

野人留得五湖船，丞相兴歌郡国年。醉笔倚风飘润雪，

静襟披月坐楼天。鹤归华表山河在，气返青云雨露全。
闻说万方思旧德，一时倾望重陶甄。

卷 549_106 【成名年献座主仆射兼呈同年】

赵嘏

拂烟披月羽毛新，千里初辞九陌尘。曾失玄珠求象罔，
不将双耳负伶伦。贾嵩词赋相如手，杨乘歌篇李白身。
除却今年仙侣外，堂堂又见两三春。

卷 549_107 【抒怀上歙州卢中丞宣州杜侍郎】

赵嘏

东来珠履与旌旗，前者登朝亦一时。竹马迎呼逢稚子，
柏台长告见男儿。花飘舞袖楼相倚，角送归轩客尽随。
独有贱夫怀感激，十年两地负恩知。

卷 549_108 【山阳韦中丞罢郡因献】

赵嘏

笙歌只是旧笙歌，肠断风流奈别何。照物二年春色在，

感恩千室泪痕多。尽将魂梦随西去，犹望旌旗暂一过。
今日尊前无限思，万重云月隔烟波。

卷 549_109 【山阳即席献裴中丞】

赵嘏

早年天上见清尘，今日楼中醉一春。暂肯剖符临水石，
几曾焚笔动星辰。琼台雪映迢迢鹤，蓬岛波横浩浩津。
好是仙家羽衣使，欲教垂涕问何人。

卷 549_110 【西峰即事献沈大夫】

赵嘏

松竹闲游道路身，衣襟落尽往来尘。山连谢宅余霞在，
水映琴溪旧浪春。拂榻从容今有地，酬恩寂寞久无人。
安知不及屠沽者，曾对青萍泪满巾。

卷 549_111 【杜陵贻杜牧侍御】

赵嘏

紫陌尘多不可寻，南溪酒熟一披襟。山高昼枕石床隐，

泉落夜窗烟树深。白首寻人嗟问计，青云无路觅知音。
唯君怀抱安如水，他日门墙许醉吟。

卷 549_112 【下第后上李中丞】

赵嘏

落第逢人恸哭初，平生志业欲何如。鬓毛洒尽一枝桂，
泪血滴来千里书。谷外风高摧羽翮，江边春在忆樵渔。
唯应感激知恩地，不待功成死有余。

卷 549_113 【浙东赠李副使员外】

赵嘏

妙尽戎机佐上台，少年清苦自霜台。马嘶深竹闲宜贵，
花拂朱衣美称才。早入半缘分务重，晚吟多是看山回。
名高渐少翻飞伴，几度烟霄独去来。

卷 549_114 【寄淮南幕中刘员外】

赵嘏

郎官何逊最风流，爱月怜山不下楼。三佐戎旃换朱绂，

一辞兰省见清秋。桂生岩石本潇洒，鹤到烟空更自由。
休向西斋久闲卧，满朝倾盖是依刘。

卷 549_115 【薛廷范从事自宣城至因赠】

赵嘏

少年从事霍嫖姚，来自枫林度柳桥。金管别筵楼灼灼，
玉溪回首马萧萧。清风气调真君辈，知己风流满圣朝。
独有故人愁欲死，晚檐疏雨动空瓢。

卷 549_116 【寄浔阳赵校书】

赵嘏

帘下秋江夜影空，倚楼人在月明中。不将行止问朝列，
唯脱衣裳与钓翁。几处别巢悲去燕，十年回首送归鸿。
那应更结庐山社，见说心闲胜远公。

卷 549_117 【赠李从贵】

赵嘏

白马嘶风何处还，鞭梢拂地看南山。珠帘卷尽不回首，

春色欲阑休闭关。花外鸟归残雨暮，竹边人语夕阳闲。
知君旧隐嵩云下，岩桂从今几更攀。

卷 549_118 【赠陈正字】

赵嘏

鲁儒今日意何如，名挂春官选籍初。野艇几曾寻水去，
故山从此与云疏。吟怜受露花阴足，行觉嘶风马力余。
闻说晚心心更静，竹间依旧卧看书。

卷 549_119 【洞庭寄所思】

赵嘏

日断兰台空望归，锦衾香冷梦来稀。书中自报刀头约，
天上三看破镜飞。孤浪漫疑红脸笑，轻云忽似舞罗衣。
遥知不语坐相忆，寂寞洞房寒烛微。

卷 549_120 【代人赠杜牧侍御】

赵嘏

郎作东台御史时，妾长西望敛双眉。一从诏下人皆羨，

岂料恩衰不自知。高阙如天萦晓梦，华筵似水隔秋期。
坐来情态犹无限，更向楼前舞柘枝。

卷 549_121 【旅馆闻雁别友人】

赵嘏

路绕秋塘首独搔，背群燕雁正呼号。故关何处重相失，
碧落有云终自高。旅宿去城他日恨，单飞谁见此生劳。
行衣湿尽千山雪，肠断金笼好羽毛。

卷 549_122 【泊凫矶江馆】

赵嘏

风雪晴来岁欲除，孤舟晚下意何如。月当轩色湖平后，
雁断云声夜起初。傍晓管弦何处静，犯寒杨柳绕津疏。
三间茅屋东溪上，归去生涯竹与书。

卷 549_123 【春尽独游慈恩寺南池】

赵嘏

竹外池塘烟雨收，送春无伴亦迟留。秦城马上半年客，

潘鬓水边今日愁。气变晚云红映阙，风含高树碧遮楼。
杏园花落游人尽，独为圭峰一举头。

卷 549_124 【重游楚国寺】

赵嘏

往事飘然去不回，空余山色在楼台。池塘风暖雁寻去，
松桂寺高人独来。庄叟著书真达者，贾生挥涕信悠哉。
老僧心地闲于水，犹被流年日日催。

卷 549_125 【三像寺酬元秘书】

赵嘏

官总芸香阁署崇，可怜诗句落春风。偶然侍坐水声里，
还许醉吟松影中。车马照来红树合，烟霞咏尽翠微空。
不因高寺闲回首，谁识飘飘一寒翁。

卷 549_126 【献淮南李仆射】

赵嘏

早年曾谒富民侯，今日难甘失鹄羞。新诺似山无力负，

旧恩如水满身流。马嘶红叶萧萧晚，日照长江滟滟秋。
功德万重知不惜，一言抛得百生愁。

卷 549_127 【江亭晚望】

赵嘏

碧江凉冷雁来疏，闲望江云思有余。秋馆池亭荷叶歇，
野人篱落豆花初。无愁自得仙翁术，多病能忘太史书。
闻说故园香稻熟，片帆归去就鲈鱼。

卷 549_128 【赠曹处士幽居】

赵嘏

勾漏先生冰玉然，曾将八石问群仙。中山暂醉一千日，
南苑往来三百年。棋局不收花满洞，霓旌欲别浪翻天。
何须更学鸱夷子，头白江湖一短船。

卷 549_129 【重阳日示舍弟】

赵嘏

多少乡心入酒杯，野塘今日菊花开。新霜何处雁初下，

故国穷秋首正回。渐老向人空感激，一生驱马傍尘埃。
侯门无路提携尔，虚共扁舟万里来。

卷 549_130 【客至】

赵嘏

得路逢津更俊才，可怜鞍马照春来。残花几日小斋闭，
大笑一声幽抱开。袖拂碧溪寒缭绕，冠欹红树晚裴回。
相逢少别更堪恨，何必秋风江上台。

第五百五十卷

卷 550_1 【岁暮江轩寄卢端公】

赵嘏

积水生高浪，长风自北时。万艘俱拥棹，上客独吟诗。
路以重湖阻，心将小谢期。渚云愁正断，江雁重惊悲。
笑忆游星子，歌寻罢贵池。梦来孤岛在，醉醒百忧随。
戍迥烟生晚，江寒鸟过迟。问山樵者对，经雨钓船移。
敢叹今留滞，犹胜曩别离。醉从陶令得，善必丈人知。
道蹇才何取，恩深剑不疑。此身同岸柳，只待变寒枝。

卷 550_2 【秋日吴中观贡藕】

赵嘏

野艇几西东，清冷映碧空。褰衣来水上，捧玉出泥中。
叶乱田田绿，莲余片片红。激波才入选，就日已生风。
御洁玲珑膳，人怀拔擢功。梯山谩多品，不与世流同。

卷 550_3 【华清宫和杜舍人】

赵嘏

五十年天子，离宫仰峻墙。登封时正泰，御宇日何长。
上位先名实，中兴事宪章。起戎轻甲冑，余地复河湟。
道帝玄元祖，儒封孔子王。因缘百司署，丛会一人汤。
渭水波摇绿，秦郊草半黄。马驯金勒细，鹰健玉铃锵。
下箭朱弓满，鸣鞭皓腕攘。畋思获吕望，谏只避周昌。
兔迹贪前逐，枭心不早防。几添鹦鹉劝，先赐荔枝尝。
月锁千门静，天吹一笛凉。细音摇羽珮，轻步宛霓裳。
祸乱基潜结，升平意遽忘。衣冠逃犬虏，鼙鼓动渔阳。
外戚心殊迫，中途事可量。血埋妃子艳，创断禄儿肠。
近侍烟尘隔，前踪辇路荒。益知迷宠佞，遗恨丧贤良。
北阙尊明主，南宫逊上皇。禁清余凤吹，池冷睡龙光。
祝寿山犹在，流年水共伤。杜鹃魂厌蜀，蝴蝶梦悲庄。
雀卵遗雕拱，虫丝罥画梁。紫苔侵壁润，红树闭门芳。
守吏齐鸳瓦，耕民得翠珰。登年齐酺乐，讲武旧兵场。
暮草深岩翠，幽花坠径香。不堪垂白叟，行折御沟杨。

卷 550_4 【下第】

赵嘏

南溪抱瓮客，失意自怀羞。晚路谁携手，残春自白头。

卷 550_5 【到家】

赵嘏

童稚苦相问，归来何太迟。共谁争岁月，赢得鬓边丝。

卷 550_6 【春酿】

赵嘏

春酿正风流，梨花莫问愁。马卿思一醉，不惜鹔鹕裘。

卷 550_7 【寒塘】

赵嘏

晓发梳临水，寒塘坐见秋。乡心正无限，一雁度南楼。

卷 550_8 【寄前黄州窦使君】

赵嘏

池上笙歌寂不闻，楼中愁杀碧虚云。

玉壶凝尽重重泪，寄与风流旧使君。

卷 550_9 【八月二十九日宿怀】

赵嘏

秋天晴日菊还香，独坐书斋思已长。
无奈风光易流转，强须倾酒一杯觞。

卷 550_10 【泗上奉送相公】

赵嘏

语堪铭座默含春，西汉公卿绝比伦。
今日抱辕留不得，欲挥双涕学舒人。

卷 550_11 【赠桐乡丞】

赵嘏

舟触长松岸势回，潺湲一夜绕亭台。
若教靖节先生见，不肯更吟归去来。

卷 550_12 【哭李进士】

赵嘏

牵马街中哭送君，灵车辗雪隔城闻。
唯有山僧与樵客，共舁孤柩入幽坟。

卷 550_13 【重阳】

赵嘏

节逢重九海门外，家在五湖烟水东。
还向秋山觅诗句，伴僧吟对菊花风。

卷 550_14 【重阳日即事】

赵嘏

病酒坚辞绮席春，菊花空伴水边身。
由来举止非闲雅，不是龙山落帽人。

卷 550_15 【十无诗寄桂府杨中丞】

赵嘏

琴酒曾将风月须，谢公名迹满江湖。
不知贵拥旌旗后，犹暇怜诗爱酒无。

东省南宫兴不孤，几因诗酒谬招呼。
一从开署芙蓉幕，曾向风前记得无。

遥闻桂水绕城隅，城上江山满画图。
为问訾家洲畔月，清秋拟许醉狂无。

日暮江边一小儒，空怜未有白髭须。
马融已贵诸生老，犹自容窥绛帐无。

一种吟诗号孔徒，沧江有客独疏愚。
初筵尽辟知名士，许到风前月下无。

望断南云日已晡，便应凭梦过重湖。
不知自古登龙者，曾有因诗泥得无。

早游门馆一樵夫，只爱吟诗傍药炉。
旌旆满江身不见，思言记得颍川无。

孔融襟抱称名儒，爱物怜才与世殊。

今日宾阶忘姓字，当时省记荐雄无。

僻爱江山俯坐隅，人间不是便为图。
尊前为问神仙伴，肯向三清慰荐无。

膺门不避额逢珠，绝境由来卷轴须。
早忝阿戎诗友契，趋庭曾荐柅生无。

卷 550_16 【寄山僧】

赵嘏

云里幽僧不置房，橡花藤叶盖禅床。
朝来逢著山中伴，闻说新移最上方。

卷 550_17 【喜张湊及第】

赵嘏

九转丹成最上仙，青天暖日踏云轩。
春风贺喜无言语，排比花枝满杏园。

卷 550_18 【赠张漬榜头被驳落】

赵嘏

莫向花前泣酒杯，谪仙依旧是仙才。
犹堪与世为祥瑞，曾到蓬山顶上来。

卷 550_19 【悼亡二首】

赵嘏

一烛从风到奈何，二年衾枕逐流波。
虽知不得公然泪，时泣阑干恨更多。

明月萧萧海上风，君归泉路我飘蓬。
门前虽有如花貌，争奈如花心不同。

卷 550_20 【宫乌栖】

赵嘏

宫乌栖处玉楼深，微月生檐夜夜心。
香辇不回花自落，春来空佩辟寒金。

卷 550_21 【长信宫】

赵嘏

君恩已尽欲何归，犹有残香在舞衣。
自恨身轻不如燕，春来长绕御帘飞。

卷 550_22 【广陵城】

赵嘏

红映高台绿绕城，城边春草傍墙生。
隋家不向此中尽，汴水应无东去声。

卷 550_23 【冷日过骊山】

赵嘏

冷日微烟渭水愁，翠华宫树不胜秋。
霓裳一曲千门锁，白尽梨园弟子头。

卷 550_24 【下第后归永乐里自题二首】

赵嘏

无地无媒只一身，归来空拂满床尘。
尊前尽日谁相对，唯有南山似故人。

玄发侵愁忽似翁，暖尘寒袖共东风。
公卿门户不知处，立马九衢春影中。

卷 550_25 【出试日独游曲江】

赵嘏

江莎渐映花边绿，楼日自开池上春。
双鹤绕空来又去，不知临水有愁人。

卷 550_26 【题曹娥庙】

赵嘏

青娥埋没此江滨，江树飏飏惨暮云。
文字在碑碑已堕，波涛辜负色丝文。

卷 550_27 【题段氏中台】

赵嘏

看山台下水无尘，碧筱前头曲水春。
独对一尊风雨夜，不知家有早朝人。

卷 550_28 【华州座中献卢给事】

赵嘏

送迎皆到三峰下，满面烟霜满马尘。
自是追攀认知己，青云不假送迎人。

卷 550_29 【商山道中】

赵嘏

和如春色净如秋，五月商山是胜游。
当昼火云生不得，一溪綦作万重愁。

卷 550_30 【赠歙州妓】

赵嘏

滟滟横波思有余，庾楼明月堕云初。
扬州寒食春风寺，看遍花枝尽不如。

卷 550_31 【赠王明府】

赵嘏

五柳逢秋影渐微，陶潜恋酒不知归。
但存物外醉乡在，谁向人间问是非。

卷 550_32 【吕校书雨中见访】

赵嘏

竹阁斜溪小槛明，惟君来赏见山情。
马嘶风雨又归去，独听子规千万声。

卷 550_33 【千秋岭下】

赵嘏

知有岩前万树桃，未逢摇落思空劳。
年年盛发无人见，三十六溪春水高。

卷 550_34 【歙州道中仆逃】

赵嘏

去跳风雨几奔波，曾共辛勤奈若何。
莫遣穷归不知处，秋山重叠戍旗多。

卷 550_35 【重阳日寄韦舍人】

赵嘏

节过重阳菊委尘，江边病起杖扶身。
不知此日龙山会，谁是风流落帽人。

卷 550_36 【赠薛勋下第】

赵嘏

一掷虽然未得卢，惊人不用绕床呼。
牢之坐被青云逼，只问君能酷似无。

卷 550_37 【宛陵望月寄沈学士】

赵嘏

一川如画敬亭东，待诏闲游处处同。
天竺山前镜湖畔，何如今日庾楼中。

卷 550_38 【翡翠岩】

赵嘏

芙蓉幕里千场醉，翡翠岩前半日闲。
惆怅晋朝人不到，谢公抛力上东山。

卷 550_39 【发新安后途中寄卢中丞二首】

赵嘏

楼上风流庾使君，笙歌曾醉此中闻。
目前已是陵阳路，回首丛山满眼云。

晚树萧萧促织愁，风帘似水满床秋。
千山不碍笙歌月，谁伴羊公上夜楼。

卷 550_40 【留题兴唐寺】

赵嘏

满水楼台满寺山，七年今日共跻攀。
月高对菊问行客，去折芳枝早晚还。

卷 550_41 【广陵道】

赵嘏

斗鸡台边花照尘，炀帝陵下水含春。
青云回翅北归雁，白首哭途何处人。

卷 550_42 【茅山道中】

赵嘏

溪树重重水乱流，马嘶残雨晚程秋。
门前便是仙山路，目送归云不得游。

卷 550_43 【江上与兄别】

赵嘏

楚国湘江两渺瀰，暖川晴雁背帆飞。
人间离别尽堪哭，何况不知何日归。

卷 550_44 【落第】

赵嘏

九陌初晴处处春，不能回避看花尘。
由来得丧非吾事，本是钓鱼船上人。

卷 550_45 【宛陵馆冬青树】

赵嘏

碧树如烟覆晚波，清秋欲尽客重过。
故园亦有如烟树，鸿雁不来风雨多。

卷 550_46 【赠五老韩尊师】

赵嘏

有客斋心事玉晨，对山须鬓绿无尘。
住山道士年如鹤，应识当时五老人。

卷 550_47 【经汾阳旧宅】

赵嘏

门前不改旧山河，破虏曾轻马伏波。
今日独经歌舞地，古槐疏冷夕阳多。

卷 550_48 【寄卢中丞】

赵嘏

叶覆清溪滟滟红，路横秋色马嘶风。
独携一榼郡斋酒，吟对青山忆谢公。

卷 550_49 【途中】

赵嘏

故园回首雁初来，马上千愁付一杯。
惟有新诗似相识，暮山吟处共徘徊。

卷 550_50 【寄裴澜】

赵嘏

绮云初堕亭亭月，锦席惟横滟滟波。
宋玉逢秋正高卧，一篇吟尽奈情何。

卷 550_51 【淮南丞相坐赠歌者虞姁】

赵嘏

绮筵无处避梁尘，虞姁清歌日日新。
来值渚亭花欲尽，一声留得满城春。

卷 550_52 【酬段侍御】

赵嘏

莲花上客思闲闲，数首新诗到筭关。
吟得楚天风雨霁，一条江水两三山。

卷 550_53 【寻僧二首】

赵嘏

台殿参差日堕尘，坞西归去一庵云。
寒泉何处夜深落，声隔半岩疏叶闻。

溪户无人谷鸟飞，石桥横木挂禅衣。
看云日暮倚松立，野水乱鸣僧未归。

卷 550_54 【发柏梯寺】

赵嘏

一泓秋水千竿竹，静得劳生半日身。
犹有向西无限地，别僧骑马入红尘。

卷 550_55 【西江晚泊】

赵嘏

茫茫霭霭失西东，柳浦桑村处处同。
戍鼓一声帆影尽，水禽飞起夕阳中。

卷 550_56 【南池】

赵嘏

照影池边多少愁，往来重见此塘秋。
芙蓉苑外新经雨，红叶相随何处流。

卷 550_57 【江楼旧感】

赵嘏

独上江楼思渺然，月光如水水如天。
同来望月人何处，风影依稀似去年。

卷 550_58 【南园】

赵嘏

雨过郊园绿尚微，落花惆怅满尘衣。
芳尊有酒无人共，日暮看山还独归。

卷 550_59 【南亭】

赵嘏

孤亭影在乱花中，怅望无人此醉同。
听尽暮钟犹独坐，水边襟袖起春风。

卷 550_60 【赠女仙】

赵嘏

水思云情小凤仙，月涵花态语如弦。
不因金骨三清客，谁识吴州有洞天。

卷 550_61 【宣州送判官】

赵嘏

来时健笔佐嫖姚，去折槐花度野桥。
谁见尊前此惆怅，一声歌尽路迢迢。

卷 550_62 【宿僧院】

赵嘏

月满长空树满霜，度云低拂近檐床。
林中夜半一声磬，卧见高僧入道场。

卷 550_63 【寻僧】

赵嘏

斜日横窗起暗尘，水边门户闭闲春。
千竿竹里花枝动，只道无人似有人。

卷 550_64 【经王先生故居】

赵嘏

晚波东去海茫茫，谁识蓬山不死乡。
弄玉已归萧史去，碧楼红树倚斜阳。

卷 550_65 【送从翁中丞奉使黠戛斯六首】

赵嘏

扬雄词赋举天闻，万里油幢照塞云。
仆射峰西几千骑，一时迎著汉将军。

旌旗杳杳雁萧萧，春尽穷沙雪未消。
料得坚昆受宣后，始知公主已归朝。

虽言穷北海云中，属国当时事不同。
九姓如今尽臣妾，归期那肯待秋风。

牢山望断绝尘氛，滟滟河西拂地云。
谁见鲁儒持汉节，玉关降尽可汗军。

山川险易接胡尘，秦汉图来或未真。
自此尽知边塞事，河湟更欲托何人。

秦皇无策建长城，刘氏仍穷北路兵。
若遇单于旧牙帐，却应伤叹汉公卿。

卷 550_66 【东亭柳】

赵嘏

拂水斜烟一万条，几随春色倚河桥。
不知别后谁攀折，犹自风流胜舞腰。

卷 550_67 【僧舍二首】

赵嘏

只言双鬓未蹉跎，独奈牛羊送日何。
禅客不归车马去，晚檐山色为谁多。

溪上禅关水木间，水南山色与僧闲。
春风尽日无来客，幽磬一声高鸟还。

卷 550_68 【新月】

赵嘏

玉钩斜傍画檐生，云匣初开一寸明。
何事最能悲少妇，夜来依约落边城。

卷 550_69 【赠皇甫垣】

赵嘏

养由弓箭已无功，牢落生涯事事同。
相劝一杯寒食酒，几多辛苦到春风。

卷 550_70 【四祖寺】

赵嘏

千株松下双峰寺，一盏灯前万里身。
自为心猿不调伏，祖师元是世间人。

卷 550_71 【听蝉】

赵嘏

噪蝉声乱日初曛，弦管楼中永不闻。
独奈愁人数茎发，故园秋隔五湖云。

卷 550_72 【寄远】

赵嘏

禁钟声尽见栖禽，关塞迢迢故国心。
无限春愁莫相问，落花流水洞房深。

卷 550_73 【池上】

赵嘏

正怜佳月夜深坐，池上暖回燕雁声。
犹有渔舟系江岸，故人归尽独何情。

卷 550_74 【春日书怀】

赵嘏

暖莺春日舌难穷，枕上愁生晓听中。
应袅绿窗残梦断，杏园零落满枝风。

卷 550_75 【赠别】

赵嘏

水边秋草暮萋萋，欲驻残阳恨马蹄。
曾是管弦同醉伴，一声歌尽各东西。

卷 550_76 【灵岩寺】

赵嘏

馆娃宫伴千年寺，水阔云多客到稀。
闻说春来更惆怅，百花深处一僧归。

卷 550_77 【代人听琴二首】

赵嘏

抱琴花夜不胜春，独奏相思泪满巾。
第五指中心最恨，数声呜咽为何人。

湘娥不葬九疑云，楚水连天坐忆君。
惟有啼乌旧名在，忍教呜咽夜长闻。

卷 550_78 【访沈舍人不遇】

赵嘏

溪翁强访紫微郎，晓鼓声中满鬓霜。
知在禁闱人不见，好风飘下九天香。

卷 550_79 【座上献元相公】

赵嘏

寂寞堂前日又曛，阳台去作不归云。
从来闻说沙吒利，今日青娥属使君。

卷 550_80 【遣兴二首】

赵嘏

溪花入夏渐稀疏，雨气如秋麦熟初。
终日苦吟人不会，海边兄弟久无书。

读彻残书弄水回，暮天何处笛声哀。
花前独立无人会，依旧去年双燕来。

卷 550_81 【送李给事】

赵嘏

眼前轩冕是鸿毛，天上人间漫自劳。
脱却朝衣独归去，青云不及白云高。

卷 550_82 【宿僧舍】

赵嘏

高僧夜滴芙蓉漏，远客窗含杨柳风。
何处相逢话心地，月明身在磬声中。

卷 550_83 【吴门梦故山】

赵嘏

心熟家山梦不迷，孤峰寒绕一条溪。
秋窗觉后情无限，月堕馆娃宫树西。

卷 550_84 【别李谱】

赵嘏

尊前路映暮尘红，池上琴横醉席风。
今日别君如别鹤，声容长在楚弦中。

卷 550_85 【和杜侍郎题禅智寺南楼】

赵嘏

楼畔花枝拂槛红，露天香动满帘风。
谁知野寺遗钿处，尽在相如春思中。

卷 550_86 【发青山】

赵嘏

鳬鹭声暖野塘春，鞍马嘶风驿路尘。
一宿青山又前去，古来难得是闲人。

卷 550_87 【入蓝关】

赵嘏

微烟已辨秦中树，远梦更依江上台。
看落晚花还怅望，鲤鱼时节入关来。

卷 550_88 【落第寄沈询】

赵嘏

穿杨力尽独无功，华发相期一夜中。
别到江头旧吟处，为将双泪问春风。

卷 550_89 【送韦中丞】

赵嘏

二年恩意是春辉，
清净胸襟似者希。
泣尽楚人多少泪，
满船唯载酒西归。

卷 550_90 【咏端正春树】

赵嘏

一树繁阴先著名，
异花奇叶俨天成。
马嵬此去无多地，
只合杨妃墓上生。

卷 550_91 【叙事献同州侍御三首】

赵嘏

青云席中罗袜尘，
白首江上吟诗人。
登龙不及三千士，
虚度膺门二十春。

平生望断云层层，
紫府杳是他人登。
却应归访溪边寺，
说向当时同社僧。

尊前谁伴谢公游，莲岳晴来翠满楼。
坐见一方金变化，独吟红药对残秋。

卷 550_92 【婺州宴上留别】

赵嘏

双溪楼影向云横，歌舞高台晚更清。
独自下楼骑瘦马，摇鞭重入乱蝉声。

卷 550_93 【别牛郎中门馆】

赵嘏

整襟收泪别朱门，自料难酬顾念恩。
招得片魂骑匹马，西风斜日入秋原。

卷 550_94 【山中寄卢简求】

赵嘏

竹西池上有花开，日日幽吟看又回。
心忆郡中萧记室，何时暂别醉乡来。

卷 550_95 【寄梁侗兄弟】

赵嘏

桃李春多翠影重，竹楼当月夜无风。
荀家兄弟来还去，独倚栏干花露中。

卷 550_96 【同州南亭陪刘侍郎送刘先辈】

赵嘏

处处云随晚望开，洞庭秋水管弦来。
谢公待醉消离恨，莫惜临川酒一杯。

卷 550_97 【赠馆驿刘巡官】

赵嘏

云别青山马踏尘，负才难觅作闲人。
莫言馆驿无公事，诗酒能消一半春。

卷 550_98 【赠解头贾嵩】

赵嘏

贾生名迹忽无伦，十月长安看尽春。
顾我先鸣还自笑，空沾一第是何人。

卷 550_99 【题僧壁】

赵嘏

晓望疏林露满巾，碧山秋寺属闲人。
溪头尽日看红叶，却笑高僧衣有尘。

卷 550_100 【沙溪馆】

赵嘏

翠湿衣襟山满楼，竹间溪水绕床流。
行人莫羡邮亭吏，生向此中今白头。

卷 550_101 【李侍御归炭谷山居，同宿华严寺】

赵嘏

家在青山近玉京，日云红树满归程。
相逢一宿最高寺，半夜翠微泉落声。

卷 550_102 【过喷玉泉】

赵嘏

平生半为山淹留，马上欲去还回头。
两京尘路一双鬓，不见玉泉千万秋。

卷 550_103 【汉阴庭树】

赵嘏

掘沟引水浇蔬圃，插竹为篱护药苗。
杨柳如丝风易乱，梅花似雪日难消。

卷 550_104 【送王龟拾遗谢官后归浣水山居】

赵嘏

水边残雪照亭台，台上风襟向雪开。
还似当时姓丁鹤，羽毛成后一归来。

卷 550_105 【宿长水主人】

赵嘏

白云溪北丛岩东，树石夜与潺湲通。
行人一宿翠微月，二十五弦声满风。

卷 550_106 【寒食离白沙】

赵嘏

莫惊客路已经年，尚有青春一半妍。
试上方坦望春野，万条杨柳拂青天。

卷 550_107 【将发循州社日于所居馆宴送】

赵嘏

浪花如雪叠江风，社过高秋万恨中。
明日便随江燕去，依依俱是故巢空。

卷 550_108 【句】

赵嘏

浮云悲晚翠，落日泣秋风。

语风双燕立，袅树百劳飞。

松岛鹤归书信绝，橘洲风起梦魂香。

徒知六国随斤斧，莫有群儒定是非。

一千里色中秋月，十万军声半夜潮。

梁王旧馆已秋色，珠履少年轻绣衣。

第五百五十一卷

卷 551_1 【汉堤诗】

卢肇

阴沴奸阳，来暴于襄。洎入大郭，波端若铓。触厚摧高，
不知其防。骇溃颠委，万室皆毁。灶登蛟鼉，堂集鳣鲔。
惟恩若雝，母不能子。洪溃既涸，閤閤其虚。以隳我堵，
以剥我庐。酸伤顾望，若践丘墟。帝曰念嗟，朕日南顾。
流灾降慝，天曷台怒。滔滔襄郊，捽我婴孺。于惟余眴，
饥伤喘呼。斯为淫瘼，孰往膏傅。惟汝元寮，佥举明哲。
我公用谐，苴茅杖节。来视襄人，噢咻提挈。不日不月，
诒乎抃悦。乃泳故堤，陷于沙泥。缺落坳圯，由东讫西。
公曰呜呼，汉之有堤。实命襄人，不力乃力。则及乃身，
具锺与畚。汉堤其新，帝廩有粟。帝府有缗，尔成尔堤。
必锡尔勤，襄人怡怡。听命襄浒，背囊肩杵。奔走蹈舞，
分之卒伍。令以麾鼓，寻尺既度。日月可数，登登桀桀。
周旋上下，披岷斫楚。飞石挽土，举筑殷雷。骇汗霏雨，
疲癯鰥独。奋有筋膂，呀吁来助。提筐负筥，不劳其劳。
杂沓笑语，咸曰卢公，来赐我生。斯堤既成，蜿蜿而平。
确尔山固，屹如云横。汉流虽狂，坚不可蚀。代千年亿，
与天无极。惟公之堤，昔在人心。既筑既成，横之于南。

萌渚不峻，此门不深。今复在兹，于汉之阴。斯堤已崇，
兹民获祐。覩童相庆，室以完富。貽于襄人，愿保厥寿。
繫公之功，赫焉如昼。捍此巨灾，宰若京阜。天子赐之，
百姓载之。族孙作诗，昭示厥后。

卷 551_2 【题甘露寺】

卢肇

北固岩端寺，佳名自上台。地从京口断，山到海门回。
曙色烟中灭，潮声日下来。一隅通雉堞，千仞耸楼台。
林暗疑降虎，江空想度杯。福庭增气象，仙磬落昭回。
觉路花非染，流年景谩催。隋宫凋绿草，晋室散黄埃。
西蜀波湍尽，东溟日月开。如登最高处，应得见蓬莱。

卷 551_3 【江陵府初试澄心如水】

卢肇

丹心何所喻，唯水并清虚。莫测千寻底，难知一勺初。
内明非有物，上善本无鱼。澹泊随高下，波澜逐卷舒。
养蒙方浩浩，出险每徐徐。若灌情田里，常流尽不如。

卷 551_4 【风不鸣条】

卢肇

习习和风至，过条不自鸣。暗通青律起，远傍白蘋生。
拂树花仍落，经林鸟自惊。几牵萝蔓动，潜惹柳丝轻。
入谷迷松响，开窗失竹声。薰弦方在御，万国仰皇情。

卷 551_5 【别宜春赴举】

卢肇

秋天草木正萧疏，西望秦关别旧居。筵上芳樽今日酒，
箧中黄卷古人书。辞乡且伴衔芦雁，入海终为戴角鱼。
长短九霄飞直上，不教毛羽落空虚。

卷 551_6 【射策后作】

卢肇

射策明时愧不才，敢期青律变寒灰。晴怜断雁侵云去，
暖见醺鸡傍酒来。箭发尚忧杨叶远，愁生只恐杏花开。
曲江春浅人游少，尽日看山醉独回。

卷 551_7 【和主司王起】

卢肇

嵩高降德为时生，洪笔三题造化名。凤诏伫归专北极，
骊珠搜得尽东瀛。褒衣已换金章贵，禁掖曾随玉树荣。
明日定知同相印，青衿新列柳间营。

卷 551_8 【及第送潘图归宜春】

卢肇

三载皇都恨食贫，北溟今日化穷鳞。青云乍喜逢知己，
白社犹悲送故人。对酒共惊千里别，看花自感一枝春。
君归为说龙门寺，雷雨初生电绕身。

卷 551_9 【将归宜春留题新安馆】

卢肇

东里如今号郑乡，西家昔日近丘墙。芸台四部添新学，
秘殿三年学老郎。天外鸳鸯愁不见，山中云鹤喜相忘。
犹张皂盖归蓬荜，直谓时无许子将。

卷 551_10 【竞渡诗】

卢肇

石溪久住思端午，馆驿楼前看发机。鼙鼓动时雷隐隐，
兽头凌处雪微微。冲波突出人齐譟，跃浪争先鸟退飞。
向道是龙刚不信，果然夺得锦标归。

卷 551_11 【除歙州途中寄座主王侍郎】

卢肇

忽忝专城奉六条，自怜出谷屡迁乔。驱车虽道还家近，
捧日惟愁去国遥。朱户昨经新棨戟，风帆常觉恋箴瓢。
江天夜夜知消息，长见台星在碧霄。

卷 551_12 【御沟水】

卢肇

万壑朝溟海，萦回岁月多。无如此沟水，咫尺奉天波。

卷 551_13 【杨柳枝】

卢肇

青鸟泉边草木春，黄云塞上是征人。
归来若得长条赠，不惮风霜与苦辛。

卷 551_14 【新植红茶花偶出被人移去以诗索之】

卢肇

严恨柴门一树花，便随香远逐香车。
花如解语还应道，欺我郎君不在家。

卷 551_15 【戏题】

卢肇

神女初离碧玉阶，彤云犹拥牡丹鞋。
知道相公怜玉腕，强将纤手整金钗。

卷 551_16 【成名后作】

卢肇

桂在蟾宫不可攀，功成业熟也何难。
今朝折得东归去，共与乡闾年少看。

卷 551_17 【登祝融寺兰若】

卢肇

祝融绝顶万余层，策杖攀萝步步登。
行到月宫霞外寺，白云相伴两三僧。

卷 551_18 【被谪连州】

卢肇

黄绢外孙翻得罪，华颠故老莫相嗤。
连州万里无亲戚，旧识唯应有荔枝。

卷 551_19 【谪后再书一绝】

卢肇

崆峒道士误烧丹，赤鼠黄牙几许难。
坠堕阎浮南斗下，不知何事犯星官。

卷 551_20 【题清远峡观音院二首】

卢肇

清潭洞澈深千丈，危岫攀萝上几层。
秋尽更无黄叶树，夜阑唯对白头僧。

风入古松添急雨，月临虚槛背残灯。
老猿啸狖还欺客，来撼窗前百尺藤。

卷 551_21 【喜杨舍人入翰林】

卢肇

御笔亲批翰长街，夜开金殿送瑶缄。
平明玉案临宣室，已见龙光出傅岩。

卷 551_22 【谪连州书春牛榜子】

卢肇

阳和未解逐民忧，雪满群山对白头。
不得职田饥欲死，儿依何事打春牛。

卷 551_23 【送弟】

卢肇

去日家无担石储，汝须勤若事樵渔。
古人尽向尘中远，白日耕田夜读书。

卷 551_24 【牧童】

卢肇

谁人得似牧童心，牛上横眠秋听深。
时复往来吹一曲，何愁南北不知音。

卷 551_25 【嘲小儿】

卢肇

贪生只爱眼前珍，不觉风光度岁频。
昨日见来骑竹马，今朝早是有年人。

卷 551_26 【金钱花】

卢肇

轮郭休夸四字书，红窠写出对庭除。
时时买得佳人笑，本色金钱却不如。

卷 551_27 【木笔花】

卢肇

软如新竹管初齐，粉腻红轻样可携。
谁与诗人偎槛看，好于笺墨并分题。

卷 551_28 【句】

卢肇

君梦涪阳月，中秋忆棹歌。

妙吹应谐凤，工书定得鹅。

亭边古木昼阴阴，亭下寒潭百丈深。黄菊旧连陶令宅，
青山遥负向平心。

第五百五十二卷

卷 552_1 【塞下曲】

丁棱

北风鸣晚角，雨雪塞云低。烽举战军动，天寒征马嘶。
出营红旆展，过碛暗沙迷。诸将年皆老，何时罢鼓鼙。

卷 552_2 【和主司王起】

丁棱

公心独立副天心，三辖春闱冠古今。兰署门生皆入室，
莲峰太守别知音。同升翰苑时名重，遍历朝端主意深。
新有受恩江海客，坐听朝夕继为霖。

卷 552_3 【和主司王起】

高退之

昔年桃李已滋荣，今日兰荪又发生。葑菲采时皆有道，

权衡分处且无情。叨陪鸳鹭朝天客，共作门阑出谷莺。
何事感恩偏觉重，忽闻金榜扣柴荆。

卷 552_4 【和主司王起】

孟球

当年门下化龙成，今日余波进后生。仙籍共知推丽藻，
禁垣同得荐嘉名。桃蹊早茂夸新萼，菊圃初开耀晚英。
谁料羽毛方出谷，许教齐和九皋鸣。

卷 552_5 【和主司王起】

刘耕

孔门频建铸颜功，紫绶青衿感激同。一篲勤劳成太华，
三年恩德仰维嵩。杨随前辈穿皆中，桂许平人折欲空。
惭和周郎应见顾，感知大造竟无穷。

卷 552_6 【和主司王起】

裴翻

常将公道选群生，犹被春闱屈重名。文柄久持殊岁纪，

恩门三启动寰瀛。云霄幸接鸳鸾盛，变化欣同草木荣。
乍得阳和如细柳，参差长近亚夫营。

卷 552_7 【和主司王起】

樊骥

满朝簪发半门生，又见新书甲乙名。孤进自今开道路，
至公依旧振寰瀛。云飞太华清词著，花发长安白屋荣。
忝受恩光同上客，惟将报德是经营。

卷 552_8 【和主司王起】

崔轩

满朝朱紫半门生，新榜劳人又得名。国器旧知收片玉，
朝宗转觉集登瀛。同升翰苑三年美，继入花源九族荣。
共仰莲峰听雪唱，欲赓仙曲意怔营。

卷 552_9 【和主司王起】

蒯希逸

一振声华入紫薇，三开秦镜照春闱。龙门旧列金章贵，

莺谷新迁碧落飞。恩感风雷宜变化，诗裁锦绣借光辉。
谁知散质多荣忝，鸳鹭清尘接布衣。

卷 552_10 【句】

蒯希逸

蟾蜍醉里破，蛱蝶梦中残。

山险不曾离马后，酒醒长见在床前。

卷 552_11 【望九华山】

林滋

兹山突出何怪奇，上有万状无凡姿。大者嶙峋若奔兕，
小者□崑如婴儿。玉柱金茎相拄枝，干空逾碧势参差。
虚中始讶巨灵擘，陡处乍惊愚叟移。萝烟石月相蔽亏，
天风袅袅猿啾啾。龙潭万古喷飞溜，虎穴几人能得窥？
吁予比年爱灵境，到此始觉魂神驰。如何独得百丈索，
直上高峰抛俗羈。

卷 552_12 【春望】

林滋

春海镜长天，青郊丽上年。林光虚霁晓，山翠薄晴烟。
气暖禽声变，风恬草色鲜。散襟披石磴，韶景自深怜。

卷 552_13 【蠡泽旅怀】

林滋

谁言行旅日，况复桃花时。水即沧溟远，星从天汉垂。
川光独鸟暮，林色落英迟。岂是王程急，偏多游子悲。

卷 552_14 【宴韦侍御新亭】

林滋

烟磴披青霭，风筵藉紫苔。花香凌桂醕，竹影落藤杯。
鸣籁将歌远，飞枝拂舞开。未愁留兴晚，明月度云来。

卷 552_15 【人日】

林滋

春辉新入碧烟开，芳院初将穆景来。共向花前图瑞胜，
试看池上动轻苔。林香半落沾罗幌。蕙色微含近酒杯。
闻道宸游方命赏，应随思贶喜昭回。

卷 552_16 【和主司王起】

林滋

龙门一变荷生成，况是三传不朽名。美誉早闻喧北阙，
颓波今见走东瀛。鸳行既接参差影，鸡树仍同次第荣。
从此青衿与朱紫，升堂侍宴更何营。

卷 552_17 【听蜀道士琴歌】

李宣古

至道不可见，正声难得闻。忽逢羽客抱绿绮，
西别峨嵋峰顶云。初排□面蹶轻响，似掷细珠鸣玉上。
忽挥素爪画七弦，苍崖劈裂迸碎泉。愤声高，怨声咽，
屈原叫天两妃绝。朝雉飞，双鹤离，属玉夜啼独鹭悲。

吹我神飞碧霄里，牵我心灵入秋水。有如驱逐太古来，
邪淫辟荡贞心开。孝为子，忠为臣，不独语言能教人。
前弄啸，后弄嘯，一舒一惨非冬春。从朝至暮听不足，
相将直说瀛洲宿。更深弹罢背孤灯，窗雪萧萧打寒竹。
人间岂合值仙踪，此别多应不再逢。抱琴却上瀛洲去，
一片白云千万峰。

卷 552_18 【和主司王起】

李宣古

恩光忽逐晓春生，金榜前头忝姓名。三感至公裨造化，
重扬文德振寰瀛。伫为霖雨曾相贺，半在云霄觉更荣。
何处新诗添照灼，碧莲峰下柳间营。

卷 552_19 【杜司空席上赋】

李宣古

红灯初上月轮高，照见堂前万朵桃。鸾栗调清银象管，
琵琶声亮紫檀槽。能歌姹女颜如玉，解引萧郎眼似刀。
争奈夜深抛耍令，舞来拨去使人劳。

卷 552_20 【赋寒食日亥时】

李宣古

人定朱门尚未开，初星粲粲照人回。
此时寒食无烟火，花柳苍苍月欲来。

卷 552_21 【句】

李宣古

翠盖不西来，池上天池歇。
冉冉池上烟。盈盈池上柳。生贵非道傍，不断行人手。

卷 552_22 【风不鸣条】

黄颇

五纬起祥飙，无声瑞圣朝。稍开含露蕊，才转惹烟条。
密叶应潜变，低枝几暗摇。林间莺欲啭，花下蝶微飘。
初满沿堤草，因生逐水苗。太平无一事，天外奏虞韶。

卷 552_23 【和主司王起】

黄颇

二十二年文教主，三千上士满皇州。独陪宣父蓬瀛奏，
方接颜生鲁卫游。多羨龙门齐变化，屡看鸡树第名流。
千堂何处最荣美，朱紫环尊几处酬。

卷 552_24 【闻宜春诸举子陪郡主登河梁玩月】

黄颇

一年秋半月当空，遥羨飞觞接庾公。虹影迥分银汉上，
兔辉全写玉筵中。笙歌送尽迎寒漏，冰雪吟消永夜风。
虽向东堂先折桂，不如宾席此时同。

卷 552_25 【和主司王起】

张道符

三开文镜继芳声，暗暗云霄接去程。会压洪波先得路，
早升清禁共垂名。莲峰对处朱轮贵，金榜传时玉韵成。
更许下才听白雪，一枝今过郢谿荣。

卷 552_26 【和主司王起】

丘上卿

常将公道选诸生，不是鸳鸿不得名。天上宴回联步武，
禁中麻出满寰瀛。簪裾尽过前贤贵，门馆仍叨旧学荣。
看著凤池相继入，都堂那肯滞关营。

卷 552_27 【和主司王起】

石贯

重德由来为国生，五朝清显冠公卿。风波久伫济川楫，
羽翼三迁出谷莺。绛帐青衿同日贵，春兰秋菊异时荣。
孔门弟子皆贤哲，谁料穷儒忝一名。

卷 552_28 【和主司王起】

李潜

文学宗师心秤平，无私三用佐贞明。恩波旧是仙舟客，
德宇新添月桂名。兰署崇资金色重，莲峰高唱玉音清。
羽毛方荷生成力，难继鸾皇上汉声。

卷 552_29 【和主司王起】

孟守

科文又主守初时，光显门生济会期。美擅东堂登甲乙，
荣同内署侍恩私。群莺共喜新迁木，双凤皆当即入池。
别有倍深知感士，曾经两度得芳枝。

卷 552_30 【和主司王起】

唐思言

儒雅皆传德教行，几崇浮俗赞文明。龙门昔上波涛远，
禁署同登渥泽荣。虚散谬当陪杞梓，后先宁异感生成。
时方侧席征贤急，况说歌谣近帝京。

卷 552_31 【风不鸣条】

戈牢

旭日悬清景，微风在绿条。入松声不发，度柳影空摇。
长养应潜变，扶疏每暗飘。有林时袅袅，无树渐萧萧。
慢逐青烟散，轻和瑞气饶。丰年知有待，歌咏美唐尧。

卷 552_32 【和主司王起】

戈牢

圣乾文德最称贤，自古儒生少比肩。再后龙门将二纪，
两司莺谷已三年。蓬山皆美成荣贵，金榜谁知忝后先。
正是感恩流涕日，但思旌旆碧峰前。

卷 552_33 【风不鸣条】

金厚载

寂寂曙风生，迟迟散野轻。露华摇有滴，林叶袅无声。
暗剪丛芳发，空传谷鸟鸣。悠扬韶景静，澹荡霁烟横。
远水波澜息，荒郊草树荣。吾君垂至化，万类共澄清。

卷 552_34 【和主司王起】

金厚载

长庆曾收间世英，果居台阁冠公卿。天书再受恩波远，
金榜三开日月明。已见差肩趋翰苑，更期连步掌台衡。
小儒谬迹云霄路，心仰莲峰望太清。

卷 552_35 【风不鸣条】

王甚夷

圣日祥风起，韶晖助发生。蒙蒙遥野色，裊裊细条轻。
徃弱看渐动，怡和吹不鸣。枝含余露湿，林霁晓烟平。
缥缈春光媚，悠扬景气晴。康哉帝尧代，寰宇共澄清。

卷 552_36 【和主司王起】

王甚夷

春闱帝念主生成，长庆公闻两岁名。有蕴赤心分雨露，
无私和气浹寰瀛。龙门乍出难胜幸，鸳侣先行是最荣。
遥仰高峰看白雪，多惭属和意屏营。

第五百五十三卷

卷 553_1 【送李潜归绵州覲省】

姚鹄

朱楼对翠微，红旆出重扉。此地千人望，寥天一鹤归。
雪封山崦白，鸟拂栈梁飞。谁比趋庭恋，骊珠耀彩衣。

卷 553_2 【塞外寄张侍御】

姚鹄

千里入黄云，羁愁日日新。疏钟关路晓，远雨寒山春。
南眺有归雁，北来无故人。却思陪宴处，回望与天邻。

卷 553_3 【晓发】

姚鹄

旅行宜早发，况复是南归。月影缘山尽，钟声隔浦微。

残星萤共失，落叶鸟和飞。去去渡南浦，村中人出稀。

卷 553_4 【题终南山隐者居】

姚鹄

开门绝壑旁，蹑藓过花梁。路入峰峦影，风来芝朮香。
夜吟明雪牖，春梦闭云房。尽室更何有，一琴兼一觴。

卷 553_5 【嘉川驿楼晚望】

姚鹄

楼压寒江上，开帘对翠微。斜阳诸岭暮，古渡一僧归。
窗迴云冲起，汀遥鸟背飞。谁言坐多倦，目极自忘机。

卷 553_6 【送人归吴】

姚鹄

东吴与上国，万里路迢迢。为别晨昏久，全轻水陆遥。
湘阴岛上寺，楚色月中潮。到此一长望，知君积恨销。

卷 553_7 【送石贯归湖州】

姚鹄

同志幸同年，高堂君独还。齐荣恩未报，共隐事应闲。
访寺临湖岸，开楼见海山。洛中推二陆，莫久恋乡关。

卷 553_8 【送刘耕归舒州】

姚鹄

四座莫纷纷，须臾岐路分。自从同得意，谁不惜离群。
旧国连青海，归程在白云。弃繻当日路，应竞看终军。

卷 553_9 【寄赠许璋少府】

姚鹄

若说君高道，何人更得如。公庭唯树石，生计是琴书。
诗句峭无敌，文才清有余。不知尺水内，争滞北溟鱼。

卷 553_10 【寄雍陶先辈】

姚鹄

知音杳何处，书札寄无由。独宿月中寺，相思天畔楼。
露凝衰草白，萤度远烟秋。怅望难归枕，吟劳生夜愁。

卷 553_11 【寄友人】

姚鹄

西风又开菊，久客意如何。旧国天涯远，清砧月夜多。
明时难际会，急景易蹉跎。抱玉终须献，谁言恋薜萝。

卷 553_12 【感怀陈情】

姚鹄

恩重空感激，何门誓杀身。谬曾分玉石，竟自困风尘。
阴谷非因暖，幽丛岂望春。升沉在言下，应念异他人。

卷 553_13 【送程秀才下第归蜀】

姚鹄

莺迁与鵙退，十载泣岐分。蜀道重来老，巴猿此去闻。
晓程侵岭雪，远栈入谿云。莫滞趋庭恋，荣亲只待君。

卷 553_14 【旱鱼词上苗相公】

姚鹄

似龙鳞已足，唯是欠登门。日里腮犹湿，泥中目未昏。
乞锄防蚁穴，望水泻金盆。他日能为雨，公田报此恩。

卷 553_15 【野寺寓居即事二首】

姚鹄

南山色当户，初日半檐时。鹤去卧看远，僧来嫌起迟。
窗明云影断，庭晓树阴移。何处题新句，连溪密叶垂。

古寺更何有，当庭唯折幢。伴僧青藜榻，对雨白云窗。
暝色生前岭，离魂隔远江。沙洲半藜草，飞鹭白双双。

卷 553_16 【襄州献卢尚书】

姚鹄

立事成功尽远图，一方独与万方殊。藩臣皆竞师兵略，
相国今多揖庙谟。礼乐政行凋弊俗，歌谣声彻帝王都。
即随凤诏归何处，只是操持造化炉。

卷 553_17 【将归蜀留献恩地仆射二首】

姚鹄

自持衡镜采幽沈，此事常闻旷古今。危叶只将终委地，
焦桐谁料却为琴。蒿莱讵报生成德，犬马空怀感恋心。
明日还家盈眼血，定应回首即沾襟。

江上长思狎钓翁，此心难与昨心同。自承丘壑新恩重，
已分烟霞旧隐空。龙变偶因资巨浪，鸟飞谁肯借高风。
应怜死节无门效，永叹潜怀似转蓬。

卷 553_18 【随州献李侍御二首】

姚鹄

彩笔曾专造化权，道尊翻向宦途闲。端居有地唯栽药，

静坐无时不忆山。德望旧悬霄汉外，政声新溢路岐间。
众知圣主搜贤相，朝夕欲征黄霸还。

再别未甘何处说，但垂双泪出咸秦。风尘匹马来千里，
蓬梗全家望一身。旧隐每怀空竟夕，愁眉不展几经春。
今朝傥降非常顾，倒屣宁惟有古人。

卷 553_19 【虢州献杨抑卿二首】

姚鹄

盖世英华更有谁，赋成传写遍坤维。名科累中求贤日，
苦节高标守郡时。楼上叫云秋鼓角，林间宿鹤夜旌旗。
征归诏下应非久，德望人情在凤池。

碧山曾共惜分阴，暗学相如赋上林。到此敢逾千里恨，
归家且遂十年心。疏愚只怯膺门险，浅薄争窥孔室深。
一顾傥怜持苦节，更令何处问升沉。

卷 553_20 【赠边将】

姚鹄

三边近日往来通，尽是将军镇抚功。兵统万人为上将，
威加千里慑西戎。清笳绕塞吹寒月，红旆当山肃晓风。

却恨北荒沾雨露，无因扫尽虏庭空。

卷 553_21 【送费炼师供奉赴上都】

姚鹄

缩地周游不计程，古今应只有先生。已同化鹤临华表，
又见骖龙向玉清。萝磴静攀云共过，雪坛当醺月孤明。
无因相逐朝天帝，空羡烟霞得送迎。

卷 553_22 【和徐先辈秋日游泾州南亭呈三二同年】

姚鹄

多此欢情泛鹢舟，桂枝同折塞同游。声喧岛上巢松鹤，
影落杯中过水鸥。送日暮钟交戍岭，叫云寒角动城楼。
酒酣笑语秋风里，谁道槐花更起愁。

卷 553_23 【送黄颇归袁】

姚鹄

莫倦连期在醉乡，孔门多恋惜分行。文章声价从来重，
霄汉途程此去长。何处听猿临万壑，几宿因月滞三湘。

炉峰若上应相忆，不得同过惠远房。

卷 553_24 【和陕州参军李通微首夏书怀，呈同寮张裳段群二先辈】

姚鹄

公门何事更相牵，邵伯优贤任养闲。满院落花从覆地，
半檐初日未开关。寻仙郑谷烟霞里，避暑柯亭树石间。
独为高怀谁和继，掾曹同处桂同攀。

卷 553_25 【玉真观寻赵尊师不遇】

姚鹄

羽客朝元昼掩扉，林中一径雪中微。松阴绕院鹤相对，
山色满楼人未归。尽日独思风驭返，寥天几望野云飞。
凭高目断无消息，自醉自吟愁落晖。

卷 553_26 【及第后上主司王起】

姚鹄

三年竭力向春闈，塞断浮华众路岐。盛选栋梁非昔日，

平均雨露及明时。登龙旧美无邪径，折桂新荣尽直枝。
莫道只陪金马贵，相期更在凤凰池。

卷 553_27 【送贺知章入道】

姚鹄

若非尧运及垂衣，肯许巢由脱俗机。太液始同黄鹤下，
仙乡已驾白云归。还披旧褐辞金殿，却捧玄珠向翠微。
羁束惭无仙药分，随车空有梦魂飞。

卷 553_28 【送友人出塞】

姚鹄

帝城春色著寒梅，去恨离怀醉不开。作别欲将何计免，
此行应又隔年回。入河残日雕西尽，卷雪惊蓬马上来。
有思莫忘清塞学，众传君负佐王才。

卷 553_29 【送僧归新罗】

姚鹄

淼淼万余里，扁舟发落晖。沧溟何岁别，白首此时归。

寒暑途中变，人烟岭外稀。惊天巨鳌斗，蔽日大鹏飞。
雪入行砂屐，云生坐石衣。汉风深习得，休恨本心违。

卷 553_30 【奉和秘监从翁夏日陕州河亭晚望】

姚鹄

洪河何处望，一境在孤烟。极野如蓝日，长波似镜年。

卷帘花影里，倚槛鹤巢边。霞焰侵旌旆，滩声杂管弦。
钟微来叠岫，帆远落遥天。过客多相指，应疑会水仙。

卷 553_31 【风不鸣条】

姚鹄

吾君理化清，上瑞报时平。晓吹何曾歇，柔条自不鸣。
花香知暗度，柳动觉潜生。只见低垂影，那闻击触声。
大王初溥畅，少女正轻盈。幸遇无私力，幽芳愿发荣。

卷 553_32 【书情献知己】

姚鹄

日日恨何穷，巴云旧隐空。一为栖寓客，二见北归鸿。

有道期攀桂，无门息转蓬。赁居将罄比，乞食与僧同。
花月登临处，江山怅望中。众皆轻病骥，谁肯救焦桐。
坐惜春还至，愁吟夜每终。谷寒思变律，叶晚怯回风。
谒蔡惭王粲，怜衡冀孔融。深恩知尚在，何处问穷通。

卷 553_33 【和工部杨尚书重送绝句】

姚鹄

桂枝攀得献庭闱，何似空怀楚橘归。
好控扶摇早回首，人人思看大鹏飞。

第五百五十四卷

卷 554_1 【寄石桥僧】

项斯

逢师入山日，道在石桥边。别后何人见，秋来几处禅。
溪中云隔寺，夜半雪添泉。生有天台约，知无却出缘。

卷 554_2 【送欧阳衮归闽中】

项斯

秦城几年住，犹著故乡衣。失意时相识，成名后独归。
海秋蛮树黑，岭夜瘴禽飞。为学心难满，知君更掩扉。

卷 554_3 【古观】

项斯

置观碑已折，看松年不分。洞中谁识药，门外日添坟。

放去龟随水，呼来鹿怕薰。坛边见灰火，几烧祭星文。

卷 554_4 【题令狐处士溪居】

项斯

白发已过半，无心离此溪。病尝山药遍，贫起草堂低。
为月窗从破，因诗壁重泥。近来常夜坐，寂寞与僧齐。

卷 554_5 【送僧归南岳】

项斯

心知衡岳路，不怕去人稀。船里谁鸣磬，沙头自曝衣。
有家从小别，是寺即言归。料得逢春住，当禅云满扉。

卷 554_6 【宁州春思】

项斯

失意离城早，边城任见花。初为断酒客，旧识卖书家。
寒寺稀无雪，春风亦有沙。思归频入梦，即路不言赊。

卷 554_7 【山友赠藓花冠】

项斯

尘污出华发，惭君青藓冠。此身闲未得，终日戴应难。
好就松阴挂，宜当枕石看。会须寻道士，簪去绕霜坛。

卷 554_8 【蛩家】

项斯

领得卖珠钱，还归铜柱边。看儿调小象，打鼓试新船。
醉后眠神树，耕时语瘴烟。不逢寒便老，相问莫知年。

卷 554_9 【早春题湖上顾氏新居二首】

项斯

近得水云看，门长侵早开。到时微有雪，行处又无苔。
劝酒客初醉，留茶僧未来。每逢晴暖日，唯见乞花栽。

门不当官道，行人到亦稀。故从餐后出，方至夜深归。
开箴拣书卷，扫床移褐衣。几时同买宅，相近有柴扉。

卷 554_10 【苍梧云气】

项斯

何年化作愁，漠漠便难收。数点山能远，平铺水不流。
湿连湘竹暮，浓盖舜坟秋。亦有思归客，看来尽白头。

卷 554_11 【晚春花】

项斯

阴洞日光薄，花开不及时。当春无半树，经烧足空枝。
疏与香风会，细将泉影移。此中人到少，开尽几人知。

卷 554_12 【宿胡氏溪亭】

项斯

独住水声里，有亭无热时。客来因月宿，床势向山移。
鹤睡松枝定，萤归葛叶垂。寂寥犹欠伴，谁为报僧知。

卷 554_13 【送华阴隐者】

项斯

往往到城市，得非征药钱。世人空识面，弟子莫知年。
自说能医死，相期更学仙。近来移住处，毛女旧峰前。

卷 554_14 【落第后寄江南亲友】

项斯

古巷槐阴合，愁多昼掩扉。独存过江马，强拂看花衣。
送客心先醉，寻僧夜不归。龙钟易惆怅，莫遣寄书稀。

卷 554_15 【欲别】

项斯

花时人欲别，每日醉樱桃。买酒金钱尽，弹筝玉指劳。
归期无岁月，客路有风涛。锦缎裁衣赠，麒麟落剪刀。

卷 554_16 【留别张水部籍】

项斯

省中重拜别，兼领寄人书。已念此行远，不应相问疏。
子城西并宅，御水北同渠。要取春前到，乘闲候起居。

卷 554_17 【小古镜】

项斯

字已无人识，唯应记铸年。见来深似水，携去重于钱。
鸾翅巢空月，菱花遍小天。宫中照黄帝，曾得化为仙。

卷 554_18 【题太白山隐者】

项斯

高居在幽岭，人得见时稀。写篆扁虚白，寻僧到翠微。
扫坛星下宿，收药雨中归。从服小还后，自疑身解飞。

卷 554_19 【病中怀王展先辈在天台】

项斯

枕上用心静，唯应改旧诗。强行休去早，暂卧起还迟。
因说来归处，却愁初病时。赤城山下寺，无计得相随。

卷 554_20 【鲤鱼】

项斯

似龙鳞又足，只是欠登门。月里腮犹湿，泥中目未昏。
乞锄防蚁穴，望水写金盆。他日能为雨，公田报此恩。

卷 554_21 【子规】

项斯

游魂自相叫，宁复记前身。飞过人家月，声连客路春。
梦边催晓急，愁外送风频。自有沾花血，相和泪滴新。

卷 554_22 【边州客舍】

项斯

开门不成出，麦色遍前坡。自小诗名在，如今白发多。
经年无越信，终日厌蕃歌。近寺居僧少，春来亦懒过。

卷 554_23 【赠道者】

项斯

晏来知养气，度日语时稀。到处留丹井，终寒不絮衣。
病乡多惠药，鬼俗有符威。自说身轻健，今年数梦飞。

卷 554_24 【边游】

项斯

古镇门前去，长安路在东。天寒明垆火，日晚裂旗风。
塞馆皆无事，儒装亦有弓。防秋故乡卒，暂喜语音同。

卷 554_25 【夜泊淮阴】

项斯

夜入楚家烟，烟中人未眠。望来淮岸尽，坐到酒楼前。
灯影半临水，筝声多在船。乘流向东去，别此易经年。

卷 554_26 【远水】

项斯

渺渺浸天色，一边生晚光。阔浮萍思远，寒入雁愁长。
北极连平地，东流即故乡。扁舟来宿处，仿佛似潇湘。

卷 554_27 【黄州暮愁】

项斯

凌澌冲泪眼，重叠自西来。即夜寒应合，非春暖不开。
岂无登陆计，宜弃济川材。愿寄浮天外，高风万里回。

卷 554_28 【晓发昭应】

项斯

行人见雪愁，初作帝乡游。旅店开偏早，乡帆去未收。
灯残催卷席，手冷怕梳头。是物寒无色，汤泉正自流。

卷 554_29 【赠金州姚合使君】

项斯

为郎名更重，领郡是蹉跎。官壁题诗尽，衙庭看鹤多。
城池连草堑，篱落带椒坡。未觉旗幡贵，闲行触处过。

卷 554_30 【送殷中丞游边】

项斯

话别无长夜，灯前闻曙鸦。已行难避雪，何处合逢花。
野寺门多闭，羌楼酒不赊。还须见边将，谁拟静尘沙。

卷 554_31 【寄坐夏僧】

项斯

坐夏日偏长，知师在律堂。多因束带热，更忆剃头凉。
苔色侵经架，松阴到簟床。还应炼诗句，借卧石池傍。

卷 554_32 【寄卢式】

项斯

到处久南望，未知何日回。寄书频到海，得梦忽闻雷。
岭日当秋暗，蛩花近腊开。白身居瘴疠，谁不惜君才。

卷 554_33 【日东病僧】

项斯

云水绝归路，来时风送船。不言身后事，犹坐病中禅。
深壁藏灯影，空窗出艾烟。已无乡土信，起塔寺门前。

卷 554_34 【泛溪】

项斯

溪船泛渺瀰，渐觉灭炎辉。动水花连影，逢人鸟背飞。
深犹见白石，凉好换生衣。未得多诗句，终须隔宿归。

卷 554_35 【送顾少府】

项斯

作尉年犹少，无辞去路赊。渔舟县前泊，山吏日高衙。
幽景临溪寺，秋蝉织杼家。行程须过越，先醉镜湖花。

卷 554_36 【咸阳别李处士】

项斯

古道自迢迢，咸阳离别桥。越人闻水处，秦树带霜朝。
驻马言难尽，分程望易遥。秋前未相见，此意转萧条。

卷 554_37 【寄流人】

项斯

毒草不曾枯，长添客健无。雾开蛮市合，船散海城孤。
象迹频藏齿，龙涎远蔽珠。家人秦地老，泣对日南图。

卷 554_38 【华顶道者】

项斯

仙人掌中住，生有上天期。已废烧丹处，犹多种杏时。
养龙于浅水，寄鹤在高枝。得道复无事，相逢尽日棋。

卷 554_39 【酬从叔听夜泉见寄】

项斯

梦罢更开户，寒泉声隔云。共谁寻最远，独自坐偏闻。
岩际和风滴，溪中泛月分。岂知当此夜，流念到江滨。

卷 554_40 【和李用夫栽小松】

项斯

移来未换叶，已胜在空山。静对心标直，遥吟境助闲。
影侵残雪际，声透小窗间。即耸凌空干，脩脩岂易攀。

卷 554_41 【哭南流人】

项斯

遥见南来使，江头哭问君。临终时有雪，旅葬处无云。
官库空收剑，蛮僧共起坟。知名人尚少，谁为录遗文。

卷 554_42 【经李白墓】

项斯

夜郎归未老，醉死此江边。葬阙官家礼，诗残乐府篇。
游魂应到蜀，小碣岂旌贤。身没犹何罪，遗坟野火燃。

卷 554_43 【春夜樊川竹亭陪诸同年宴】

项斯

相知皆是旧，每恨独游频。幸此同芳夕，宁辞倒醉身。
灯光遥映烛，萼粉暗飘茵。明月分归骑，重来更几春。

卷 554_44 【送僧】

项斯

灵山巡未遍，不作住持心。逢寺暂投宿，是山皆独寻。
有时过静界，在处想空林。从小即行脚，出家来至今。

卷 554_45 【送苏处士归西山】

项斯

南游何所为，一篋又空归。守道安清世，无心换白衣。
深林蝉噪暮，绝顶客来稀。早晚重相见，论诗更及微。

卷 554_46 【游烂柯山】

项斯

步步出尘氛，溪山别是春。坛边时过鹤，棋处寂无人。
访古碑多缺，探幽路不真。翻疑归去晚，清世累移晨。

卷 554_47 【送友人之永嘉】

项斯

长贫知不易，去计拟何逃。相对人愁别，经过几处劳。
城连沙岫远，山断夏云高。犹想成诗处，秋灯半照涛。

卷 554_48 【巴中逢故人】

项斯

劳思空积岁，偶会更无由。以分难相舍，将行且暂留。
路岐何处极，江峡半猿愁。到此分南北，离怀岂易收。

卷 554_49 【送归江州友人初下第】

项斯

名高不俟召，收采献君门。偶屈应缘数，他人尽为冤。
新春城外路，旧隐水边村。归去无劳久，知君更待论。

卷 554_50 【舜城怀古】

项斯

禅禹逊尧聪，巍巍盛此中。四隅咸启圣，万古赖成功。
道德去弥远，山河势不穷。停车一再拜，帝业即今同。

卷 554_51 【送刘道士之成都严真观】

项斯

严君名不朽，道出二经中。归去精诚恳，还应梦寐通。
池台镜定月，松桧雨余风。想对灵玄忆，人间恋若空。

卷 554_52 【汉南遇友人】

项斯

此身西复东，何计此相逢。梦尽吴越水，恨深襄汉钟。
积云开去路，曙雪叠前峰。谁即知非旧，怜君忽见容。

卷 554_53 【游头陀寺上方】

项斯

高步陟崔嵬，吟闲路惜回。寺知何代有，僧见梵天来。
暮霭连沙积，余霞遍槛开。更期招静者，长啸上南台。

卷 554_54 【送友人游河东】

项斯

停车晓烛前，一语几潸然。路去干戈日，乡遥饥馑年。
湖波晴见雁，槐驿晚无蝉。莫纵经时住，东南书信偏。

卷 554_55 【中秋夜怀】

项斯

趋驰早晚休，一岁又残秋。若只如今日，何难至白头。
沧波归处远，旅食尚边愁。赖见前贤说，穷通不自由。

卷 554_56 【寄富春孙路处士】

项斯

平生醉与吟，谁是见君心。上国一归去，沧江闲至今。
钟繁秋寺近，峰阔晚涛深。疏放长如此，何人长得寻。

卷 554_57 【送客归新罗】

项斯

君家沧海外，一别见何因。风土虽知教，程途自致贫。
浸天波色晚，横笛鸟行春。明发千樯下，应无更远人。

卷 554_58 【杭州江亭留题登眺】

项斯

处处日驰销，凭轩夕似朝。渔翁闲鼓棹，沙鸟戏迎潮。
树间津亭密，城连坞寺遥。因谁报隐者，向此得耕樵。

卷 554_59 【荆州夜与友亲相遇】

项斯

山海两分岐，停舟偶似期。别来何限意，相见却无辞。
坐永神凝梦，愁繁鬓欲丝。趋名易迟晚，此去莫经时。

卷 554_60 【送友人游边】

项斯

方春到帝京，有恋有愁并。万里江海思，半年沙塞程。
绿阴斜向驿，残照远侵城。自可资新课，还期振盛名。

卷 554_61 【题赠宣州亢拾遗】

项斯

传骑一何催，山门昼未开。高人终避世，圣主不遗才。
坐次欹临水，门中独举杯。谁为旦夕侣，深寺数僧来。

卷 554_62 【姚氏池亭】

项斯

池馆饶嘉致，幽人惬所闲。筱风能动浪，岸树不遮山。
啸槛鱼惊后，眠窗鹤语间。何须说庐阜，深处更跻攀。

卷 554_63 【送友人之江南】

项斯

东南路苦辛，去路见无因。万里此相送，故交谁更亲。
日浮汀草绿，烟霁海山春。握手无别赠，为予书札频。

卷 554_64 【彭蠡湖春望】

项斯

湖亭东极望，远棹不须回。遍草新湖落，连天众雁来。
芦洲残照尽，云障积烟开。更想鸱夷子，扁舟安在哉。

卷 554_65 【闻友人会裴明府县楼】

项斯

闲阁雨吹尘，陶家揖上宾。湖山万叠翠，门树一行春。
景遍归檐燕，歌喧已醉身。登临兴不足，喜有数来因。

卷 554_66 【归家山行】

项斯

献赋才何拙，经时不耻归。能知此意是，甘取众人非。
遍陇耕无圃，缘溪钓有矶。此怀难自遣，期在振儒衣。

卷 554_67 【长安书怀呈知己】

项斯

江湖归不易，京邑计长贫。独夜有知己，论心无故人。
一灯愁里梦，九陌病中春。为问清平日，无门致出身。

卷 554_68 【闻蝉】

项斯

动叶复惊神，声声断续匀。坐来同听者，俱是未归人。
一棹三湘浪，单车二蜀尘。伤秋各有日，千可念因循。

卷 554_69 【李处士道院南楼】

项斯

霜晚复秋残，楼明近远山。满壶邀我醉，一榻为僧闲。
树簇孤汀眇，帆欹积浪间。从容更南望，殊欲外人寰。

卷 554_70 【送顾非熊及第归茅山】

项斯

吟诗三十载，成此一名难。自有恩门入，全无帝里欢。
湖光愁里碧，岩景梦中寒。到后松杉月，何人共晓看。

卷 554_71 【春日题李中丞樊川别墅】

项斯

心知受恩地，到此亦裴回。上路移时立，中轩隔宿来。
川光通沼沚，寺影带楼台。无限成蹊树，花多向客开。

卷 554_72 【龙州与韩将军夜会】

项斯

庭绿草纤纤，边州白露沾。别歌缘剑起，客泪是愁添。
见月鹄啼树，避风云满帘。将军尽尊酒，楼上赋星占。

卷 554_73 【途中逢友人】

项斯

长大有南北，山川各所之。相逢孤馆夜，共忆少年时。
烂醉百花酒，狂题几首诗。来朝又分袂，后会鬓应丝。

卷 554_74 【送友人下第归襄阳】

项斯

失意已春残，归愁与别难。山分关路细，江绕夜城寒。
草色连晴坂，鼙声离晓滩。差池是秋赋，何以暂怀安。

卷 554_75 【宿山寺】

项斯

栗叶重重复翠微，黄昏溪上语人稀。月明古寺客初到，
风度闲门僧未归。山果经霜多自落，水萤穿竹不停飞。
中宵能得几时睡，又被钟声催著衣。

卷 554_76 【病鹤】

项斯

青云有意力犹微，岂料低回得所依。幸念翅因风雨困，
岂教身陷稻粱肥。曾游碧落宁无侣，见有清池不忍飞。
纵使他年引仙驾，主人恩在亦应归。

卷 554_77 【梦仙】

项斯

昨宵魂梦到仙津，得见蓬山不死人。云叶许裁成野服，
玉浆教吃润愁身。红楼近月宜寒水，绿杏摇风占古春。
次第引看行未遍，浮光牵入世间尘。

卷 554_78 【古扇】

项斯

昨日裁成夺夏威，忽逢秋节便相违。寒尘妒尽秦王女，
凉殿恩随汉主妃。似月旧临红粉面，有风休动麝香衣。
千年萧瑟关人事，莫语当时掩泪归。

卷 554_79 【泾州听张处士弹琴】

项斯

边州独夜正思乡，君又弹琴在客堂。
仿佛不离灯影外，似闻流水到潇湘。

卷 554_80 【赠别】

项斯

鱼在深泉鸟在云，从来只得影相亲。
他时纵有逢君处，应作人间白发身。

卷 554_81 【对鲙】

项斯

行到鲈鱼乡里时，鲙盘如雪怕风吹。
犹怜醉里江南路，马上垂鞭学钓时。

卷 554_82 【忆朝阳峰前居】

项斯

每忆闲眠处，朝阳最上峰。溪僧来自远，林路出无踪。
败褐黏苔遍，新题出石重。霞光侵曙发，岚翠近秋浓。
健美机能破，安危道不逢。雪残猿到阁，庭午鹤离松。
此地虚为别，人间久未容。何时无一事，却去养疏慵。

卷 554_83 【暮上瞿唐峡】

项斯

自古艰难地，孤舟旦暮程。独愁空托命，省已是轻生。
有树皆相倚，无岩不倒倾。蛟螭波数怒，鬼怪火潜明。
履道知无负，离心自要惊。何年面骨肉，细话苦辛行。

卷 554_84 【和李中丞醉中期王征君月夜同游浣水旧居】

项斯

醉后情俱远，难忘素浣间。照花深处月，当户旧时山。
事想同清话，欢期一破颜。风流还爱竹，此夜尚思闲。

卷 554_85 【浊水求珠】

项斯

灵魄自沉浮，从来任浊流。愿从深处得，不向暗中投。
圆月时堪惜，沧波路可求。沙寻龙窟远，泥访蚌津幽。
是宝终知贵，唯恩且用酬。如能在公掌，的不负明眸。

卷 554_86 【江村夜泊】

项斯

日落江路黑，前村人语稀。几家深树里，一火夜渔归。

卷 554_87 【落第后归覲喜逢僧再阳】

项斯

相逢须强笑，人世别离频。去晓长侵月，归乡动隔春。
见僧心暂静，从俗事多屯。宇宙诗名小，山河客路新。
翠桐犹入爨，青镜未辞尘。逸足常思骥，随群且退鳞。
宴乖红杏寺，愁在绿杨津。羞病难为药，开眉懒顾人。

卷 554_88 【送越僧元瑞】

项斯

静中无伴侣，今亦独随缘。昨夜离空室，焚香净去船。

卷 554_89 【旧宫人】

项斯

自出先皇玉殿中，衣裳不更染深红。宫钗折尽垂空鬓，
内扇穿多减半风。桃熟亦曾君手赐，酒阑犹候妾歌终。
如今还向城边住，御水东流意不通。

卷 554_90 【梦游仙】

项斯

梦游飞上天家楼，珠箔当风挂玉钩。鹦鹉隔帘呼再拜，
水仙移镜懒梳头。丹霞不是人间晓，碧树仍逢岫外秋。
将谓便长于此地，鸡声入耳所堪愁。

卷 554_91 【送宫人入道】

项斯

愿随仙女董双成，王母前头作伴行。初戴玉冠多误拜，
欲辞金殿别称名。将敲碧落新斋磬，却进昭阳旧赐箠。
旦暮焚香绕坛上，步虚犹作按歌声。

卷 554_92 【长安退将】

项斯

塞晚冲沙损眼明，归来养病住秦京。上高楼阁看星坐，
著白衣裳把剑行。常说老身思斗将，最悲无力制蕃营。
翠眉红脸和回鹘，惆怅中原不用兵。

卷 554_93 【遥装夜】

项斯

卷席贫抛壁下床，且铺他处对灯光。欲行千里从今夜，
犹惜残春发故乡。蚊蚋已生团扇急，衣裳未了剪刀忙。
谁知更有芙蓉浦，南去令人愁思长。

卷 554_94 【送苗七求职】

项斯

相逢未得三回笑，风送离情入剪刀。客路最能销日月，
梦魂空自畏波涛。独眠秋夜琴声急，未拜军城剑色高。
去去缘多山与海，鹤身宁肯为飞劳。

卷 554_95 【山行】

项斯

青枥林深亦有人，一渠流水数家分。山当日午回峰影，
草带泥痕过鹿群。蒸茗气从茅舍出，缲丝声隔竹篱闻。
行逢卖药归来客，不惜相随入岛云。

卷 554_96 【题永忻寺影堂】

项斯

不遇修寺日，无钱入影堂。故来空礼拜，临去重添香。
僧得名难近，灯传火已长。发心依止后，借住有邻房。

卷 554_97 【献令狐相公，时相公郊坛行事回】

项斯

鶚在卿云冰在壺，代天才業本訏謨。榮同伊陟傳朱戶，
秀比王商入画图。昨夜星辰回劍履，前年風月滿江湖。
不知機務時多暇，還許詩家屬和無。

卷 554_98 【句】

项斯

佳人背江坐，眉际列烟树。

马蹄没青莎，船迹成空波。

春风吹两意，何意更相值。

更望会稽何处是，沙连竹箭白鹇群。

第五百五十五卷

卷 555_1 【校猎曲】

马戴

楚子畋郊野，布罟笼天涯。浮云张作罗，万草结成置。
意在绝飞鸟，臂弓腰镞。远将射勾践，次欲诛夫差。
壮志一朝尽，他□□繁华。当时能猎贤，保国兼保家。

卷 555_2 【蛮家】

马戴

领得卖珠钱，还归铜柱边。看儿调小象，打鼓放新船。
醉后眠神树，耕时语瘴烟。又逢衰蹇老，相问莫知年。

卷 555_3 【春思】

马戴

初日照杨柳，玉楼含翠阴。啼春独鸟思，望远佳人心。

幽怨贮瑶瑟，韶光凝碧林。所思曾不见，芳草意空深。

卷 555_4 【送从叔赴南海幕】

马戴

洞庭秋色起，哀狖更难闻。身往海边郡，帆悬天际云。
炎州罗翠鸟，瘴岭控蛮军。信息来非易，堪悲此路分。

卷 555_5 【江行留别】

马戴

吴楚半秋色，渡江逢苇花。云侵帆影尽，风逼雁行斜。
返照开岚翠，寒潮荡浦沙。余将何所往，海峤拟营家。

卷 555_6 【将别寄友人】

马戴

帝乡归未得，辛苦事羁游。别馆一尊酒，客程千里秋。
霜风红叶寺，夜雨白蘋洲。长恐此时泪，不禁和恨流。

卷 555_7 【客行】

马戴

路岐长不尽，客恨杳难通。芦荻晚汀雨，柳花南浦风。
乱钟嘶马急，残日半帆红。却羡渔樵侣，闲歌落照中。

卷 555_8 【过野叟居】

马戴

野人闲种树，树老野人前。居止白云内，渔樵沧海边。
呼儿采山药，放犊饮溪泉。自著养生论，无烦忧暮年。

卷 555_9 【答光州王使君】

马戴

信来淮上郡，楚岫入秦云。自顾为儒者，何由答使君。
蛻风蝉半失，阻雨雁频闻。欲识平生分，他时别纪勋。

卷 555_10 【下第再过崔邵池阳居】

马戴

岂无故乡路，路远未成归。关内相知少，海边来信稀。
离云空石穴，芳草偃郊扉。谢子一留宿，此心聊息机。

卷 555_11 【夕次淮口】

马戴

天涯秋光尽，木末群鸟还。夜久游子息，月明岐路闲。
风生淮水上，帆落楚云间。此意竟谁见，行行非故关。

卷 555_12 【落日怅望】

马戴

孤云与归鸟，千里片时间。念我一何滞，辞家久未还。
微阳下乔木，远色隐秋山。临水不敢照，恐惊平昔颜。

卷 555_13 【早发故山作】

马戴

云门夹峭石，石路荫长松。谷响猿相应，山深水复重。
餐霞人不见，采药客犹逢。独宿灵潭侧，时闻岳顶钟。

卷 555_14 【下第别郢扶】

马戴

穷途别故人，京洛泣风尘。在世即应老，他乡又欲春。
平生空志学，晚岁拙谋身。静话归休计，唯将海上亲。

卷 555_15 【寄终南真空禅师】

马戴

闲想白云外，了然清净僧。松门山半寺，夜雨佛前灯。
此境可长住，浮生自不能。一从林下别，瀑布几成冰。

卷 555_16 【长安寓居寄赠贾岛】

马戴

岁暮见华发，平生志半空。孤云不我弃，归隐与谁同。
枉道紫宸谒，妨栽丹桂丛。何如随野鹿，栖止石岩中。

卷 555_17 【秋郊夕望】

马戴

度鸟向栖急，阴虫逢夜多。余霞媚秋汉，迴月濯沧波。
蔓草将萎绝，流年其奈何。耿然摇落思，独酌不成歌。

卷 555_18 【赠越客】

马戴

故国波涛隔，明时已久留。献书双阙晚，看月五陵秋。
南棹何时返，长江忆共游。遥知钓船畔，相望在汀洲。

卷 555_19 【送顾非熊下第归江南】

马戴

无成西别秦，返驾江南春。草际楚田雁，舟中吴苑人。
残云挂绝岛，迥树入通津。想到长洲日，门前多白蘋。

卷 555_20 【()上劝旧友】

马戴

斗酒故人同，长歌起北风。斜阳高垒闭，秋角暮山空。
雁叫寒流上，萤飞薄雾中。坐来生白发，况复久从戎。

卷 555_21 【送狄参军赴杭州】

马戴

新官非次受，圣主宠前勋。关雪发车晚，风涛挂席闻。
海门山叠翠，湖岸郡藏云。执简从公后，髭参岂胜君。

卷 555_22 【过故人所迁新居】

马戴

金马诏何晚，茂陵居近修。客来云雨散，鸟下梧桐秋。
迥汉衔天阙，遥泉响御沟。坐看凉月上，为子一淹留。

卷 555_23 【落照】

马戴

照曜天山外，飞鸦几共过。微红拂秋汉，片白透长波。
影促寒汀薄，光残古木多。金霞与云气，散漫复相和。

卷 555_24 【宿崔邵池阳别墅】

马戴

杨柳色已改，郊原日复低。烟生寒渚上，霞散乱山西。
待月人相对，惊风雁不齐。此心君莫问，旧国去将迷。

卷 555_25 【楚江怀古三首】

马戴

露气寒光集，微阳下楚丘。猿啼洞庭树，人在木兰舟。
广泽生明月，苍山夹乱流。云中君不降，竟夕自悲秋。

惊鸟去无际，寒蛩鸣我傍。芦洲生早雾，兰渚下微霜。
列宿分穷野，空流注大荒。看山候明月，聊自整云装。

野风吹蕙带，骤雨滴兰橈。屈宋魂冥寞，江山思寂寥。
阴霓侵晚景，海树入回潮。欲折寒芳荐，明神讵可招。

卷 555_26 【远水】

马戴

荡漾空沙际，虚明入远天。秋光照不极，鸟影去无边。
势引长云断，波轻片雪连。汀洲杳难到，万古覆苍烟。

卷 555_27 【夕发邠宁寄从弟】

马戴

半酣走马别，别后锁边城。日落月未上，鸟栖人独行。
方驰故国恋，复怆长年情。入夜不能息，何当闲此生。

卷 555_28 【赠别北客】

马戴

君生游侠地，感激气何高。饮尽玉壶酒，赠留金错刀。
雁关飞霰雪，鲸海落云涛。决去如征鸟，离心空自劳。

卷 555_29 【夜下湘中】

马戴

洞庭人夜别，孤棹下湘中。露洗寒山遍，波摇楚月空。
密林飞暗狖，广泽发鸣鸿。行值扬帆者，江分又不同。

卷 555_30 【送吕郎中牧东海郡】

马戴

假道经淮泗，樯乌集隼旌。芜城沙茭接，波岛石林疏。
海鹤空庭下，夷人远岸居。山乡足遗老，伫听荐贤书。

卷 555_31 【山行偶作】

马戴

缘危路忽穷，投宿值樵翁。鸟下山含暝，蝉鸣露滴空。
石门斜月入，云窦暗泉通。寂寞生幽思，心疑旧隐同。

卷 555_32 【巴江夜猿】

马戴

日饮巴江水，还啼巴岸边。秋声巫峡断，夜影楚云连。
露滴青枫树，山空明月天。谁知泊船者，听此不能眠。

卷 555_33 【送田使君牧蔡州】

马戴

主意思政理，牧人官不轻。树多淮右地，山远汝南城。
望稼周田隔，登楼楚月生。悬知蒋亭下，渚鹤伴闲行。

卷 555_34 【雀台怨】

马戴

魏宫歌舞地，蝶戏鸟还鸣。玉座人难到，铜台雨滴平。
西陵树不见，漳浦草空生。万恨尽埋此，徒悬千载名。

卷 555_35 【早发故园】

马戴

语别在中夜，登车离故乡。曙钟寒出岳，残月迥凝霜。
风柳条多折，沙云气尽黄。行逢海西雁，零落不成行。

卷 555_36 【赠别江客】

马戴

湘中有岑穴，君去挂帆过。露细蒹葭广，潮回岛屿多。
汀洲延夕照，枫叶坠寒波。应使同渔者，生涯许钓歌。

卷 555_37 【宿翠微寺】

马戴

处处松阴满，樵开一径通。鸟归云壑静，僧语石楼空。
积翠含微月，遥泉韵细风。经行心不厌，忆在故山中。

卷 555_38 【霁后寄白阁僧】

马戴

苍翠霾高雪，西峰鸟外看。久披山衲坏，孤坐石床寒。
盥手水泉滴，燃灯夜烧残。终期老云峤，煮药伴中餐。

卷 555_39 【送僧归金山寺】

马戴

金陵山色里，蝉急向秋分。迴寺横洲岛，归僧渡水云。
夕阳依岸尽，清磬隔潮闻。遥想禅林下，炉香带月焚。

卷 555_40 【新秋雨霁宿王处士东郊】

马戴

夕阳逢一雨，夜木洗清阴。露气竹窗静，秋光云月深。
煎尝灵药味，话及故山心。得意两不寐，微风生玉琴。

卷 555_41 【关山曲二首】

马戴

金甲耀兜鍪，黄金拂紫骝。叛羌旗下戮，陷壁夜中收。
霜霰戎衣月，关河碣气秋。箭疮殊未合，更遣击兰州。

火发龙山北，中宵易左贤。勒兵临汉水，惊雁散胡天。
木落防河急，军孤受敌偏。犹闻汉皇怒，按剑待开边。

卷 555_42 【塞下曲二首】

马戴

旌旗倒北风，霜霰逐南鸿。夜救龙城急，朝焚虏帐空。
骨销金镞在，鬓改玉关中。却想羲轩氏，无人尚战功。

广漠云凝惨，日斜飞霰生。烧山搜猛兽，伏道击回兵。
风折旗竿曲，沙埋树杪平。黄云飞旦夕，偏奏苦寒声。

卷 555_43 【广陵曲】

马戴

葱茏桂树枝，高系黄金羁。叶隐青蛾翠，花飘白玉墀。
上鸣间关鸟，下醉游侠儿。炀帝国已破，此中都不知。

卷 555_44 【送人游蜀】

马戴

别离杨柳陌，迢递蜀门行。若听清猿后，应多白发生。
虹霓侵栈道，风雨杂江声。过尽愁人处，烟花是锦城。

卷 555_45 【宿无可上人房】

马戴

稀逢息心侣，细话远山期。河汉秋深夜，杉梧露滴时。
风传林磬响，月掩草堂迟。坐卧禅心在，浮生皆不知。

卷 555_46 【旅次夏州】

马戴

嘶马发相续，行次夏王台。锁郡云阴暮，鸣笳烧色来。
霜繁边上宿，鬓改碛中回。怅望胡沙晓，惊蓬朔吹催。

卷 555_47 【同庄秀才宿镇星观】

马戴

的的星河落，沾苔复洒松。湿光微泛草，石翠澹摇峰。
野观云和月，秋城漏间钟。知君亲此境，九陌少相逢。

卷 555_48 【鹤雀楼晴望】

马戴

尧女楼西望，人怀太古时。海波通禹凿，山木闭虞祠。
鸟道残虹挂，龙潭返照移。行云如可驭，万里赴心期。

卷 555_49 【赠淮南将】

马戴

何事淮南将，功高业未成。风涛辞海郡，雷雨镇山营。
度磧黄云起，防秋白发生。密机曾制敌，忧国更论兵。
塞色侵旗动，寒光锁甲明。自怜心有作，独立望专征。

卷 555_50 【寄贾岛】

马戴

海上不同来，关中俱久住。寻思别山日，老尽经行树。
志业人未闻，时光鸟空度。风悲汉苑秋，雨滴秦城暮。
佩玉与锵金，非亲亦非故。朱颜枉自毁，明代空相遇。
岁晏各能归，心知旧岐路。

卷 555_51 【湘川吊舜】

马戴

伊予生好古，吊舜苍梧间。白日坐将没，游波凝不还。
九疑云动影，旷野竹成班。雁集蒹葭渚，猿啼雾露山。
南风吹早恨，瑶瑟怨长闲。元化谁能问，天门恨久关。

卷 555_52 【送僧归闽中旧寺】

马戴

寺隔海山遥，帆前落叶飘。断猿通楚塞，惊鹭出兰桡。
星月浮波岛，烟萝渡石桥。钟声催野饭，秋色落寒潮。
旧社人多老，闲房树半凋。空林容病士，岁晚待相招。

卷 555_53 【寄远】

马戴

坐想亲爱远，行嗟天地阔。积疹甘毁颜，沈忧更销骨。
迢迢游子心，望望归云没。乔木非故里，高楼共明月。
夜深秋风多，闻雁来天末。

卷 555_54 【经咸阳北原】

马戴

秦山曾共转，秦云自舒卷。古来争雄图，到此多不返。
野犢穴孤坟，农人耕废苑。川长波又逝，日与岁俱晚。
夜入咸阳中，悲吞不能饭。

卷 555_55 【冬日寄洛中杨少尹】

马戴

黄河岸柳衰，城下度流澌。年长从公懒，天寒入府迟。
家山望几遍，魏阙赴何时。怀古心谁识，应多谒舜祠。

卷 555_56 【浙江夜宿】

马戴

落帆人更起，露草满汀洲。远狖啼荒峤，孤萤溺漫流。
积阴开片月，爽气集高秋。去去胡为恋，辜芳时一游。

卷 555_57 【寄西岳白石僧】

马戴

挂锡中峰上，经行踏石梯。云房出定后，岳月在池西。
峭壁残霞照，欹松积雪齐。年年著山屐，曾得到招提。

卷 555_58 【同州冬日陪吴常侍闲宴】

马戴

中天白云散，集客郡斋时。陶性聊飞爵，看山忽罢棋。
雪花凝始散，木叶脱无遗。静理良多暇，招邀惬所思。

卷 555_59 【答鄜畤友人同宿见示】

马戴

为客自堪悲，风尘日满衣。承明无计入，旧隐但怀归。
雪积孤城暗，灯残晓角微。相逢喜同宿，此地故人稀。

卷 555_60 【题僧禅院】

马戴

虚室焚香久，禅心悟几生。谿泉侵月起，扫径避虫行。
树隔前朝在，苔滋废渚平。我来风雨夜，像设一灯明。

卷 555_61 【怀故山寄贾岛】

马戴

心偶羨明代，学诗观国风。自从来阙下，未胜在山中。
丹桂日应老，白云居久空。谁能谢时去，聊与此生同。

卷 555_62 【灞上秋居】

马戴

灞原风雨定，晚见雁行频。落叶他乡树，寒灯独夜人。
空园白露滴，孤壁野僧邻。寄卧郊扉久，何门致此身。

卷 555_63 【寄崇德里居作】

马戴

扫君园林地，泽我清凉襟。高鸟云路晚，孤蝉杨柳深。
风微汉宫漏，月迥秦城砧。光景坐如此，徒怀经济心。

卷 555_64 【河梁别】

马戴

河梁送别者，行哭半非亲。此路足征客，胡天多杀人。
金罍照离思，宝瑟凝残春。早晚期相见，垂杨凋复新。

卷 555_65 【留别定襄卢军事】

马戴

行行与君别，路在雁门西。秋色见边草，军声闻戍鼙。
酣歌击宝剑，跃马上金堤。归去咸阳里，平生志不迷。

卷 555_66 【送杜秀才东游】

马戴

羁游年复长，去日值秋残。草出函关白，云藏野渡寒。
鸿多霜雪重，山广道途难。心事何人识，斗牛应数看。

卷 555_67 【怀黄颇】

马戴

有客南浮去，平生与我同。炎州结遥思，芳杜采应空。
秦雁归侵月，湘猿戏裹枫。期君翼明代，未可恋山中。

卷 555_68 【陇上独望】

马戴

斜日挂边树，萧萧独望间。阴云藏汉垒，飞火照胡山。
陇首行人绝，河源夕鸟还。谁为立勋者，可惜宝刀闲。

卷 555_69 【长安书怀】

马戴

岐路今如此，还堪恸哭频。关中成久客，海上老诸亲。
谷口田应废，乡山草又春。年年销壮志，空作献书人。

卷 555_70 【邯郸驿楼作】

马戴

芜没丛台久，清漳废御沟。蝉鸣河外树，人在驿西楼。
云烧天中赤，山当日落秋。近郊经战后，处处骨成丘。

卷 555_71 【别家后次飞狐西即事】

马戴

远归从此别，亲爱失天涯。去国频回首，方秋不在家。
鸣蛩闻塞路，冷雁背龙沙。西次桑干曲，洲中见荻花。

卷 555_72 【题青龙寺镜公房】

马戴

一室意何有，闲门为我开。炉香寒自灭，履雪饭初回。
窗迥孤山入，灯残片月来。禅心方此地，不必访天台。·

第五百五十六卷

卷 556_1 【边城独望】

马戴

聊凭危堞望，倍起异乡情。霜落蒹葭白，山昏雾露生。
河滩胡雁下，戎垒汉鞞惊。独树残秋色，狂歌泪满缨。

卷 556_2 【江亭赠别】

马戴

长亭晚送君，秋色渡江滨。衰柳风难定，寒涛雪不分。
猿声离楚峡，帆影入湘云。独泛扁舟夜，山钟可卧闻。

卷 556_3 【旅次寄贾岛兼简无可上人】

马戴

相思边草长，回望水连空。雁过当行次，蝉鸣复客中。

壮年看即改，羸病计多同。悦宿林中寺，深凭问远公。

卷 556_4 【寄剡中友人】

马戴

故人今在剡，秋草意如何。岭暮云霞杂，潮回岛屿多。
沃洲僧几访，天姥客谁过。岁晚偏相忆，风生隔楚波。

卷 556_5 【送国子韦丞】

马戴

临水独相送，归期千里间。云回逢过雨，路转入连山。
一骑行芳草，新蝉发故关。遥聆茂陵下，夜后竹扉闲。

卷 556_6 【题吴发原南居】

马戴

闲居谁厌僻，门掩汉祠前。山色夏云映，树阴幽草连。
晴光分渚曲，绿气冒原田。何日远游罢，高枝已噪蝉。

卷 556_7 【雒中寒夜姚侍御宅怀贾岛】

马戴

夜木动寒色，雒阳城阙深。如何异乡思，更抱故人心。
微月关山远，闲阶霜霰侵。谁知石门路，待与子同寻。

卷 556_8 【征妇叹】

马戴

稚子在我抱，送君登远道。稚子今已行，念君上边城。
蓬根既无定，蓬子焉用生。但见请防胡，不闻言罢兵。
及老能得归，少者还长征。

卷 556_9 【山中寄姚合员外】

马戴

朝与城阙别，暮同麋鹿归。鸟鸣松观静，人过石桥稀。
木叶摇山翠，泉痕入涧扉。敢招仙署客，暂此拂朝衣。

卷 556_10 【中秋月】

马戴

阴魄出海上，望之增苦吟。冷搜骊颔重，寒彻蚌胎深。
皓气笼诸夏，清光射万岑。悠然天地内，皎洁一般心。

卷 556_11 【下第寄友人】

马戴

金门君待问，石室我思归。圣主尊黄屋，何人荐白衣。
年来御沟柳，赠别雨霏霏。

卷 556_12 【寄广州杨参军】

马戴

南方春意好，念子缓归心。身方脱野服，冠未系朝簪。
足恣平生赏，无虞外役侵。汀洲观鸟戏，向月和猿吟。
税驾楚山广，扬帆湘水深。采奇搜石穴，怀胜即枫林。
怅望极霞际，流情堕海阴。前朝杳难问，叹息洒鸣琴。

卷 556_13 【离夜二首】

马戴

东征辽水迥，北近单于台。戎衣挂宝剑，玉箸衔金杯。
红烛暗将灭，翠蛾终不开。

凝夜照离色，恐闻啼晚鸦。前年营雁塞，明月戍龙沙。
曾与五陵子，休装孤剑花。

卷 556_14 【答太原从军杨员外送别】

马戴

君将海月珮，赠之光我行。见知言不浅，怀报意非轻。
反照临岐思，中年未达情。河梁人送别，秋汉雁相鸣。
衰柳摇边吹，寒云冒古城。西游还献赋，应许托平生。

卷 556_15 【送从叔重赴海南从事】

马戴

又从连帅请，还作岭南行。穷海何时到，孤帆累月程。
乱蝉吟暮色，哀狖落秋声。晚路潮波起，寒葭雾雨生。

沙埋铜柱没，山簇瘴云平。念此别离苦，其如宗从情。

卷 556_16 【送韩校书江西从事】

马戴

出关寒色尽，云梦草生新。雁背岳阳雨，客行江上春。
遥程随水阔，枉路倒帆频。夕照临孤馆，朝霞发广津。
湖山潮半隔，郡壁岸斜邻。自此钟陵道，裁书有故人。

卷 556_17 【送顾少府之永康】

马戴

婺女星边去，春生即有花。寒关云复雪，古渡草连沙。
宿次吴江晚，行侵日徼斜。官传梅福政，县顾赤松家。
烧起明山翠，潮回动海霞。清高宜阅此，莫叹近天涯。

卷 556_18 【幽上留别令狐侍郎】

马戴

自别丘中隐，频年哭路岐。辛勤今若是，少壮岂多时。
露滴阴虫苦，秋声远客悲。晚营严鼓角，红叶拂旌旗。

北阙虚延望，西林久见思。川流寒水急，云返故山迟。
落照游人去，长空独鸟随。不堪风景隔，忠信寡相知。

卷 556_19 【襄阳席上呈于司空】

马戴

花枝临水复临堤，也照清江也照泥。
寄语东君好抬举，夜来曾伴凤凰栖。

卷 556_20 【宿裴氏溪居怀厉玄先辈】

马戴

树下孤石坐，草间微有霜。同人不同北，云鸟自南翔。
迢递夜山色，清冷泉月光。西风耿离抱，江海遥相望。

卷 556_21 【集宿姚殿中宅期僧无可不至】

马戴

殿中日相命，开尊话旧时。余钟催鸟绝，积雪阻僧期。
林静寒光远，天阴曙色迟。今夕复何夕，人谒去难追。

卷 556_22 【宿贾岛原居】

马戴

寒雁过原急，渚边秋色深。烟霞向海岛，风雨宿园林。
俱住明时愿，同怀故国心。未能先隐迹，聊此一相寻。

卷 556_23 【赠别空公】

马戴

云门秋却入，微径久无人。后夜中峰月，空林百衲身。
寂寥寒磬尽，盥漱瀑泉新。履迹谁相见，松风扫石尘。

卷 556_24 【府试观开元皇帝东封图】

马戴

俨若翠华举，登封图乍开。冕旒明主立，冠剑侍臣陪。
迹类飞仙去，光同拜日来。粉痕疑检玉，黛色讶生苔。
挂壁云将起，陵风仗若回。何年复东幸，鲁叟望悠哉。

卷 556_25 【府试水始冰】

马戴

南池寒色动，北陆岁阴生。薄薄流澌聚，漓漓翠潋平。
暗沾霜稍厚，回照日还轻。乳窦悬残滴，湘流减恨声。
即堪金井贮，会映玉壶清。洁白心虽识，空期饮此明。

卷 556_26 【边馆逢贺秀才】

马戴

贫病无疏我与君，不知何事久离群。鹿裘共弊同为客，
龙阙将移拟献文。空馆夕阳鸦绕树，荒城寒色雁和云。
不堪吟断边笳晓，叶落东西客又分。

卷 556_27 【宿王屋天坛】

马戴

星斗半沈苍翠色，红霞远照海涛分。折松晓拂天坛雪，
投简寒窥玉洞云。绝顶醺回人不见，深林磬度鸟应闻。
未知谁与传金篆，独向仙祠拜老君。

卷 556_28 【岐阳逢曲阳故人话旧】

马戴

异地还相见，平生问可知。壮年俱欲暮，往事尽堪悲。
道路频艰阻，亲朋久别离。解兵逃白刃，谒帝值明时。
淹疾生涯故，因官事业移。鸡鸣关月落，雁度朔风吹。
客泪翻岐下，乡心落海湄。积愁何计遣，满酌浣相思。

卷 556_29 【赠禅僧】

马戴

弟子人天遍，童年在沃洲。开禅山木长，浣衲海沙秋。
振锡摇汀月，持瓶接瀑流。赤城何日上，鄙愿从师游。

卷 556_30 【题庐山寺】

马戴

白茅为屋宇编荆，数处阶墀石叠成。东谷笑言西谷响，
下方云雨上方晴。鼠惊樵客缘苍壁，猿戏山头撼紫柅。
别有一条投涧水，竹筒斜引入茶铛。

卷 556_31 【题石瓮寺】

马戴

僧室并皇宫，云门辇路同。渭分双阙北，山迥五陵东。
修纓悬林表，深泉汲洞中。人烟窥垤蚁，鸳瓦拂冥鸿。
藓壁松生峭，龕灯月照空。稀逢息心侣，独礼竺乾公。

卷 556_32 【谒仙观二首】

马戴

我生求羽化，斋沐造仙居。葛蔓没丹井，石函盛道书。
寒松多偃侧，灵洞遍清虚。一就泉西饮，云中采药蔬。

山空蕙气香，乳管折云房。愿值壶中客，亲传肘后方。
三更礼星斗，寸匕服丹霜。默坐树阴下，仙经横石床。

卷 556_33 【送朴山人归新罗】

马戴

浩渺行无极，扬帆但信风。云山过海半，乡树入舟中。
波定遥天出，沙平远岸穷。离心寄何处，目断曙霞东。

卷 556_34 【题静住寺钦用上人房】

马戴

寺近朝天路，多闻玉佩音。鉴人开慧眼，归鸟息禅心。
磬接星河曙，窗连夏木深。此中能宴坐，何必在云林。

卷 556_35 【赠杨先辈】

马戴

平生闲放久，野鹿许为群。居止邻西岳，轩窗度白云。
斋心饭松子，话道接茅君。汉主思清净，休书谏猎文。

卷 556_36 【酬李景章先辈】

马戴

平生诗句忝多同，不得陪君奉至公。金镫自宜先中鹄，
铅刀甘且学雕虫。莺啼细柳临关路，燕接飞花绕汉宫。
九陌芳菲人竞赏，此时心在别离中。

卷 556_37 【赠祠部令狐郎中】

马戴

官初执宪称雄才，省转为郎雅望催。待制松阴移玉殿，
分宵露气静天台。算棋默向孤云坐，随鹤闲穷片水回。
忽忆十年相识日，小儒新自海边来。

卷 556_38 【送册东夷王使】

马戴

越海传金册，华夷礼命行。片帆秋色动，万里信潮生。
日映孤舟出，沙连绝岛明。翳空翻大鸟，飞雪洒长鲸。
旧鬓回应改，遐荒梦易惊。何当理风楫，天外问来程。

卷 556_39 【送武陵王将军】

马戴

河外今无事，将军有战名。艰难长剑缺，功业少年成。
晓仗亲云陛，寒宵突禁营。朱旗身外色，玉漏耳边声。
开阁谈宾至，调弓过雁惊。为儒多不达，见学请长缨。

卷 556_40 【赠鄂县尉李先辈二首】

马戴

同人家鄂杜，相见罢官时。野坐苔生石，荒居菊入篱。
听蝉临水久，送鹤背山迟。未拟还城阙，溪僧别有期。

休官不到阙，求静匪营他。种药唯愁晚，看云肯厌多。
渚边逢鹭下，林表伴僧过。闲检仙方试，松花酒自和。

卷 556_41 【边将】

马戴

玉榼酒频倾，论功笑李陵。红缰跑骏马，金镞掣秋鹰。
塞迥连天雪，河深彻底冰。谁言提一剑，勤苦事中兴。

卷 556_42 【下第别令狐员外】

马戴

论文期雨夜，饮酒及芳晨。坐叹百花发，潜惊双鬓新。
旧交多得路，别业远仍贫。便欲辞知己，归耕海上春。

卷 556_43 【送春坊董正字浙右归觀】

马戴

去觀毗陵日，秋殘建業中。莎垂石城古，山闊海門空。
灌木寒檣远，层波皓月同。何当复餽校，春集少阳宫。

卷 556_44 【送和北虜使】

马戴

路始阴山北，迢迢雨雪天。长城人过少，沙碛马难前。
日入流沙际，阴生瀚海边。刀镞向月动，旌纛冒霜悬。
逐兽孤围合，交兵一箭传。穹庐移斥候，烽火绝祁连。
汉将行持节，胡儿坐控弦。明妃的回面，南送使君旋。

卷 556_45 【攄情留别并州从事】

马戴

浅学长自鄙，谬承贤达知。才希汉主召，玉任楚人疑。
年长惭漂泊，恩深惜别离。秋光独鸟过，暝色一蝉悲。
鹤发生何速，龙门上苦迟。雕虫羞朗鉴，干禄贵明时。
故国诚难返，青云致末期。空将感激泪，一自洒临岐。

卷 556_46 【酬田卿送西游】

马戴

华堂开翠簟，惜别玉壶深。客去当烦暑，蝉鸣复此心。
废城乔木在，古道浊河侵。莫虑西游远，西关绝陇阴。

卷 556_47 【雪中送青州薛评事】

马戴

腊景不可犯，从戎难自由。怜君急王事，走马赴边州。
岳雪明日观，海云冒营丘。惭无斗酒泻，敢望御重裘。

卷 556_48 【哭京兆庞尹】

马戴

神州丧贤尹，父老泣关中。未尽群生愿，才留及物功。
清光沉皎月，素业振遗风。履迹莓苔掩，珂声紫陌空。
从来受知者，会葬汉陵东。

卷 556_49 【路傍树】

马戴

古树何人种，清阴减昔时。莓苔根半露，风雨节偏危。
虫蠹心将穴，蝉催叶向衰。樵童不须翦，聊起邵公思。

卷 556_50 【送客南游】

马戴

拟卜何山隐，高秋指岳阳。苇干云梦色，橘熟洞庭香。
疏雨残虹影，回云背鸟行。灵均如可问，一为哭清湘。

卷 556_51 【寄襄阳王公子】

马戴

君马勒金羁，君家贮玉笄。白云登岘首，碧树醉铜鞮。
泽广荆州北，山多汉水西。鹿门知不隐，芳草自萋萋。

卷 556_52 【集宿姚侍御宅怀永乐宰殷侍御】

马戴

石田虞芮接，种树白云阴。穴闭神踪古，河流禹凿深。
樵人应满郭，仙鸟几巢林。此会偏相语，曾供雪夜吟。

卷 556_53 【易水怀古】

马戴

荆卿西去不复返，易水东流无尽期。
落日萧条蓟城北，黄沙白草任风吹。

卷 556_54 【送僧二首】

马戴

亲在平阳忆久归，洪河雨涨出关迟。
独过旧寺人稀识，一一杉松老别时。

龕中破衲自持行，树下禅床坐一生。
来往白云知岁久，满山猿鸟会经声。

卷 556_55 【赠友人边游回】

马戴

游子新从绝塞回，自言曾上李陵台。
尊前语尽北风起，秋色萧条胡雁来。

卷 556_56 【山中作】

马戴

屐齿无泥竹策轻，莓苔梯滑夜难行。
独开石室松门里，月照前山空水声。

卷 556_57 【出塞词】

马戴

金带连环束战袍，马头冲雪度临洮。
卷旗夜劫单于帐，乱斫胡儿缺宝刀。

卷 556_58 【寄云台观田秀才】

马戴

云压松枝拂石窗，幽人独坐鹤成双。
晚来漱齿敲冰渚，闲读仙书倚翠幢。

卷 556_59 【边上送杨侍御鞫狱回】

马戴

狱成冤雪晚云开，豸角威清塞雁回。
飞将送迎遥避马，离亭不敢劝金杯。

卷 556_60 【射雕骑】

马戴

蕃面将军著鼠裘，酣歌冲雪在边州。
猎过黑山犹走马，寒雕射落不回头。

卷 556_61 【高司马移竹】

马戴

丛居堂下幸君移，翠掩灯窗露叶垂。
莫羨孤生在山者，无人看著拂云枝。

卷 556_62 【赠前蔚州崔使君】

马戴

战回脱剑绶铜鱼，塞雁迎风避隼旗。
欲识前时为郡政，校成上下考新书。

卷 556_63 【秋思二首】

马戴

万木秋霖后，孤山夕照余。田园无岁计，寒近忆樵渔。
亭树霜霞满，野塘凫鸟多。蕙兰不可折，楚老徒悲歌。

卷 556_64 【黄神谷纪事】

马戴

霹雳振秋岳，折松横洞门。云龙忽变化，但觉玉潭昏。

卷 556_65 【过亡友墓】

马戴

忆昨送君葬，今看坟树高。寻思后期者，只是益生劳。

卷 556_66 【闻瀑布冰折】

马戴

万仞冰峭折，寒声投白云。光摇山月堕，我向石床闻。

卷 556_67 【赠道者】

马戴

深居白云穴，静注赤松经。往往龙潭上，焚香礼斗星。

卷 556_68 【华下逢杨侍御】

马戴

巨灵掌上月，玉女盆中泉。柱史息车看，孤云心浩然。

卷 556_69 【新春闻赦】

马戴

道在猜谗息，仁深疾苦除。尧聪能下听，汤网本来疏。

卷 556_70 【送李侍御福建从事】

马戴

晋安来越国，蔓草故宫迷。钓渚龙应在，琴台鹤乱栖。
泛涛明月广，边海众山齐。宾府通兰棹，蛮僧接石梯。
片云和瘴湿，孤屿映帆低。上客多诗兴，秋猿足夜啼。

卷 556_71 【酬刑部姚郎中】

马戴

路岐人不见，尚得记心中。月忆潇湘渚，春生兰杜丛。

鸟啼花半落，人散爵方空。所赠诚难答，泠然一雅风。

卷 556_72 【送柳秀才往连州看弟】

马戴

离人非逆旅，有弟谪连州。楚雨沾猿暮，湘云拂雁秋。
蒹葭行广泽，星月棹寒流。何处江关锁，风涛阻客愁。

卷 556_73 【晚眺有怀】

马戴

点点抱离念，旷怀成怨歌。高台试延望，落照在寒波。
此地芳草歇，旧山乔木多。悠然暮天际，但见鸟相过。

卷 556_74 【山中兴作】

马戴

高高丹桂枝，袅袅女萝衣。密叶浮云过，幽阴暮鸟归。
月和风翠动，花落瀑泉飞。欲剪兰为佩，中林露未晞。

卷 556_75 【送皇甫协律淮南从事】

马戴

辟书丞相草，招作广陵行。隋柳疏淮岸，汀洲接海城。
楚檣经雨泊，烟月隔潮生。谁与同尊俎，鸡鸾集虎营。

卷 556_76 【别灵武令狐校书】

马戴

北风吹别思，落月度关河。树隐流沙短，山平近塞多。
雁池戎马饮，雕帐戍人过。莫虑行军苦，华夷道正和。

卷 556_77 【田氏南楼对月】

马戴

主人同露坐，明月在高台。咽咽阴虫叫，萧萧寒雁来。
影摇疏木落，魄转曙钟开。幸免丹霞映，清光溢酒杯。

卷 556_78 【送宗密上人】

马戴

门前九陌尘，石上定中身。近放辽天鹤，曾为南岳人。
腊高松叶换，雪尽茗芽新。一自传香后，名山愿卜邻。

卷 556_79 【白鹿原晚望】

马戴

浐曲雁飞下，秦原人葬回。丘坟与城阙，草树共尘埃。

卷 556_80 【失意书怀呈知己】

马戴

直道何由启圣君，非才谁敢议论文。心存黄箓兼丹诀，
家忆青山与白云。麋鹿幽栖闲可近，鸳鸯高举势宜分。
微生不学刘琨辈，剑刃相交拟立勋。

卷 556_81 【春日寻浣川王处士】

马戴

碧草径微断，白云扉晚开。罢琴松韵发，鉴水月光来。
宿鸟排花动，樵童浇竹回。与君同露坐，涧石拂青苔。

卷 556_82 【宿阳台观】

马戴

玉洞仙何在，炉香客自焚。醺坛围古木，石磬响寒云。
曙月孤霞映，悬流峭壁分。心知人世隔，坐与鹤为群。

卷 556_83 【寄金州姚使君员外】

马戴

老怀清净化，乞去守洵阳。废井人应满，空林虎自藏。
迸泉疏石窦，残雨发椒香。山缺通巴峡，江流带楚樯。
忧农生野思，祷庙结云装。覆局松移影，听琴月堕光。
鸟鸣开郡印，僧去置禅床。罢贡金休凿，凌寒笋更长。
退公披鹤氅，高步隔鹓行。相见朱门内，麾幢拂曙霜。

卷 556_84 【中秋夜坐有怀】

马戴

秋光动河汉，耿耿曙难分。堕露垂丛药，残星间薄云。
心悬赤城峤，志向紫阳君。雁过海风起，萧萧时独闻。

卷 556_85 【题镜湖野老所居】

马戴

湖里寻君去，樵风往返吹。树喧巢鸟出，路细药田移。
沤苳成鱼网，枯根是酒卮。老年唯自适，生事任群儿。

卷 556_86 【题女道士居】

马戴

不饵住云溪，休丹罢药畦。杏花虚结子，石髓任成泥。
扫地青牛卧，栽松白鹤栖。共知仙女丽，莫是阮郎妻。

卷 556_87 【送王道士】

马戴

真人俄整舄，双鹤屡飞翔。恐入壶中住，须传肘后方。
霓裳云气润，石径术苗香。一去何时见，仙家日月长。

卷 556_88 【送道友入天台山作】

马戴

却忆天台去，移居海岛空。观寒琪树碧，雪浅石桥通。
漱齿飞泉外，餐霞早境中。终期赤城里，披氅与君同。

卷 556_89 【题章野人山居】

马戴

带郭茅亭诗兴饶，回看一曲倚危桥。门前山色能深浅，
壁上湖光自动摇。闲花散落填书帙，戏鸟低飞碍柳条。
向此隐来经几载，如今已是汉家朝。

卷 556_90 【江中遇客】

马戴

危石江中起，孤云岭上还。相逢皆得意，何处是乡关。

卷 556_91 【期王炼师不至】

马戴

黄精蒸罢洗琼杯，林下从留石上苔。
昨日围棋未终局，多乘白鹤下山来。

卷 556_92 【秋日送僧志幽归山寺】

马戴

禅室绳床在翠微，松间荷笠一僧归。
磬声寂历宜秋夜，手冷灯前自衲衣。

卷 556_93 【句】

马戴

申胥任向秦庭哭，靳尚终贻楚国忧。

第五百五十七卷

卷 557_1 【寄宜阳兄弟】

易重

六年雁序恨分离，诏下今朝遇已知。上国皇风初喜日，
御阶恩渥属身时。内庭再考称文异，圣主宣名奖艺奇。
故里仙才若相问，一春攀得两重枝。

卷 557_2 【发蕙风馆遇阴不见九华山有作】

孟迟

我来淮阴城，千江万山无不经。山青水碧千万丈，
奇峰急派何纵横！又闻九华山，山顶连青冥。太白有逸韵，
使我西南行。一步一攀策，前行正鸡鸣。阴云冉冉忽飞起，
千里万里危峥嵘。譬如天之有日蚀，使我昏沈犹不明。
人家敲镜救不得，光阴却属贪狼星。恨亦不能通，
言亦不足听。长鞭挥马出门去，是以九华为不平。

卷 557_3 【寄浙右旧幕僚】

孟迟

由来恶舌难追，自古无媒谤所归。勾践岂能容范蠡，
李斯何暇救韩非。巨拳岂为鸡挥肋，强弩那因鼠发机。
惭愧故人同鲍叔，此心江柳尚依依。

卷 557_4 【壮士吟】

孟迟

壮士何曾悲，悲即无回期。如何易水上，未歌泪先垂。

卷 557_5 【徐波渡】

孟迟

晓月千重树，春烟十里溪。过来还过去，此路不知迷。

卷 557_6 【题嘉祥驿】

孟迟

树顶烟微绿，山根菊暗香。何人独鞭马，落日上嘉祥。

卷 557_7 【怀郑洎】

孟迟

风兰舞幽香，雨叶堕寒滴。美人来不来，前山看向夕。

卷 557_8 【长信宫】

孟迟

君恩已尽欲何归，犹有残香在舞衣。
自恨身轻不如燕，春来还绕御帘飞。

卷 557_9 【闺情】

孟迟

山上有山归不得，湘江暮雨鹧鸪飞。
靡芜亦是王孙草，莫送春香入客衣。

卷 557_10 【莲塘】

孟迟

脉脉低回殷袖遮，脸横秋水髻盘鸦。

莲茎有刺不成折，尽日岸傍空看花。

卷 557_11 【还淮却寄睢阳】

孟迟

梁王池苑已苍然，满树斜阳极浦烟。
尽日回头看不见，两行愁泪上南船。

卷 557_12 【乌江】

孟迟

中分岂是无遗策，百战空劳不逝骓。
大业固非人事及，乌江亭长又何知。

卷 557_13 【新安故关】

孟迟

汉帝英雄重武材，崇山险处凿门开。
如今更有将军否，移取潼关向北来。

卷 557_14 【广陵城】

孟迟

红绕高台绿绕城，城边春草傍墙生。
隋家不向此中尽，汴水应无东去声。

卷 557_15 【过骊山】

孟迟

冷日微烟渭水愁，华清宫树不胜秋。
霓裳一曲千门锁，白尽梨园弟子头。

卷 557_16 【吴故宫】

孟迟

越女歌长君且听，芙蓉香满水边城。
岂知一日终非主，犹自如今有怨声。

卷 557_17 【兰昌宫】

孟迟

宫门两片掩埃尘，墙上无花草不春。
谁见当时禁中事，阿娇解佩与何人。

卷 557_18 【宫人斜】

孟迟

云惨烟愁苑路斜，路傍丘冢尽宫娃。
茂陵不是同归处，空寄香魂著野花。

卷 557_19 【句】

孟迟

天地有时饶一掷。江山无主任平分。

卷 557_20 【和于兴宗登越王楼诗】

王铎

谢朓题诗处，危楼压郡城。雨余江水碧，云断雪山明。

锦绣来仙境，风光入帝京。恨无青玉案，何以报高情。

卷 557_21 【谒梓潼张恶子庙】

王铎

盛唐圣主解青萍，欲振新封济顺名。夜雨龙抛三尺匣，
春云凤入九重城。剑门喜气随雷动，玉垒韶光待贼平。
惟报关东诸将相，柱天功业赖阴兵。

卷 557_22 【罢都统守镇滑州作】

王铎

用军何事敢迁延，恩重才轻分使然。黜诏已闻来阙下，
檄书犹未遍军前。腰间尽解苏秦印，波上虚迎范蠡船。
正会星辰扶北极，却驱戈甲镇南燕。三尘上相逢明主，
九合诸侯愧昔贤。看却中兴扶大业，杀身无路好归田。

卷 557_23 【句】

王铎

华表尚迷丁令鹤，竹坡犹认葛溪龙。

卷 557_24 【中秋月直禁苑】

郑畋

禁署方怀忝，纶闱已再加。暂来西掖路，还整上清槎。
恍惚归丹地，深严宿绛霞。幽襟聊自适，闲弄紫薇花。

卷 557_25 【麦穗两岐】

郑畋

圣虑忧千亩，嘉苗荐两岐。如云方表盛，成穗忽标奇。
瑞露纵横滴，祥风左右吹。讴歌连上苑，化日遍平陂。
史册书堪重，丹青画更宜。愿依连理树，俱作万年枝。

卷 557_26 【五月一日紫宸候对时属禁直，穿内而行，因书六韵】

郑畋

朱夏五更后，步廊三里余。有人从翰苑，穿入内中书。
漏响飘银箭，灯光照玉除。禁扉犹锁钥，宫妓已妆梳。
紫府游应似，钧天梦不如。尘埃九重外，谁信在清虚。

卷 557_27 【题缙山王子晋庙】

郑畋

有昔灵王子，吹笙溯沕。六宫攀不住，三岛去相招。
亡国原陵古，冥天岁月遥。无蹊窥海曲，有庙访山椒。
石帐龙蛇拱，云栊彩翠销。露坛装琬琰，真像写松乔。
珠馆青童宴，琳宫阿母朝。气舆仙女侍，天马吏兵调。
湘妓红丝瑟，秦郎白管箫。西城要绰约，南岳命娇娆。
句曲觞金洞，天台啸石桥。晚花珠弄蕊，春茹玉生苗。
二景神光秘，三元宝篆饶。雾垂鸦翅发，冰束虎章腰。
鹤驭争銜箭，龙妃合献绡。衣从星渚浣，丹就日宫烧。
物外花尝满，人间叶自凋。望台悲汉戾，阅水笑梁昭。
古殿香残炷，荒阶柳长条。几曾期七日，无复降重霄。
嵩岭连天汉，伊瀾入海潮。何由得真诀，使我佩环飘。

卷 557_28 【初秋寓直三首】

郑畋

晓星独挂结麟楼，三殿风高药树秋。
玉笛数声飘不住，问人依约在东头。

宿鸟翩翩落照微，石台楼阁锁重扉。
步廊无限金羈响，应是诸司扈从归。

幽阁焚香万虑凝，下帘胎息过禅僧。
玉堂分照无人后，消尽金盆一碗冰。

卷 557_29 【夜景又作】

郑畋

铃绦无响闭珠宫，小阁凉添玉蕊风。
枕簟满床明月到，自疑身在五云中。

卷 557_30 【杪秋夜直】

郑畋

蕊宫裁诏与宵分，虽在青云忆白云。
待报君恩了归去，山翁何急草移文。

卷 557_31 【禁直寄崔员外】

郑畋

银台楼北蕊珠宫，夙与人间路不同。
在省五更春睡侣，早来分梦玉堂中。

卷 557_32 【闻号】

郑畋

陛兵偏近羽林营，夜静仍传禁号声。
应笑执金双阙下，近南犹隔两重城。

卷 557_33 【禁直和人饮酒】

郑畋

卉醴陀花物外香，清浓标格胜椒浆。
我来尚有钧天会，犹得金尊半日尝。

卷 557_34 【下直早出】

郑畋

诸司人尽马蹄稀，紫帕云竿九钉归。
偏觉石台清贵处，榜悬金字射晴晖。

卷 557_35 【金銮坡上南望】

郑畋

玉晨钟韵上清虚，画戟祥烟拱帝居。
极眼向南无限地，绿烟深处认中书。

卷 557_36 【酬隐珪舍人寄红烛】

郑畋

蜜炬殷红画不如，且将归去照吾庐。
今来并得三般事，灵运诗篇逸少书。

卷 557_37 【马嵬坡】

郑畋

玄宗回马杨妃死，云雨虽亡日月新。
终是圣明天子事，景阳宫井又何人。

卷 557_38 【句】

郑畋

圆明青饣飣饭，光润碧霞浆。

浴殿晴秋倘中谢，残英犹可醉琼杯。

卷 557_39 【题九华山】

谭铎

忆闻九华山，尚在童稚年。浮沉任名路，窥仰会无缘。
罢职池阳时，复遭迎送牵。因兹契诚愿，瞩望枕席前。
况值春正浓，气色无不全。或如碧玉静，或似青霞鲜。
或接白云堆，或映红霞天。呈姿既不一，变态何啻千。
巍峨本无动，崇峻性岂偏。外景自隐隐，潜虚固幽玄。
我来暗凝情，务道志更坚。色与山异性，性并山亦然。
境变山不动，性存形自迁。自迁不阻俗，自定不失贤。
浮华与朱紫，安可迷心田。

卷 557_40 【真娘墓】

谭铎

武丘山下冢累累，松柏萧条尽可悲。

何事世人偏重色，真娘墓上独题诗。

卷 557_41 【望九华山】

卢嗣立

九华深翠落轩楹，迥眺澄江气象明。不遇阴霾孤岫隐，
正当寒日众峰呈。坐观风雪销烦思，惜别烟岚驻晓行。
得路归山期早决，夜来潜已告精诚。

卷 557_42 【应举日寄兄弟】

朱可名

废刈镜湖田，上书紫阁前。愁人久委地，诗道未闻天。
不是烧金手，徒抛钓月船。多惭兄弟意，不敢问林泉。

卷 557_43 【河出荣光】

张良器

引派昆山峻，朝宗海路长。千龄逢圣主，五色瑞荣光。
隐映浮中国，晶明助太阳。坤维连浩漫，天汉接微茫。
丹阙清氛里，函关紫气旁。位尊常守伯，道泰每呈祥。

· 全唐诗 ·

习坎灵逾久，居卑德有常。龙门如可涉，忠信是舟梁。

第五百五十八卷

卷 558_1 【新雪八韵】

薛能

大雪满初晨，开门万象新。龙钟鸡未起，萧索我何贫。
耀若花前境，清如物外身。细飞斑户牖，干洒乱松筠。
正色凝高岭，随流助要津。鼎消微是滓，车碾半和尘。
茶兴留诗客，瓜情想戍人。终篇本无字，谁别胜阳春。

卷 558_2 【国学试风化下】

薛能

霁阙露穹崇，含生仰圣聪。英明高比日，声教下如风。
静发宸居内，低来品物中。南薰歌自溥，北极响皆通。
蘋末看无状，人间觉有功。因今委泥者，睹此忘途穷。

卷 558_3 【升平词十首】

薛能

瑞气绕宫楼，皇居信上游。远冈连圣祚，平地载神州。
会合皆重译，潺湲近八流。中兴岂假问，据此自千秋。

寥泚敞延英，朝班立位横。宣传无草动，拜舞有衣声。
鸳瓦霜消湿，虫丝日照明。辛勤自不到，遥见似前程。

处处是欢心，时康岁已深。不同三尺剑，应似五弦琴。
寿笑山犹尽，明嫌日有阴。何当怜一物，亦遣断愁吟。

曙质绝埃氛，彤庭列禁军。圣颜初对日，龙尾竞缘云。
佩响交成韵，帘阴暖带纹。逍遥岂有事，于此咏南薰。

一物至周天，洪纤尽晏然。车书无异俗，甲子并丰年。
奇技皆归朴，征夫亦服田。君王故不有，台鼎合韦弦。

日日听歌谣，区中尽祝尧。虫蝗初不害，夷狄近全销。
史笔惟书瑞，天台绝见妖。因令匹夫志，转欲事清朝。

品物尽昭苏，神功复帝谟。他时应有寿，当代且无虞。
赐历通遐俗，移关入半胡。鹓鷺一何幸，于此寄微躯。

无战复无私，尧时即此时。焚香临极早，待月卷帘迟。

端拱乾坤内，何言黜纆垂。君看圣明验，只此是神龟。

旭日上清穹，明堂坐圣聪。衣裳承瑞气，冠冕盖重瞳。
花木经宵露，旌旗入仗风。何期于此地，见说是神工。

五帝三皇主，萧曹魏邴臣。文章惟返朴，戈甲尽生尘。
谏纸应无用，朝纲自有伦。升平不可记，所见是闲人。

卷 558_4 【送冯温往河外】

薛能

琴剑事行装，河关出北方。秦音尽河内，魏画自黎阳。
野日村苗熟，秋霜馆叶黄。风沙问船处，应得立清漳。

卷 558_5 【送从兄之太原副使】

薛能

少载琴书去，须知暂佐军。初程见西岳，尽室渡横汾。
元日何州住，枯风宿馆闻。都门送行处，青紫骑纷纷。

卷 558_6 【送马戴书记之太原】

薛能

一曲大河声，全家几日行。从容长约夜，差互忽离城。
镇北胡沙浅，途中霍岳横。相逢莫已讯，诗雅负雄名。

卷 558_7 【送友人出塞】

薛能

榆关到不可，何况出榆关。春草临岐断，边楼带日闲。
人归穹帐外，鸟乱废营间。此地堪愁想，霜前作意还。

卷 558_8 【送李溟出塞】

薛能

边城官尚恶，况乃是羁游。别路应相忆，离亭更少留。
黄沙人外阔，飞雪马前稠。甚险穹庐宿，无为过代州。

卷 558_9 【寄终南隐者】

薛能

海日东南出，应开岭上扉。扫坛花入簪，科竹露沾衣。
饭后嫌身重，茶中见鸟归。相思爱民者，难说与亲违。

卷 558_10 【赠隐者】

薛能

自得高闲性，平生向北栖。月潭云影断，山叶雨声齐。
庭树人书匝，栏花鸟坐低。相留永不忘，经宿话丹梯。

卷 558_11 【惜春】

薛能

花开亦花落，时节暗中迁。无计延春日，可能留少年。
小丛初散蝶，高柳即闻蝉。繁艳归何处，满山啼杜鹃。

卷 558_12 【送人自苏州之长沙县官】

薛能

驱马复乘流，何时发虎丘。全家上南岳，一尉事诸侯。
茶煮朝宗水，船停调角州。炎方好将息，卑湿旧堪忧。

卷 558_13 【早春归山中旧居】

薛能

茫茫驱匹马，归处是荒榛。猿迹破庭雪，鼠踪生甑尘。
开门冲网断，扫叶放苔匀。为惜诗情错，应难致此身。

卷 558_14 【麟中寓居寄蒲中友人】

薛能

萧条秋雨地，独院阻同群。一夜惊为客，多年不见君。
边心生落日，乡思羡归云。更在相思处，子规灯下闻。

卷 558_15 【关中送别】

薛能

一行千里外，几事寸心间。才子贫堪叹，男儿别是闲。
黄河淹华岳，白日照潼关。若值乡人问，终军贱不还。

卷 558_16 【中秋夜寄李溟】

薛能

满魄断埃氛，牵吟并舍闻。一年唯此夜，到晚愿无云。
待赏从初出，看行过二分。严城亦已闭，悔不预期君。

卷 558_17 【赠禅师】

薛能

梦想青山寺，前年住此中。夜堂吹竹雨，春地落花风。
旧句师曾见，清斋我亦同。浮生蹇莫问，辛苦未成功。

卷 558_18 【送禅僧】

薛能

寒空孤鸟度，落日一僧归。近寺路闻梵，出郊风满衣。
步摇瓶浪起，孟夏磬声微。还坐栖禅所，荒山月照扉。

卷 558_19 【赠隐者】

薛能

门前虽有径，绝向世间行。薤草因逢药，移花便得莺。
甘贫原是道，苦学不为名。莫怪苍髯晚，无机任世情。

卷 558_20 【冬日送僧归吴中旧居】

薛能

去扫冬林下，闲持未遍经。为山低凿牖，容月广开庭。
旧业云千里，生涯水一瓶。还应觅新句，看雪倚禅扃。

卷 558_21 【恭禧皇太后挽歌词三首】

薛能

八月曾殊选，三星固异仪。柎陵经灞浐，归赙杂华夷。
旌去题新谥，宫存锁素帏。重泉应不恨，生见太平时。

月落娥兼隐，宫空后岂还。衔哀穷地界，亲莅泣天颜。
旧住留丹药，新陵在碧山。国人伤莫及，应只咏关关。

配圣三朝隔，灵仪万姓哀。多年好黄老，旧日荐贤才。
道著标彤管，宫闲闭绿苔。平生六衣在，曾著祀高禴。

卷 558_22 【送胡澳下第归蒲津】

薛能

无媒甘下飞，君子尚麻衣。岁月终荣在，家园近且归。
山光临舜庙，河气隔王畿。甚积汤原思，青青宿麦肥。

卷 558_23 【春日闲居】

薛能

权门多见薄，吾道岂终行。散地徒忧国，良时不在城。

花繁春正王，茶美梦初惊。赖有兹文在，犹堪畅此生。

卷 558_24 【题逃户】

薛能

几界蓍农桑，凶年竟失乡。朽关生湿菌，倾屋照斜阳。
雨水淹残臼，葵花压倒墙。明时岂致此，应自负苍苍。

卷 558_25 【郊居答客】

薛能

傍舍虫声满，残秋宿雨村。远劳才子骑，光顾野人门。
败叶盘空蔓，雕丛露暗根。相携未尽语，川月照黄昏。

卷 558_26 【早春归山中旧居】

薛能

绿草闭闲院，悄然花正开。新年人未去，戊日燕还来。
雨地残枯沫，灯窗积旧煤。归田语不忘，樗散料非才。

卷 558_27 【下第后春日长安寓居三首】

薛能

一榜尽精选，此身犹陆沉。自无功谗分，敢抱怨尤心。
暖陌开花气，春居闭日阴。相知岂不有，知浅未知深。

暂屈固何恨，所忧无此时。隔年空仰望，临日又参差。
劳力且成病，壮心能不衰。犹将琢磨意，更欲候宗师。

关东归不得，岂是爱他乡。草碧余花落，春闲白日长。
全家期圣泽，半路敢农桑。独立应无侣，浮生欲自伤。

卷 558_28 【春早选寓长安二首】

薛能

疏拙自沉昏，长安岂是村。春非闲客事，花在五侯门。
道僻惟忧祸，诗深不敢论。扬雄若有荐，君圣合承恩。

旧论已浮海，此心犹滞秦。上僚如报国，公道岂无人。
岩隐悬溪瀑，城居入榻尘。渔舟即拟去，不待晚年身。

卷 558_29 【送进士许棠下第东归】

薛能

长安那不住，西笑又东行。若以贫无计，何因事有成。
云峰天外出，江色草中明。谩忝相于分，吾言世甚轻。

卷 558_30 【咏岛】

薛能

孤岛如江上，诗家犹闭门。一池分倒影，空舸系荒根。
烟湿高吟石，云生偶坐痕。登临有新句，公退与谁论。

卷 558_31 【冬日写怀】

薛能

幕府尽平蛮，客留戎阕间。急流霜夹水，轻霭日连山。
设醴徒惭楚，为郎未姓颜。斯文苦不胜，会拟老民闲。

卷 558_32 【和杨中丞早春即事】

薛能

贵宅登临地，春来见物华。远江桥外色，繁杏竹边花。
戍客烽楼迥，文君酒幔斜。新题好不已，珠府未穷奢。

卷 558_33 【闻官军破吉浪戎小而固，虑史氏遗忽，因记为二章】

薛能

一战便抽兵，蛮孤吉浪平。通连无旧穴，要害有新城。
昼卒烽前寝，春农界上耕。高楼一拟望，新雨剑南清。

泸水断嚣氛，妖巢已自焚。汉江无敌国，蛮物在回军。
越巂通游国，苴咩闭聚蚊。空余罗凤曲，哀思满边云。

卷 558_34 【寒食有怀】

薛能

流落伤寒食，登临望岁华。村球高过索，坟树绿和花。
晋聚应搜火，秦喧定走车。谁知恨榆柳，风景似吾家。

卷 558_35 【绵楼】

薛能

溪边人浣纱，楼下海棠花。极望虽怀土，多情拟置家。
前山应象外，此地已天涯。未有销忧赋，梁王礼欲奢。

卷 558_36 【雕堂】

薛能

丈室久多病，小园晴独游。鸣蛩孤烛雨，啁雀一篱秋。
圣主恩难谢，生灵志亦忧。他年谁识我，心迹在徐州。

卷 558_37 【赠歌人】

薛能

温燠坐相侵，罗襦一水沉。拜深知有意，令背不无心。
近住应名玉，前生约姓阴。东山期已定，相许便抽簪。

卷 558_38 【柘枝词三首】

薛能

同营三十万，震鼓伐西羌。战血粘秋草，征尘搅夕阳。
归来人不识，帝里独戎装。

悬军征拓羯，内地隔萧关。日色昆仑上，风声朔漠间。
何当千万骑，飒飒贰师还。

意气成功日，春风起絮天。楼台新邸第，歌舞小婵娟。
急破催摇曳，罗衫半脱肩。

卷 558_39 【咏柳花】

薛能

浮生失意频，起絮又飘沦。发自谁家树，飞来独院春。
朝容萦断砌，晴影过诸邻。乱掩宫中蝶，繁冲陌上人。
随波应到海，沾雨或依尘。会向慈恩日，轻轻对此身。

卷 558_40 【一叶落】

薛能

轻叶独悠悠，天高片影流。随风来此地，何树落先秋。

变色黄应近，辞林绿尚稠。无双浮水面，孤绝落关头。
乍减诚难觉，将凋势未休。客心空自比，谁肯问新愁。

卷 558_41 【行路难】

薛能

何处力堪殫，人心险万端。藏山难测度，暗水自波澜。
对面如千里，回肠似七盘。已经吴坂困，欲向雁门难。
南北诚须泣，高深不可干。无因善行止，车辙得平安。

卷 558_42 【蔡州蒋亭】

薛能

草径彻林间，过桥如入山。蔡侯添水榭，蒋氏本柴关。
静泛穷幽趣，惊飞湿醉颜。恨无优俸买，来得暂时闲。
步与招提接，舟临夕照还。春风应不到，前想负花湾。

卷 558_43 【戏题】

薛能

闪闪动鸣珰，初来烛影傍。拥头珠翠重，萦步绮罗长。

静发歌如磬，连飘气觉香。不言微有笑，多媚总无妆。
坐缺初离席，帘垂却入房。思惟不是梦，此会胜高唐。

卷 558_44 【酬曹侍御见寄】

薛能

儒道苦不胜，迩来惟慕禅。触途非巧者，于世分沉然。
要地羞难入，闲居钝更便。清和挑菜食，闷寂闭花眠。
累遣期抛俸，机忘怕与权。妨春愁筦榷，响夜忆林泉。
匪石从遭刖，珠膏枉被煎。讨论唯子厚，藏退合吾先。
旧制群英伏，来章六义全。休旬一拟和，乡思乱情田。

卷 558_45 【送赵道士归天目旧山】

薛能

愚朴尚公平，此心邻道情。有缘终自鄙，何计逐师行。
日者闻高躅，时人盖强名。口无滋味入，身有羽仪生。
奏乞还乡远，诗曾对御成。土毛珍到越，尘发倦离京。
符叱风雷恶，朝修月露清。观临天目顶，家住海潮声。
道引图看足，参同注解精。休粮一拟问，窗草俟回程。

卷 558_46 【除夜作】

薛能

和吹度穹旻，虚徐接建寅。不辞加一岁，唯喜到三春。
燎照云烟好，幡悬井邑新。祯祥应北极，调燮验平津。
树欲含迟日，山将退旧尘。兰萎残此夜，竹爆和诸邻。
祝寿思明圣，驱傩看鬼神。团圆多少辈，眠寝独劳筋。
茜旆犹双节，雕盘又五辛。何当平贼后，归作自由身。

卷 558_47 【桃花】

薛能

香色自天种，千年岂易逢。开齐全未落，繁极欲相重。
冷湿朝如淡，晴干午更浓。风光新社燕，时节旧春农。
篱落欹临竹，亭台盛间松。乱缘堪羨蚁，深入不如蜂。
有影宜暄煦，无言自冶容。洞连非俗世，溪静接仙踪。
子熟河应变，根盘土已封。西王潜爱惜，东朔盗过从。
醉席眠英好，题诗恋景慵。芳菲聊一望，何必在临邛。

卷 558_48 【黄河】

薛能

何处发昆仑，连乾复浸坤。波浑经雁塞，声振自龙门。

岸裂新冲势，滩余旧落痕。横沟通海上，远色尽山根。
勇逗三峰坼，雄标四渎尊。湾中秋景树，阔外夕阳村。
沫乱知鱼响，槎来见鸟蹲。飞沙当白日，凝雾接黄昏。
润可资农亩，清能表帝恩。雨吟堪极目，风度想惊魂。
显瑞龟曾出，阴灵伯固存。盘涡寒渐急，浅濑暑微温。
九曲终柔胜，常流可暗吞。人间无博望，谁复到穷源。

卷 558_49 【华岳】

薛能

簇簇复亭亭，三峰卓杳冥。每思穷本末，应合记图经。
发地连宫观，冲天接井星。河微临巨势，秦重载奇形。
太古朝群后，中央擘巨灵。邻州犹映槛，几县恰当庭。
鹤毳坛风乱，龙漈涧水腥。望遥通北极，上彻见东溟。
客玩晴难偶，农祈雨必零。度关无暑气，过路得愁醒。
羽客时应见，霜猿夜可听。顶悬飞瀑峻，崦合白云青。
混石猜良玉，寻苗得茯苓。从官知侧近，悉俸致岩扃。

卷 558_50 【秋雨】

薛能

宿雨觉才初，亭林忽复徐。簇声诸树密，悬滴四檐疏。
省漏疑方丈，愁炊问斗储。步难多入屐，窗浅欲飘书。

动蠖苍苔静，藏蚕落叶虚。吹交来翕习，雷慢歇踟蹰。
滞已妨行路，晴应好荷锄。醉楼思蜀客，鯨市想淮鱼。
径草因缘合，栏花自此除。有形皆霰霏，无地不污潴。
境晦宜甘寝，风清□退居。我魂惊晓簟，邻话喜秋蔬。
既用功成岁，旋应惨变舒。仓箱足可恃，归去傲吾庐。

卷 558_51 【春色满皇州】

薛能

蔼蔼复悠悠，春归十二楼。最明云里阙，先满日边州。
色媚青门外，光摇紫陌头。上林荣旧树，太液镜新流。
暖带祥烟起，清添瑞景浮。阳和如启蛰，从此事芳游。

卷 558_52 【寄唁张乔喻坦之】

薛能

何事尽参差，惜哉吾子诗。日令销此道，天亦负明时。
有路当重振，无门即不知。何当见尧日，相与啜尧漓。

卷 558_53 【赠僧】

薛能

尽日行方到，何年独此林。客归惟鹤伴，人少似师心。

· 全唐诗 ·

坐石落松子，禅床摇竹阴。山灵怕惊定，不遣夜猿吟。

第五百五十九卷

卷 559_1 【春日旅舍书怀】

薛能

出去归来旅食人，麻衣长带几坊尘。开门草色朝无客，
落案灯花夜一身。贫舍卧多消永日，故园莺老忆残春。
蹉跎冠盖谁相念，二十年中尽苦辛。

卷 559_2 【秋日将离滑台酬所知二首】

薛能

身起中宵骨亦惊，一分年少已无成。松吹竹簟朝眠冷，
雨湿蔬餐宿疾生。僮汲野泉兼土味，马磨霜树作秋声。
相知莫话诗心苦，未似前贤取得名。

灯涩秋光静不眠，叶声身影客窗前。闲园露湿鸣蛩夜，
急雨风吹落木天。城见远山应北岳，野多空地本南燕。
明朝欲别忘形处，愁把离杯听管弦。

卷 559_3 【下第后夷门乘舟至永城驿题】

薛能

秋赋春还计尽违，自知身是拙求知。唯思旷海为休处，
忽喜孤舟似去时。连浦一城兼汴宋，夹堤千柳杂唐隋。
从来此恨皆前达，敢负吾君作楚辞。

卷 559_4 【秋夜旅舍寓怀】

薛能

庭锁荒芜独夜吟，西风吹动故山心。三秋木落半年客，
满地月明何处砧。渔唱乱沿汀鹭合，雁声寒咽陇云深。
平生只有松堪对，露浥霜欺不受侵。

卷 559_5 【洛下寓怀】

薛能

胡为遭遇孰为官，朝野君亲各自欢。敢向官途争虎首，
尚嫌身累爱猪肝。冰霜谷口晨樵远，星火炉边夜坐寒。
唯有报恩心未剖，退居犹欲佩茝兰。

卷 559_6 【题平湖】

薛能

平湖湖畔雨晴新，南北东西不隔尘。映野烟波浮动日，
损花风雨寂寥春。山无俗路藏高士，岸泊仙舟忆主人。
那得载来都未保，此心离此甚情亲。

卷 559_7 【平阳寓怀】

薛能

晋国风流阻洳川，家家弦管路岐边。曾为郡职随分竹，
亦作歌词乞采莲。北榭远峰闲即望，西湖残景醉常眠。
墙花此日休回避，不是当时恶少年。

卷 559_8 【留题汾上旧居】

薛能

乡园一别五年归，回首人间总祸机。尚胜邻翁常寂寞，
敢嫌裘马未轻肥。尘颜不见应消落，庭树曾栽已合围。
难说累牵还却去，可怜榆柳尚依依。

卷 559_9 【怀汾上旧居】

薛能

素汾千载傍吾家，常忆衡门对浣纱。好事喜逢投宿客，
刈田因得自生瓜。山头鼓笛阴沉庙，陌上薪蒸突兀车。
投暗作珠何所用，被人专拟害灵蛇。

卷 559_10 【送同儒大德归柏梯寺】

薛能

柏梯还拟谢微官，遥拟千峰送法兰。行径未曾青石断，
拂床终有白云残。京尘濯后三衣洁，山舍禅初万象安。
薇蕨纵多师莫踏，我心犹欲尽图看。

卷 559_11 【春日使府寓怀二首】

薛能

一想流年百事惊，已抛渔父戴尘缨。青春背我堂堂去，
白发欺人故故生。道困古来应有分，诗传身后亦何荣。
谁怜合负清朝力，独把风骚破郑声。

平生无解亦无操，永日书生坐独劳。唯觉宦情如水薄，
不知人事有山高。孤心好直迥犹强，病发慵梳痒更搔。
何事故溪归未得，几抛清浅泛红桃。

卷 559_12 【许州题德星亭】

薛能

灈水南流东有堤，堤边亭是武陵溪。槎松配石堪僧坐，
蕊杏含春欲鸟啼。高树月生沧海外，远郊山在夕阳西。
频来不似军从事，只戴纱巾曳杖藜。

卷 559_13 【送人归上党】

薛能

燕台基坏穴狐蛇，计拙因循岁月赊。兵革未销王在镐，
桑蚕临熟客还家。霏微对岸漳边雨，堆阜邻疆蓟北沙。
若到长平战场地，为求遗镞辟魔邪。

卷 559_14 【春日重游平湖】

薛能

湖上春风发管弦，须临三十此离筵。离人忽有重来日，

游女初非旧少年。官职已辜疲瘵望，诗名空被后生传。
啼莺莫惜蹉跎恨，闲事听吟一两篇。

卷 559_15 【并州】

薛能

少年流落在并州，裘脱文君取次游。携挈共过芳草渡，
登临齐凭绿杨楼。庭前蛱蝶春方好，床上樗蒲宿未收。
坊号偃松人在否，饼炉南畔曲西头。

卷 559_16 【相国陇西公南征，能以留务独宿府城作】

薛能

吾君贤相事南征，独宿军厨负请缨。灯室卧孤如怨别，
月阶簪草似临行。高墉撼铎思巴栈，老木号风念野营。
殊忆好僧招不及，夜来仓卒锁严城。

卷 559_17 【早春书事】

薛能

百蛮降伏委三秦，锦里风回岁已新。渠滥水泉花巷湿，

日销冰雪柳营春。何年道胜苏群物，尽室天涯是旅人。
焚却蜀书宜不读，武侯无可律余身。

卷 559_18 【春日书怀】

薛能

伯牙琴绝岂求知，往往情牵自有诗。莜月正当寒食夜，
春阴初过海棠时。耽书未必酬良相，断酒唯堪作老师。
多病不任衣更薄，东风台上莫相吹。

卷 559_19 【投杜舍人】

薛能

床上新诗诏草和，栏边清酒落花多。闲消白日舍人宿，
梦觉紫薇山鸟过。春刻几分添禁漏，夏桐初叶满庭柯。
风骚委地苦无主，此事圣君终若何。

卷 559_20 【献仆射相公】

薛能

清如冰雪重如山，百辟严趋礼绝攀。强虏外闻应丧胆，

平人相见尽开颜。朝廷有道青春好，门馆无私白日闲。
致却垂衣更何事，几多诗句咏关关。

卷 559_21 【上盐铁尚书】

薛能

南宫环雉隔嚣尘，况值清斋宿大臣。城绝鼓钟更点后，
雨凉烟树月华新。檐前漱晓穹苍碧，庭下眠秋沆漭津。
闻说务闲心更静，此时忧国合求人。

卷 559_22 【汉南春望】

薛能

独寻春色上高台，三月皇州驾未回。几处松筠烧后死，
谁家桃李乱中开。奸邪用法原非法，唱和求才不是才。
自古浮云蔽白日，洗天风雨几时来。

卷 559_23 【晚春】

薛能

恶怜风景极交亲，每恨年年作瘦人。卧晚不曾抛好夜，

情多唯欲哭残春。阴成杏叶才通日，雨著杨花已污尘。
无限后期知有在，只愁烦作总戎身。

卷 559_24 【将赴镇过太康县有题】

薛能

才入东郊便太康，自听何暮岂龚黄。晴村透日桑榆影，
晓露湿秋禾黍香。十万旌旗移巨镇，几多輶輶负孤庄。
时人欲识征东将，看取欃枪落太荒。

卷 559_25 【彭门解嘲二首】

薛能

呜呜吹角贰师营，落日身闲笑傲行。尽觉文章尊万事，
却嫌官职剩双旌。终休未拟降低屈，忽遇还须致太平。
频上水楼谁会我，泗滨浮磬是同声。

伤禽栖后意犹惊，偶向鸬竿脱此生。身外不思簪组事，
耳中唯要管弦声。耽吟乍可妨时务，浅饮无因致宿醒。
秦客莫嘲瓜戍远，水风潇洒是彭城。

卷 559_26 【清河泛舟】

薛能

都人层立似山丘，坐啸将军拥棹游。绕郭烟波浮泗水，
一船丝竹载凉州。城中睹望皆丹雘，旗里惊飞尽白鸥。
儒将不须夸郤縠，未闻诗句解风流。

卷 559_27 【新竹】

薛能

柳营茅土倦粗材，因向山家乞翠栽。清露便教终夜滴，
好风疑是故园来。栏边匠去朱犹湿，溉后虫浮穴暗开。
他日会应威凤至，莫辞公府受尘埃。

卷 559_28 【晚春】

薛能

征东留滞一年年，又向军前遇火前。画出鹧舟宜祓禊，
镂成鸡卵有秋千。澄明烟水孤城立，狼藉风花落日眠。
赖指清和樱笋熟，不然愁杀暮春天。

卷 559_29 【题彭祖楼】

薛能

新晴天状湿融融，徐国滩声上下洪。极目澄鲜无限景，
入怀轻好可怜风。身防潦倒师彭祖，妓拥登临愧谢公。
谁致此楼潜惠我，万家残照在河东。

卷 559_30 【汉庙祈雨回阳春亭有怀】

薛能

南荣轩槛接城闉，适罢祈农此访春。九九已从南至尽，
芊芊初傍北篱新。池中水是前秋雨，陌上风惊自古尘。
欲召罗敷倾一盏，乘闲言语不容人。

卷 559_31 【送李倍秀才】

薛能

南朝才子尚途穷，毕竟应须问叶公。书剑伴身离泗上，
雪风吹面立船中。家园枣熟归圭窦，会府槐疏试射弓。
相顾日偏留不得，夜深聊欲一杯同。

卷 559_32 【重游德星亭感事】

薛能

颍水川中枕水台，当时离别此重来。舟沉土岸生新草，
诗映纱笼有薄埃。事系兴亡人少到，地当今古我迟回。
残阳照树明于旭，犹向池边把酒杯。

卷 559_33 【许州题观察判官厅】

薛能

三载从戎类系匏，重游全许尚分茅。刘郎别后无遗履，
丁令归来有旧巢。冬暖井梧多未落，夜寒窗竹自相敲。
纤腰弟子知千恨，笑与扬雄作解嘲。

卷 559_34 【闲题】

薛能

八年藩翰似侨居，只此谁知报玉除。旧将已成三仆射，
老身犹是六尚书。时丁厚讷终无咎，道致中兴尚有余。
为问春风谁是主，空催弱柳拟何如。

卷 559_35 【送福建李大夫】

薛能

洛州良牧帅瓯闽，曾是西垣作谏臣。红旆已胜前尹正，
尺书犹带旧丝纶。秋来海有幽都雁，船到城添外国人。
行过小藩应大笑，只知夸近不知贫。

卷 559_36 【送李倍巡官归永乐旧居】

薛能

羡君归去五峰前，往往星河实见仙。麦垄夏枯成废地，
枣枝秋赤近高天。山泉饮犊流多变，村酒经蚕味可怜。
曾约道门终老住，步虚声里寄闲眠。

卷 559_37 【赠歌者】

薛能

一字新声一颗珠，转喉疑是击珊瑚。听时坐部音中有，
唱后樱花叶里无。汉浦蔑闻虚解佩，临邛焉用枉当垆。
谁人得向青楼宿，便是仙郎不是夫。

卷 559_38 【舞者】

薛能

绿毛钗动小相思，一唱南轩日午时。慢鞦轻裾行欲近，
待调诸曲起来迟。筵停匕箸无非听，吻带宫商尽是词。
为问倾城年几许，更胜琼树是琼枝。

卷 559_39 【天际识归舟】

薛能

斜日满江楼，天涯照背流。同人在何处，远目认孤舟。
帆省当时席，歌声旧日讴。人浮津济晚，棹倚沅寥秋。
晴阔忻全见，归迟怪久游。离居意无限，贪此望难休。

卷 559_40 【和曹侍御除夜有怀】

薛能

有病无媒客，多慵亦太疏。自怜成叔夜，谁与荐相如。
嗜退思年老，谄空笑岁除。迹闲过寺宿，头暖近阶梳。
春立穷冬后，阳生旧物初。叶多庭不扫，根在径新锄。
田事终归彼，心情倦老於。斫材须见像，藏剑岂为鱼。

效浅惭尹禄，恩多负辟书。酬知必拟共，勿使浪踟躇。

卷 559_41 【华清宫和杜舍人】

薛能

五十年天子，离宫仰峻墙。登封时正泰，御宇日何长。
上位先名实，中兴事宪章。起戎轻甲冑，余地复河湟。
道降玄元祖，儒封孔子王。因缘百司署，聚会一人汤。
渭水波摇绿，秦山草半黄。马驯金勒细，鹰健玉铃锵。
下箭朱方满，鸣鞭皓腕攘。畋思获吕望，谏只避周昌。
兔迹贪前逐，泉心不早防。几添鹦鹉劝，先赐荔枝尝。
月锁千门静，天吹一笛凉。细音摇羽佩，轻步宛霓裳。
祸乱基潜结，升平意遽忘。衣冠逃犬虏，鼙鼓动渔阳。
外戚心殊迫，中原事可量。血埋妃子艳，刃断禄儿肠。
近侍烟尘隔，前踪辇路荒。益知迷宠佞，遗恨丧贤良。
北阙尊明主，南宫逊上皇。禁清余凤吹，池冷睡龙光。
祝寿山犹在，流年水共伤。杜鹃魂厌蜀，蝴蝶梦悲庄。
雀卵遗雕拱，虫丝罥画梁。紫苔侵壁润，红树闭门芳。
守吏齐鸳瓦，耕民得翠珰。登年昔酺乐，讲武旧兵场。
暮草深岩翠，幽花坠径香。不堪垂白叟，行折御沟杨。

卷 559_42 【送浙东王大夫】

薛能

天爵擅忠贞，皇恩复宠荣。远源过晋史，甲族本缙笙。

亚相兼尤美，周行历尽清。制除天近晓，衙谢草初生。
宾客招闲地，戎装拥上京。九街鸣玉勒，一宅照红旗。
细雨当离席，遥花显去程。佩刀畿甸色，歌吹馆桥声。
骖裹从秦赐，舳舻到汴迎。步沙逢霁月，宿岸致严更。
渤澥流东鄙，天台压属城。众谈称重镇，公意念疲氓。
井邑曾多难，疮痍此未平。察应均赋敛，逃必复桑耕。
隼重权兼帅，翬雄设有兵。越台随厚俸，剡硖得尤名。
夜蜡州中宴，春风部外行。香奁扃凤诏，朱篆动龙坑。
报后功何患，投虚论素精。徵还真指掌，感激自关情。
旧业怀昏作，微班负旦评。空余骚雅事，千古傲刘桢。

卷 559_43 【送李殷游京西】

薛能

立马送君地，黯然愁到身。万途皆有匠，六义独无人。
莫怪敢言此，已能甘世贫。时来贵亦在，事是掩何因。
投刺皆羁旅，游边更苦辛。岐山终蜀境，泾水复蛮尘。
埋没餐须强，炎蒸醉莫频。俗徒欺合得，吾道死终新。
展分先难许，论诗永共亲。归京稍作意，充斥犯西邻。

卷 559_44 【长安送友人之黔南】

薛能

衡岳犹云过，君家独几千。心从贱游话，分向禁城偏。

陆路终何处，三湘在素船。琴书去迢递，星路照潺湲。
台镜簪秋晚，盘蔬饭雨天。同文到乡尽，殊国共行连。
后会应多日，归程自一年。贫交永无忘，孤进合相怜。

卷 559_45 【寄李频】

薛能

长安千万蹊，迷者自多迷。直性身难达，良时日易低。
环檐消旧雪，晴气满春泥。那得同君去，逢峰苦爱齐。

卷 559_46 【赠苗端公二首】

薛能

繁总近何如，君才必有余。身欢步兵酒，吏写鲁连书。
坐默闻鼙吹，庭班见雪初。沉碑若果去，一为访邻居。

至老不相疏，斯言不是虚。两心宜一体，同舍又邻居。
晓角秋砧外，清云白月初。从军何有用，未造鲁连书。

卷 559_47 【寄河南郑侍郎】

薛能

三峡与三壕，门阑梦去劳。细冰和洛水，初雪洒嵩高。

大雅何由接，微荣亦已逃。寒窗不可寐，风地叶萧骚。

卷 559_48 【蒙恩除侍御史行次华州寄蒋相】

薛能

林下天书起遁逃，不堪移疾入尘劳。黄河近岸阴风急，
仙掌临关旭日高。行野众喧闻雁发，宿亭孤寂有狼嚎。
荀家位极兼禅理，应笑埋轮著所操。

卷 559_49 【寄唐州杨郎中】

薛能

关雎憔悴一儒生，忽把鱼须事圣明。贫得俸钱还乍喜，
晚登朝序却无荣。前年坐蜀同樽俎，此日边淮独旆旌。
班列道孤君不见，曲江春暖共僧行。

卷 559_50 【塞上蒙汝州任中丞寄书】

薛能

三省推贤两掖才，关东深许稍迟回。舟浮汝水通淮去，
雨出嵩峰到郡来。投札转京忧不远，枉缄经虏喜初开。

西楼一望知无极，更与何人把酒杯。

卷 559_51 【题盐铁李尚书泸州别业】

薛能

鹿原阴面泸州湄，坐觉林泉逼梦思。闲景院开花落后，
湿香风好雨来时。邻惊麦野闻雏雉，别创茅亭住老师。
备足好中还有阙，许昌军里李陵诗。

第五百六十卷

卷 560_1 【送刘驾归京】

薛能

相逢听一吟，惟我不降心。在世忧何事，前生得至音。
蒲多南去远，汾尽北游深。为宿关亭日，苍苍晓欲临。

卷 560_2 【夏日寺中有怀】

薛能

亭午四邻睡，院中唯鸟鸣。当门塞鸿去，欹枕世人情。
地燥苍苔裂，天凉晚月生。归家岂不愿，辛苦未知名。

卷 560_3 【夏日蒲津寺居二首】

薛能

日日闲车马，谁来访此身。一门兼鹤静，四院与僧邻。

雨室墙穿溜，风窗笔染尘。空余气长在，天子用平人。

故国有如梦，省来长远游。清晨起闲院，疏雨似深秋。
宿寝书棱叠，行吟杖迹稠。天晴岂能出，春暖未更裘。

卷 560_4 【北都题崇福寺】

薛能

此地潜龙寺，何基即帝台。细花庭树荫，清气殿门开。
长老多相识，旬休暂一来。空空亦拟解，干进幸无媒。

卷 560_5 【题龙兴寺】

薛能

高户列禅房，松门到上方。像开祇树岭，人施蜀城香。
地遍磷磷石，江移子子樯。林僧语不尽，身役事梁王。

卷 560_6 【题大云寺西阁】

薛能

阁临偏险寺当山，独坐西城笑满颜。四野有歌行路乐，

五营无战射堂闲。鼙和调角秋空外，砧办征衣落照间。
方拟杀身酬圣主，敢于高处恋乡关。

卷 560_7 【舟行至平羌】

薛能

貔虎直沙壩，严更护早眠。簇霜孤驿树，落日下江船。
暂去非吴起，终休爱鲁连。平羌无一术，候吏莫加笏。

卷 560_8 【题开元寺阁】

薛能

一阁见一郡，乱流仍乱山。未能终日住，尤爱暂时闲。
唱棹吴门去，啼林杜宇还。高僧不可羨，西景掩禅关。

卷 560_9 【凌云寺】

薛能

像阁与山齐，何人致石梯。万烟生聚落，一岫露招提。
斋月人来上，残阳鸽去栖。从边亦已极，烽火是沈黎。

卷 560_10 【石堂溪】

薛能

三面接渔樵，前门向郡桥。岸沙崩橘树，山径入茶苗。
夜拥军烟合，春浮妓舸邀。此心无与醉，花影莫相烧。

卷 560_11 【荔枝楼】

薛能

高槛起边愁，荔枝谁致楼。会须教匠坼，不欲见蛮陬。
树痺无春影，天连觉汉流。仲宣如可拟，即此是荆州。

卷 560_12 【圣冈】

薛能

古迹是何王，平身入石房。远村通后径，一郡隔前冈。
昼静唯禅客，春来有女郎。独醒回不得，无事可焚香。

卷 560_13 【蜀州郑史君寄鸟觜茶，因以赠答八韵】

薛能

鸟觜撷浑牙，精灵胜镢铍。烹尝方带酒，滋味更无茶。
拒碾乾声细，撑封利颖斜。衔芦齐劲实，啄木聚菁华。
盐损添常诫，姜宜著更夸。得来抛道药，携去就僧家。
旋觉前瓯浅，还愁后信赊。千惭故人意，此惠敌丹砂。

卷 560_14 【暇日寓怀寄朝中亲友】

薛能

命与才违岂自由，我身何负我身愁。临生白发方监郡，
遥耻青衣懒上楼。过客闷嫌疏妓乐，小儿憨爱□貔貅。
闲吟一寄清朝侣，未必淮阴不拜侯。

卷 560_15 【春日寓怀】

薛能

幽拙未谋身，无端患不均。盗憎犹念物，花尽不知春。
井邑常多弊，江山岂有神。犍为何处在，一拟吊埋轮。

卷 560_16 【监郡犍为舟中寓题寄同舍】

薛能

一寝闲身万事空，任天教作假文翁。旗穿岛树孤舟上，
家在山亭每日中。叠果盘餐丹橘地，若花床席早梅风。
佳期说尽君应笑，刘表尊前且不同。

卷 560_17 【江柳】

薛能

条绿似垂缨，离筵日照轻。向人虽有态，伤我为无情。
桥远孤临水，墙低半出营。天津曾此见，亦是怆行行。

卷 560_18 【寄吉谏议】

薛能

将迎须学返抽身，合致蹉跎敢效颦。性静拟归无上士，
迹疏常负有情人。终凭二顷谋婚嫁，谬著千篇断斧斤。
闻说旧交贤且达，欲弹章甫自羞贫。

卷 560_19 【江上寄情】

薛能

天际归舟浩荡中，我关王泽道何穷。未为时彦徒经国，
尚有边兵耻佐戎。酿黍气香村欲社，斫桑春尽野无风。
年来断定知休处，一树繁花一亩宫。

卷 560_20 【平盖观】

薛能

巨柏与山高，玄门静有猱。春风开野杏，落日照江涛。
白璧心难说，青云世未遭。天涯望不极，谁识咏离骚。

卷 560_21 【春霁】

薛能

久客孤舟上，天涯漱晓津。野芳桤似柳，江霁雪和春。
吏叫能惊鹭，官粗实害身。何当穷蜀境，却忆滞游人。

卷 560_22 【春居即事】

薛能

云密露晨晖，西园独掩扉。雨新临断火，春冷著单衣。
榆荚奔风健，兰芽负土肥。交亲不是变，自作寄书稀。

卷 560_23 【边城寓题】

薛能

孤蹇复飘零，天涯若堕萤。东风吹痼疾，暖日极青冥。
蚕市归农醉，渔舟钓客醒。论邦苦不早，只此负王庭。

卷 560_24 【春日江居寓怀】

薛能

归兴乍离边，兰桡复锦川。斫春槎枿树，消雪土膏田。
岸暖寻新菜，舟寒著旧绵。临邛若个是，欲向酒家眠。

卷 560_25 【边城作】

薛能

行止象分符，监州是戏儒。管排蛮户远，出箐鸟巢孤。
北向秦何在，南来蜀已无。怀沙悔不及，只有便乘桴。

卷 560_26 【闻李夷遇下第东归因以寄赠】

薛能

囊中书是居山写，海畔家贫乞食还。吾子莫愁登第晚，
古人惟爱贱游闲。舟行散适江亭上，郡宴歌吟蜡烛间。
从此乐章休叙战，汉兵无阵亦无蛮。

卷 560_27 【留题】

薛能

茶兴复诗心，一瓿还一吟。压春甘蔗冷，喧雨荔枝深。
骤去无遗恨，幽栖已遍寻。蛾眉不可到，高处望千岑。

卷 560_28 【春日北归舟中有怀】

薛能

尽日绕盘飧，归舟向蜀门。雨干杨柳渡，山热杏花村。
净镜空山晓，孤灯极浦昏。边城不是意，回首未终恩。

卷 560_29 【初发嘉州寓题】

薛能

劳我是犍为，南征又北移。唯闻杜鹃夜，不见海棠时。
在闇曾无负，含灵合有知。州人若爱树，莫损召南诗。

卷 560_30 【题汉州西湖】

薛能

西湖天下名，可以濯吾缨。况是携家赏，从妨半驿程。
尝茶春味渴，断酒晚怀清。尽得幽人趣，犹嫌守吏迎。
重餐逢角暮，百事喜诗成。坐阻湘江谪，谁为话政声。

卷 560_31 【自广汉游三学山】

薛能

残阳终日望栖贤，归路携家得访禅。世缺一来应薄命，
雨留三宿是前缘。诗题不忍离岩下，屐齿难忘在水边。
猿鸟可知僧可会，此心常似有香烟。

卷 560_32 【三学山开照寺】

薛能

尽室遍相将，中方上下方。夜深楠树远，春气陌林香。
圣迹留岩险，灵灯出混茫。何因将慧剑，割爱事空王。

卷 560_33 【雨霁北归留题三学山】

薛能

远树平川半夕阳，锦城遥辨立危墙。闲思胜事多遗恨，
却悔公心是漫忙。灌口阙寻惭远客，峨眉乖约负支郎。
灵龕一望终何得，谬有人情满蜀乡。

卷 560_34 【行次灵龕驿寄西蜀尚书】

薛能

北客推车指蜀门，乾阳知已近临坤。从辞府郭常回首，
欲别封疆更感恩。援寡圣朝难望阙，暑催蚕麦得归村。
雷公解劂冲天气，白日何辜遣戴盆。

卷 560_35 【雨霁宿望喜驿】

薛能

风雷一罢思何清，江水依然浩浩声。飞鸟旋生啼鸟在，
后人常似古人情。将来道路终须达，过去山川实不平。
闲想更逢知旧否，馆前杨柳种初成。

卷 560_36 【筹笔驿】

薛能

葛相终宜马革还，未开天意便开山。生欺仲达徒增气，
死见王阳合厚颜。流运有功终是扰，阴符多术得非奸。
当初若欲酬三顾，何不无为似有鳏。

卷 560_37 【通仙洞】

薛能

高龕险欲摧，百尺洞门开。白日仙何在，清风客暂来。
临崖松直上，避石水低回。贾掾曾空去，题诗岂易哉。

卷 560_38 【嘉陵驿见贾岛旧题】

薛能

贾子命堪悲，唐人独解诗。左迁今已矣，清绝更无之。
毕竟吾犹许，商量众莫疑。嘉陵四十字，一一是天资。

卷 560_39 【嘉陵驿】

薛能

江涛千叠阁千层，衔尾相随尽室登。稠树蔽山闻杜宇，
午烟薰日食嘉陵。频题石上程多破，暂歇泉边起不能。
如此幸非名利切，益州来日合携僧。

卷 560_40 【嘉陵驿】

薛能

尽室可招魂，蛮余出蜀门。雹凉随雨气，江热傍山根。
蚕月缲丝路，农时碌碡村。干将磨欲尽，无位可酬恩。

卷 560_41 【西县途中二十韵】

薛能

野客误桑麻，从军带镢锄。岂论之白帝，未合过黄花。
落日投江县，征尘漱齿牙。蜀音连井络，秦分隔褒斜。
硖路商逢使，山邮雀啅蛇。忆归临角黍，良遇得新瓜。
食久庭阴转，行多屐齿洼。气清岩下瀑，烟漫雨余畬。
黄鸟当蚕候，稀蒿杂麦查。汗凉风似雪，浆度蜜如沙。
野色生肥芋，乡仪捣散茶。梯航经杜宇，烽候彻苴咩。
逗石流何险，通关运固赊。葛侯真竭泽，刘主合亡家。
陷彼贪功吠，贻为黠武夸。阵图谁许可，庙貌我揄揶。
闲事休征汉，斯行且咏巴。音繁来有铎，軋尽去无车。
溢目看风景，清怀啸月华。焰樵烹紫笋，腰簟憩乌纱。
杞国忧寻悟，临邛渴自加。移文莫有诮，必不滞天涯。

卷 560_42 【西县作】

薛能

三年西蜀去如沉，西县西来出万岑。树石向闻清汉浪，
水风初见绿萍阴。平郊不爱行增气，好井无疑漱入心。
从此渐知光景异，锦都回首尽愁吟。

卷 560_43 【分山岭望灵宝峰】

薛能

千寻万仞峰，灵宝号何从。盛立同吾道，贪程阻圣踪。
岭奇应有药，壁峭尽无松。那得休于是，蹉跎亦卧龙。

卷 560_44 【水帘吟】

薛能

万滴相随万响兼，路尘天产尽旁沾。源从颢气何因绝，
派助前溪岂觉添。豪客每来清夏葛，愁人才见认秋檐。
嘉名已极终难称，别是风流不是帘。

卷 560_45 【褒斜道中】

薛能

十驿褒斜到处慵，眼前常似接灵踪。江遥旋入旁来水，
山豁犹藏向后峰。鸟径恶时应立虎，畚田闲日自烧松。
行吟却笑公车役，夜发星驰半不逢。

卷 560_46 【褒城驿有故元相公旧题诗，因仰叹而作】

薛能

鄂相顷题应好池，题云万竹与千梨。我来已变当初地，
前过应无继此诗。敢叹临行殊旧境，惟愁后事劣今时。
闲吟四壁堪搔首，频见青蘋白鹭鸶。

卷 560_47 【题褒城驿池】

薛能

池馆通秦槛向衢，旧闻佳赏此踟蹰。清凉不散亭犹在，
事力何销舫已无。钓客坐风临岛屿，牧牛当雨食菰蒲。
西川吟吏偏思葺，只恐归寻水亦枯。

卷 560_48 【送崔学士赴东川】

薛能

羽人仙籍冠浮丘，欲作鄮侯且蜀侯，导骑已多行剑阁，
亲军全到近绵州。文翁劝学人应恋，魏绛和戎戎自休。
唯有夜樽欢莫厌，庙堂他日少闲游。

卷 560_49 【海棠】

薛能

酷烈复离披，玄功莫我知。青苔浮落处，暮柳间开时。
带醉游人插，连阴被叟移。晨前清露湿，晏后恶风吹。
香少传何许，妍多画半遗。岛苏涟水脉，庭绽粒松枝。
偶泛因沉砚，闲飘欲乱棋。绕山生玉垒，和郡遍坤维。
负赏惭休饮，牵吟分失饥。明年应不见，留此赠巴儿。

卷 560_50 【咏夹径菊】

薛能

夹径尽黄英，不通人并行。几曾相对绽，元自两行生。
丛比高低等，香连左右并。畔摇风势断，中夹日华明。

间隔蛩吟隔，交横蝶乱横。频应泛桑落，摘处近前楹。

卷 560_51 【碧鲜亭春题竹】

薛能

竹少竹更重，碧鲜疆更名。有栏常凭立，无径独穿行。
夕月阴何乱，春风叶尽轻。已闻图画客，兼写薛先生。

卷 560_52 【行径】

薛能

盘径入依依，旋惊幽鸟飞。寻多苔色古，踏碎箨声微。
鞭节横妨户，枝梢动拂衣。前溪闻到处，应接钓鱼矶。

卷 560_53 【新柳】

薛能

轻轻须重不须轻，众木难成独早成。柔性定胜刚性立，
一枝还引万枝生。天钟和气元无力，时遇风光别有情。
谁道少逢知己用，将军因此建雄名。

卷 560_54 【牡丹四首】

薛能

异色禀陶甄，常疑主者偏。众芳殊不类，一笑独奢妍。
颢折羞含懒，丛虚隐陷圆。亚心堆胜被，美色艳于莲。
品格如寒食，精光似少年。种堪收子子，价合易贤贤。
迴秀应无妒，奇香称有仙。深阴宜映幕，富贵助开筵。
蜀水争能染，巫山未可怜。数难忘次第，立困恋傍边。
逐日愁风雨，和星祝夜天。且从留尽赏，离此便归田。

万朵照初筵，狂游忆少年。晓光如曲水，颜色似西川。
白向庚辛受，朱从造化研。众开成伴侣，相笑极神仙。
见焰宁劳火，闻香不带烟。自高轻月桂，非偶贱池莲。
影接雕盘动，丛遭恶草偏。招欢忧事阻，就卧觉情牵。
四面宜绀锦，当头称管弦。泊来莺定忆，粉扰蝶何颠。
苏息承朝露，滋荣仰霁天。压栏多尽好，敌国贵宜然。
未落须迷醉，因兹任病缠。人谁知极物，空负感麟篇。

去年零落暮春时，泪湿红笺怨别离。常恐便随巫峡散，
何因重有武陵期。传情每向馨香得，不语还应彼此知。
欲就栏边安枕席，夜深闲共说相思。

牡丹愁为牡丹饥，自惜多情欲瘦羸。浓艳冷香初盖后，
好风乾雨正开时。吟蜂遍坐无闲蕊，醉客曾偷有折枝。
京国别来谁占玩，此花光景属吾诗。

卷 560_55 【使院栽苇】

薛能

戛戛复差差，一丛千万枝。格如僧住处，栽得吏闲时。
笋自厅中出，根从府外移。从军无宿例，空想夜风吹。

卷 560_56 【失鹤二首】

薛能

偶背雕笼与我违，四方端伫竟忘归。谁家白日云间见，
何处沧洲雨里飞。曾啄稻粱残粒在，旧翘泥潦半踪稀。
凭人转觉多相误，尽道皤然作令威。

华表翘风未可期，变丁投卫两堪疑。应缘失路防人损，
空有归心最我知。但见空笼抛夕月，若何无树宿荒陂。
不然直道高空外，白水青山属腊师。

卷 560_57 【答贾支使寄鹤】

薛能

瑞羽奇姿踉跄形，称为仙驭过清冥。何年厚禄曾居卫，

几世前身本姓丁。幸有远云兼远水，莫临华表望华亭。
劳君赠我清歌侣，将去田园夜坐听。

卷 560_58 【陈州刺史寄鹤】

薛能

临风高视耸奇形，渡海冲天想尽经。因得羽仪来合浦，
便无魂梦去华亭。春飞见境乘桴切，夜唳闻时醉枕醒。
南守欲知多少重，抚毛千万唤丁丁。

卷 560_59 【孔雀】

薛能

偶有功名正俗才，灵禽何事降瑶台。天仙黼黻毛应是，
宫后屏帟尾忽开。曾处嶂中真雾隐，每过庭下似春来。
佳人为我和衫拍，遣作傄傄送一杯。

卷 560_60 【鄜州进白野鹄】

薛能

轻毛叠雪翅开霜，红觜能深练尾长。名应玉符朝北阙，

色柔金性瑞西方。不忧云路填河远，为对天颜送喜忙。
从此定知栖息处，月宫琼树是仙乡。

卷 560_61 【早蝉】

薛能

不见上庭树，日高声忽吟。他人岂无耳，远客自关心。
暂落还因雨，横飞亦向林。分明去年意，从此渐闻砧。

卷 560_62 【申湖】

薛能

昔年依峡寺，每日见申湖。下泪重来此，知心一已无。
雨霖舟色暗，岸拔木形枯。旧境深相恼，新春宛不殊。
方来寻熟侣，起去恨惊凫。忍事花何笑，喧吟瀑正粗。
堪忧从宦到，倍遣曩怀孤。上马终回首，傍人怪感吁。

卷 560_63 【谢刘相寄天柱茶】

薛能

两串春团敌夜光，名题天柱印维扬。偷嫌曼倩桃无味，

捣觉嫦娥药不香。惜恐被分缘利市，尽应难觅为供堂。
粗官寄与真抛却，赖有诗情合得尝。

卷 560_64 【题后集】

薛能

诗源何代失澄清，处处狂波污后生。常感道孤吟有泪，
却缘风坏语无情。难甘恶少欺韩信，枉被诸侯杀祢衡。
纵到猴山也无益，四方联络尽蛙声。

卷 560_65 【秋晚送无可上人】

薛能

半夜觉松雨，照书灯悄然。河声才淅沥，旧业近潺湲。
坐滴寒更尽，吟惊宿鹤迁。相思不相见，日短复愁牵。

卷 560_66 【赠源寂禅师】

薛能

瓶钵镇随腰，怡然处寂寥。门禅从北祖，僧格似南朝。
性近徒相许，缘多愧未销。何传能法慧，此岸要津桥。

卷 560_67 【赠禅师】

薛能

嗜欲本无性，此生长在禅。九州空有路，一室独多年。
鸣磬微尘落，移瓶湿地圆。相寻偶同宿，星月坐忘眠。

卷 560_68 【夏日青龙寺寻僧二首】

薛能

帝里欲何待，人间无阙遗。不能安旧隐，都属扰明时。
违理须齐辱，雄图岂藉知。纵横悉已误，斯语是吾师。

得官殊未喜，失计是忘愁。不是无心速，焉能有自由。
凉风盈夏扇，蜀茗半形瓯。笑向权门客，应难见道流。

卷 560_69 【寄题巨源禅师】

薛能

风雨禅思外，应残木槿花。何年别乡土，一衲代袈裟。
日气侵瓶暖，雷声动枕斜。还当扫楼影，天晚自煎茶。

卷 560_70 【题河中亭子】

薛能

河擘双流岛在中，岛中亭上正南空，蒲根旧浸临关道，
沙色遥飞傍苑风。晴见树卑知岳大，晚闻车乱觉桥通。
无穷胜事应须宿，霜白蒹葭月在东。

卷 560_71 【逢友人边游回】

薛能

游子新从绝塞回，自言曾上李陵台。
尊前语尽北风起，秋色萧条胡雁来。

卷 560_72 【春雨】

薛能

电阔照潺潺，惊流往复还。远声如有洞，迷色似无山。
利物乾坤内，并风竹树间。静思来朔漠，愁望满柴关。
迸湿消尘虑，吹风触疾颜。谁知草茅径，沾此尚虚闲。

卷 560_73 【夏雨】

薛能

何处发天涯，风雷一道赊。去声随地急，残势傍楼斜。
透树垂红叶，沾尘带落花。潇湘无限思，闲看下蒹葭。

卷 560_74 【秋夜山中述事】

薛能

初宵门未掩，独坐对霜空。极目故乡月，满溪寒草风。
樵声当岭上，僧语在云中。正恨归期晚，萧萧闻塞鸿。

卷 560_75 【长安道】

薛能

汲汲复营营，东西连两京。关繻古若在，山岳累应成。
各自有身事，不相知姓名。交驰兼众类，分散入重城。
此去应无尽，万方人旋生。空余片言苦，来往觅刘桢。

卷 560_76 【酬泗州韦中丞埶上日寄赠兼次本韵】

薛能

鲁儒相悟欲成空，学尽文章不见功。官自掖垣飘海上，
镇从随岸入山中。尝遭火发瞿云宅，争得天如老氏弓。
何意杜陵怀宝客，也随迷路出关东。

卷 560_77 【泛觴池】

薛能

通咽远华樽，泛觴名自君。净看筹见影，轻动酒生纹。
细滴随杯落，来声就浦分。便应半酣后，清冷漱兼云。

第五百六十一卷

卷 561_1 【荔枝诗】

薛能

颗如松子色如樱，未识蹉跎欲半生。
岁杪监州曾见树，时新入座久闻名。

卷 561_2 【丁巳上元日放三雉】

薛能

婴网虽皆困，褰笼喜共归。无心期尔报，相见莫惊飞。

卷 561_3 【寓题】

薛能

王泽犹来雅在新，尚词微事可愁人。
淫哇满眼关雎弱，犹贺清朝有此身。

卷 561_4 【望蜀亭】

薛能

树簇烟迷蜀国深，岭头分界恋登临。
前轩一望无他处，从此西川只在心。

卷 561_5 【游嘉州后溪】

薛能

山屐经过满径踪，隔溪遥见夕阳春。
当时诸葛成何事，只合终身作卧龙。

卷 561_6 【自讽】

薛能

千题万咏过三旬，忘食贪魔作瘦人。
行处便吟君莫笑，就中诗病不任春。

卷 561_7 【乞假归题候馆】

薛能

仆带雕弓马似飞，老莱衣上著戎衣。
邮亭不暇吟山水，塞外经年皆未归。

卷 561_8 【监郡犍为将归使府登楼寓题】

薛能

几日监临向蜀春，错抛歌酒强忧人。
江楼一望西归去，不负嘉州只负身。

卷 561_9 【过象耳山二首】

薛能

一色青松几万栽，异香薰路带花开。
山门欲别心潜愿，更到蜀中还到来。

到处逢山便欲登，自疑身作住来僧。
徒行至此三千里，不是有缘应不能。

卷 561_10 【圣灯】

薛能

莽莽空中稍稍灯，坐看迷浊变清澄。
须知火尽烟无益，一夜栏边说向僧。

卷 561_11 【过昌利观有怀】

薛能

万仞云峰八石泉，李君仙后更谁仙。
我来驻马人何问，老柏无多不种田。

卷 561_12 【蜀路】

薛能

剑阁缘云拂斗魁，疾风生树过龙媒。
前程憩罢知无益，但是驽蹄亦到来。

卷 561_13 【山下偶作】

薛能

零雨沾山百草香，树梢高顶尽斜阳。
横流巨石皆堪住，何事无僧有石房。

卷 561_14 【伏牛山】

薛能

虎蹲峰状屈名牛，落日连村好望秋。
不为时危耕不得，一犁风雨便归休。

卷 561_15 【老圃堂】

薛能

邵平瓜地接吾庐，谷雨乾时偶自锄。
昨日春风欺不在，就床吹落读残书。

卷 561_16 【春题】

薛能

柳莫摇摇花莫开，此心因病亦成灰。
人生只有家园乐，及取春农归去来。

卷 561_17 【并州寓怀】

薛能

人多知遇独难求，人负知音独爱酬。
常恐此心无乐处，枉称年少在并州。

卷 561_18 【中秋旅舍】

薛能

云卷庭虚月逗空，一方秋草尽鸣虫。
是时兄弟正南北，黄叶满阶来去风。

卷 561_19 【符亭二首】

薛能

符亭之地雅离群，万古悬泉一旦新。
若念农桑也如此，县人应得似行人。

山如巫峡烟云好，路似嘉祥水木清。
大抵游人总应爱，就中难说是诗情。

卷 561_20 【秋夜听任郎中琴】

薛能

十指宫商膝上秋，七条丝动雨修修。
空堂半夜孤灯冷，弹著乡心欲白头。

卷 561_21 【留别关东旧游】

薛能

我去君留十载中，未曾相见及花红。
他时住得君应老，长短看花心不同。

卷 561_22 【赠出塞客】

薛能

出郊征骑逐飞埃，此别惟愁春未回。
寒叶夕阳投宿意，芦关门向远河开。

卷 561_23 【秋溪独坐】

薛能

黄叶分飞砧上下，白云零落马东西。
人生万意此端坐，日暮水深流出溪。

卷 561_24 【蒲中霁后晚望】

薛能

河边霁色无人见，身带春风立岸头。
浊水茫茫有何意，日斜还向古蒲州。

卷 561_25 【宋氏林亭】

薛能

地湿莎青雨后天，桃花红近竹林边。
行人本是农桑客，记得春深欲种田。

卷 561_26 【云花寺寓居赠海岸上人】

薛能

暂寄空门未是归，上方林树独儒衣。
吾师不语应相怪，频惹街尘入寺飞。

卷 561_27 【关中秋夕】

薛能

簟湿秋庭岳在烟，露光明滑竹苍然。
何人意绪还相似，鹤宿松枝月半天。

卷 561_28 【西县道中有短亭，岩穴飞泉隔江洒至，因成二首】

薛能

风凉津湿共微微，隔岸泉冲石窍飞。
争得巨灵从野性，旧乡无此擘将归。

一瀑三峰赤日天，路人才见便翛然。
谁能夜向山根宿，凉月初生的有仙。

卷 561_29 【省试夜】

薛能

白莲千朵照廊明，一片承平雅颂声。
更报第三条烛尽，文昌风景画难成。

卷 561_30 【过骊山】

薛能

丹雘苍苍簇背山，路尘应满旧帘间。
玄宗不是偏行乐，只为当时四海闲。

卷 561_31 【曲江醉题】

薛能

闲身行止属年华，马上怀中尽落花。
狂遍曲江还醉卧，觉来人静日西斜。

卷 561_32 【参军厅新池】

薛能

帘外无尘胜物外，墙根有竹似山根。
流泉不至客来久，坐见新池落旧痕。

卷 561_33 【太原使院晚出】

薛能

青门无路入清朝，滥作将军最下僚。
同舍尽归身独在，晚风开印叶萧萧。

卷 561_34 【寒食日曲江】

薛能

曲水池边青草岸，春风林下落花杯。
都门此日是寒食，人去看多身独来。

卷 561_35 【盤屋官舍新竹】

薛能

心觉清凉体似吹，满风轻撼叶垂垂。
无端种在幽闲地，众鸟嫌寒凤未知。

卷 561_36 【京中客舍闻箏】

薛能

十二三弦共五音，每声如截远人心。
当时向秀闻邻笛，不是离家岁月深。

卷 561_37 【铜雀台】

薛能

魏帝当时铜雀台，黄花深映棘丛开。
人生富贵须回首，此地岂无歌舞来。

卷 561_38 【寿安水馆】

薛能

地接山林兼有石，天悬星月更无云。
惊鸥上树满池水，漉漉一声中夜闻。

卷 561_39 【雨后早发永宁】

薛能

春霖朝罢客西东，雨足泥声路未通。
独爱千峰最高处，一峰初日白云中。

卷 561_40 【宿仙游寺望月生峰】

薛能

公门身入洞门行，出阱离笼似有情。
僧语夜凉云树黑，月生峰上月初生。

卷 561_41 【秋题】

薛能

独坐东南见晓星，白云微透沆寥清。
磷磷磴石堪僧坐，一叶梧桐落半庭。

卷 561_42 【和友人寄怀】

薛能

从来行乐近来希，蘧瑗知言与我违。
自是衰心不如旧，非关四十九年非。

卷 561_43 【子夜】

薛能

嫖姚家宴敌吴王，子夜歌声满画堂。
此日相逢眉翠尽，女真行李乞斋粮。

卷 561_44 【雁和韦侍御】

薛能

肃肃雍雍义有余，九天鸾凤莫相疏。
唯应静向山窗过，激发英雄夜读书。

卷 561_45 【和府帅相公】

薛能

竹映高墙似傍山，邹阳归后令威还。
君看将相才多少，两首诗成七步间。

卷 561_46 【又和留山鸡】

薛能

五色文胜百鸟王，相思兼绝寄芸香。
由来不是池中物，鸡树归时即取将。

卷 561_47 【舟中酬杨中丞春早见寄】

薛能

锦楼春望忆丹楹，更遇高情说早莺。
江上境寒吟不得，湿风梅雨满船轻。

卷 561_48 【寒食日题】

薛能

美人寒食事春风，折尽青青赏尽红。
夜半无灯还有睡，秋千悬在月明中。

卷 561_49 【杏花】

薛能

活色生香第一流，手中移得近青楼。
谁知艳性终相负，乱向春风笑不休。

卷 561_50 【黄蜀葵】

薛能

娇黄新嫩欲题诗，尽日含毫有所思。
记得玉人初病起，道家妆束厌禳时。

卷 561_51 【春咏】

薛能

春来还似去年时，手把花枝唱竹枝。
狂瘦未曾餐有味，不缘中酒却缘诗。

卷 561_52 【赠欢娘】

薛能

一束龙吟细竹枝，青娥擎在手中吹。
当时纵使双成在，不得如伊是小时。

卷 561_53 【戏瞻相】

薛能

失意蹉跎到旧游，见吹杨柳便遮羞。
瞻相赵女休相拽，不及人前诈摆头。

卷 561_54 【赠解诗歌人】

薛能

同有诗情自合亲，不须歌调更含嚬。
朝天御史非韩寿，莫窃香来带累人。

卷 561_55 【赠韦氏歌人二首】

薛能

弦管声凝发唱高，几人心地暗伤刀。
思量更有何堪比，王母新开一树桃。

一曲新声惨画堂，可能心事忆周郎。
朝来为客频开口，绽尽桃花几许香。

卷 561_56 【加阶】

薛能

二年中散似稽康，此日无功换宠光。
唯有一般酬圣主，胜于东晋是文章。

卷 561_57 【野园】

薛能

野园无鼓又无旗，鞍马传杯用柳枝。
娇养翠娥无怕惧，插人头上任风吹。

卷 561_58 【郊亭】

薛能

郊亭宴罢欲回车，满郭传呼调角初。
尚拥笙歌归未得，笑娥扶著醉尚书。

卷 561_59 【老僧】

薛能

清瘦形容八十余，匏悬篱落似村居。
劝师莫羡人间有，幸是元无免破除。

卷 561_60 【僧窗】

薛能

不悟时机滞有余，近来为事更乖疏。
朱轮皂盖蹉跎尽，犹爱明窗好读书。

卷 561_61 【题平等院】

薛能

十里城中一院僧，各持巾钵事南能。
还应笑我功名客，未解嫌官学大乘。

卷 561_62 【影灯夜二首】

薛能

偃王灯塔古徐州，二十年来乐事休。
此日将军心似海，四更身领万人游。

十万军城百万灯，酥油香暖夜如蒸。
红妆满地烟光好，只恐笙歌引上升。

卷 561_63 【许州旌节到作】

薛能

两地旌旗拥一身，半缘伤旧半荣新。
州人若忆将军面，写取雕堂报国真。

卷 561_64 【重游通波亭】

薛能

十年抛掷故园花，最忆红桃竹外斜。
此日郊亭心乍喜，败榆芳草似还家。

卷 561_65 【戏舸】

薛能

远舸冲开一路萍，岸傍偷上小茅亭。
游人莫觅杯盘分，此地才应聚德星。

卷 561_66 【偶题】

薛能

到处吟兼上马吟，总无愁恨自伤心。
无端梦得钧天乐，尽觉宫商不是音。

卷 561_67 【折杨柳十首】

薛能

华清高树出离宫，南陌柔条带暖风。
谁见轻阴是良夜，瀑泉声畔月明中。

洛桥晴影覆江船，羌笛秋声湿塞烟。
闲想习池公宴罢，水蒲风絮夕阳天。

嫩绿轻悬似缀旒，路人遥见隔宫楼。
谁能更近丹墀种，解播皇风入九州。

暖风晴日断浮埃，废路新条发钓台。
处处轻阴可惆怅，后人攀处古人栽。

潭上江边袅袅垂，日高风静絮相随。
青楼一树无人见，正是女郎眠觉时。

汴水高悬百万条，风清两岸一时摇。
隋家力尽虚栽得，无限春风属圣朝。

和风烟树九重城，夹路春阴十万营。
唯向边头不堪望，一株憔悴少人行。

窗外齐垂旭日初，楼边轻暖好风徐。

游人莫道栽无益，桃李清阴却不如。

众木犹寒独早青，御沟桥畔曲江亭。
陶家旧日应如此，一院春条绿绕厅。

帐偃纓垂细复繁，令人心想石家园。
风条月影皆堪重，何事侯门爱树萱。

卷 561_68 【柳枝四首】

薛能

数首新诗带恨成，柳丝牵我我伤情。
柔娥幸有腰支稳，试踏吹声作唱声。

高出军营远映桥，贼兵曾斫火曾烧。
风流性在终难改，依旧春来万万条。

县依陶令想嫌迂，营畔将军即大粗。
此日与君除万恨，数篇风调更应无。

狂似纤腰嫩胜绵，自多情态竟谁怜。
游人不折还堪恨，抛向桥边与路边。

卷 561_69 【柳枝词五首】

薛能

朝阳晴照绿杨烟，一别通波十七年。
应有旧枝无处觅，万株风里卓旌旃。

晴垂芳态吐牙新，雨摆轻条湿面春。
别有出墙高数尺，不知摇动是何人。

暖梳簪朵事登楼，因挂垂杨立地愁。
牵断绿丝攀不得，半空悬着玉搔头。

西园高树后庭根，处处寻芳有折痕。
终忆旧游桃叶舍，一株斜映竹篱门。

刘白苏台总近时，当初章句是谁推。
纤腰舞尽春杨柳，未有侬家一首诗。

卷 561_70 【吴姬十首】

薛能

夜锁重门昼亦监，眼波娇利瘦岩岩。
偏怜不怕傍人笑，自把春罗等舞衫。

龙麝薰多骨亦香，因经寒食好风光。
何人画得天生态，枕破施朱隔宿妆。

滴滴春霖透荔枝，笔题笺动手中垂。
天阴不得君王召，嚬著青蛾作小诗。

钿合重盛绣结深，昭阳初幸赐同心。
君知一夜恩多少，明日宣教放德音。

退红香汗湿轻纱，高卷蚊厨独卧斜。
娇泪半垂珠不破，恨君曛折后庭花。

取次衣裳尽带珠，别添龙脑裛罗襦。
年来寄与乡中伴，杀尽春蚕税亦无。

画烛烧兰暖复迷，殿帏深密下银泥。
开门欲作侵晨散，已是明朝日向西。

楼台重叠满天云，殷殷鸣鼙世上闻。
此日杨花初似雪，女儿弦管弄参军。

冠剪黄绡帔紫罗，薄施铅粉画青娥。
因将素手夸纤巧，从此椒房宠更多。

身是三千第一名，内家丛里独分明。
芙蓉殿上中元日，水拍银台弄化生。

卷 561_71 【题于公花园】

薛能

含桃庄主后园深，繁实初成静扫阴。
若使明年花可待，应须恼破事花心。

卷 561_72 【登城】

薛能

偶作闲身上古城，路人遥望不相惊。
无端将吏逡巡至，又作都头一队行。

卷 561_73 【好客】

薛能

好客连宵在醉乡，蜡烟红暖胜春光。
谁人肯信山僧语，寒雨唯煎治气汤。

卷 561_74 【赠普恭禅师】

薛能

一日迢迢每一餐，我心难伏我无难。
南檐十月绳床暖，背卷真经向日看。

卷 561_75 【赠无表禅师】

薛能

笠戴圆阴楚地棕，磬敲清乡蜀山铜。
秋来说偈寅朝殿，爽爽杨枝满手风。

卷 561_76 【彭门偶题】

薛能

淮王西舍固非夫，柳恹偏州未是都。
直到春秋诸列国，拥旄才子也应无。

卷 561_77 【嘲赵璘】

薛能

巡关每傍擐蒲局，望月还登乞巧楼。
第一莫教娇太过，缘人衣带上人头。

卷 561_78 【句】

薛能

百首如一首，卷初如卷终。
坐久仆头出，语多僧齿寒。
西塞长云尽，南湖片月斜。
李白终无取，陶潜固不刊。
我身若在开元日，争遣名为李翰林。

第五百六十二卷

卷 562_1 【早春】

刘威

晓来庭户外，草树似依依。一夜东风起，万山春色归。
冰消泉派动，日暖露珠晞。已酝看花酒，娇莺莫预飞。

卷 562_2 【伤春感怀】

刘威

花飞惜不得，年长更堪悲。春尽有归日，老来无去时。
风前千片雪，镜里数茎丝。肠断青山暮，独攀杨柳枝。

卷 562_3 【闰三月】

刘威

三年皆一闰，此闰胜常时。莫怪花开晚，都缘春尽迟。

节分炎气近，律应蕙风移。梦得成胡蝶，芳菲幸不遗。

卷 562_4 【早秋游湖上亭】

刘威

危亭秋尚早，野思已无穷。竹叶一尊酒，荷香四座风。
晓烟孤屿外，归鸟夕阳中。渐爱湖光冷，移舟月满空。

卷 562_5 【宿渔家】

刘威

竹屋清江上，风烟四五家。水园分菱叶，邻界认芦花。
雨到鱼翻浪，洲回鸟傍沙。月明何处去，片片席帆斜。

卷 562_6 【旅中早秋】

刘威

金威生止水，爽气遍遥空。草色萧条路，槐花零落风。
夜来万里月，觉后一声鸿。莫问前程事，飒然沙上蓬。

卷 562_7 【早秋西归有怀】

刘威

求归方有计，惜别更堪愁。上马江城暮，出郊山戍秋。
暗销何限事，白尽去年头。莫怪频惆怅，异乡难再游。

卷 562_8 【冬夜旅怀】

刘威

寒窗危竹枕，月过半床阴。嫩叶不归梦，晴虫成苦吟。
酒无通夜力，事满五更心。寂寞谁相似，残灯与素琴。

卷 562_9 【塞上作】

刘威

萧萧陇水侧，落日客愁中。古塞一声笛，长沙千里风。
鸟无栖息处，人爱战争功。数夜城头月，弯弯如引弓。

卷 562_10 【秋日寄陈景孚秀才】

刘威

征车日已远，物候尚凄凄。风叶青桐落，露花红槿低。
心随秦国远，梦到楚山迷。却恨衔芦雁，秋飞不向西。

卷 562_11 【冬日送友人西归】

刘威

北风吹别思，杳杳度云山。满望是归处，一生犹未闲。
知音方见誉，浮宦久相关。空有心如月，同居千里还。

卷 562_12 【感寓】

刘威

海竭山移岁月深，分明齐得世人心。颜回徒恨少成古，
彭祖何曾老至今。须向道中平贵贱，还从限内任浮沉。
他年免似骊山鬼，信有蓬莱不可寻。

卷 562_13 【七夕】

刘威

乌鹊桥成上界通，千秋灵会此宵同。云收喜气星楼晓，
香拂轻尘玉殿空。翠辇不行青草路，金銮徒候白榆风。
采盘花阁无穷意，只在游丝一缕中。

卷 562_14 【晚春陪王员外东塘游宴】

刘威

水绿山青春日长，政成因暇泛回塘。初移柳岸笙歌合，
欲过蘋洲罗绮香。共济已惊依玉树，随流还许醉金觞。
一声画角严城暮，云雨分时满路光。

卷 562_15 【游东湖黄处士园林】

刘威

偶向东湖更向东，数声鸡犬翠微中。遥知杨柳是门处，
似隔芙蓉无路通。樵客出来山带雨，渔舟过去水生风。
物情多与闲相称，所恨求安计不同。

卷 562_16 【题许子正处士新池】

刘威

坐爱风尘日已西，功成得与化工齐。巧分孤岛思何远，
欲似五湖心易迷。渐有野禽来试水，又怜春草自侵堤。
那堪更到芙蓉拆，晚夕香联桃李蹊。

卷 562_17 【旅怀】

刘威

物态人心渐渺茫，十年徒学钓沧浪。老将何面还吾土，
梦有惊魂在楚乡。自是一身嫌苟合，谁怜今日欲佯狂。
无名无位却无事，醉落乌纱卧夕阳。

卷 562_18 【早秋归】

刘威

数口飘零身未回，梦魂遥断越王台。家书欲寄雁飞远，
客恨正深秋又来。风解绿杨三署冷，月当银汉四山开。
茫茫归路在何处，砧杵一声心已摧。

卷 562_19 【欧阳示新诗因贻四韵】

刘威

冲戛瑶琼得至音，数篇清越应南金。都由苦思无休日，
已证前贤不到心。风入寒松声自古，水归沧海意皆深。
欲知字字惊神鬼，一气秋时试夜吟。

卷 562_20 【尉迟将军】

刘威

天仗拥门希授钺，重臣入梦岂安金。江河定后威风在，
社稷危来寄托深。扶病暂将弓试力，感恩重与剑论心。
明妃若遇英雄世，青冢何由怨陆沉。

卷 562_21 【赠欧阳秀才】

刘威

桐上知音日下身，道光谁不仰清尘。偶来水馆逢为客，
旧熟诗名似故人。永日空惊沧海阔。何年重见白头新。
权门要路应行遍，闲伴山夫一夜贫。

卷 562_22 【赠道者】

刘威

五云深处有真仙，岁月催多却少年。入郭不知今世事，
卖丹犹觅古时钱。闲寻白鹿眠瑶草，暗摘红桃去洞天。
时向人间深夜坐，鬼神长在药囊边。

卷 562_23 【赠道者】

刘威

道帔轻裾三岛云，绿髯长占镜中春。高风已驾祥鸾驭，
浮世休惊野马尘。过海独辞王母面，度关谁识老聃身。
儒生也爱长生术，不见人间大笑人。

卷 562_24 【遣怀寄欧阳秀才】

刘威

地上江河天上乌，百年流转只须臾。平生闲过日将日，
欲老始知吾负吾。似豹一班时或有，如龟三顾岂全无。
古来晚达人何限，莫笑空枝犹望苏。

卷 562_25 【送元秀才入道】

刘威

不教荣乐损天机，愿逐鸾皇次第飞。明月满时开道帔，
欲尘飘处脱儒衣，只携仙籍还金洞，便与时流隔翠微。
空有缄题报亲爱，一千年后始西归。

卷 562_26 【三闾大夫】

刘威

三闾一去湘山老，烟水悠悠痛古今。青史已书殷鉴在，
词人劳咏楚江深。竹移低影潜贞节，月入中流洗恨心。
再引离骚见微旨，肯教渔父会升沈。

卷 562_27 【伤曾秀才马】

刘威

买得龙媒越水滨，轻桃细杏色初分。秋归未过阳关日，
夜魄忽销阴塞云。吴练已知随影没，朔风犹想带嘶闻。
临轩振策休惆怅，坐致烟霄只在君。

卷 562_28 【喷玉泉冥会诗八首·白衣叟途中吟二首】

李玖

春草萋萋春水绿，野棠开尽飘香玉。
绣岭宫前鹤发人，犹唱开元太平曲。

厌世逃名者，谁能答姓名。曾闻王乐否，眷取路傍情。

卷 562_29 【喷玉泉冥会诗八首·白衣叟述甘棠馆西楹诗】

李玖

浮云凄惨日微明，沉痛将军负罪名。白昼叫阍无近戚，
缟衣饮气只门生。佳人暗泣填宫泪，厩马连嘶换主声。
六合茫茫皆汉土，此身无处哭田横。

卷 562_30 【喷玉泉冥会诗八首·白衣叟喷玉泉感旧游书怀】

李玖

树色川光向晚晴，旧曾游处事分明。鼠穿月榭荆榛合，
草掩花园畦垄平。迹陷黄沙仍未寤，罪标青简竟何名。
伤心谷口东流水，犹喷当时寒玉声。

卷 562_31 【喷玉泉冥会诗八首·四丈夫同赋】

李玖

鸟啼莺语思何穷，一世荣华一梦中。李固有冤藏蠹简，
邓攸无子续清风。文章高韵传流水，丝管遗音托草虫。
春月不知人事改，闲垂光影照洿宫。

桃蹊李径尽荒凉，访旧寻新益自伤。虽有衣衾藏李固，
终无表疏雪王章。羁魂尚觉霜风冷，朽骨徒惊月桂香。
天爵竟为人爵误，谁能高叫问苍苍。

落花寂寂草绵绵，云影山光尽宛然。坏室基摧新石鼠，
瀦宫水引故山泉。青云自致惭天爵，白首同归感昔贤。
惆怅林间中夜月，孤光曾照读书筵。

新荆棘路旧衡门，又驻高车会一尊。寒骨未沾新雨露，
春风不长败兰荪。丹诚岂分埋幽壤，白日终希照覆盆。
珍重昔年金谷友，共来泉际话幽魂。

卷 562_32 【下第归宜春酬黄颇饯别】

潘唐

圣代澄清雨露均，独怀惆怅出咸秦。承明未荐相如赋，

· 全唐诗 ·

故国犹惭季子贫。御苑钟声临远水，都门树色背行尘。
一从此地曾携手，益羨江头桃李春。

第五百六十三卷

卷 563_1 【题泐潭】

裴休

泐潭形胜地，祖塔在云湄。浩劫有穷日，真风无坠时。
岁华空自老，消息竟谁知。到此轻尘虑，功名自可遗。

卷 563_2 【赠黄蘗山僧希运】

裴休

曾传达士心中印，额有圆珠七尺身。挂锡十年栖蜀水，
浮杯今日渡漳滨。一千龙象随高步，万里香华结胜因。
拟欲事师为弟子，不知将法付何人。

卷 563_3 【登望京楼赋】

令狐绹

夷门一镇五经秋，未得朝天不免愁。

因上此楼望京国，便名楼作望京楼。

卷 563_4 【享太庙乐章】

夏侯孜

于铎令主，圣祚重昌。兴起教义，申明典章。
俗尚素朴，人皆乐康。积德可报，流庆无疆。

卷 563_5 【和重阳锡宴御制诗】

魏謩

四方无事去，宸豫杪秋来。八水寒光起，千山霁色开。

卷 563_6 【贺王仆射放榜】

周墀

文场三化鲁儒生，三十余年振重名。曾忝木鸡夸羽翼，
又陪金马入蓬瀛。虽欣月桂居先折，更羨春兰最后荣。
欲到龙门看风雨，关防不许暂离营。

卷 563_7 【酬李常侍立秋日奉诏祭岳见寄】

周墀

秋祠灵岳奉尊罍，风过深林古柏开。莲掌月高珪币列，
金天雨露鬼神陪。质明三献虽终礼，祈寿千年别上杯。
岂是琐才能祀事，洪农太守主张来。

卷 563_8 【寄华州周侍郎立秋日奉诏祭岳诗】

李景让

关河豁静晓云开，承诏秋祠太守来。山霁莲花添翠黛，
路阴桐叶少尘埃。朱轡入庙威仪肃，玉佩升坛步武回。
往岁今朝几时事，谢君非重我非才。

卷 563_9 【句】

李景让

成都十万户，抛若一鸿毛。

卷 563_10 【续梦中十韵】

郑顥

间岁流虹节，归轩出禁扃。奔波陶畏景，萧洒梦殊庭。
境象非曾到，崇严昔未经。日斜乌敛翼，风动鹤飘翎。
异苑人争集，凉台笔不停。石门雾露白，玉殿莓苔青。
若匪灾先兆，何缘思入冥。御炉虚仗马，华盖负云亭。
白日成千古，金滕閤九龄。小臣哀绝笔，湖上泣青萍。

卷 563_11 【扬州送人】

刘绮庄

桂楫木兰舟，枫江竹箭流。故人从此去，望远不胜愁。
落日低帆影，归风引棹讴。思君折杨柳，泪尽武昌楼。

卷 563_12 【置酒】

刘绮庄

酒熟人须饮，春还鬓已秋。愿逢千日醉，得逭百年愁。
卒卒周姬旦，栖栖鲁孔丘。平生能几日，不及且遨游。

卷 563_13 【重阳宴东观山亭和从事卢顺之】

张固

乱山青翠郡城东，爽节凭高一望通。交友会时丝管合，
羽觞飞处笑言同。金英耀彩晴云外，玉树凝霜暮雨中。
高咏已劳潘岳思，醉欢惭道自车公。

卷 563_14 【独秀山】

张固

孤峰不与众山俦，直入青云势未休。
曾得乾坤融结意，擎天一柱在南州。

卷 563_15 【长门怨】

刘皋

营营孤思通，寂寂长门夜。妾妒亦知非，君恩那不借。
携琴就玉阶，调悲声未谐。将心寄明月，流影入君怀。

卷 563_16 【宿日观东房诗】

李质

曾入桃溪路，仙源信少双。洞霞飘素练，藓壁画阴窗。
古木愁撑月，危峰欲堕江。自吟空向寂，谁共倒秋缸。

卷 563_17 【赠副戎】

南卓

翱翔曾在玉京天，堕落江南路几千。
从事不须轻县宰，满身犹带御炉烟。

卷 563_18 【命妓盛小丛歌饯崔侍御还阙】

李讷

绣衣奔命去情多，南国佳人敛翠娥。
曾向教坊听国乐，为君重唱盛丛歌。

卷 563_19 【李尚书命妓歌饯有作奉酬】

崔元范

羊公留宴岷山亭，洛浦高歌五夜情。
独向柏台为老吏，可怜林木响余声。

卷 563_20 【和李尚书命妓歌饯崔侍御】

杨知至

燕赵能歌有几人，为花回雪似含颦。
声随御史西归去，谁伴文翁怨九春。

卷 563_21 【覆落后呈同年】

杨知至

由来梁雁与冥鸿，不合翩翩向碧空。寒谷谩劳邹氏律，
长天独遇宋都风。此时泣玉情虽异，他日衔环事亦同。
二月春光正摇荡，无因得醉杏园中。

卷 563_22 【送韦覲谪潘州】

李明远

北鸟飞不到，南人谁去游。天涯浮瘴水，岭外向潘州。
草木春秋暮，猿猱日夜愁。定知迁客泪，应只对君流。

卷 563_23 【前望江麴令颂德】

萧綰

政绩虽殊道且同，无辞买石纪前功。
谁论重德光青史，过里犹歌卧辙风。

卷 563_24 【重阳东观席上赠侍郎张固】

卢顺之

渡江旌旆动鱼龙，令节开筵上碧峰。翡翠巢低岩桂小，
茱萸房湿露香浓。白云郊外无尘事，黄菊筵中尽醉容。
好是谢公高兴处，夕阳归骑出疏松。

卷 563_25 【责汉水辞】

李善夷

汉之广兮，风波四起。虽有风波，不如蹄涔之水。
蹄涔之水，不为下国而倾天子。汉之深兮，其堤莫量。
虽云莫量，不如行潦之汪。行潦之汪，不为下国而溺天王。
汉之美者曰鲂。吾虽饥不食其鲂，恐污吾之饥肠。

卷 563_26 【大堤曲】

李善夷

酒旗相望大堤头，堤下连樯堤上楼。
日暮行人争渡急，桨声幽轧满中流。

卷 563_27 【金灯】

卢澹

疏茎秋拥翠，幽艳夕添红。有月长灯在，无烟烬火同。
香浓初受露，势庳不知风。应笑金台上，先随晓漏终。

卷 563_28 【和李尚书命妓饯崔侍御】

卢澹

乌台上客紫髯公，共捧天书静境中。
桃朵不辞歌白苣，耶溪暮雨起樵风。

卷 563_29 【对酒】

赵牧

云翁耕扶桑，种黍养日乌。手授六十花甲子，
循环落落如弄珠。长绳系日未是愚，有翁临镜捋白须。
饥魂吊骨吟古书，冯唐八十无高车。人生如云在须臾，
何乃自苦八尺躯，裂衣换酒且为娱，劝君朝饮一瓢，
夜饮一壶。杞天崩，雷腾腾，桀非尧是何足凭。
桐君桂父岂胜我，醉里白龙多上升。菖蒲花开鱼尾定，
金丹始可延君命。

卷 563_30 【南歌子词三首】

裴諝

不是厨中弗，争知炙里心。井边银钏落，展转恨还深。

不信长相忆，抬头问取天。风吹荷叶动，无夜不摇莲。

簪蜡为红烛，情知不自由。细丝斜结网，争奈眼相钩。

卷 563_31 【新添声杨柳枝词】

裴諝

思量大是恶姻缘，只得相看不得怜。

愿作琵琶槽畔，得他长抱在胸前。

独房莲子没有看，偷折莲时命也拌。

若有所由来借问，但道偷莲是下官。

第五百六十四卷

卷 564_1 【夏杪登越王楼临涪江望雪山寄朝中知友】

于兴宗

巴西西北楼，堪望亦堪愁。山乱江回远，川清树欲秋。
晴明中雪岭，烟霭下渔舟。写寄朝天客，知余恨独游。

卷 564_2 【东阳涵碧亭】

于兴宗

高低竹杂松，积翠复留风。路剧阴溪里，寒生暑气中。

卷 564_3 【奉酬绵州中丞以江山小图远垂赐及兼寄诗】

李朋

巴江与雪山，井邑共回环。图写丹青内，分明烟霭间。
移君名郡兴，助我小斋闲。日想登临处，高踪不可攀。

卷 564_4 【奉酬于中丞登越王楼见寄之什】

杨牢

剑外书来日，惊忙自折封。丹青得山水，强健慰心胸。
事少胜诸郡，江回见几重。宁悲久作别，且似一相逢。
诗合焚香咏，愁应赖酒浓。庾楼寒更忆，肠断雪千峰。

卷 564_5 【赠舍弟】

杨牢

秦云蜀浪两堪愁，尔养晨昏我远游。千里客心难寄梦，
两行乡泪为君流。早驱风雨知龙圣，饿食鱼虾觉虎羞。
袖里鎔铓光似水，丈夫不合等闲休。

卷 564_6 【句】

杨牢

虾蟆欲吃月，保护常教圆。

心明外不察，月向怀中圆。

罗帏若不卷，谁道中无人。

魁形下方天顶亚，二十四寸窗中月。

卷 564_7 【和绵州于中丞登越王楼见寄】

李续

早年登此楼，退想不胜愁。地远二千里，时将四十秋。
迢迢多失路，华皓任虚舟。诗酒虽堪使，何因得共游。

卷 564_8 【和绵州于中丞登越王楼作】

李汶儒

珍重巴西守，殷勤寄远情。剑峰当户碧，诗韵满楼清。
日照涪川阔，烟笼雪峤明。微黄看即及，莫叹滞江城。

卷 564_9 【和于中丞夏杪登越王楼望雪山见寄】

田章

志乖多感物，临眺更增愁。暑候虽云夏，江声已似秋。
雪遥难辨木，村近好维舟。莫恨归朝晚，朝簪拟胜游。

卷 564_10 【和绵州于中丞登越王楼作】

薛蒙

左绵江上楼，五马此销愁。暑退千山雪，风来万木秋。
迢回犹刺郡，系滞似维舟。即有徵黄日，名川莫厌游。

卷 564_11 【和绵州于中丞登越王楼作】

李邕

长听巴西事，看图胜所闻。江楼明返照，雪岭乱晴云。
景象诗情在，幽奇笔迹分。使君徒说好，不只怨离群。

卷 564_12 【和绵州于中丞登越王楼作二首】

于瑰

楼因藩邸号，川势似依楼。显敞含清暑，岚光入素秋。
山宜姑射貌，江泛李膺舟。郢曲思朋执，轻纱画胜游。

极目郡城楼，浮云拂槛愁。政成多暇日，诗思动先秋。
远霁千岩雪，随波一叶舟。昔曾窥粉绘，今愿许陪游。

卷 564_13 【和于中丞登越王楼】

王严

雉堞临朱槛，登兹便散愁。蝉声怨炎夏，山色报新秋。
江转穿云树，心闲随叶舟。仲宣徒有叹，谢守几追游。

卷 564_14 【题越王楼寄献中丞使君】

刘暌

朱轩迴压碧烟州，昔岁贤王是胜游。山簇剑峰朝阙远，
水如巴字绕城流。人间物象分千里，天上笙歌醉五侯。
今日登临无限意，同沾惠化自销愁。

卷 564_15 【秋日登越王楼献于中丞】

李渥

越王曾牧剑南州，因向城隅建此楼。横玉远开千嶂雪，
暗雷下听一江流。画檐先弄朝阳色，朱槛低临众木秋。
徒学仲宣聊四望，且将词赋好依刘。

卷 564_16 【洋州于中丞顷牧左绵，题诗越王楼上，朝贤继和，辄课四韵】

刘璐

隔政代君侯，多惭迹令猷。山光来户牖，江鸟满汀洲。
雅韵徵朝客，清词写郡楼。至今谣未已，注意在洋州。

卷 564_17 【和于中丞登越王楼作】

卢栢

图画越王楼，开缄慰别愁。山光涵雪冷，水色带江秋。
云岛孤征雁，烟帆一叶舟。向风舒霁景，如伴谢公游。

卷 564_18 【飞鸿响远音】

李体仁

漠漠微霜夕，翩翩出渚鸿。清声流迥野，高韵入寥空。
旧质经寒塞，残音响远风。萦雪犹类网，避月尚疑弓。
弱羽虽能振，丹青竟未通。欲知多怨思，听取暮烟中。

第五百六十五卷

卷 565_1 【春愁】

韩琮

金乌长飞玉兔走，青鬓长青古无有。秦娥十六语如弦，
未解贪花惜杨柳。吴鱼岭雁无消息，水誓兰情别来久。
劝君年少莫游春，暖风迟日浓于酒。

卷 565_2 【牡丹】

韩琮

残花何处藏，尽在牡丹房。嫩蕊包金粉，重葩结绣囊。
云凝巫峡梦，帘闭景阳妆。应恨年华促，迟迟待日长。

卷 565_3 【兴平县野中得落星石移置县斋】

韩琮

的的堕芊苍，茫茫不记年。几逢疑虎将，应逐犯牛仙。

择地依兰畹，题诗间锦钱。何时成五色，却上女蜗天。

卷 565_4 【题商山店】

韩琮

商山驿路几经过，未到仙娥见谢娥。红锦机头抛皓腕，
绿云鬟下送横波。佯嗔阿母留宾客，暗为王孙换绮罗。
碧涧门前一条水，岂知平地有天河。

卷 565_5 【风】

韩琮

竞持飘忽意何穷，为盛为衰半不同。偃草喜逢新雨后，
鸣条愁听晓霜中。凉飞玉管来秦甸，暗袅花枝入楚宫。
莫见东风便无定，满帆还有济川功。

卷 565_6 【云】

韩琮

深惹离情霭落晖，如车如盖早依依。山头触石应常在，
天际从龙自不归。莫向隙窗笼夜月，好来仙洞湿行衣。

春风淡荡无心后，见说襄王梦亦稀。

卷 565_7 【露】

韩琮

长随圣泽堕尧天，濯遍幽兰叶叶鲜。才喜轻尘销陌上，
已愁新月到阶前。文腾要地成非久，珠缀秋荷偶得圆。
几处花枝抱离恨，晓风残月正潸然。

卷 565_8 【霞】

韩琮

应是行云未拟归，变成春态媚晴晖。深如绮色斜分阁，
碎似花光散满衣。天际欲销重惨淡，镜中闲照正依稀。
晓来何处低临水，无限鸳鸯妒不飞。

卷 565_9 【颍亭】

韩琮

颍上新亭瞰一川，几重旧址敞幽关。寒声北下当轩水，
翠影西来扑槛山。远目静随孤鹤去，高情常共白云闲。

知君久负巢由志，早晚相忘寂寞间。

卷 565_10 【咏马】

韩琮

曾经伯乐识长鸣，不似龙行不敢行。金埒未登嘶若是，
盐车犹驾瘦何惊。难逢王济知音癖，欲就燕昭买骏名。
早晚飞黄引同皂，碧云天上作鸾鸣。

卷 565_11 【题圭峰下长孙家林亭】

韩琮

赵国林亭二百年，绿苔如毯葛如烟。闲期竹色摇霜看，
醉惜松声枕月眠。出树圭峰寒压坐，入篱沙濑碧流天。
明知富贵非身物，莫为金章堕地仙。

卷 565_12 【牡丹】

韩琮

桃时杏日不争浓，叶帐阴成始放红。晓艳远分金掌露，
暮香深惹玉堂风。名移兰杜千年后，贵擅笙歌百醉中。

如梦如仙忽零落，暮霞何处绿屏空。

卷 565_13 【雨】

韩琮

阴云拂地散丝轻，长得为霖济物名。夜浦涨归天堑阔，
春风洒入御沟平。轩车几处归频湿，罗绮何人去欲生。
不及流他荷叶上，似珠无数转分明。

卷 565_14 【京西即事】

韩琮

秋草河兰起阵云，凉州唯向管弦闻。豺狼毳幕三千帐，
貔虎金戈十万军。候骑北来惊有说，戍楼西望悔为文。
昭阳亦待平安火，谁握旌旗不见勋。

卷 565_15 【公子行】

韩琮

紫袖长衫色，银蝉半臂花。带装盘水玉，鞍绣坐云霞。
别殿承恩泽，飞龙赐渥洼。控罗青褭辔，镂象碧熏葩。

意气倾歌舞，阑珊走钿车。袖障云缥缈，钗转凤欹斜。
珠卷迎归箔，雕笼晃醉纱。唯无难夜日，不得似仙家。

卷 565_16 【秋晚信州推院亲友或责无书，即事寄答】

韩琬

官信安仁拙，书非叔夜慵。谬驰骢马传，难附鲤鱼封。
万里劳何补，千年运忝逢。不量横草力，虚慕入云踪。
洁水空澄鉴，持铅亦砺锋。月寒深夜桂，霜凜近秋松。
宪摘无逃魏，冤申得梦冯。问狸将挟虎，歼蛰敢虞蜂。
商吹移砧调，春华改镜容。归期方畹积，愁思暮山重。
仙鼠犹惊燕，莎鸡欲变蛩。唯应碧湘浦，云落及芙蓉。

卷 565_17 【晚春江晴寄友人】

韩琬

晚日低霞绮，晴山远画眉。春青河畔草，不是望乡时。

卷 565_18 【凉州词】

韩琬

树发花如锦，莺啼柳若丝。更游欢宴地，悲见别离时。

卷 565_19 【暮春浐水送别】

韩琬

绿暗红稀出凤城，暮云楼阁古今情。
行人莫听宫前水，流尽年光是此声。

卷 565_20 【骆谷晚望】

韩琬

秦川如画渭如丝，去国还家一望时。
公子王孙莫来好，岭花多是断肠枝。

卷 565_21 【二月二日游洛源】

韩琬

旧苑新晴草似苔，人还香在踏青回。
今朝此地成惆怅，已后逢春更莫来。

卷 565_22 【柳】

韩琮

折柳歌中得翠条，远移金殿种青霄。
上阳宫女含声送，不忿先归舞细腰。

卷 565_23 【杨柳枝】

韩琮

梁苑隋堤事已空，万条犹舞旧春风。
那堪更想千年后，谁见杨花入汉宫。

卷 565_24 【杨柳枝词】

韩琮

枝斗纤腰叶斗眉，春来无处不如丝。
霸陵原上多离别，少有长条拂地垂。

第五百六十六卷

卷 566_1 【和襄阳徐相公商贺徐副使加章绶】

王传

朱紫联辉照日新，芳菲全属断金人。华筵重处宗盟地，
白雪飞时郢曲春。仙府色饶攀桂侣，莲花光让握兰身。
自怜亦是膺门客，吟想恩荣气益振。

卷 566_2 【和李尚书命妓饯崔侍御】

卢邺

何郎载酒别贤侯，更吐歌珠宴庾楼。
莫道江南不同醉，即陪舟楫上京游。

卷 566_3 【松】

陆肱

雪霜知劲质，今古占嘉名。断砌盘根远，疏林偃盖清。

鹤栖何代色，僧老四时声。郁郁心弥久，烟高万井生。

卷 566_4 【赠王福娘】

崔澹

怪得清风送异香，娉婷仙子曳霓裳。
惟应错认偷桃客，曼倩曾为汉侍郎。

卷 566_5 【答问读书居】

莫宣卿

书屋倚麒麟，不同牛马路。床头万卷书，溪上五龙渡。
井汲冽寒泉，桂花香玉露。茅檐无外物，只见青云护。

卷 566_6 【百官乘月早朝听残漏】

莫宣卿

建礼俨朝冠，重门耿夜阑。碧空蟾魄度，清禁漏声残。
候晓车舆合，凌霜剑佩寒。星河犹皎皎，银箭尚珊珊。
杳霭祥光起，霏微瑞气攒。忻逢圣明代，长愿接鹓鸾。

卷 566_7 【赋得水怀珠】

莫宣卿

长川含媚色，波底孕灵珠。素魄生蘋末，圆规照水隅。
沦涟冰彩动，荡漾瑞光铺。迴夜星同贯，清秋岸不枯。
江妃思在掌，海客亦忘躯。合浦当还日，恩威信已敷。

卷 566_8 【句】

莫宣卿

我本南山凤，岂同凡鸟群。

卷 566_9 【和李尚书命妓饯崔侍御】

封彦卿

莲府才为绿水宾，忽乘骢马入咸秦。
为君唱作西河调，日暮偏伤去住人。

卷 566_10 【赠释疏言还道林寺诗】

李节

湘川狺狺兮俗犷且佷，利杀业偷兮吏莫之驯。
繫释氏兮易暴使仁，释何在兮释在斯文，
湘水滔滔兮四望何依，猿狖腾拏兮云树飞飞。
月沉浦兮烟暝山，檣席卷兮櫓床闲。偃仰兮啸咏，
鼓长江兮何时还。

湘川超忽兮落日峴峴，松覆秋亭兮兰被春苑。
上人去兮几千里，何日同游兮湘川水。

卷 566_11 【和柯古穷居苦日喜雨】

韦蟾

贞机澹少思，雅尚防多僻。揽葛犹不畏，劳形同处瘠。
头焦讵是焚，背汗宁关炙。方欣见润础，那虞悲铄石。
道与古人期，情难物外适。几怀朱邱绶，颇旷金门藉。
清奥已萧萧，陈柯将槭槭。玉律诗调正，琼卮酒肠窄。
衣桁袭中单，浴床抛下绌。黎侯寓于卫，六义非凡格。

卷 566_12 【岳麓道林寺】

韦蟾

石门迴接苍梧野，愁色阴深二妃寡。广殿崔嵬万壑间，
长廓诘曲千岩下。静听林飞念佛鸟，细看壁画驮经马。
暖日斜明蟬螭梁，湿烟散幂鸳鸯瓦。北方部落檀香塑，
西国文书贝叶写。坏栏迸竹醉好题，窄路垂藤困堪把。
沈裴笔力斗雄壮，宋杜词源两风雅。他方居士来施斋，
彼岸上人投结夏。悲我未离扰扰徒，劝我休学悠悠者。
何时得与刘遗民，同入东林远公社。

卷 566_13 【上元三首】

韦蟾

新正圆月夜，尤重看灯时。累塔嫌沙细，成文讶笔迟。
归牛疑燧落，过雁误书迟。生惜兰膏烬，远为隔岁期。

举烛光才起，挥毫势竞分。点时惊坠石，挑处接崩云。
辞异秦丞相，铭非窦冠军。唯愁残焰落，逢玉亦俱焚。

多宝神光动，生金瑞色浮。照人低入郭，伴月夜当楼。
熏穴应无取，焚林固有求。夜阑陪玉帐，不见九枝留。

卷 566_14 【梅】

韦蟾

高树临溪艳，低枝隔竹繁。何须是桃李，然后欲忘言。
拟折魂先断，须看眼更昏。谁知南陌草，却解望王孙。

卷 566_15 【送卢潘尚书之灵武】

韦蟾

贺兰山下果园成，塞北江南旧有名。水木万家朱户暗，
弓刀千队铁衣鸣。心源落落堪为将，胆气堂堂合用兵。
却使六番诸子弟，马前不信是书生。

卷 566_16 【题僧壁】

韦蟾

一竹横檐挂净巾，灶无烟火地无尘。
剃头未必知心法，要且闲于名利人。

卷 566_17 【赠商山僧】

韦蟾

商岭东西路欲分，两间茅屋一溪云。
师言耳重知师意，人是人非不欲闻。

卷 566_18 【长乐驿谑李汤给事题名】

韦蟾

渭水秦川拂眼明，希仁何事寡诗情。
只应学得虞姬婿，书字才能记姓名。

卷 566_19 【句】

韦蟾

争挥钩弋手，竞耸踏摇身。伤颊讵关舞，捧心非效颦。

卷 566_20 【赋得寿星见】

卢渥

玄象今何应，时和政亦平。祥为一人寿，色映九霄明。

皎洁垂银汉，光芒近斗城。含规同月满，表瑞得天清。
甘露盈条降，非烟向日生。无如此嘉祉，率土荷秋成。

卷 566_21 【题嘉祥驿】

卢渥

交亲荣饯洛城空，秉钺戎装上将同。星使自天丹诏下，
雕鞍照地数程中。马嘶静谷声偏响，旆映晴山色更红。
到后定知人易化，满街棠树有遗风。

卷 566_22 【九华山】

郭夔

岩翠凌云出迥然，峒峒万丈倚秋天。暮风飘送当轩色，
晓雾斜飞入槛烟。帘卷倚屏双影聚，镜开朱户九条悬。
画图何必家家有，自有画图来目前。

卷 566_23 【送莫仲节状元归省】

柳珪

青骢聚送谪仙人，南国荣亲不及君。椰子味从今日近，

· 全唐诗 ·

鹧鸪声向旧山闻。孤猿夜叫三湘月，匹马时侵五岭云。
想到故乡应腊过，药栏犹有异花薰。

第五百六十七卷

卷 567_1 【津阳门诗】

郑嵎

津阳门北临通逵，雪风猎猎飘酒旗。泥寒款段蹶不进，
疲童退问前何为。酒家顾客催解装，案前罗列樽与卮。
青钱琐屑安足数，白醪软美甘如飴。开垆引满相献酬，
枯肠渴肺忘朝饥。愁忧似见出门去，渐觉春色入四肢。
主翁移客挑华灯，双肩隐膝乌帽欹。笑云鲐老不为礼，
飘萧雪鬓双垂颐。问余何往凌寒曦，顾翁枯朽郎岂知。
翁曾豪盛客不见，我自为君陈昔时。时平亲卫号羽林，
我才十五为孤儿。射熊搏虎众莫敌，弯弧出入随伙飞。
此时初创观风楼，檐高百尺堆华榱。楼南更起斗鸡殿，
晨光山影相参差。其年十月移禁仗，山下桤比罗百司。
朝元阁成老君见，会昌县以新丰移。幽州晓进供奉马，
玉珂宝勒黄金羁。五王扈驾夹城路，传声校猎渭水湄。
羽林六军各出射，笼山络野张置维。雕弓绣韣不知数，
翻身灭没皆蛾眉。赤鹰黄鸢云中来，妖狐狡兔无所依。
人烦马殆禽兽尽，百里腥膻禾黍稀。暖山度腊东风微，
宫娃赐浴长汤池。刻成玉莲喷香液，漱回烟浪深逶迤。
犀屏象荐杂罗列，锦帟绣雁相追随。破簪碎钿不足拾，

金沟残溜和纓綬。上皇宽容易承事，十家三国争光辉。
绕床呼卢恣樗博，张灯达昼相谩欺。相君侈拟纵骄横，
日从秦虢多游嬉。朱衫马前未满足，更驱武卒罗旌旗。
画轮宝轴从天来，云中笑语声融怡。鸣鞭后骑何躩蹀，
宫妆襟袖皆仙姿。青门紫陌多春风，风中数日残春遗。
骊驹吐沫一奋迅，路人拥篲争珠玑。八姨新起合欢堂，
翔鹞贺燕无由窥。万金酬工不肯去，矜能恃巧犹嗟咨。
四方节制倾附媚，穷奢极侈沽恩私。堂中特设夜明枕，
银烛不张光鉴帷。瑶光楼南皆紫禁，梨园仙宴临花枝。
迎娘歌喉玉窈窕，蛮儿舞带金葳蕤。三郎紫笛弄烟月，
怨如别鹤呼羈雌。玉奴琵琶龙香拨，倚歌促酒声娇悲。
饮鹿泉边春露晞，粉梅檀杏飘朱墀。金沙洞口长生殿，
玉蕊峰头王母祠。禁庭术士多幻化，上前较胜纷相持。
罗公如意夺颜色，三藏袈裟成散丝。蓬莱池上望秋月，
无云万里悬清辉。上皇夜半月中去，三十六宫愁不归。
月中秘乐天半间，丁珰玉石和埙篪。宸聪听览未终曲，
却到人间迷是非。千秋御节在八月，会同万国朝华夷。
花萼楼南大合乐，八音九奏鸾来仪。都卢寻橦诚龌龊，
公孙剑伎方神奇。马知舞彻下床榻，人惜曲终更羽衣。
禄山此时侍御侧，金鸡画障当罽毼。绣衣衣赭日赧赧，
甘言狡计愈娇痴。诏令上路建甲第，楼通走马如飞翬。
大开内府恣供给，玉缶金筐银簸箕。异谋潜炽促归去，
临轩赐带盈十围。忠臣张公识逆状，日日切谏上弗疑。
汤成召浴果不至，潼关已溢渔阳师。御街一夕无禁鼓，
玉辂顺动西南驰。九门回望尘坌多，六龙夜驭兵卫疲。
县官无人具军顿，行宫彻屋屠云螭。马嵬驿前驾不发，
宰相射杀冤者谁。长眉鬓发作凝血，空有君王潜涕洟。

青泥坂上到三蜀，金堤城边止九旂。移文泣祭昔臣墓，
度曲悲歌秋雁辞。明年尚父上捷书，洗清观阙收封畿。
两君相见望贤顿，君臣鼓舞皆歔歔。宫中亲呼高骠骑，
潜令改葬杨真妃。花肤雪艳不复见，空有香囊和泪滋。
銮輿却入华清宫，满山红实垂相思。飞霜殿前月悄悄，
迎春亭下风飏飏。雪衣女失玉笼在，长生鹿瘦铜牌垂。
象床尘凝罨飒被，画檐虫网颇梨碑。碧菱花覆云母陵，
风篁雨菊低离披。真人影帐偏生草，果老药堂空掩扉。
鼎湖一日失弓剑，桥山烟草俄霏霏。空闻玉碗入金市，
但见铜壶飘翠帷。开元到今逾十纪，当初事迹皆残隳。
竹花唯养栖梧凤，水藻周游巢叶龟。会昌御宇斥内典，
去留二教分黄缁。庆山污潚石瓮毁，红楼绿阁皆支离。
奇松怪柏为樵苏，童山胥谷亡嶮巇。烟中壁碎摩诘画，
云间字失玄宗诗。石鱼岩底百寻井，银床下卷红绶迟。
当时清影荫红叶，一旦飞埃埋素规。韩家烛台倚林杪，
千枝灿若山霞摛。昔年光彩夺天月，昨日销熔当路岐。
龙宫御榜高可惜，火焚牛挽临崎嶇。孔雀松残赤琥珀，
鸳鸯瓦碎青琉璃。今我前程能几许，徒有余息筋力羸。
逢君话此空洒涕，却忆欢娱无见期。主翁莫泣听我语，
宁劳感旧休吁嘻。河清海宴不难睹，我皇已上升平基。
湟中土地昔湮没，昨夜收复无疮痍。戎王北走奔青冢，
虏马西奔空月支。两逢尧年岂易偶，愿翁颐养丰肤肌。
平明酒醒便分首，今夕一樽翁莫违。

卷 567_2 【春日即事】

崔櫓

一百五日又欲来，梨花梅花参差开。行人自笑不归去，
瘦马独吟真可哀。杏酪渐香邻舍粥，榆烟将变旧炉灰。
画桥春暖清歌夜，肯信愁肠日九回。

卷 567_3 【春晚岳阳言怀二首】

崔櫓

烟花零落过清明，异国光阴老客情。云梦夕阳愁里色，
洞庭春浪坐来声。天边一与旧山别，江上几看芳草生。
独倚阑干意难写，暮笳呜咽调孤城。

翠烟如钿柳如环，晴倚南楼独看山。江国草花三月暮，
帝城尘梦一年间。虚舟尚叹萦难解，飞鸟空惭倦未还。
何以不羁詹父伴，睡烟歌月老潺潺。

卷 567_4 【过蛮溪渡】

崔櫓

绿杨如发雨如烟，立马危桥独唤船。山口断云迷旧路，

渡头芳草忆前年。身随远道徒悲梗，诗卖明时不直钱。
归去楚台还有计，钓船春雨日高眠。

卷 567_5 【岸梅】

崔櫓

含情含怨一枝枝，斜压渔家短短篱。惹袖尚余香半日，
向人如诉雨多时。初开偏称雕梁画，未落先愁玉笛吹。
行客见来无去意，解帆烟浦为题诗。

卷 567_6 【重阳日次荆南路经武宁驿】

崔櫓

茱萸冷吹溪口香，菊花倒绕山脚黄。家山去此强百里，
弟妹待我醉重阳。风健早鸿高晓景，露清圆碧照秋光。
莫看时节年年好，暗送搔头逐手霜。

卷 567_7 【述怀】

崔櫓

白首成何事，无欢可替悲。空余酒中兴，犹似少年时。

卷 567_8 【三月晦日送客】

崔櫓

野酌乱无巡，送君兼送春。明年春色至，莫作未归人。

卷 567_9 【华清宫三首】

崔櫓

草遮回磴绝鸣鸾，云树深深碧殿寒。
明月自来还自去，更无人倚玉栏干。

障掩金鸡蓄祸机，翠华西拂蜀云飞。
珠帘一闭朝元阁，不见人归见燕归。

门横金锁悄无人，落日秋声渭水滨。
红叶下山寒寂寂，湿云如梦雨如尘。

卷 567_10 【题云梦亭】

崔櫓

薄烟如梦雨如尘，霜景晴来却胜春。

好住池西红叶树，何年今日伴何人。

卷 567_11 【有酒失于虔州陆郎中肱，以诗谢之】

崔櫓

醉时颠蹶醒时羞，麹蘖推人不自由。
叵耐一双穷相眼，不堪花卉在前头。

卷 567_12 【闻笛】

崔櫓

银河漾漾月晖晖，楼碍星边织女机。
横玉叫云天似水，满空霜逐一声飞。

卷 567_13 【山路见花】

崔櫓

晓红初拆露香新，独立空山冷笑人。
春意自知无主惜，恣风吹逐马蹄尘。

卷 567_14 【暮春对花】

崔櫓

病香无力被风欺，多在青苔少在枝。
马上行人莫回首，断君肠是欲残时。

卷 567_15 【句】

崔櫓

强半瘦因前夜雪，数枝愁向晚天来。

无人解把无尘袖，盛取残香尽日怜。
一番春雨吹巢冷，半朵山花咽觜香。

云生柱础降龙地，露洗林峦放鹤天。

菱叶乍翻人采后，荇花初没舸行时。

第五百六十八卷

卷 568_1 【乌夜号】

李群玉

层波隔梦渚，一望青枫林。有鸟在其间，达晓自悲吟。
是时月黑天，四野烟雨深。如闻生离哭，其声痛人心。
悄悄夜正长，空山响哀音。远客不可听，坐愁华发侵。
既非蜀帝魂，恐是桓山禽。四子各分散，母声犹至今。

卷 568_2 【升仙操】

李群玉

嬴女去秦宫，琼笙飞碧空。凤台闭烟雾，鸾吹飘天风。
复闻周太子，亦遇浮丘公。丛簧发天弄，轻举紫霞中。
浊世不久驻，清都路何穷。一去霄汉上，世人那得逢。

卷 568_3 【雨夜呈长官】

李群玉

远客坐长夜，雨声孤寺秋。请量东海水，看取浅深愁。
愁穷重于山，终年压人头。朱颜与芳景，暗赴东波流。
鳞翼思风水，青云方阻修。孤灯冷素艳，虫响寒房幽。
借问陶渊明，何物号忘忧。无因一酩酊，高枕万情休。

卷 568_4 【小弟艤南游近书来】

李群玉

湘南客帆稀，游子寡消息。经时停尺素，望尽云边翼。
笑言频梦寐，独立想容色。落景无来人，修江入天白。
亭亭倚门念，瑟瑟风雨夕。何处泊扁舟，迢递湍波侧。
秋归旧窗竹，永夜一凄寂。吟尔鵲鵲篇，中宵慰相忆。

卷 568_5 【赠方处士】

李群玉

白衣方外人，高闲溪中鹤。无心恋稻粱，但以林泉乐。
赤霄终得意，天池俟飞跃。岁晏入帝乡，期君在寥廓。

卷 568_6 【秋怨】

李群玉

瑟瑟凉海气，西来送愁容。金风死绿蕙，玉露生寒松。
所思在溟碧，无因一相逢。登楼梯去翼，目尽沧波重。
虚窗度流萤，斜月啼幽蛩。疏红落残艳，冷水凋芙蓉。
岁暮空太息，年华逐遗踪。凝情耿不寐，揽涕起疏慵。

卷 568_7 【感春】

李群玉

春情不可状，艳艳令人醉。暮水绿杨愁，深窗落花思。
吴宫新暖日，海燕双飞至。秋思逐烟光，空濛满天地。

卷 568_8 【山中秋夕】

李群玉

抱琴出南楼，气爽浮云灭。松风吹天箫，竹路踏碎月。
后山鹤唳定，前浦荷香发。境寂良夜深，了与人间别。

卷 568_9 【将游罗浮登广陵楞伽台别羽客】

李群玉

清远登高台，晃朗纵览历。濯泉唤仙风，于此荡灵魄。
冷光邀远目，百里见海色。送云归蓬壶，望鹤灭秋碧。
波澜收日气，天自回澄寂。百越落掌中，十洲点空白。
身居飞鸟上，口咏玄元籍。飘如出尘笼，想望吹箫客。
冥冥人间世，歌笑不足惜。竭来罗浮巅，披云炼琼液。
谢公云岑兴，可以蹑高迹。吾将抱瑶琴，绝境纵所适。

卷 568_10 【卢溪道中】

李群玉

晓发潺湲亭，夜宿潺湲水。风篁扫石澜，琴声九十里。
光奔觉来眼，寒落梦中耳。曾向三峡行，巴江亦如此。

卷 568_11 【湖中古愁三首】

李群玉

凉风西海来，直渡洞庭水。飏飏木叶下，白浪连天起。
蘼兰委皓雪，百草一时死。摧残负志人，感叹何穷已。

昔我睹云梦，穷秋经汨罗。灵均竟不返，怨气成微波。
奠桂开古祠，朦胧入幽萝。落日潇湘上，凄凉吟九歌。

南云哭重华，水死悲二女。天边九点黛，白骨迷处所。
朦胧波上瑟，清夜降北渚。万古一双魂，飘飘在烟雨。

卷 568_12 【别狄佩】

李群玉

翠竹不着花，凤雏长忍饥。未开凡霄翮，空把碧梧枝。
圣人奏云韶，祥凤一来仪。文章耀白日，众鸟莫敢窥。
郁抑不自言，凡鸟何由知。当看九千仞，飞出太平时。

卷 568_13 【古镜】

李群玉

明月何处来，朦胧在入境。得非轩辕作，妙绝世莫并。
瑶匣开旭日，白电走孤影。泓澄一尺天，彻底寒霜景。
冰辉凜毛发，使我肝胆冷。忽惊行深幽，面落九秋井。
云天入掌握，爽朗神魂净。不必负局仙，金沙发光炯。
阴沉蓄灵怪，可与天地永。恐为悲龙吟，飞去在俄顷。

卷 568_14 【我思何所在】

李群玉

我思何所在，乃在阳台侧。良宵相望时，空此明月色。
归魂泊湘云，飘荡去不得。觉来理舟楫，波浪春湖白。
烟光浩楚秋，瑶草不忍摘。因书天末心，系此双飞翼。

卷 568_15 【送萧绶之桂林】

李群玉

兰香佩兰人，弄兰兰江春。尔为兰林秀，芳藻惊常伦。
灿灿凤池裔，一毛今再新。竹花不给口，憔悴清湘滨。
一朝南溟飞，彩翮不可亲。苍梧云水晚，离思空凝颦。
我亦纵烟棹，西浮彭蠡津。丈夫未虎变，落魄甘风尘。
大禹惜寸阴，况我无才身。流光销道路，以此生嗟辛。
万里阔分袂，相思杳难申。桂水秋更碧，寄书西上鳞。

卷 568_16 【感兴四首】

李群玉

子云吞白凤，遂吐太玄书。幽微十万字，枝叶何扶疏。

婉变猛虎口，甘言累其初。一睹美新作，斯瑕安可除。

昔窃不死药，奔空有嫦娥。盈盈天上艳，孤洁栖金波。
织女了无语，长宵隔银河。轧轧挥素手，几时停玉梭。

洞房三五夕，金缸凝焰灭。美人抱云和，斜倚纱窗月。
沈吟想幽梦，闺思深不说。弦冷玉指寒，含颦待明发。

朔雁衔边秋，寒声落燕代。先惊愁人耳，颜发潜消改。
凝云蔽洛浦，梦寐劳光彩。天边无书来，相思泪成海。

卷 568_17【将之吴越留别坐中文酒诸侣】

李群玉

秋色满水国，江湖兴萧然。氛埃敛八极，万里净澄鲜。
洿浦纵孤棹，吴门渺三千。回随衡阳雁，南入洞庭天。
早闻陆士龙，矫掌跨山川。非思鲈鱼脍，且弄五湖船。
暝泊远浦霞，晓饭芦洲烟。风流访王谢，佳境恣洄沿。
霜剪别岸柳，香枯北池莲。岁华坐摇落，寂寂感流年。
明朝即漂萍，离憾无由宣。相思空江上，何处金波圆。

卷 568_18【大云池泛舟】

李群玉

九月莲花死，萍枯霜水清。船浮天光远，棹拂翠澜轻。

古木□□□，了无烟霭生。游鳞泳皎洁，洞见逍遥情。
渔父一曲歌，沧浪遂知名。未知斯水上，可以濯吾缨。

卷 568_19 【送友人之峡】

李群玉

东吴有赋客，愿识阳台仙。彩毫飞白云，不减郢中篇。
楚水五月浪，轻舟入暮烟。巫云多感梦，桂楫早回旋。

卷 568_20 【登宜春醉宿景星寺寄郑判官兼简空上人】

李群玉

晓发碧水阳，暝宿金山寺。松风洒寒雨，淅沥醒余醉。
夜中香积饭，蔬粒俱精异。境寂灭尘愁，神高得诗思。
皎皎茱阳子，芳春富才义。涨海豁心源，冰壶见门地。
碧霄有鸠序，未展联行翅。俱笑一尺绳，三年绊骐驎。
摧藏担簦客，郁抑胸襟事。名业尔未从，临风嘿舒志。
一身渺云岭，中夜空涕泗。侧枕对孤灯，衾寒不成寐。
粮薪极桂玉，大道生榛刺。耻息恶木阴，难书剑歌意。
扬鞭入莽苍，山驿凌烟翠。越鸟日南飞，芳音愿相次。

卷 568_21 【江楼独酌怀从叔】

李群玉

水国发爽气，川光静高秋。酣歌金尊醪，送此清风愁。
楚色忽满目，滩声落西楼。云翻天边叶，月弄波上钩。
芳意长摇落，蘅兰谢汀洲。长吟碧云合，怅望江之幽。

卷 568_22 【登章华楼】

李群玉

楚子故宫地，苍然云水秋。我来览从事，落景空生愁。
伯业没荆棘，雄图成古丘。沈吟问鼎语，但见东波流。
征鸿引乡心，一去何悠悠。晴湖碧云晚，暝色空高楼。
迢递趋远峤，微茫入孤舟。空路不堪望，西风白浪稠。

卷 568_23 【骢马】

李群玉

浮云何权奇，绝足世未知。长嘶清海风，蹀躞振云丝。
由来渥洼种，本是苍龙儿。穆满不再活，无人昆阆骑。
若识跃峤怯，宁劳耀金羁。青乌与白水，空笑驽骀肥。

伯乐傥一见，应惊耳长垂。当思八荒外，逐日向瑶池。

卷 568_24 【赠方处士兼以写别】

李群玉

天与云鹤情，人间恣诗酒。龙宫奉采觅，瀕洞一千首。
清如南薰丝，韵若黄钟吼。喜于风骚地，忽见陶谢手。
籍籍九江西，篇篇在人口。芙蓉为芳菲，未落诸花后。
所知心眼大，别自开户牖。才力似风鹏，谁能算升斗。
无营傲云竹，琴帙静为友。鸾凤戢羽仪，骐驎在郊薮。
镜湖春水绿，越客忆归否。白衣四十秋，逍遥一何久。
此身无定迹，又逐浮云走。离思书不穷，残阳落江柳。

卷 568_25 【湘西寺霁夜】

李群玉

雨过琉璃宫，佳兴浩清绝。松风冷晴滩，竹路踏碎月。
月波荡如水，气爽星朗灭。皓夜千树寒，峥嵘万岩雪。
后山鹤唳断，前池荷香发。境寂凉夜深，神思空飞越。

卷 568_26 【伤思】

李群玉

八月白露浓，芙蓉抱香死。红枯金粉堕，寥落寒塘水。
西风团叶下，叠穀参差起。不见棹歌人，空垂绿房子。

卷 568_27 【送郑京昭之云安】

李群玉

君吟高唐赋，路过巫山渚。莫令巫山下，幽梦惹云雨。
往事几千年，芬菲今尚传。空留荆王馆，岩嶂深苍然。
楚水五月浪，轻舟入蘋烟。送君扬楫去，愁绝郢城篇。

卷 568_28 【送处士自番禺东游便归苏台别业】

李群玉

哑轧暮江上，橹声摇落心。宛陵三千里，路指吴云深。
莼菜动归兴，忽然闻会吟。南浮龙川月，东下敬亭岑。
多君咏逍遥，结萝碧溪阴。高笼华表鹤，静对幽兰琴。
汗漫江海思，傲然抽冠簪。归屿未云寂，还家应追寻。
二陆文苑秀，岿峣怀所钦。惜我入洛晚，不睹双南金。

江左风流尽，名贤成古今。送君无限意，别酒但加斟。

卷 568_29 【法华微上人盛话金山境胜，旧游在目，吟成此篇】

李群玉

江上青莲宫，人间蓬莱岛。烟霞与波浪，隐映楼台好。
潮门梵音静，海日天光早。愿与灵鹫人，吟经此终老。

卷 568_30 【洞庭入澧江寄巴丘故人】

李群玉

四月桑半枝，吴蚕初弄丝。江行好风日，燕舞轻波时。
去事旋成梦，来欢难预期。唯凭东流水，日夜寄相思。

卷 568_31 【自澧浦东游江表，途出巴丘，投员外从公虞】

李群玉

短翮后飞者，前攀鸾鹤翔。力微应万里，矫首空苍苍。
谁昔探桃源，考槃西岳阳。高风动商洛，绮皓无馨香。
一朝下蒲轮，清辉照岩廊。孤醒立众醉，古道何由昌。
经术震浮荡，国风扫齐梁。文襟即玄圃，笔下成琳琅。

霞水散吟啸，松筠奉琴觞。冰壶避皎洁，武库羞锋铓。
小子书代耕，束发颇自强。艰哉水投石，壮志空摧藏。
十年侣龟鱼，垂头在沅湘。巴歌掩白雪，鲍肆埋兰芳。
骚雅道未丧，何忧名不彰。饥寒束困厄，默塞飞星霜。
百志不成一，东波掷年光。尘生脱粟甑，万里违高堂。
中夜恨火来，焚烧九回肠。平明梁山泪，缘枕沾匡床。
依泊洞庭波，木叶忽已黄。哀砧捣秋色，晓月啼寒螿。
复此棹孤舟，云涛浩茫茫。朱门待媒势，短褐谁揄扬。
仰羨野陂鳧，无心忧稻粱。不如天边雁，南北皆成行。
男儿白日间，变化未可量。所希困辱地，剪拂成腾骧。
咋笔话肝肺，咏兹枯鱼章。何由首西路，目断白云乡。

卷 568_32 【洞庭驿楼雪夜宴集，奉赠前湘州张员外】

李群玉

昔与张湘州，闲登岳阳楼。目穷衡巫表，兴尽荆吴秋。
掷笔落郢曲，巴人不能酬。是时簪裾会，景物穷冥搜。
误忝玳筵秀，得陪文苑游。几篇云楣上，风雨沉银钩。
□□□□□，□□□沧洲。童儿待郭伋，竹马空迟留。
路指云汉津，谁能吟四愁。银壶傲海雪，青管罗名讴。
贱子迹未安，谋身拙如鸠。分随烟霞老，岂有风云求。
不逐万物化，但贻知己羞。方穷立命说，战胜心悠悠。
不然蹲会稽，钩下三五牛。所期波涛助，燁赫呈吞舟。

卷 568_33 【送郑子宽弃官东游便归女几】

李群玉

八月湖浸天，扬帆入秋色。岷峨雪气来，寒涨潇湘碧。
子真冥鸿志，不逐笼下翼。九女叠云屏，於焉恣栖息。
新诗山水思，静入陶谢格。困醉松花春，追攀紫烟客。
相逢十年旧，嚬笑等欢戚。一饭玉露蔬，中肠展堆积。
停食不尽意，倾意怅可惜。云水一分飞，离忧洞庭侧。
回车三乡路，仙菊正堪摘。寄谢杜兰香，何年别张硕。

卷 568_34 【长沙九日登东楼观舞】

李群玉

南国有佳人，轻盈绿腰舞。华筵九秋暮，飞袂拂云雨。
翩如兰苕翠，婉如游龙举。越艳罢前溪，吴姬停白纻。

慢态不能穷，繁姿曲向终。低回莲破浪，凌乱雪萦风。
坠珥时流盼，修裾欲溯空。唯愁捉不住，飞去逐惊鸿。

卷 568_35 【龙山人惠石廩方及团茶】

李群玉

客有衡岳隐，遗余石廩茶。自云凌烟露，采掇春山芽。

珪璧相压叠，积芳莫能加。碾成黄金粉，轻嫩如松花。
红炉爨霜枝，越儿斟井华。滩声起鱼眼，满鼎漂清霞。
凝澄坐晓灯，病眼如蒙纱。一瓯拂昏寐，襟鬲开烦拏。
顾渚与方山，谁人留品差？持瓯默吟味，摇膝空咨嗟。

卷 568_36 【宿鸟远峡化台遇风雨】

李群玉

孤鹤长松颠，独宿万岩雨。龙湫在石脚，引袂时一取。
惊风折乔木，飞焰猎窗户。半夜霹雳声，高斋有人语。

卷 568_37 【岳阳春晚】

李群玉

不觉春物老，块然湖上楼。云沙鹧鸪思，风日沅湘愁。
去翼灭云梦，来帆指昭丘。所嗟芳桂晚，寂寞对汀洲。

卷 568_38 【汉阳春晚】

李群玉

汉阳抱青山，飞楼映湘渚。白云蔽黄鹤，绿树藏鹦鹉。

凭高送春日，流恨伤千古。遐思祢衡才，令人怨黄祖。

卷 568_39 【将离澧浦置酒野屿奉怀沈正字昆弟三人联登高第】

李群玉

春月三改兔，花枝成绿阴。年光东流水，浩叹伤羁心。
酌桂烟屿晚，鵙鸣江草深。良图一超忽，万恨空相寻。
上国刘翘楚，才微甘陆沉。无灯假贫女，有泪沾牛衾。
衡岳三麒麟，各振黄钟音。卿云被文彩，芳价摇词林。
夫子芸阁英，养鳞湘水浔。晴沙踏兰菊，隐几当青岑。
明月洞庭上，悠扬挂离襟。停觞一摇笔，聊寄生刍吟。

卷 568_40 【湘中别成威闾黎】

李群玉

至哉彼上人，冰霜凛规则。游心杳何境，宴坐入冥默。
解空与密行，名腊信崇德。吐论驾秋涛，龙宫发胸臆。
群迷行大夜，浩浩一昏黑。赤水千丈深，玄珠几人得。
持杯挹溟涨，至理安可测。宁假喻芭蕉，真成嗅薝卜。
松声扫白月，霁夜来静域。清梵罢法筵，天香满衣襟。
何方济了岸，祇仗慈航力。愿与十八贤，同栖翠莲国。

卷 568_41 【别尹炼师】

李群玉

吾家五千言，至道悬日月。若非函谷令，谁注流沙说。
多君飞升志，机悟独超拔。学道玉笥山，烧丹白云穴。
南穷衡疑秀，采药历幽绝。夜卧瀑布风，朝行碧岩雪。
洞宫四百日，玉籍恣探阅。徒以菌蟪姿，缅攀修真诀。
尘笼罩浮世，遐思空飞越。一罢棋酒欢，离情满寥沏。
愿骑紫盖鹤，早向黄金阙。城市不可留，尘埃秽仙骨。

卷 568_42 【饭僧】

李群玉

好读天竺书，为寻无生理。焚香面金偈，一室唯巾水。
交信方外言，二三空门子。峻范照秋霜，高标掩僧史。
清晨洁蔬茗，延请良有以。一落喧哗竞，栖心愿依止。
奔曦入半百，冉冉颓濛汜。云泛名利心，风轻是非齿。
向为情爱缚，未尽金仙旨。以静制猿心，将虞警然起。
纶巾与藜杖，此意真已矣。他日云壑间，来寻幽居士。

卷 568_43 【赠回雪】

李群玉

回雪舞萦盈，萦盈若回雪。腰支一把玉，只恐风吹折。
如能买一笑，满斗量明月。安得金莲花，步步承罗袜。

卷 568_44 【将之京国赠薛员外】

李群玉

黄叶下空馆，寂寥寒雨愁。平居岁华晏，络纬啼林幽。
节物凋壮志，咄嗟不能休。空怀赵鞅叹，变化良无由。
所思杳何知，侧身仰皇州。苍烟晦楚野，寒浪埋昭丘。
赵壹赋命薄，陈思多世忧。翻然羡鱼鸟，畅矣山川游。
薛公龙泉姿，其气在斗牛。南冠束秀发，白石劳悲讴。
圭袞照崇阅，文儒嗣箕裘。旷然方寸地，霁海浮云舟。
澧浦一遗佩，郢南再悲秋。叫阍路既阻，浩荡怀灵修。
莫奏武溪笛，且登仲宣楼。亨通与否闭，物理相沉浮。
天子坐宣室，夔龙奉谏猷。行当赐环去，岂作遗贤羞。

卷 568_45 【送魏珪觐省】

李群玉

木落楚色深，风高浪花白。送君飞一叶，鸟逝入空碧。

猗欤白华秀，伤心倚门夕。不知云涨遥，万里看咫尺。
萧萧青枫岸，去掩江山宅。离觞有黄花，节物助凄戚。
潇湘入濡桂，一路萦水石。烟萝拂行舟，玉瀨锵枕席。
多君林泉趣，耽玩日成癖。长啸凌清晖，襟情当雪涤。
登龙屈指内，飞誉甚籍籍。未折月中枝，宁随宋都鶡。
曰余吞声地，举足伤瓦砾。见尔一开颜，温明乃珠璧。
春风到云峤，把酒时相忆。豆蔻花入船，鸂鶒啼送客。
颺天与瘴海，此去备沿历。珍重春官英，加餐数刀帛。

卷 568_46【始忝四座奏状闻荐蒙恩授官，旋进歌诗，延英宣
赐言怀纪事，呈同馆诸公二十四韵】

李群玉

两鬓有二毛，光阴流浪中。形骸日土木，志气随云风。
冥默楚江畔，萧条林巷空。幽鸟事翔翥，敛翼依蒿蓬。
一饭五放箸，愀然念途穷。孟门在步武，所向何由通。
只征大易言，物否不可终。庶期白雪调，一奏惊凡聒。
昨忝丞相召，扬鞭指冥鸿。姓名挂丹诏，文句飞天聪。
解薛龙凤署，怀铅兰桂丛。声名仰闻见，烟汉陪高踪。
峨峨群玉山，肃肃紫殿东。神飙泛钟漏，佳气浮筠松。
自顾珉珠璞，何缘侣圭琮。群贤垂重价，省已增磨砢。
天子栖穆清，三台付夔龙。九霄降雨露，万国望时雍。
巍巍致君期，勋华将比崇。承天四柱石，嶷若窥衡嵩。
日见帝道升，谋猷垂景钟。寰瀛纳寿域，翔泳皆冲融。
百神俨云亭，伫将告成功。吾徒事文藻，骧首歌登封。

卷 568_47 【穆天子】

李群玉

穆满恣逸志，而轻天下君。一朝得八骏，逐日西溟濱。
寂漠崦嵫幽，绝迹留空文。三千閼宫艳，怨绝宁胜云。
或言帝轩辕，乘龙凌紫氛。桥山葬弓剑，暧昧竟难分。
不思五弦琴，作歌咏南薰。但听西王母，瑶池吟白云。

卷 568_48 【广州重别方处士之封川】

李群玉

楚国傲名客，九州遍芳声。白衣谢簪绂，云卧重岩扃。
长波飞素舸，五月下南溟。大笑相逢日，天边作酒星。

七年一云雨，常恨辉容隔。天末又分襟，离忧鬓堪白。
愿回凌潮楫，且著登山屐。共期罗浮秋，与子醉海色。

卷 568_49 【洞庭遇秋】

李群玉

尘愁老来颜，久与江山隔。逍遥澄湖上，洗眼见秋色。

凉波弄轻棹，湖月生远碧。未减遥客情，西望杳何极。

卷 568_50 【寄短书歌】

李群玉

骨肉萍蓬各天末，十度附书九不达。孤台冷眼无来人，
楚水秦天莽空阔。翔雁横秋过洞庭，西风落日浪峥嵘。
三年音信凝颦外，一曲哀歌白发生。

卷 568_51 【王内人琵琶引】

李群玉

檀槽一曲黄钟羽，细拨紫云金凤语。万里胡天海寒秋，
分明弹出风沙愁。三千宫嫔推第一，敛黛倾鬟艳兰室。
嬴女停吹降浦箫，嫦娥净掩空波瑟。翠幕横云蜡焰光，
银龙吐酒菊花香，皓魄翻（下缺）

卷 568_52 【醒起独酌怀友】

李群玉

西风静夜吹莲塘，芙蓉破红金粉香。摘花把酒弄秋芳，

吴云楚水愁茫茫。美人此夕不入梦，独宿高楼明月凉。

卷 568_53 【竞渡时在湖外偶为成章】

李群玉

雷奔电逝三千儿，彩舟画楫射初晖。喧江雷鼓鳞甲动，
三十六龙衔浪飞。灵均昔日投湘死，千古沉魂在湘水。
绿草斜烟日暮时，笛声幽远愁江鬼。

第五百六十九卷

卷 569_1 【新荷】

李群玉

田田八九叶，散点绿池初。嫩碧才平水，圆阴已蔽鱼。
浮萍遮不合，弱荇绕犹疏。增在春波底，芳心卷未舒。

卷 569_2 【初月二首】

李群玉

滟滟流光浅，娟娟泛露轻。云间龙爪落，帘上玉钩明。
桂树枝犹小，仙人影未成。欲为千里别，倚幌独含情。

凝颦立户前，细魄向娟娟。破镜徒相问，刀头恐隔年。
轻轻摇远水，脉脉下春烟。别后春江上，随人何处圆。

卷 569_3 【石渚】

李群玉

古岸陶为器，高林尽一焚。焰红湘浦口，烟浊洞庭云。
迥野煤飞乱，遥空爆响闻。地形穿凿势，恐到祝融坟。

卷 569_4 【云安】

李群玉

滩恶黄牛吼，城孤白帝秋。水寒巴字急，歌迥竹枝愁。
树暗荆王馆，云昏蜀客舟。瑶姬不可见，行雨在高丘。

卷 569_5 【石头城】

李群玉

伯业随流水，寒芜上古城。长空横海色，断岸落潮声。
八极悲扶拄，五湖来止倾。东南天子气，扫地入函京。

卷 569_6 【湖阔】

李群玉

楚色笼青草，秋风洗洞庭。夕霏生水寺，初月尽云汀。
棹响来空阔，渔歌发杳冥。欲浮阑下艇，一到斗牛星。

卷 569_7 【失鹤】

李群玉

瑶台烟雾外，一去不回心。清海蓬壶远，秋风碧落深。
堕翎留片雪，雅操入孤琴。岂是笼中物，云萝莫更寻。

卷 569_8 【腊夜雪霁，月彩交光，开阁临轩，竟睡不得，命家仆吹笙数曲，独饮一壶，奉寄江陵副使杜中丞】

李群玉

月华临霁雪，皓彩射貂裘。桂酒寒无醉，银笙冻不流。
怀哉梁苑客，思作剡溪游。竟夕吟琼树，川途恨阻修。

卷 569_9 【长沙陪裴大夫登北楼】

李群玉

岩嶂随高步，琴尊奉胜游。金风吹绿簟，湘水入朱楼。
朗抱云开月，高情鹤见秋。登临多暇日，非为赋消忧。

卷 569_10 【登蒲涧寺后二岩三首】

李群玉

五仙骑五羊，何代降兹乡。涧有尧年韭，山余禹日粮。
楼台笼海色，草树发天香。浩啸波光里，浮溟兴甚长。

行尽崎岖路，惊从汗漫游。青天豁眼快，碧海醒心秋。
便欲寻河汉，因之犯斗牛。九霄身自致，何必遇浮丘。

南溟吞越绝，极望碧鸿濛。龙渡潮声里，雷喧雨气中。
赵佗丘垄灭，马援鼓鼙空。遐想鱼鹏化，开襟九万风。

卷 569_11 【早鸿】

李群玉

木落波浪动，南飞闻夜鸿。参差天汉雾，嘹唳月明风。

野水莲茎折，寒泥稻穗空。无令一行侣，相失五湖中。

卷 569_12 【旅泊】

李群玉

摇落江天里，飘零倚客舟。短篇才遣闷，小酿不供愁。
沙雨潮痕细，林风月影稠。书空闲度日，深拥破貂裘。

卷 569_13 【半醉】

李群玉

处俗常如病，看花亦似秋。若无时复酒，宁遣镇长愁。
渐觉身非我，都迷蝶与周。何烦五色药，尊下即丹丘。

卷 569_14 【昼寐】

李群玉

筠桂晚萧疏，任人嘲宰予。鸟惊林下梦，风展枕前书。
正作庄生蝶，谁知惠子鱼。人间无乐事，直拟到华胥。

卷 569_15 【晚莲】

李群玉

露冷芳意尽，稀疏空碧荷。残香随暮雨，枯蕊堕寒波。
楚客罢奇服，吴姬停棹歌。涉江无可寄，幽恨竟如何。

卷 569_16 【将之番禺留别湖南府幕】

李群玉

本乏烟霞志，那随鸳鹭游。一枝仍未定，数粒欲何求。
溟涨道途远，荆吴云雪愁。会登梅岭翠，南翥入炎洲。

卷 569_17 【宵民】

李群玉

大雅无忧怨，宵民有爱憎。鲁侯天不遇，臧氏尔何能。
惨惨心如飮，营营舌似蝇。谁于销骨地，一鉴玉壶冰。

卷 569_18 【吾道】

李群玉

吾道成微哂，时情付绝言。凤兮衰已尽，犬也吠何繁。
轻重忧衡曲，妍媸虑镜昏。方忻耳目净，谁到翟公门。

卷 569_19 【与三山人夜话】

李群玉

静谈云鹤趣，高会两三贤。酒思弹琴夜，茶芳向火天。
兔裘堆膝暖，鸠杖倚床偏。各厌池笼窄，相看意浩然。

卷 569_20 【春寒】

李群玉

拨火垂帘夕，将暄向冷天。闷斟壶酒暖，愁听雨声眠。
处世心悠尔，干时思索然。春光看已半，明日又藏烟。

卷 569_21 【广江驿饯筵留别】

李群玉

别筵欲尽秋，一醉海西楼。夜雨寒潮水，孤灯万里舟。
酒飞鹦鹉重，歌送鹧鸪愁。惆怅三年客，难期此处游。

卷 569_22 【桑落洲】

李群玉

九江寒露夕，微浪北风生。浦屿渔人火，蒹葭凫雁声。
颓云晦庐岳，微鼓辨湓城。远忆天边弟，曾从此路行。

卷 569_23 【杜门】

李群玉

且咏闲居赋，飞翔去未能。春风花屿酒，秋雨竹溪灯。
世路变陵谷，时情验友朋。达生书一卷，名利付春冰。

卷 569_24 【池州封员外郡斋双鹤丹顶霜翎，仙态浮旷，罢政之日因呈此章】

李群玉

潇洒二白鹤，对之高兴清。寒溪侣云水，朱阁伴琴笙。
顾慕稻粱惠，超遥江海情。应携帝乡去，仙阙看飞鸣。

卷 569_25 【经费拾遗所居呈封员外】

李群玉

云卧竟不起，少微空陨光。唯应孔北海，为立郑公乡。
旧馆苔藓合，幽斋松菊荒。空余书带草，日日上阶长。

卷 569_26 【送秦炼师】

李群玉

紫府静沈沈，松轩思别琴。水流宁有意，云泛本无心。
锦洞桃花远，青山竹叶深。不因时卖药，何路更相寻。

卷 569_27 【湘阴县送迁客北归】

李群玉

不须留薏苡，重遣世人疑。瘴染面如槁，愁熏头似丝。
黄梅住雨外，青草过湖时。今日开汤网，冥飞亦未迟。

卷 569_28 【九日陪崔大夫宴清河亭】

李群玉

玉醴浮金菊，云亭敞玳筵。晴山低画浦，斜雁远书天。
谢朓离都日，殷公出守年。不知瑶水宴，谁和白云篇。

卷 569_29 【送房处士闲游】

李群玉

采药陶贞白，寻山许远游。刀圭藏妙用，岩洞契冥搜。
花月三江水，琴尊一叶舟。羨君随野鹤，长揖稻梁愁。

卷 569_30 【赠花】

李群玉

酒为看花酝，花须趁酒红。莫令芳树晚，使我绿尊空。
金谷园无主，桃源路不通。纵非乘露折，长短尽随风。

卷 569_31 【洞庭风雨二首】

李群玉

面南一片黑，俄起北风颠。浪泼巴陵树，雷烧鹿角田。
鱼龙方簸荡，云雨正喧阗。想赭君山日，秦皇怒赫然。

巨浸吞湘澧，西风忽怒号。水将天共黑，云与浪争高。
羽化思乘鲤，山漂欲扑鳌。阳乌犹曝翅，真恐湿蟠桃。

卷 569_32 【临水蔷薇】

李群玉

堪爱复堪伤，无情不久长。浪摇千脸笑，风舞一丛芳。
似濯文君锦，如窥汉女妆。所思云雨外，何处寄馨香。

卷 569_33 【中秋维舟君山看月二首】

李群玉

汗漫铺澄碧，朦胧吐玉盘。雨师清滓秽，川后扫波澜。
气射繁星灭，光笼八表寒。来从云涨迥，路上碧霄宽。

熠熠游何处，蟾蜍食渐残。棹翻银浪急，林映白虹攒。
练彩连河晓，冰晖压树干。夜深高不动，天下仰头看。

卷 569_34 【桂州经佳人故居琪树】

李群玉

种树人何在，攀枝空叹嗟。人无重见日，树有每年花。
满院雀声暮，半庭春景斜。东风不知恨，遍地落余霞。

卷 569_35 【赠元绛】

李群玉

相逢在总角，与子即同心。隐石那知玉，披沙始遇金。
兰秋香不死，松晚翠方深。各保芳坚性，宁忧霜霰侵。

卷 569_36 【中秋广江驿示韦益】

李群玉

莫惜三更坐，难消万里情。同看一片月，俱在广州城。
泪逐金波满，魂随夜鹊惊。支颐乡思断，无语到鸡鸣。

卷 569_37 【九日越台】

李群玉

旭日高山上，秋天大海隅。黄花罗粳粂，绛实簇茱萸。
病久欢情薄，乡遥客思孤。无心同落帽，天际望归途。

卷 569_38 【中秋越台看月】

李群玉

海雨洗尘埃，月从空碧来。水光笼草树，练影挂楼台。
皓曜迷鲸目，晶荧失蚌胎。宵分凭槛望，应合见蓬莱。

卷 569_39 【长沙开元寺昔与故长林许侍御题松竹联句】

李群玉

墙阴数行字，怀旧惨伤情。薜荔侵年月，莓苔压姓名。
逝川前后水，浮世短长生。独立秋风暮，凝颦隔郢城。

卷 569_40 【伤友】

李群玉

玉棺来九天，鳧舄掩穷泉。芜没池塘屿，凄凉翰墨筵。
短期存大梦，旧好委浮烟。我有幽兰曲，因君遂绝弦。

卷 569_41 【法性寺六祖戒坛】

李群玉

初地无阶级，余基数尺低。天香开茉莉，梵树落菩提。
惊俗生真性，青莲出淤泥。何人得心法，衣钵在曹溪。

卷 569_42 【东湖二首】

李群玉

晚景微雨歇，逍遥湖上亭。波闲鱼弄饵，树静鸟遗翎。
性野难依俗，诗玄自入冥。何繇遂潇洒，高枕对云汀。

雨气消残暑，苍苍月欲升。林间风卷簟，栏下水摇灯。
迥野垂银镜，层峦挂玉绳。重期浮小楫，来摘半湖菱。

卷 569_43 【湖阁晓晴寄呈从翁二首】

李群玉

岭日开寒雾，湖光荡霁华。风乌摇径柳，水蝶恋幽花。
蜀国地西极，吴门天一涯。轻舟栏下去，点点入湘霞。

高秋凭远槛，万里看新晴。重雾披天急，千云触石轻。
湖山四五点，湘雁两三声。遥想潘园里，琴尊兴转清。

卷 569_44 【同张明府游潞水亭】

李群玉

草色绿溪晚，梅香生縠文。云天敛余霁，水木笼微曛。

垂钓坐方屿，幽禽时一闻。何当五柳下，酌醴吟庭筠。

卷 569_45【七月十五夜看月】

李群玉

朦胧南溟月，汹涌出云涛。下射长鲸眼，遥分玉兔毫。
势来星斗动，路越青冥高。竟夕瞻光彩，昂头把白醪。

卷 569_46【北风】

李群玉

病发干垂枕，临风强起梳。蝶飞魂尚弱，蚁斗体犹虚。
瘦骨呻吟后，羸容几杖初。庭幽行药静，凉暑翠筠疏。

卷 569_47【游玉芝观】

李群玉

寻仙向玉清，独倚雪初晴。木落寒郊迥，烟开叠嶂明。
片云盘鹤影，孤磬杂松声。且共探玄理，归途月未生。

卷 569_48 【中秋夜南楼寄友人】

李群玉

海月出银浪，湖光射高楼。朗吟无绿酒，贱价买清秋。
气冷鱼龙寂，轮高星汉幽。他乡此夜客，对景钱多愁。

卷 569_49 【三月五日陪裴大夫泛长沙东湖】

李群玉

上巳余风景，芳辰集远坰。彩舟浮滢荡，绣毂下娉婷。
林树回葱蒨，笙歌转杳冥。湖光迷翡翠，草色醉蜻蜓。
鸟弄桐花日，鱼翻谷雨萍。从今留胜会，谁肯画兰亭。

卷 569_50 【龟】

李群玉

静养千年寿，重泉自隐居。不应随跛鳖，宁肯滞凡鱼。
灵腹唯玄露，芳巢必翠蕖。扬花输蚌蛤，奔月恨蟾蜍。
曳尾辞泥后，支床得水初。冠山期不小，铸印事宁虚。
有志酬毛宝，无心畏豫且。他时清洛汭，会荐帝尧书。

卷 569_51 【长沙春望寄沔阳故人】

李群玉

清明别后雨晴时，极浦空顰一望眉。湖畔春山烟黯黯，
云中远树黑离离。依微水戍闻疏鼓，掩映河桥见酒旗。
风暖草长愁自醉，行吟无处寄相思。

卷 569_52 【金塘路中】

李群玉

山连楚越复吴秦，蓬梗何年是住身。黄叶黄花古城路，
秋风秋雨别家人。冰霜想度商於冻，桂玉愁居帝里贫。
十口系心抛不得，每回回首即长颦。

卷 569_53 【自遣】

李群玉

翻覆升沉百岁中，前途一半已成空。浮生暂寄梦中梦，
世事如闻风里风。修竹万竿资阒寂，古书千卷要穷通。
一壶浊酒暄和景，谁会陶然失马翁。

卷 569_54 【送于少监自广州还紫逻】

李群玉

鸣皋山水似麻源，谢监东还忆故园。海峤烟霞轻逸翰，
洛川花木待回轩。宦情薄去诗千首，世事闲来酒一尊。
明日中书见颜范，始应通籍入金门。

卷 569_55 【石门韦明府为致东阳潭石鲫鲙】

李群玉

锦鳞衔饵出清涟，暖日江亭动鲙筵。叠雪乱飞消箸底，
散丝繁洒拂刀前。太湖浪说朱衣鲋，汉浦休夸缩项鳊。
隼味品流知第一，更劳霜橘助芳鲜。

卷 569_56 【规公业在净名得甚深义，仆近获顾长康月宫真影，
对戴安道所画文殊走笔此篇以屈瞻礼】

李群玉

五浊之世尘冥冥，达观栖心于此经。但用须弥藏芥子，
安知牛迹笑东溟。生公吐辩真无敌，顾氏传神实有灵。
今日净开方丈室，一飞白足到茅亭。

卷 569_57 【玉真观】

李群玉

高情帝女慕乘鸾，绀发初簪玉叶冠。秋月无云生碧落，
素蕖寒露出情澜。层城烟雾将归远，浮世尘埃久住难。
一自箫声飞去后，洞宫深掩碧瑶坛。

卷 569_58 【辱绵州于中丞书信】

李群玉

一缄垂露到云林，中有孙阳念骥心。万木自凋山不动，
百川皆旱海长深。风标想见瑶台鹤，诗韵如闻渌水琴。
他日纵陪池上酌，已应难到暝猿吟。

卷 569_59 【送崔使君萧山祷雨甘泽遽降】

李群玉

谢公一拜敬亭祠，五马旋归下散丝。不假土龙呈夭矫，
自然石燕起参差。预听禾稼如云语，应有空濛似雾时。
已向为霖报消息，颍川征诏是前期。

卷 569_60 【重经巴丘追感】

李群玉

昔年高接李膺欢，日泛仙舟醉碧澜。诗句乱随青草发，
酒肠俱逐洞庭宽。浮生聚散云相似，往事微茫梦一般。
今日片帆城下去，秋风回首泪阑干。

卷 569_61 【湘阴江亭却寄友人】

李群玉

湘岸初晴淑景迟，风光正是客愁时。幽花暮落骚人浦，
芳草春深帝子祠。往事隔年如过梦，旧游回首谩劳思。
烟波自此扁舟去，小酌文园杳未期。

卷 569_62 【哭郴州王使君】

李群玉

银章朱绂照云骢，六换鱼书惠化崇。瑶树忽倾沧海里，
醉乡翻在夜台中。东山妓逐飞花散，北海尊随逝水空。
曾是绮罗筵上客，一来长恸向春风。

卷 569_63 【九日巴丘杨公台上宴集】

李群玉

凄凄霜日上高台，水国秋深客思哀。万叠银山寒浪起，
一行斜字早鸿来。谁家捣练孤城暮，何处题衣远信回。
江汉路长身不定，菊花三笑旅萍开。

卷 569_64 【奉和张舍人送秦炼师归岑公山】

李群玉

仙翁归卧翠微岑，一夜西风月峡深。松径定知芳草合，
玉书应念素尘侵。闲云不系东西影，野鹤宁知去住心。
兰浦苍苍春欲暮，落花流水怨离琴。

卷 569_65 【送陶少府赴选】

李群玉

陶君官兴本萧疏，长傍青山碧水居。久向三茅穷艺术，
仍传五柳旧琴书。迹同飞鸟栖高树，心似闲云在太虚。
自是葛洪求药价，不关梅福恋簪裾。

卷 569_66 【寄张祜】

李群玉

越水吴山任兴行，五湖云月挂高情。不游都邑称平子，
只向江东作步兵。昔岁芳声到童稚，老来佳句遍公卿。
如君气力波澜地，留取阴何沈范名。

卷 569_67 【寄长沙许侍御】

李群玉

三年文会许追随，和遍南朝杂体诗。未把彩毫还郭璞，
乞留残锦与丘迟。竹斋琴酒欢成梦，水寺烟霞赏对谁。
今日秋风满湘浦，只应搔首咏琼枝。

卷 569_68 【望月怀友】

李群玉

浮云卷尽看瞳眈，直出沧溟上碧空。盈手水光寒不湿，
流天素彩静无风。酒花荡漾金尊里，棹影飘飘玉浪中。
川路正长难可越，美人千里思何穷。

卷 569_69 【和吴中丞悼笙妓】

李群玉

丽质仙姿烟逐风，凤凰声断吹台空。多情草色怨还绿，
无主杏花春自红。堕珥尚存芳树下，余香渐减玉堂中。
唯应去抱云和管，从此长归阿母宫。

卷 569_70 【薛侍御处乞靴】

李群玉

越客南来夸桂麋，良工用意巧缝成。看时共说茱萸皱，
著处嫌无鸂鶒鸣。百里奚身悲甚似，五羊皮价敢全轻。
日于文苑陪高步，赢得芳尘接武名。

卷 569_71 【九子坡闻鹧鸪】

李群玉

落照苍茫秋草明，鹧鸪啼处远人行。正穿诘曲崎岖路，
更听钩輜格磔声。曾泊桂江深岸雨，亦于梅岭阻归程。
此时为尔肠千断，乞放今宵白发生。

卷 569_72 【凉公从叔春祭广利王庙】

李群玉

龙骧伐鼓下长川，直济云涛古庙前。海客敛威惊火旆，
天吴收浪避楼船。阴灵向作南溟王，祀典高齐五岳肩。
从此华夷封域静，潜熏玉烛奉尧年。

卷 569_73 【长沙紫极宫雨夜愁坐】

李群玉

独坐高斋寒拥衾，洞宫台殿宵沉沉。春灯含思静相伴，
夜雨滴愁更向深。穷达未知他日事，是非皆到此时心。
羁栖摧剪平生志，抱膝时为梁甫吟。

卷 569_74 【送人隐居】

李群玉

棋局茅亭幽涧滨，竹寒江静远无人。村梅尚敛风前笑，
沙草初偷雪后春。鹏鷃喻中消日月，沧浪歌里放心神。
平生自有烟霞志，久欲抛身狎隐沦。

卷 569_75 【江楼闲望怀关中亲故】

李群玉

摇落江天欲尽秋，远鸿高送一行愁。音书寂绝秦云外，
身世蹉跎楚水头。年貌暗随黄叶去，时情深付碧波流。
风凄日冷江湖晚，注目寒空独倚楼。

卷 569_76 【请告南归留别同馆】

李群玉

一点灯前独坐身，西风初动帝城砧。不胜庾信乡关思，
遂作陶潜归去吟。书阁乍离情黯黯，彤庭回望肃沈沈。
应怜一别瀛洲侣，万里单飞云外深。

卷 569_77 【仙明洲口号】

李群玉

长爱沙洲水竹居，暮江春树绿阴初。浪翻新月金波浅，
风损轻云玉叶疏。半浦夜歌闻荡桨，一星幽火照叉鱼。
二年此处寻佳句，景物常输楚客书。

卷 569_78 【送萧十二校书赴郢州婚姻】

李群玉

蓬莱才子即萧郎，彩服青书卜凤凰。玉珮定催红粉色，
锦衾应惹翠云香。马穿暮雨荆山远，人宿寒灯郢梦长。
领取和鸣好风景，石城花月送归乡。

卷 569_79 【送隐者归罗浮】

李群玉

春山杳杳日迟迟，路入云峰白犬随。两卷素书留赏酒，
一柯樵斧坐看棋。蓬莱道士飞霞履，清远仙人寄好诗。
自此尘寰音信断，山川风月永相思。

卷 569_80 【献王中丞时有除拜】

李群玉

登仙望绝李膺舟，从此青蝇点遂稠。半夜剑吹牛斗动，
二年门掩雀罗愁。张仪会展平生舌，韩信那惭跨下羞。
他日图勋画麟阁，定呈肝胆始应休。

卷 569_81 【哭小女痴儿】

李群玉

平生未省梦熊罴，稚女如花坠晓枝。条蔓纵横输葛藟，
子孙蕃育羡螽斯。方同王衍钟情切，犹念商瞿有庆迟。
负尔五年恩爱泪，眼中惟有涸泉知。

卷 569_82 【醉后赠冯姬】

李群玉

黄昏歌舞促琼筵，银烛台西见小莲。二寸横波回慢水，
一双纤手语香弦。桂形浅拂梁家黛，瓜字初分碧玉年。
愿托襄王云雨梦，阳台今夜降神仙。

卷 569_83 【广州陪凉公从叔越台宴集】

李群玉

一径松梢踏石梯，步穷身在白云西。日衔赤浪金车没，
天拂沧波翠幕低。高鸟散飞惊大旆，长风万里卷秋鼙。
玉钩挂海笙歌合，珠履三千半似泥。

卷 569_84 【留别马使君】

李群玉

俱来海上叹烟波，君佩银鱼我触罗。蜀国才微甘放荡，
专城年少岂蹉跎。应怜旅梦千重思，共怆离心一曲歌。
唯有管弦知客意，分明吹出感恩多。

卷 569_85 【将欲南行陪崔八宴海榴亭】

李群玉

朝宴华堂暮未休，几人偏得谢公留。风传鼓角霜侵戟，
云卷笙歌月上楼。宾馆尽开徐孺榻，客帆空恋李膺舟。
谩夸书剑无归处，水远山长步步愁。

卷 569_86 【湖寺清明夜遣怀】

李群玉

柳暗花香愁不眠，独凭危槛思凄然。野云将雨渡微月，
沙鸟带声飞远天。久向饥寒抛弟妹，每因时节忆团圆。
饧餐冷酒明年在，未定萍蓬何处边。

卷 569_87 【九日】

李群玉

年年羞见菊花开，十度悲秋上楚台。半岭残阳衔树落，
一行斜雁向人来。行云永绝襄王梦，野水偏伤宋玉怀。
丝管阑珊归客尽，黄昏独自咏诗回。

卷 569_88 【同郑相并歌姬小饮戏赠】

李群玉

裙拖六幅湘江水，鬟耸巫山一段云。风格只应天上有，
歌声岂合世间闻。胸前瑞雪灯斜照，眼底桃花酒半醺。
不是相如怜赋客，争教容易见文君。

卷 569_89 【秣陵怀古】

李群玉

野花黄叶旧吴宫，六代豪华烛散风，龙虎势衰佳气歇，
凤凰名在故台空。市朝迁变秋芜绿，坟冢高低落照红。
霸业鼎图人去尽，独来惆怅水云中。

卷 569_90 【黄陵庙】

李群玉

小姑洲北浦云边，二女容华自俨然。野庙向江春寂寂，
古碑无字草芊芊。风回日暮吹芳芷，月落山深哭杜鹃。
犹似含颦望巡狩，九疑愁断隔湘川。

卷 569_91 【送唐侍御福建省兄】

李群玉

桂枝攀尽贾家才，霄汉春风棣萼开。世掌纶言传大笔，
官分鸿序压霜台。闽山翠卉迎飞旆，越水清纹散落梅。
到日池塘春草绿，谢公应梦惠连来。

卷 569_92 【送秦炼师归岑公山】

李群玉

紫泥飞诏下金銮，列象分明世仰观。北省谏书藏旧草，
南宫郎署握新兰。春归凤沼恩波暖，晓入鸳行瑞气寒。
偏是此生栖息者，满衣零泪一时干。

卷 569_93 【浔阳观水】

李群玉

朝宗汉水接阳台，唢呀填坑吼作雷。莫见九江平稳去，
还从三峡嶮巇来，南经梦泽宽浮日，西出岷山劣泛杯。
直至沧溟涵贮尽，深沉不动浸昭回。

卷 569_94 【谪仙吟赠赵道士】

李群玉

汗漫东游黄鹤雏，缙云仙子住清都。三元麟凤推高座，
六甲风雷閤小壶。日月暗资灵寿药，山河直拟化生符。
若为失意居蓬岛，鳌足尘飞桑树枯。

卷 569_95 【长沙陪裴大夫夜宴】

李群玉

东山夜宴酒成河，银烛荧煌照绮罗。四面雨声笼笑语，
满堂香气泛笙歌。泠泠玉漏初三滴，滟滟金觞已半酡。
共向柏台窥雅量，澄陂万顷见天和。

卷 569_96 【宝剑】

李群玉

雷焕丰城掘剑池，年深事远迹依稀。泥沙难掩冲天气，
风雨终思发匣时。夜电尚摇池底影，秋莲空吐镞边辉。
自从星坼中台后，化作双龙去不归。

卷 569_97 【人日梅花病中作】

李群玉

去年今日湘南寺，独把寒梅愁断肠。今年此日江边宅，
卧见琼枝低压墙。半落半开临野岸，团情团思醉韶光。
玉鳞寂寂飞斜月，素艳亭亭对夕阳。已被儿童苦攀折，
更遭风雨损馨香。洛阳桃李渐撩乱，回首行宫春景长。

第五百七十卷

卷 570_1 【静夜相思】

李群玉

山空天籁寂，水榭延轻凉。浪定一浦月，藕花闲自香。

卷 570_2 【桂州经佳人故居】

李群玉

桂水依旧绿，佳人本不还。只应随暮雨，飞入九疑山。

卷 570_3 【放鱼】

李群玉

早觅为龙去，江湖莫漫游。须知香饵下，触口是铦钩。

卷 570_4 【莲叶】

李群玉

根是泥中玉，心承露下珠。在君塘下种，埋没任春浦。

卷 570_5 【客愁二首】

李群玉

客愁看柳色，日日逐春深。荡漾春风起，谁知历乱心。

客愁看柳色，日日逐春长。凭送湘流水，绵绵入帝乡。

卷 570_6 【洞庭干二首】

李群玉

借问蓬莱水，谁逢清浅年。伤心云梦泽，岁岁作桑田。

朱宫紫贝阙，一旦作沙洲。八月还平在，鱼虾不用愁。

卷 570_7 【病起别主人】

李群玉

益愧千金少，情将一饭殊。恨无泉客泪，尽泣感恩珠。

卷 570_8 【火炉前坐】

李群玉

孤灯照不寐，风雨满西林。多少关心事，书灰到夜深。

卷 570_9 【古词】

李群玉

一合相思泪，临江洒素秋。碧波如会意，却与向西流。

卷 570_10 【嘲卖药翁】

李群玉

鬪尽春山土，辛勤卖药翁。莫抛破笠子，留作败天公。

卷 570_11 【伤小女痴儿】

李群玉

哭尔春日短，支颐长叹嗟。不如半死树，犹吐一枝花。

卷 570_12 【青鹢】

李群玉

独立蒹葭雨，低飞浦屿风。须知毛色下，莫入鹭鸶丛。

卷 570_13 【池塘晚景】

李群玉

风荷珠露倾，惊起睡鸂鶒。月落池塘静，金刀剪一声。

卷 570_14 【役从叔】

李群玉

可惜出群蹄，毛焦久卧泥。孙阳如不顾，骐驎向谁嘶。

卷 570_15 【恼自澄】

李群玉

常闻天女会，玉指散天花。莫遣春风里，红芳点袈裟。

卷 570_16 【读贾谊传】

李群玉

卑湿长沙地，空抛出世才。已齐生死理，鵬鸟莫为灾。

卷 570_17 【寄人】

李群玉

寄语双莲子，须知用意深。莫嫌一点苦，便拟弃莲心。

卷 570_18 【寄韦秀才】

李群玉

荆台兰渚客，寥落共含情。空馆相思夜，孤灯照雨声。

卷 570_19 【春日寄友】

李群玉

晴气熏樱蕊，丰蒙雪满林。请君三斗酒，醉卧白罗岑。

卷 570_20 【题竹】

李群玉

一顷含秋绿，森风十万竿。气吹朱夏转，声扫碧霄寒。

卷 570_21 【怀初公】

李群玉

不见休上人，空伤碧云思。何处开宝书，秋风海光寺。

卷 570_22 【龙安寺佳人阿最歌八首】

李群玉

团团明月面，冉冉柳枝腰。未入鸳鸯被，心长似火烧。

见面知何益，闻名忆转深。拳拳荷叶子，未得展莲心。
欲摘不得摘，如看波上花。若教亲玉树，情愿作蒹葭。
门路穿茶焙，房门映竹烟。会须随鹿女，乞火到窗前。
不是求心印，都缘爱绿珠。何须同泰寺，然后始为奴。
既为金界客，任改净人名。愿扫琉璃地，烧香过一生。
素腕撩金索，轻红约翠纱。不如栏下水，终日见桃花。
第一龙宫女，相怜是阿谁。好鱼输獭尽，白鹭镇长饥。

卷 570_23 【野鸭】

李群玉

鸕鶿借毛衣，喧呼鹰隼稀。云披菱藻地，任汝作群飞。

卷 570_24 【题二妃庙】

李群玉

黄陵庙前春已空，子规啼血滴松风。

不知精爽归何处，疑是行云秋色中。

卷 570_25 【寄友二首】

李群玉

野水晴山雪后时，独行村落更相思。
无因一向溪头醉，处处寒梅映酒旗。

花落轻寒酒熟迟，醉眠不及落花期。
愁人相忆春山暮，烟树苍苍播谷时。

卷 570_26 【桃源】

李群玉

我到瞿真上升处，山川四望使人愁。
紫雪白鹤去不返，唯有桃花溪水流。

卷 570_27 【题王侍御宅】

李群玉

门向沧江碧岫开，地多鸥鹭少尘埃。

绿阴十里滩声里，闲自王家看竹来。

卷 570_28 【闻湘南从叔朝覲】

李群玉

长沙地窄却回时，舟楫駉駉向凤池。
为报湘川神女道，莫教云雨湿旌旗。

卷 570_29 【汉阳太白楼】

李群玉

江上层楼翠霭间，满帘春水满窗山。
青枫绿草将愁去，远入吴云暝不还。

卷 570_30 【送客】

李群玉

沅水罗文海燕回，柳条牵恨到荆台。
定知行路春愁里，故郢城边见落梅。

卷 570_31 【醴陵道中】

李群玉

别酒离亭十里强，半醒半醉引愁长。
无端寂寂春山路，雪打溪梅狼藉香。

卷 570_32 【校书叔遗暑服】

李群玉

翠云箱里叠摠枕，楚葛湘纱净似空。
便著清江明月夜，轻凉与挂一身风。

卷 570_33 【赠魏三十七】

李群玉

名珪字玉净无瑕，美誉芳声有数车。
莫放焰光高二丈，来年烧杀杏园花。

卷 570_34 【酬崔表仁】

李群玉

昨日朱门一见君，忽惊野鹤在鸡群。
不应长啄潢污水，早晚归飞碧落云。

卷 570_35 【旅游番禺献凉公】

李群玉

帝乡群侣杳难寻，独立沧洲岁暮心。
野鹤栖飞无远近，稻粱多处是恩深。

卷 570_36 【长沙元门寺张璪员外壁画】

李群玉

片石长松倚素楹，翛然云壑见高情。
世人只爱凡花鸟，无处不知梁广名。

卷 570_37 【请告出春明门】

李群玉

本不将心挂名利，亦无情意在樊笼。
鹿裘藜杖且归去，富贵荣华春梦中。

卷 570_38 【引水行】

李群玉

一条寒玉走秋泉，引出深萝洞口烟。
十里暗流声不断，行人头上过潺湲。

卷 570_39 【移松竹】

李群玉

龙髯凤尾乱飏飏，带雾停风一亩秋。
待取满庭苍翠合，酒尊书案闭门休。

卷 570_40 【叹灵鹫寺山榴】

李群玉

水蝶岩蜂俱不知，露红凝艳数千枝。
山深春晚无人赏，即是杜鹃催落时。

卷 570_41 【黄陵庙】

李群玉

黄陵庙前莎草春，黄陵女儿茜裙新。
轻舟短棹唱歌去，水远山长愁杀人。

卷 570_42 【北亭】

李群玉

斜雨飞丝织晓空，疏帘半卷野亭风。
荷花向尽秋光晚，零落残红绿沼中。

卷 570_43 【送客往涪阳】

李群玉

春与春愁逐日长，远人天畔远思乡。
蘋生水绿不归去，孤负东溪七里庄。

卷 570_44 【寄友人鹿胎冠子】

李群玉

数点疏星紫锦斑，仙家新样剪三山。
宜与谢公松下戴，净簪云发翠微间。

卷 570_45 【江南】

李群玉

鳞鳞别浦起微波，泛泛轻舟桃叶歌。
斜雪北风何处宿，江南一路酒旗多。

卷 570_46 【答友人寄新茗】

李群玉

满火芳香碾麴尘，吴瓯湘水绿花新。
愧君千里分滋味，寄与春风酒渴人。

卷 570_47 【峡山寺上方】

李群玉

满院泉声水殿凉，疏帘微雨野松香。
东峰下视南溟月，笑踏金波看海光。

卷 570_48 【秋登涪阳城二首】

李群玉

万户砧声水国秋，凉风吹起故乡愁。
行人望远偏伤思，白浪青枫满北楼。

穿针楼上闭秋烟，织女佳期又隔年。
斜笛夜深吹不落，一条银汉挂秋天。

卷 570_49 【钓鱼】

李群玉

七尺青竿一丈丝，菰蒲叶里逐风吹。
几回举手抛芳饵，惊起沙滩水鸭儿。

卷 570_50 【酬魏三十七】

李群玉

静里寒香触思初，开缄忽见二琼琚。
一吟丽可风流极，没得弘文李校书。

卷 570_51 【赠琵琶妓】

李群玉

我见鸳鸯飞水上，君还望月苦相思。
一双裙带同心结，早寄黄鹂孤雁儿。

卷 570_52 【落帆后赋得二绝】

李群玉

平湖茫茫春日落，危樯独映沙洲泊。
上岸闲寻细草行，古查飞起黄金鹗。

水浮秋烟沙晓雪，皎洁无风灯影彻。
海客云帆未挂时，相与缘江拾明月。

卷 570_53 【赠人】

李群玉

曾留宋玉旧衣裳，惹得巫山梦里香。
云雨无情难管领，任他别嫁楚襄王。

卷 570_54 【赠妓人】

李群玉

谁家少女字千金，省向人间逐处寻。
今日分明花里见，一双红脸动春心。

卷 570_55 【山榴】

李群玉

洞中春气蒙笼暄，尚有红英千树繁。
可怜夹水锦步障，羞数石家金谷园。

卷 570_56 【鸂鶒】

李群玉

锦羽相呼暮沙曲，波上双声戛哀玉。
霞明川静极望中，一时飞灭青山绿。

卷 570_57 【沅江渔者】

李群玉

倚棹汀洲沙日晚，江鲜野菜桃花饭。
长歌一曲烟霭深，归去沧江碧波远。

卷 570_58 【题金山寺石堂】

李群玉

白波四面照楼台，日夜潮声绕寺回。
千叶红莲高会处，几曾龙女献珠来。

卷 570_59 【戏赠魏十四】

李群玉

兰浦秋来烟雨深，几多情思在琴心。
知君调得东家子，早晚和鸣入锦衾。

卷 570_60 【和人赠别】

李群玉

嚙黛低红别怨多，深亭芳恨满横波。
声中唱出缠绵意，泪落灯前一曲歌。

卷 570_61 【宿巫山庙二首】

李群玉

寂寞高堂别楚君，玉人天上逐行云。
停舟十二峰峦下，幽佩仙香半夜闻。

庙闭春山晓月光，波声回合树苍苍。
自从一别襄王梦，云雨空飞巫峡长。

卷 570_62 【伤柘枝妓】

李群玉

曾见双鸾舞镜中，联飞接影对春风。
今来独在花筵散，月满秋天一半空。

卷 570_63 【题樱桃】

李群玉

春初携酒此花间，几度临风倒玉山。
今日叶深黄满树，再来惆怅不能攀。

卷 570_64 【恼从兄】

李群玉

芳草萋萋新燕飞，芷汀南望雁书稀。
武陵洞里寻春客，已被桃花迷不归。

卷 570_65 【紫极宫斋后】

李群玉

紫府空歌碧落寒，晓星寥亮月光残。
一群白鹤高飞上，唯有松风吹石坛。

卷 570_66 【春晚】

李群玉

思乡之客空凝睇，天边欲尽未尽春。
独攀江树深不语，芳草落花愁杀人。

卷 570_67 【喜浑吉见访】

李群玉

公子春衫桂水香，远冲飞雪过书堂。
贫家冷落难消日，唯有松筠满院凉。

卷 570_68 【索曲送酒】

李群玉

帘外春风正落梅，须求狂药解愁回。
烦君玉指轻拢撚，慢拨鸳鸯送一杯。

卷 570_69 【山驿梅花】

李群玉

生在幽崖独无主，溪萝涧鸟为俦侣。
行人陌上不留情，愁香空谢深山雨。

卷 570_70 【重阳日上渚宫杨尚书】

李群玉

落帽台边菊半黄，行人惆怅对重阳。
荆州一见桓宣武，为趁悲秋入帝乡。

卷 570_71 【书院二小松】

李群玉

一双幽色出凡尘，数粒秋烟二尺鳞。
从此静窗闻细韵，琴声长伴读书人。

卷 570_72 【劝人庐山读书】

李群玉

怜君少隽利如锋，气爽神清刻骨聪。
片玉若磨唯转莹，莫辞云水入庐峰。

卷 570_73 【言怀】

李群玉

白鹤高飞不逐群，嵇康琴酒鲍昭文。
此身未有栖归处，天下人间一片云。

卷 570_74 【闻笛】

李群玉

冉冉生山草何异，截而吹之动天地。
望乡台上望乡时，不独落梅兼落泪。

卷 570_75 【晓宴】

李群玉

金波西倾银汉落，绿树含烟倚朱阁。
晓华胧眊闻调笙，一点残灯隔罗幕。

卷 570_76 【将游荆州投魏中丞】

李群玉

贫埋病压老巉岒，拂拭菱花不喜看。
又恐无人肯青眼，事须凭仗小还丹。

卷 570_77 【二辛夷】

李群玉

狂吟辞舞双白鹤，霜翎玉羽纷纷落。
空庭向晚春雨微，却敛寒香抱瑶萼。

卷 570_78 【题龙潭西斋】

李群玉

寂寞幽斋暝烟起，满径西风落松子。
远公一去兜率宫，唯有面前虎溪水。

卷 570_79 【中秋寄南海梁侍御】

李群玉

海静天高景气殊，鲸睛失彩蚌潜珠。
不知今夜越台上，望见瀛洲方丈无。

卷 570_80 【戏赠姬人】

李群玉

骰子巡抛裹手拈，无因得见玉纤纤。
但知谿道金钗落，图向人前露指尖。

卷 570_81 【大庾山岭别友人】

李群玉

笱簞无子鸳雏饥，毛彩凋摧不得归。
谁念火云千嶂里，低身犹傍鹧鸪飞。

卷 570_82 【石门戍】

李群玉

到此空思吴隐之，潮痕草蔓上幽碑。
人来皆望珠玑去，谁咏贪泉四句诗。

卷 570_83 【文殊院避暑】

李群玉

赤日黄埃满世间，松声入耳即心闲。
愿寻五百仙人去，一世清凉住雪山。

卷 570_84 【南庄春晚二首】

李群玉

连云草映一条陂，鸂鶒双双带水飞。
南村小路桃花落，细雨斜风独自归。

草暖沙长望去舟，微茫烟浪向巴丘。
沅江寂寂春归尽，水绿蘋香人自愁。

卷 570_85 【湘妃庙】

李群玉

少将风月怨平湖，见尽扶桑水到枯。
相约杏花坛上去，画栏红紫斗樗蒲。

第五百七十一卷

卷 571_1 【古意】

贾岛

碌碌复碌碌，百年双转毂。志士终夜心，良马白日足。
俱为不等闲，谁是知音目。眼中两行泪，曾吊三献玉。

卷 571_2 【望山】

贾岛

南山三十里，不见逾一句。冒雨时立望，望之如朋亲。
虬龙一掬波，洗荡千万春。日日雨不断，愁杀望山人。
天事不可长，劲风来如奔。阴霆一以扫，浩翠写国门。
长安百万家，家家张屏新。谁家最好山，我愿为其邻。

卷 571_3 【北岳庙】

贾岛

天地有五岳，恒岳居其北。岩峦叠万重，诡怪浩难测。

人來不敢入，祠宇白日黑。有時起霖雨，一洒天地德。
神兮安在哉，永康我王國。

卷 571_4 【朝飢】

賈島

市中有樵山，此舍朝無煙。井底有甘泉，釜中乃空然。
我要見白日，雪來塞青天。坐聞西床琴，凍折兩三弦。
飢莫詣他門，古人有拙言。

卷 571_5 【哭盧仝】

賈島

賢人無官死，不親者亦悲。空令古鬼哭，更得新鄰比。
平生四十年，惟著白布衣。天子未辟召，地府誰來追。
長安有交友，托孤遽棄移。冢側志石短，文字行參差。
無錢買松栽，自生蒿草枝。在日贈我文，汨流把讀時。
從茲加敬重，深藏恐失遺。

卷 571_6 【劍客】

賈島

十年磨一劍，霜刃未曾試。今日把似君，誰為不平事。

卷 571_7 【口号】

贾岛

中夜忽自起，汲此百尺泉。林木含白露，星斗在青天。

卷 571_8 【寄远】

贾岛

别肠多郁纡，岂能肥肌肤。始知相结密，不及相结疏。
疏别恨应少，密离恨难祛。门前南流水，中有北飞鱼。
鱼飞向北海，可以寄远书。不惜寄远书，故人今在无。
况此数尺身，阻彼万里途。自非日月光，难以知子躯。

卷 571_9 【斋中】

贾岛

耽静非谬为，本性实疏索。斋中一就枕，不觉白日落。
低扉碍轩轳，寡德谢接诺。丛菊在墙阴，秋穷未开萼。
所餐类病马，动影似移岳。欲驻迫逃衰，岂殊辞纆缚。
已见饱时雨，应丰蔬与药。

卷 571_10 【感秋】

贾岛

商气飒已来，岁华又虚掷。朝云藏奇峰，暮雨洒疏滴。
几蛩嘿凉叶，数蛩思阴壁。落日空馆中，归心远山碧。
昔人多秋感，今人何异昔。四序驰百年，玄发坐成白。
喧喧徇声利，扰扰同辙迹。傥无世上怀，去偃松下石。

卷 571_11 【玩月】

贾岛

寒月破东北，贾生立西南。西南立倚何，立倚青青杉。
近月有数星，星名未详谙。但爱杉倚月，我倚杉为三。
月乃不上杉，上杉难相参。眙愕子细视，睛瞳桂枝剡。
目常有热疾，久视无烦炎。以手扪衣裳，零露已濡沾。
久立双足冻，时向股髀淹。立久病足折，兀然羸胶粘。
他人应已睡，转喜此景恬。此景亦胡及，而我苦淫耽。
无异市井人，见金不知廉。不知此夜中，几人同无厌。
待得上顶看，未拟归枕函。强步望寝斋，步步情不堪。
步到竹丛西，东望如隔帘。却坐竹丛外，清思刮幽潜。
量知爱月人，身愿化为蟾。

卷 571_12 【辞二知己】

贾岛

一双千岁鹤，立别孤翔鸿。波岛忽已暮，海雨寒濛濛。
离人闻美弹，亦与哀弹同。况兹切切弄，绕彼行行躬。
云飞北岳碧，火息西山红。何以代远诚，折芳腊雪中。

卷 571_13 【义雀行和朱评事】

贾岛

玄鸟雄雌俱，春雷惊蛰余。口衔黄河泥，空即翔天隅。
一夕皆莫归，哢哢遗众雏。双雀抱仁义，哺食劳劬劬。
雏既迺迺飞，云间声相呼。燕雀虽微类，感愧诚不殊。
禽贤难自彰，幸得主人书。

卷 571_14 【宿悬泉驿】

贾岛

晓行沥水楼，暮到悬泉驿。林月值云遮，山灯照愁寂。

卷 571_15 【辩士】

贾岛

辩士多毁誉，不闻谈己非。猛虎恣杀暴，未尝啗妻儿。
此理天所感，所感当问谁。求食饲雏禽，吐出美言词。
善哉君子人，扬光掩瑕疵。

卷 571_16 【不欺】

贾岛

上不欺星辰，下不欺鬼神。知心两如此，然后何所陈。
食鱼味在鲜，食蓼味在辛。掘井须到流，结交须到头。
此语诚不谬，敌君三万秋。

卷 571_17 【绝句】

贾岛

海底有明月，圆于天上轮。得之一寸光，可买千里春。

卷 571_18 【寓兴】

贾岛

莫居暗室中，开目闭目同。莫趋碧霄路，容飞不容步。
暗室未可居，碧霄未可趋。劝君跨仙鹤，日下云为衢。

卷 571_19 【游仙】

贾岛

借得孤鹤骑，高近金乌飞。掬河洗老貌，照月生光辉。
天中鹤路直，天尽鹤一息。归来不骑鹤，身自有羽翼。
若人无仙骨，芝朮徒烦食。

卷 571_20 【枕上吟】

贾岛

夜长忆白日，枕上吟千诗。何当苦寒气，忽被东风吹。
冰开鱼龙别，天波殊路岐。

卷 571_21 【双鱼谣】

贾岛

天河堕双鲂，飞我庭中央。掌握尺余雪，劈开肠有璜。
见令馋舌短，烹绕邻舍香。一得古诗字，与玉含异藏。

卷 571_22 【易水怀古】

贾岛

荆卿重虚死，节烈书前史。我叹方寸心，谁论一时事。
至今易水桥，寒风兮萧萧。易水流得尽，荆卿名不消。

卷 571_23 【早起】

贾岛

北客入西京，北雁再离北。秋寝独前兴，天梭星落织。
耽玩余恬爽，顾盼轻痼力。旅途少颜尽，明镜劝仙食。
出门路纵横，张家路最直。昨夜梦见书，张家厅上壁。

卷 571_24 【客喜】

贾岛

客喜非实喜，客悲非实悲。百回信到家，未当身一归。
未归长嗟愁，嗟愁填中怀。开口吐愁声，还却入耳来。
常恐泪滴多，自损两目辉。鬓边虽有丝，不堪织寒衣。

卷 571_25 【延寿里精舍寓居】

贾岛

旅托避华馆，荒楼遂愚慵。短庭无繁植，珍果春亦浓。
侧庐废扃枢，纤魄时卧逢。耳目乃鄮井，肺肝即岩峰。
汲泉饮酌余，见我闲静容。霜蹊犹舒英，寒蝶断来踪。
双履与谁逐，一寻青瘦筇。

卷 571_26 【赠智朗禅师】

贾岛

上人分明见，玉兔潭底没。上人光惨貌，古来恨峭发。
涕辞孔颜庙，笑访禅寂室。步随青山影，坐学白塔骨。
解听无弄琴，不礼有身佛。欲问师何之，忽与我相别。

率赋赠远言，言惭非子曰。

卷 571_27 【送沈秀才下第东归】

贾岛

曲言恶者谁，悦耳如弹丝。直言好者谁，刺耳如长锥。
沈生才俊秀，心肠无邪欺。君子忌苟合，择交如求师。
毁出疾夫口，腾入礼部闈。下第子不耻，遗才人耻之。
东归家室远，掉轡时参差。浙云近吴见，汴柳接楚垂。
明年春光别，回首不复疑。

卷 571_28 【酬栖上人】

贾岛

夜久城馆闲，情幽出在山。新月有微辉，朗朗空庭间。
处世虽识机，伊余多掩关。松姿度腊见，篱药知春还。
静览冰雪词，厚为酬赠颜。东林有踟躅，脱屣期共攀。

卷 571_29 【冬月长安雨中见终南雪】

贾岛

秋节新已尽，雨疏露山雪。西峰稍觉明，残滴犹未绝。

气侵瀑布水，冻著白云穴。今朝灞浐雁，何夕潇湘月。
想彼石房人，对雪扉不闭。

卷 571_30 【寄孟协律】

贾岛

我有吊古泣，不泣向路岐。挥泪洒暮天，滴著桂树枝。
别后冬节至，离心北风吹。坐孤雪扉夕，泉落石桥时。
不惊猛虎啸，难辱君子词。欲酬空觉老，无以堪远持。
嵒峤倚角窗，王屋悬清思。

卷 571_31 【和刘涵】

贾岛

京官始云满，野人依旧闲。闭扉一亩居，中有古风还。
市井日已午，幽窗梦南山。乔木覆北斋，有鸟鸣其间。
前日远岳僧，来时与开关。新题惊我瘦，窥镜见丑颜。
陶情惜清澹，此意复谁攀。

卷 571_32 【明月山怀独孤崇鱼琢】

贾岛

明月长在目，明月长在心。在心复在目，何得稀去寻。

试望明月人，孟夏树蔽岑。想彼叹此怀，乐喧忘幽林。
乡本北岳外，悔恨东夷深。愿缩地脉还，岂待天恩临。
非不渴隐秀，却嫌他事侵。或云岳楼钟，来绕草堂吟。
当从令尹后，再往步柏林。

卷 571_33 【投张太祝】

贾岛

风骨高更老，向春初阳葩。泠泠月下韵，一一落海涯。
有子不敢和，一听千叹嗟。身卧东北泥，魂挂西南霞。
手把一枝栗，往轻觉程赊。水天朔方色，暖日嵩根花。
达闲幽栖山，遣寻种药家。欲买双琼瑶，惭无一木瓜。

卷 571_34 【咏韩氏二子】

贾岛

千岩一尺璧，八月十五夕。清露堕桂花，白鸟舞虚碧。

卷 571_35 【送别】

贾岛

丈夫未得意，行行且低眉。素琴弹复弹，会有知音知。

卷 571_36 【携新文诣张籍韩愈途中成】

贾岛

袖有新成诗，欲见张韩老。青竹未生翼，一步万里道。
仰望青冥天，云雪压我脑。失却终南山，惆怅满怀抱。
安得西北风，身愿变蓬草。地只闻此语，突出惊我倒。

卷 571_37 【上谷送客游江湖】

贾岛

莫叹迢递分，何殊咫尺别。江楼到夜登，还见南台月。

卷 571_38 【重酬姚少府】

贾岛

隙月斜枕旁，讽咏夏贻什。如今何时节，虫虺亦已蛰。
答迟礼涉傲，抱疾思加涩。仆本胡为者，衔肩贡客集。
茫然九州内，譬如一锥立。欺暗少此怀，自明曾沥泣。
量无越勇士，诚欲戈矛戢。原阁期跻攀，潭舫偶俱入。
深斋竹木合，毕夕风雨急。俸利沐均分，价称烦嘘噓。
百篇见删罢，一命嗟未及。沧浪愚将还，知音激所习。

卷 571_39 【投孟郊】

贾岛

月中有孤芳，天下聆薰风。江南有高唱，海北初来通。
容飘清冷余，自蕴襟抱中。止息乃流溢，推寻却冥濛。
我知雪山子，谒彼偈句空。必竟获所实，尔焉遂深衷。
录之孤灯前，犹恨百首终。一吟动狂机，万疾辞顽躬。
生平面未交，永夕梦辄同。叙诘谁君师，讷言无吾宗。
余求履其迹，君曰可但攻。啜波肠易饱，揖险神难从。
前岁曾入洛，差池阻从龙。萍家复从赵，云思长萦萦。
嵩海每可诣，长途追再穷。原倾肺肠事，尽入焦梧桐。

卷 571_40 【代边将】

贾岛

持戈簇边日，战罢浮云收。露草泣寒霁，夜泉鸣陇头。
三尺握中铁，气冲星斗牛。报国不拘贵，愤将平虏雠。

卷 571_41 【寄刘栖楚】

贾岛

趋走与偃卧，去就自殊分。当窗一重树，上有万里云。

离披不相顾，仿佛类人群。友生去更远，来书绝如焚。
蝉吟我为听，我歌蝉岂闻。岁暮傥旋归，晤言桂氛氲。

卷 571_42 【寄丘儒】

贾岛

地近轻数见，地远重一面。一面如何重，重甚珍宝片。
自经失欢笑，几度腾霜霰。此心镇悬悬，天象固回转。
长安秋风高，子在东甸县。仪形信寂蔑，风雨岂乖间。
凭人报消息，何易凭笔砚。俱不尽我心，终须对君宴。

卷 571_43 【送陈商】

贾岛

古道长荆棘，新岐路交横。君于荒榛中，寻得古辙行。
足踏圣人路，貌端禅士形。我曾接夜谈，似听讲一经。
联翩曾数举，昨登高第名。釜底绝烟火，晓行皇帝京。
上客远府游，主人须目明。青云别青山，何日复可升。

卷 571_44 【送张校书季霞】

贾岛

从京去容州，马在船上多。容州几千里，直傍青天涯。

掌记试校书，未称高词华。义往不可屈，出家如入家。
城市七月初，热与夏未差。饯君到野地，秋凉满山坡。
南境异北候，风起无尘沙。秦吟宿楚泽，海酒落桂花。
暂醉即还醒，彼土生桂茶。

卷 571_45 【寄友人】

贾岛

同人半年别，一别寂来音。赖有别时文，相思时一吟。
我常倦投迹，君亦知此衿。笔砚且勿弃，苏张曾陆沉。
但存舌在口，当冀身遂心。君看明月夜，松桂寒森森。

卷 571_46 【答王参】

贾岛

寸晷不相待，四时互如竞。客思先觉秋，虫声苦知暝。
霜松积旧翠，露月团如镜。诗负属景同，琴孤坐堂听。
相期黄菊节，别约红桃径。每把式微篇，临风一长咏。

卷 571_47 【延康吟】

贾岛

寄居延寿里，为与延康邻。不爱延康里，爱此里中人。

人非十年故，人非九族亲。人有不朽语，得之烟山春。

卷 571_48 【戏赠友人】

贾岛

一日不作诗，心源如废井。笔砚为辘轳，吟咏作縻细。
朝来重汲引，依旧得清冷。书赠同怀人，词中多苦辛。

卷 571_49 【寓兴】

贾岛

真集道方至，貌殊妒还多。山泉入城池，自然生浑波。
今时出古言，在众翻为讹。有琴含正韵，知音者如何。
一生足感激，世言忽嵯峨。不得市井味，思响吾岩阿。
浮华岂我事，日月徒蹉跎。旷哉颍阳风，千载无其他。

卷 571_50 【怀郑从志】

贾岛

西风吹阴云，雨雪半夜收。忽忆天涯人，起看斗与牛。
故人别二年，我意如百秋。音信两杳杳，谁云昔绸缪。

平明一封书，寄向东北舟。翩翩春归鸟，会自为匹俦。

卷 571_51 【易州登龙兴寺楼望郡北高峰】

贾岛

郡北最高峰，巉岩绝云路。朝来上楼望，稍觉得幽趣。
朦胧碧烟里，群岭若相附。何时一登陟，万物皆下顾。

卷 571_52 【送郑山人游江湖】

贾岛

南游衡岳上，东往天台里。足蹑华顶峰，目观沧海水。

卷 571_53 【就峰公宿】

贾岛

河出鸟宿后，萤火白露中。上人坐不倚，共我论量空。
残月华旖旎，远水响玲珑。尔时无了梦，兹宵方未穷。

卷 571_54 【刘景阳东斋】

贾岛

松阴连竹影，中有芰苔井。清风此地多，白日空自永。
景阳公干孙，诗句得真景。劝我不须归，月出东斋静。

卷 571_55 【对菊】

贾岛

九日不出门，十日见黄菊。灼灼尚繁英，美人无消息。

卷 571_56 【送集文上人游方】

贾岛

来从道陵井，双木溪边会。分首芳草时，远意青天外。
此游诣几岳，嵩华衡恒泰。

卷 571_57 【题岸上人郡内闲居】

贾岛

静向方寸求，不居山嶂幽。池开菡萏香，门闭莓苔秋。

金玉重四句，秕糠轻九流。炉烟上乔木，钟磬下危楼。
手种一株松，贞心与师俦。

卷 571_58 【游子】

贾岛

游子喜乡远，非吾忆归庐。谁知奔他山，自欲早旋车。
朝赏暮已足，图归愿无余。当期附鹏翼，未偶方踟蹰。

卷 571_59 【寄山中王参】

贾岛

我看岳西云，君看岳北月。长怀燕城南，相送十里别。
别来千余日，日日忆不歇。远寄一纸书，数字论白发。

卷 571_60 【送汲鹏】

贾岛

淮南卧理后，复逢君姓汲。文采非寻常，志愿期卓立。
深江东泛舟，夕阳眺原隰。夏夜言诗会，往往追不及。

· 全唐诗 ·

卷 571_61 【寄令狐相公】

贾岛

策杖驰山驿，逢人问梓州。长江那可到，行客替生愁。

第五百七十二卷

卷 572_1 【哭柏岩和尚】

贾岛

苔覆石床新，师曾占几春。写留行道影，焚却坐禅身。
塔院关松雪，经房锁隙尘。自嫌双泪下，不是解空人。

卷 572_2 【山中道士】

贾岛

头发梳千下，休粮带瘦容。养雏成大鹤，种子作高松。
白石通宵煮，寒泉尽日舂。不曾离隐处，那得世人逢。

卷 572_3 【就可公宿】

贾岛

十里寻幽寺，寒流数派分。僧同雪夜坐，雁向草堂闻。

静语终灯焰，余生许峤云。由来多抱疾，声不达明君。

卷 572_4 【旅游】

贾岛

此心非一事，书札若为传。旧国别多日，故人无少年。
空巢霜叶落，疏牖水萤穿。留得林僧宿，中宵坐默然。

卷 572_5 【送邹明府游灵武】

贾岛

曾宰西畿县，三年马不肥。债多平剑与，官满载书归。
边雪藏行径，林风透卧衣。灵州听晓角，客馆未开扉。

卷 572_6 【题皇甫荀蓝田厅】

贾岛

任官经一年，县与玉峰连。竹笼拾山果，瓦瓶担石泉。
客归秋雨后，印锁暮钟前。久别丹阳浦，时时梦钓船。

卷 572_7 【赠王将军】

贾岛

宿卫炉烟近，除书墨未干。马曾金镞中，身有宝刀瘢。
父子同时捷，君王画阵看。何当为外帅，白日出长安。

卷 572_8 【下第】

贾岛

下第只空囊，如何住帝乡。杏园啼百舌，谁醉在花傍。
泪落故山远，病来春草长。知音逢岂易，孤棹负三湘。

卷 572_9 【寄贺兰朋吉】

贾岛

往往东林下，花香似火焚。故园从小别，夜雨近秋闻。
野菜连寒水，枯株簇古坟。泛舟同远客，寻寺入幽云。
斜日扉多掩，荒田径细分。相思蝉几处，偶坐蝶成群。
会宿曾论道，登高省议文。苦吟遥可想，边叶向纷纷。

卷 572_10 【忆吴处士】

贾岛

半夜长安雨，灯前越客吟。孤舟行一月，万水与千岑。
岛屿夏云起，汀洲芳草深。何当折松叶，拂石剡溪阴。

卷 572_11 【哭孟郊】

贾岛

身死声名在，多应万古传。寡妻无子息，破宅带林泉。
冢近登山道，诗随过海船。故人相吊后，斜日下寒天。

卷 572_12 【送崔定】

贾岛

未知游子意，何不避炎蒸。几日到汉水，新蝉鸣杜陵。
秋江待得月，夜语恨无僧。巴峡吟过否，连天十二层。

卷 572_13 【寄白阁默公】

贾岛

已知归白阁，山远晚晴看。石室人心静，冰潭月影残。
微云分片灭，古木落薪干。后夜谁闻磬，西峰绝顶寒。

卷 572_14 【雨后宿刘司马池上】

贾岛

蓝溪秋漱玉，此地涨清澄。芦苇声兼雨，芰荷香绕灯。
岸头秦古道，亭面汉荒陵。静想泉根本，幽崖落几层。

卷 572_15 【送朱可久归越中】

贾岛

石头城下泊，北固暝钟初。汀鹭潮冲起，船窗月过虚。
吴山侵越众，隋柳入唐疏。日欲躬调膳，辟来何府书。

卷 572_16 【送田卓入华山】

贾岛

幽深足暮蝉，惊觉石床眠。瀑布五千仞，草堂瀑布边。
坛松涓滴露，岳月泐寥天。鹤过君须看，上头应有仙。

卷 572_17 【送董正字常州覲省】

贾岛

相逐一行鸿，何时出碛中。江流翻白浪，木叶落青枫。
轻楫浮吴国，繁霜下楚空。春来欢侍阻，正字在东宫。

卷 572_18 【酬姚少府】

贾岛

梅树与山木，俱应摇落初。柴门掩寒雨，虫响出秋蔬。
枯槁彰清镜，孱愚友道书。刊文非不朽，君子自相于。

卷 572_19 【送无可上人】

贾岛

圭峰霁色新，送此草堂人。麈尾同离寺，蛩鸣暂别亲。
独行潭底影，数息树边身。终有烟霞约，天台作近邻。

卷 572_20 【送李骑曹】

贾岛

归骑双旌远，欢生此别中。萧关分碛路，嘶马背寒鸿。
朔色晴天北，河源落日东。贺兰山顶草，时动卷帆风。

卷 572_21 【送乌行中石淙别业】

贾岛

寒水长绳汲，丁泠数滴翻。草通石淙脉，砚带海潮痕。
岳色何曾远，蝉声尚未繁。劳思当此夕，苗稼在西原。

卷 572_22 【送觉兴上人归中条山兼谒河中李司空】

贾岛

又忆西岩寺，秦原草白时。山寻樵径上，人到雪房迟。
暮磬潭泉冻，荒林野烧移。闻师新译偈，说拟对旌麾。

卷 572_23 【寄无可上人】

贾岛

僻寺多高树，凉天忆重游。磬过沟水尽，月入草堂秋。
穴蚁苔痕静，藏蝉柏叶稠。名山思遍往，早晚到嵩丘。

卷 572_24 【南池】

贾岛

萧条微雨绝，荒岸抱清源。入舫山侵塞，分泉稻接村。
秋声依树色，月影在蒲根。淹泊方难遂，他宵关梦魂。

卷 572_25 【寄龙池寺贞空二上人】

贾岛

受请终南住，俱妨去石桥。林中秋信绝，峰顶夜禅遥。
寒草烟藏虎，高松月照雕。霜天期到寺，寺置即前朝。

卷 572_26 【送贞空二上人】

贾岛

林下中餐后，天涯欲去时。衡阳过有伴，梦泽出应迟。
石磬疏寒韵，铜瓶结夜澌。殷勤讶此别，且未定归期。

卷 572_27 【送裴校书】

贾岛

拜官从秘省，署职在藩维。多故长疏索，高秋远别离。
天寒泗上醉，夜静岳阳棋。使府临南海，帆飞到不迟。

卷 572_28 【升道精舍南台对月寄姚合】

贾岛

月向南台见，秋霖洗涤余。出逢危叶落，静看众峰疏。
冷露常时有，禅窗此夜虚。相思聊怅望，润气遍衣初。

卷 572_29 【即事】

贾岛

索莫对孤灯，阴云积几层。自嗟怜十上，谁肯待三征。
心被通人见，文叨大匠称。悲秋秦塞草，怀古汉家陵。
城静高崖树，漏多幽沼冰。过声沙岛鹭，绝行石庵僧。
岂谓旧庐在，谁言归未曾。

卷 572_30 【黄子陂上韩吏部】

贾岛

石楼云一别，二十二三春。相逐升堂者，几为埋骨人。
涕流闻度瘴，病起喜还秦。曾是令勤道，非惟恤在屯。
疏衣蕉缕细，爽味茗芽新。钟绝滴残雨，萤多无近邻。
溪潭承到数，位秩见辞频。若个山招隐，机忘任此身。

卷 572_31 【投李益】

贾岛

四十归燕字，千年外始吟。已将书北岳，不用比南金。

卷 572_32 【吊孟协律】

贾岛

才行古人齐，生前品位低。葬时贫卖马，远日哭惟妻。
孤冢北邙外，空斋中岳西。集诗应万首，物象遍曾题。

卷 572_33 【送人适越】

贾岛

高城满夕阳，何事欲沾裳。迁客蓬蒿暮，游人道路长。
晴湖胜镜碧，寒柳似金黄。若有相思梦，殷勤载八行。

卷 572_34 【送僧游衡岳】

贾岛

心知衡岳路，不怕去人稀。船里犹鸣磬，溪头自曝衣。

有家从小别，无寺不言归。料得逢寒住，当禅雪满扉。

卷 572_35 【送路】

贾岛

别我就蓬蒿，日斜飞伯劳。龙门流水急，嵩岳片云高。
叹命无知己，梳头落白毛。从军当此去，风起广陵涛。

卷 572_36 【洛阳道中寄弟】

贾岛

趋走迫流年，惭经此路偏。密云埋二室，积雪度三川。
生类梗萍泛，悲无金石坚。翻鸿有归翼，极目仰联翩。

卷 572_37 【登江亭晚望】

贾岛

浩渺浸云根，烟岚没远村。鸟归沙有迹，帆过浪无痕。
望水知柔性，看山欲倦魂。纵情犹未已，回马欲黄昏。

卷 572_38 【送耿处士】

贾岛

一瓶离别酒，未尽即言行。万水千山路，孤舟几月程。
川原秋色静，芦苇晚风鸣。迢递不归客，人传虚隐名。

卷 572_39 【过唐校书书斋】

贾岛

池满风吹竹，时时得爽神。声齐雏鸟语，画卷老僧真。
月出行几步，花开到四邻。江湖心自切，未可挂头巾。

卷 572_40 【送杜秀才东游】

贾岛

东游谁见待，尽室寄长安。别后叶频落，去程山已寒。
大河风色度，旷野烧烟残。匣有青铜镜，时将照鬓看。

卷 572_41 【送天台僧】

贾岛

远梦归华顶，扁舟背岳阳。寒蔬修净食，夜浪动禅床。
雁过孤峰晓，猿啼一树霜。身心无别念，余习在诗章。

卷 572_42 【怀紫阁隐者】

贾岛

寂寥思隐者，孤烛坐秋霖。梨栗猿喜熟，云山僧说深。
寄书应不到，结伴拟同寻。废寝方终夕，迢迢紫阁心。

卷 572_43 【雨夜同厉玄怀皇甫荀】

贾岛

桐竹绕庭匝，雨多风更吹。还如旧山夜，卧听瀑泉时。
磧雁来期近，秋钟到梦迟。沟西吟苦客，中夕话兼思。

卷 572_44 【秋暮】

贾岛

北门杨柳叶，不觉已缤纷。值鹤因临水，迎僧忽背云。
白须相并出，清泪两行分。默默空朝夕，苦吟谁喜闻。

卷 572_45 【哭胡遇】

贾岛

夭寿知齐理，何曾免叹嗟。祭回收朔雪，吊后折寒花。
野水秋吟断，空山暮影斜。弟兄相识遍，犹得到君家。

卷 572_46 【送丹师归闽中】

贾岛

波涛路杳然，衰柳落阳蝉。行李经雷电，禅前漱岛泉。
归林久别寺，过越未离船。自说从今去，身应老海边。

卷 572_47 【送安南惟鉴法师】

贾岛

讲经春殿里，花绕御床飞。南海几回渡，旧山临老归。
潮摇蛮草落，月湿岛松微。空水既如彼，往来消息稀。

卷 572_48 【题李凝幽居】

贾岛

闲居少邻并，草径入荒园。鸟宿池边树，僧敲月下门。
过桥分野色，移石动云根。暂去还来此，幽期不负言。

卷 572_49 【送韩湘】

贾岛

挂席从古路，长风起广津。楚城花未发，上苑蝶来新。
半没湖波月，初生岛草春。孤霞临石镜，极浦映村神。
细响吟干苇，余馨动远蘋。欲凭将一札，寄与沃洲人。

卷 572_50 【寄董武】

贾岛

虽同一城里，少省得从容。门掩园林僻，日高巾帻慵。
孤鸿来半夜，积雪在诸峰。正忆毗陵客，声声隔水钟。

卷 572_51 【宿赞上人房】

贾岛

阶前多是竹，闲地拟栽松。朱点草书疏，雪平麻履踪。
御沟寒夜雨，宫寺静时钟。此时无他事，来寻不厌重。

卷 572_52 【访李甘原居】

贾岛

原西居处静，门对曲江开。石缝衔枯草，查根上净苔。
翠微泉夜落，紫阁鸟时来。仍忆寻淇岸，同行采蕨回。

卷 572_53 【题山寺井】

贾岛

沈沈百尺余，功就岂斯须。汲早僧出定，凿新虫自无。
藏源重嶂底，澄翳大空隅。此地如经劫，凉潭会共枯。

卷 572_54 【僻居无可上人相访】

贾岛

自从居此地，少有事相关。积雨荒邻圃，秋池照远山。
砚中枯叶落，枕上断云闲。野客将禅子，依依偏往还。

卷 572_55 【送李余及第归蜀】

贾岛

知音伸久屈，覲省去光辉。津渡逢清夜，途程尽翠微。
云当绵竹叠，鸟离锦江飞。肯寄书来否，原居出亦稀。

卷 572_56 【荒斋】

贾岛

草合径微微，终南对掩扉。晚凉疏雨绝，初晓远山稀。
落叶无青地，闲身著白衣。朴愚犹本性，不是学忘机。

卷 572_57 【夜喜贺兰三见访】

贾岛

漏钟仍夜浅，时节欲秋分。泉聒栖松鹤，风除翳月云。
踏苔行引兴，枕石卧论文。即此寻常静，来多只是君。

卷 572_58 【题青龙寺镜公房】

贾岛

一夕曾留宿，终南摇落时。孤灯冈舍掩，残磬雪风吹。
树老因寒折，泉深出井迟。疏慵岂有事，多失上方期。

卷 572_59 【送陈判官赴绥德】

贾岛

将军邀入幕，束带便离家。身暖蕉衣窄，天寒磧日斜。
火烧冈断苇，风卷雪平沙。丝竹丰州有，春来只欠花。

卷 572_60 【送唐环归敷水庄】

贾岛

毛女峰当户，日高头未梳。地侵山影扫，叶带露痕书。
松径僧寻药，沙泉鹤见鱼。一川风景好，恨不有吾庐。

卷 572_61 【原东居喜唐温琪频至】

贾岛

曲江春草生，紫阁雪分明。汲井尝泉味，听钟问寺名。
墨研秋日雨，茶试老僧铛。地近劳频访，乌纱出送迎。

卷 572_62 【送馡法师】

贾岛

度岁不相见，严冬始出关。孤烟寒色树，高雪夕阳山。
瀑布寺应到，牡丹房甚闲。南朝遗迹在，此去几时还。

卷 572_63 【寄钱庶子】

贾岛

曲江春水满，北岸掩柴关。只有僧邻舍，全无物映山。
树阴终日扫，药债隔年还。犹记听琴夜，寒灯竹屋间。

卷 572_64 【原上秋居】

贾岛

关西又落木，心事复如何。岁月辞山久，秋霖入夜多。
鸟从井口出，人自洛阳过。倚仗聊闲望，田家未剪禾。

卷 572_65 【夏夜】

贾岛

原寺偏邻近，开门物景澄。磬通多叶罽，月离片云棱。
寄宿山中鸟，相寻海畔僧。唯愁秋色至，乍可在炎蒸。

卷 572_66 【冬夜】

贾岛

羁旅复经冬，瓢空盎亦空。泪流寒枕上，迹绝旧山中。
凌结浮萍水，雪和衰柳风。曙光鸡未报，嘹唳两三鸿。

卷 572_67 【送厉宗上人】

贾岛

拥策背岷峨，终南雨雪和。漱泉秋鹤至，禅树夜猿过。
高顶白云尽，前山黄叶多。曾吟庐岳上，月动九江波。

卷 572_68 【寄李存穆】

贾岛

闻道船中病，似忧亲弟兄。信来从水路，身去到柴城。
久别长须鬓，相思书姓名。忽然消息绝，频梦却还京。

卷 572_69 【赠无怀禅师】

贾岛

身从劫劫修，果以此生周。禅定石床暖，月移山树秋。
捧盂观宿饭，敲磬过清流。不掩玄关路，教人问白头。

卷 572_70 【寄武功姚主簿】

贾岛

居枕江沱北，情悬渭曲西。数宵曾梦见，几处得书披。
驿路穿荒坂，公田带淤泥。静棋功奥妙，闲作韵清凄。
锄草留丛药，寻山上石梯。客回河水涨，风起夕阳低。
空地苔连井，孤村火隔溪。卷帘黄叶落，锁印子规啼。
陇色澄秋月，边声入战鼙。会须过县去，况是屡招携。

卷 572_71 【题刘华书斋】

贾岛

白石床无尘，青松树有鳞。一莺啼带雨，两树合从春。
荒榭苔胶砌，幽丛果堕榛。偶来疏或数，当暑夕胜晨。
露滴星河水，巢重草木薪。终南同往意，赵北独游身。
渡叶司天漏，惊蛰远地人。机清公干族，也莫卧漳滨。

卷 572_72 【送卢秀才游潞府】

贾岛

雨余滋润在，风不起尘沙。边日寡文思，送君吟月华。
过山干相府，临水宿僧家。能赋焉长屈，芳春宴杏花。

卷 572_73 【送南康姚明府】

贾岛

铜章美少年，小邑在南天。版籍多迁客，封疆接洞田。
静江鸣野鼓，发缆带村烟。却笑陶元亮，何须忆醉眠。

卷 572_74 【送友人弃官游江左】

贾岛

羡君休作尉，万事且全身。寰海多虞日，江湖独往人。
姓名何处变，鸥鸟几时亲。别后吴中使，应须访子真。

卷 572_75 【雨中怀友人】

贾岛

对雨思君子，尝茶近竹幽。儒家邻古寺，不到又逢秋。

卷 572_76 【寄远】

贾岛

家住锦水上，身征辽海边。十书九不到，一到忽经年。

卷 572_77 【南斋】

贾岛

独自南斋卧，神闲景亦空。有山来枕上，无事到心中。

帘卷侵床月，屏遮入座风。望春春未至，应在海门东。

卷 572_78 【早春题友人湖上新居二首】

贾岛

近得云中路，门长侵早开。到时犹有雪，行处已无苔。
劝酒客初醉，留茶僧未来。每逢晴暖日，惟见乞花栽。

门不当官道，行人到亦稀。故从餐后出，多是夜深归。
开篋收诗卷，扫床移卧衣。几时同买宅，相送有柴扉。

卷 572_79 【送雍陶入蜀】

贾岛

江山事若谖，那肯滞云南。草色分危磴，杉阴近古潭。
日斜褒谷鸟，夏浅嵩州蚕。吾自疑双鬓，相逢更不堪。

卷 572_80 【张郎中过原东居】

贾岛

年长惟添懒，经旬止掩关。高人餐药后，下马此林间。

对坐天将暮，同来客亦闲。几时能重至，水味似深山。

卷 572_81 【答王建秘书】

贾岛

人皆闻蟋蟀，我独恨蹉跎。白发无心镊，青山去意多。
信来漳浦岸，期负洞庭波。时扫高槐影，朝回或恐过。

卷 572_82 【送李余往湖南】

贾岛

昔去候温凉，秋山满楚乡。今来从辟命，春物遍沔阳。
岳石挂海雪，野枫堆渚樯。若寻吾祖宅，寂寞在潇湘。

卷 572_83 【偶作】

贾岛

野步随吾意，那知是与非。稔年时雨足，闰月暮蝉稀。
独树依冈老，遥峰出草微。园林自有主，宿鸟且同归。

卷 572_84 【过雍秀才居】

贾岛

夏木鸟巢边，终南岭色鲜。就凉安坐石，煮茗汲邻泉。
钟远清霄半，蛩稀暑雨前。幽斋如葺罢，约我一来眠。

卷 572_85 【寄顾非熊】

贾岛

知君归有处，山水亦难齐。犹去潇湘远，不闻猿狖啼。
穴通茆岭下，潮满石头西。独立生遥思，秋原日渐低。

卷 572_86 【送神邈法师】

贾岛

柳絮落濛濛，西州道路中。相逢春忽尽，独去讲初终。
行疾遥山雨，眠迟后夜风。绕房三两树，回日叶应红。

卷 572_87 【送慈恩寺霄韵法师谒太原李司空】

贾岛

何故谒司空，云山知几重。磻遥来雁尽，雪急去僧逢。
清磬先寒角，禅灯彻晓烽。旧房闲片石，倚著最高松。

卷 572_88 【送知兴上人】

贾岛

久住巴兴寺，如今始拂衣。欲临秋水别，不向故园归。
锡挂天涯树，房开岳顶扉。下看千里晓，霜海日生微。

卷 572_89 【送惠雅法师归玉泉】

贾岛

只到潇湘水，洞庭湖未游。饮泉看月别，下峡听猿愁。
讲不停雷雨，吟当近海流。降霜归楚夕，星冷玉泉秋。

卷 572_90 【忆江上吴处士】

贾岛

闽国扬帆去，蟾蜍亏复团。秋风生渭水，落叶满长安。
此地聚会夕，当时雷雨寒。兰桡殊未返，消息海云端。

卷 572_91 【题张博士新居】

贾岛

青枫何不种，林在洞庭村。应为三湘远，难移万里根。
斗牛初过伏，菡萏欲香门。旧即湖山隐，新庐葺此原。

卷 572_92 【石门陂留辞从叔谟】

贾岛

幽鸟飞不远，此行千里间。寒冲陂水雾，醉下菊花山。
有耻长为客，无成又入关。何时临涧柳，吾党共来攀。

卷 572_93 【送朱兵曹回越】

贾岛

星彩练中见，澄江岂有泥。潮生垂钓罢，楚尽去檣西。
磧鸟辞沙至，山鼯隔水啼。会稽半侵海，涛白禹祠溪。

卷 572_94 【怀博陵故人】

贾岛

孤城易水头，不忘旧交游。雪压围棋石，风吹饮酒楼。
路遥千万里，人别十三秋。吟苦相思处，天寒水急流。

卷 572_95 【夕思】

贾岛

秋宵已难曙，漏向二更分。我忆山水坐，虫当寂寞闻。
洞庭风落木，天姥月离云。会自东浮去，将何欲致君。

卷 572_96 【寄河中杨少尹】

贾岛

非惟咎曩时，投刺诣门迟。怅望三秋后，参差万里期。
禹留疏凿迹，舜在寂寥祠。此到杳难共，回风逐所思。

卷 572_97 【孟融逸人】

贾岛

孟君临水居，不食水中鱼。衣褐唯粗帛，筐箱只素书。
树林幽鸟恋，世界此心疏。拟棹孤舟去，何峰又结庐。

卷 572_98 【晚晴见终南诸峰】

贾岛

秦分积多峰，连巴势不穷。半旬藏雨里，此日到窗中。
圆魄将升兔，高空欲叫鸿。故山思不见，碣石沅东。

卷 572_99 【宿池上】

贾岛

泉来从绝壑，亭敞在中流。竹密无空岸，松长可绊舟。
蟪蛄潭上夜，河汉岛前秋。异夕期深涨，携琴却此游。

卷 572_100 【喜姚郎中自杭州回】

贾岛

路多枫树林，累日泊清阴。来去泛流水，翛然适此心。
一披江上作，三起月中吟。东省期司谏，云门悔不寻。

卷 572_101 【送郑长史之岭南】

贾岛

云林颇重叠，岑渚复幽奇。汨水斜阳岸，骚人正则祠。
苍梧多蟋蟀，白露湿江蓠。擢第荣南去，晨昏近九疑。

卷 572_102 【送李溟谒宥州李权使君】

贾岛

英雄典宥州，迢递苦吟游。风宿骊山下，月斜灞水流。
去时初落叶，回日定非秋。太守携才子，看鹏百尺楼。

卷 572_103 【永福湖和杨郑州】

贾岛

积水还平岸，春来引郑溪。旧渠通郭下，新堰绝湖西。
嵩少分明对，潇湘阔狭齐。客游随庶子，孤屿草萋萋。

卷 572_104 【题长江】

贾岛

言心俱好静，廨署落晖空。归吏封宵钥，行蛇入古桐。
长江频雨后，明月众星中。若任迁人去，西溪与剡通。

卷 572_105 【泥阳馆】

贾岛

客愁何并起，暮送故人回。废馆秋萤出，空城寒雨来。
夕阳飘白露，树影扫青苔。独坐离容惨，孤灯照不开。

卷 572_106 【送徐员外赴河中】

贾岛

原野正萧瑟，中间分散情。吏从甘扈罢，诏许朔方行。
边日沉残角，河关截夜城。云居闲独往，长老出房迎。

卷 572_107 【送贺兰上人】

贾岛

野僧来别我，略坐傍泉沙。远道擎空钵，深山蹋落花。
无师禅自解，有格句堪夸。此去非缘事，孤云不定家。

第五百七十三卷

卷 573_1 【送令狐绹相公】

贾岛

梁园趋戟节，海草几枯春。风水难遭便，差池未振鳞。
姓名犹语及，门馆阻何因。苦拟修文卷，重擎献匠人。
吟看青岛处，朝退赤墀晨。根爱杉栽活，枝怜雪霰新。
缀篇嗟调逸，不和揣才贫。早晚还霖雨，滂沱洗月轮。
握苗方灭裂，成器待陶钧。困坂思回顾，迷邦辄问津。
数行望外札，绝句握中珍。是日荣游汴，当时怯往陈。
鸿春乖汉爵，桢病卧漳滨。岳整五千仞，云惟一片身。
故山离未死，秋水宿经旬。下第能无恋，高科恐有神。
罢耕田料废，省钓岸应榛。慷慨知音在，谁能泪堕巾。

卷 573_2 【寄沧州李尚书】

贾岛

沧溟深绝阔，西岸郭东门。戈者罗夷鸟，桴人思峤猿。
威棱高腊冽，煦育极春温。陂淀封疆内，蒹葭壁垒根。

摇鞞边地脉，愁箭虎狼魂。水县卖纱市，盐田煮海村。
枝条分御叶，家世食唐恩。武可纵横讲，功从战伐论。
天涯生月片，屿顶涌泉源。非是泥池物，方因雷雨尊。
沉谋藏未露，邻境帖无喧。青冢骄回鹘，萧关陷叶蕃。
何时霖岁旱，早晚雪邦冤。迢递瞻旌纛，浮阳寄咏言。

卷 573_3 【逢旧识】

贾岛

几岁阻干戈，今朝劝酒歌。羡君无白发，走马过黄河。
旧宅兵烧尽，新宫日奏多。妖星还有角，数尺铁重磨。

卷 573_4 【崇圣寺斌公房】

贾岛

近来惟一食，树下掩禅扉。落日寒山磬，多年坏衲衣。
白须长更剃，青霭远还归。仍说游南岳，经行是息机。

卷 573_5 【送李傅侍郎剑南行营】

贾岛

走马从边事，新恩受外台。勇看双节出，期破八蛮回。

许国家无恋，盘江栈不摧。移军刁斗逐，报捷剑门开。
角咽猕猴叫，鼙干霹雳来。去年新甸邑，犹滞佐时才。

卷 573_6 【别徐明府】

贾岛

抱琴非本意，生事偶相萦。口尚袁安节，身无子贱名。
地寒春雪盛，山浅夕风轻。百战余荒野，千夫渐耦耕。
一杯宜独夜，孤客恋交情。明日疲骖去，萧条过古城。

卷 573_7 【岐下送友人归襄阳】

贾岛

蹉跎随泛梗，羁旅到西州。举翮笼中鸟，知心海上鸥。
山光分首暮，草色向家秋。若更登高岘，看碑定泪流。

卷 573_8 【送友人游蜀】

贾岛

万岑深积翠，路向此中难。欲暮多羁思，因高莫远看。
卓家人寂寞，扬子业凋残。唯有岷江水，悠悠带月寒。

卷 573_9 【送郑少府】

贾岛

江岸一相见，空令惜此分。夕阳行带月，酌水少留君。
野地初烧草，荒山过雪云。明年还调集，蝉可在家闻。

卷 573_10 【子规】

贾岛

游魂自相叫，宁复记前身。飞过邻家月，声连野路春。
梦边催晓急，愁处送风频。自有沾花血，相和雨滴新。

卷 573_11 【送僧归天台】

贾岛

辞秦经越过，归寺海西峰。石涧双流水，山门九里松。
曾闻清禁漏，却听赤城钟。妙宇研磨讲，应齐智者踪。

卷 573_12 【让纠曹上乐使君】

贾岛

战战复兢兢，犹如履薄冰。虽然叨一掾，还似说三乘。
瓶汲南溪水，书来北岳僧。戇愚兼抱疾，权纪不相应。

卷 573_13 【赠友人】

贾岛

五字诗成卷，清新韵具偕。不同狂客醉，自伴律僧斋。
春别和花树，秋辞带月淮。却归登第日，名近榜头排。

卷 573_14 【送雍陶及第归成都宁亲】

贾岛

不唯诗著籍，兼又赋知名。议论于题称，春秋对问精。
半应阴鹭与，全赖有司平。归去峰峦众，别来松桂生。
涨江流水品，当道白云坑。勿以攻文捷，而将学剑轻。
制衣新濯锦，开酝旧烧罍。同日升科士，谁同膝下荣。

卷 573_15 【谢令狐绹相公赐衣九事】

贾岛

长江飞鸟外，主簿跨驴归。逐客寒前夜，元戎予厚衣。
雪来松更绿，霜降月弥辉。即日调殷鼎，朝分是与非。

卷 573_16 【送金州鉴周上人】

贾岛

地必寻天目，溪仍住若耶。帆随风便发，月不要云遮。
极浦浮霜雁，回潮落海查。峨嵋省春上，立雪指流沙。

卷 573_17 【送谭远上人】

贾岛

下视白云时，山房盖树皮。垂枝松落子，侧顶鹤听棋。
清净从沙劫，中终未日欹。金光明本行，同侍出峨嵋。

卷 573_18 【新年】

贾岛

嗟以龙钟身，如何岁复新。石门思隐久，铜镜强窥频。
花发新移树，心知故国春。谁能平此恨，岂是北宗人。

卷 573_19 【送僧】

贾岛

出家从艸岁，解论造玄门。不惜挥谈柄，谁能听至言。
中时山果熟，后夏竹阴繁。此去逢何日，峨嵋晓复昏。

卷 573_20 【送姚杭州】

贾岛

白云峰下城，日夕白云生。人老江波钓，田侵海树耕。
吴山钟入越，莲叶吹摇旌。诗异石门思，涛来向越迎。

卷 573_21 【夜集田卿宅】

贾岛

朗咏高斋下，如将古调弹。翻鸿向桂水，来雪渡桑干。
滴滴玉漏曙，僛僛竹籁残。曩年曾宿此，亦值五陵寒。

卷 573_22 【寄山友长孙栖峤】

贾岛

此时气萧飒，琴院可应关。鹤似君无事，风吹雨遍山。
松生青石上，泉落白云间。有径连高顶，心期相与还。

卷 573_23 【酬厉玄】

贾岛

我来从北鄙，子省涉西陵。白发初相识，秋山拟共登。
邻居帝城雨，会宿御沟冰。未报见贻作，耿然中夜兴。

卷 573_24 【送刘式洛中覲省】

贾岛

晴峰三十六，侍立上春台。同宿别离恨，共看星月回。
野莺临苑语，河棹历江来。便寄相思札，缄封花下开。

卷 573_25 【送空公往金州】

贾岛

七百里山水，手中榔栗粗。松生师坐石，潭滌祖传孟。
长拟老岳峤，又闻思海湖。惠能同俗姓，不是岭南卢。

卷 573_26 【赠绍明上人】

贾岛

未住青云室，中秋独往年。上方嵩若寺，下视雨和烟。
祖岂无言去，心因断臂传。不知能已后，更有几灯然。

卷 573_27 【赠弘泉上人】

贾岛

洗足下蓝岭，古师精进同。心知溪卉长，居此玉林空。
西殿宵灯磬，东林曙雨风。旧峰邻太白，石座雨苔濛。

卷 573_28 【送宣皎上人游太白】

贾岛

剃发鬓无雪，去年三十三。山过春草寺，磬度落花潭。
得句才邻约，论宗意在南。峰灵疑懒下，苍翠太虚参。

卷 573_29 【病起】

贾岛

高丘归未得，空自责迟回。身事岂能遂，兰花又已开。
病令新作少，雨阻故人来。灯下南华卷，祛愁当酒杯。

卷 573_30 【送殷侍御赴同州】

贾岛

冯翊蒲西郡，沙冈拥地形。中条全离岳，清渭半和泾。
夜暮眠明月，秋深至洞庭。犹来交辟士，事别偃林扃。

卷 573_31 【送沈鹤】

贾岛

家楚媚于秦，携妻云养亲。陆行千里外，风卷一帆新。
夜泊疏山雨，秋吟捣药轮。芜城登眺作，才动广陵人。

卷 573_32 【秋夜仰怀钱孟二公琴客会】

贾岛

月色四时好，秋光君子知。南山昨夜雨，为我写清规。
独鹤耸寒骨，高杉韵细飀。仙家缥缈弄，仿佛此中期。

卷 573_33 【赠李金州】

贾岛

绮里祠前后，山程践白云。溯流随大旆，登岸见全军。
晓角吹人梦，秋风卷雁群。雾开方露日，汉水底沙分。

卷 573_34 【酬姚合校书】

贾岛

因贫行远道，得见旧交游。美酒易倾尽，好诗难卒酬。
公堂朝共到，私第夜相留。不觉入关晚，别来林木秋。

卷 573_35 【送独孤马二秀才居明月山读书】

贾岛

濯志俱高洁，儒科慕冉颜。家辞临水郡，雨到读书山。
栖鸟棕花上，声钟砾阁间。寂寥窗户外，时见一舟还。

卷 573_36 【病蝉】

贾岛

病蝉飞不得，向我掌中行。拆翼犹能薄，酸吟尚极清。
露华凝在腹，尘点误侵睛。黄雀并鸢鸟，俱怀害尔情。

卷 573_37 【青门里作】

贾岛

燕存鸿已过，海内几人愁。欲问南宗理，将归北岳修。
若无攀桂分，只是卧云休。泉树一为别，依稀三十秋。

卷 573_38 【卢秀才南台】

贾岛

居在青门里，台当千万岑。下因冈助势，上有树交阴。
陵远根才近，空长畔可寻。新晴登啸处，惊起宿枝禽。

卷 573_39 【寄李翰侍郎】

贾岛

终过盟津书，分明梦不虚。人从清渭别，地隔太行余。
宾幕谁嫌静，公门但晏如。櫪鞞干霹雳，斜汉湿蟾蜍。
追琢垂今后，敦庞得古初。井台怜操筑，漳岸想丕疏。
亦翼铿珉珮，终当直石渠。此身多抱疾，幽里近营居。
忆漱苏门涧，经浮楚泽潞。松栽侵古影，葦断尚芹苴。
语嘿曾延接，心源离滓淤。谁言姓琴氏，独跨角生鱼。

卷 573_40 【寄令狐绹相公】

贾岛

驴骏胜羸马，东川路匪赊。一緘论贾谊，三蜀寄严家。
澄彻霜江水，分明露石沙。话言声及政，栈阁谷离斜。
自著衣偏暖，谁忧雪六花。褰裳留阔屐，防患与通茶。
山馆中宵起，星河残月华。双僮前日雇，数口向天涯。
良乐知骐驎，张雷验镆铢。谦光贤将相，别纸圣龙蛇。
岂有斯言玷，应无白璧瑕。不妨圆魄里，人亦指虾蟆。

卷 573_41 【再投李益常侍】

贾岛

何处初投刺，当时赴尹京。淹留花柳变，然诺肺肠倾。
避暑蝉移树，高眠雁过城。人家嵩岳色，公府洛河声。
联句逢秋尽，尝茶见月生。新衣裁白苧，思从曲江行。

卷 573_42 【积雪】

贾岛

昔属时霖滞，今逢腊雪多。南猜飘桂渚，北讶雨交河。
尽灭平芜色，弥重古木柯。空中离白气，岛外下沧波。
隐者迷樵道，朝人冷玉珂。夕繁仍昼密，漏间复钟和。
想积高嵩顶，新秋皎月过。

卷 573_43 【过杨道士居】

贾岛

先生修道处，茆屋远嚣氛。叩齿坐明月，支颐望白云。
精神含药色，衣服带霞纹。无话瀛洲路，多年别少君。

卷 573_44 【赠僧】

贾岛

乱山秋木穴，里有灵蛇藏。铁锡挂临海，石楼闻异香。
出尘头未白，入定衲凝霜。莫话五湖事，令人心欲狂。

卷 573_45 【送友人游塞】

贾岛

飘蓬多塞下，君见益潸然。迴碛沙衔日，长河水接天。
夜泉行客火，晓戍向京烟。少结相思恨，佳期芳草前。

卷 573_46 【思游边友人】

贾岛

凝愁对孤烛，昨日饮离杯。叶下故人去，天中新雁来。
连沙秋草薄，带雪暮山开。苑北红尘道，何时见远回。

卷 573_47 【秋暮寄友人】

贾岛

寥落关河暮，霜风树叶低。远天垂地外，寒日下峰西。
有志烟霞切，无家岁月迷。清宵话白阁，已负十年栖。

卷 573_48 【寄令狐绹相公】

贾岛

官高频敕授，老免把犁锄。一主长江印，三封东省书。
不无濠上思，唯食圃中蔬。梦幻将泡影，浮生事只如。

卷 573_49 【和孟逸人林下道情】

贾岛

四气相陶铸，中庸道岂销。夏云生此日，春色尽今朝。
陋巷贫无闷，毗耶疾未调。已栽天末柏，合抱岂非遥。

卷 573_50 【宿姚少府北斋】

贾岛

石溪同夜泛，复此北斋期。鸟绝吏归后，蛩鸣客卧时。
锁城凉雨细，开印曙钟迟。忆此漳川岸，如今是别离。

卷 573_51 【雪晴晚望】

贾岛

倚杖望晴雪，溪云几万重。樵人归白屋，寒日下危峰。
野火烧冈草，断烟生石松。却回山寺路，闻打暮天钟。

卷 573_52 【送崔峒游潇湘】

贾岛

功烈尚书孙，琢磨风雅言。渡河山凿处，陟岷汉滩喧。
梦想吟天目，宵同话石门。枫林叶欲下，极浦月清暾。

卷 573_53 【寄朱锡珪】

贾岛

远泊与谁同，来从古木中。长江人钓月，旷野火烧风。
梦泽吞楚大，闽山厄海丛。此时檣底水，涛起屈原通。

卷 573_54 【马戴居华山因寄】

贾岛

玉女洗头盆，孤高不可言。瀑流莲岳顶，河注华山根。
绝雀林藏鹘，无人境有猿。秋蟾才过雨，石上古松门。

卷 573_55 【寄胡遇】

贾岛

一自残春别，经炎复到凉。萤从枯树出，蛩入破阶藏。
落叶书胜纸，闲砧坐当床。东门因送客，相访也何妨。

卷 573_56 【送李戎扶侍往寿安】

贾岛

二千余里路，一半是波涛。未晓著衣起，出城逢日高。
关山多寇盗，扶侍带弓刀。临别不挥泪，谁知心郁陶。

卷 573_57 【送孙逸人】

贾岛

衣屨犹同俗，妻儿亦宛然。不餐能累月，无病已多年。
是药皆谙性，令人渐信仙。杖头书数卷，荷入翠微烟。

卷 573_58 【寄华山僧】

贾岛

遥知白石室，松柏隐朦胧。月落看心次，云生闭目中。
五更钟隔岳，万尺水悬空。苔藓嵌岩所，依稀有径通。

卷 573_59 【送李登少府】

贾岛

伊阳耽酒尉，朗咏醉醒新。应见嵩山里，明年踟蹰春。
一千寻树直，三十六峰邻。流水潺潺处，坚贞玉涧珉。

卷 573_60 【易州过郝逸人居】

贾岛

每逢词翰客，邀我共寻君。果见闲居赋，未曾流俗闻。
也知邻市井，宛似出嚣氛。却笑巢由辈，何须隐白云。

卷 573_61 【酬鄆县李廓少府见寄】

贾岛

稍怜公事退，复遇夕阳时。北朔霜凝竹，南山水入篱。
吟怀沧海侣，空问白云师。恨不相从去，心惟野鹤知。

卷 573_62 【净业寺与前鄆县李廓少府同宿】

贾岛

来从城上峰，京寺暮相逢。往往语复默，微微雨洒松。
家贫初罢吏，年长畏闻蛩。前日犹拘束，披衣起晓钟。

卷 573_63 【送南卓归京】

贾岛

残春别镜陂，罢郡未霜髭。行李逢炎暑，山泉满路岐。
云藏巢鹤树，风触啜莺枝。三省同虚位，双旌带去思。
入城宵梦后，待漏月沉时。长策并忠告，从容写玉墀。

卷 573_64 【卧疾走笔酬韩愈书问】

贾岛

一卧三四旬，数书惟独君。愿为出海月，不作归山云。
身上衣频寄，瓯中物亦分。欲知强健否，病鹤未离群。

卷 573_65 【长孙霞李溟自紫阁白阁二峰见访】

贾岛

寂寞吾庐贫，同来二阁人。所论唯野事，招作住云邻。
古寺期秋宿，平林散早春。漱流今已矣，巢许岂尧臣。

卷 573_66 【送惟一游清凉寺】

贾岛

去有巡台侣，荒溪众树分。瓶残秦地水，锡入晋山云。
秋月离喧见，寒泉出定闻。人间临欲别，旬日雨纷纷。

卷 573_67 【郑尚书新开涪江二首】

贾岛

岸凿青山破，江开白浪寒。日沉源出海，春至草生滩。
梓匠防波溢，蓬仙畏水干。从今疏决后，任雨滞峰峦。

不侵南亩务，已拔北江流。涪水方移岸，浔阳有到舟。
潭澄初捣药，波动乍垂钩。山可疏三里，从知历亿秋。

卷 573_68 【寄乔侍郎】

贾岛

大宁犹未到，曾渡北浮桥。晓出爬船寺，手擎紫栗条。
差池不相见，怅望至今朝。近日营家计，绳悬一小瓢。

卷 573_69 【送去华法师】

贾岛

在越居何寺，东南水路归。秋江洗一钵，寒日晒三衣。
默听鸿声尽，行看叶影飞。囊中无宝货，船户夜扃稀。

卷 573_70 【送蔡京】

贾岛

跃蹄归鲁日，带漏别秦星。易折芳条桂，难穷邃义经。
登封多泰岳，巡狩遍沧溟。家在何林下，梁山翠满庭。

卷 573_71 【慈恩寺上座院】

贾岛

未委衡山色，何如对塔峰。曩宵曾宿此，今夕值秋浓。
羽族栖烟竹，寒流带月钟。井甘源起异，泉涌渍苔封。

卷 573_72 【题朱庆余所居】

贾岛

天寒吟竟晓，古屋瓦生松。寄信船一只，隔乡山万重。
树来沙岸鸟，窗度雪楼钟。每忆江中屿，更看城上峰。

卷 573_73 【送黄知新归安南】

贾岛

池亭沉饮遍，非独曲江花。地远路穿海，春归冬到家。
火山难下雪，瘴土不生茶。知决移来计，相逢期尚赊。

卷 573_74 【赠胡禅归】

贾岛

自是根机钝，非关夏腊深。秋来江上寺，夜坐岭南心。
井凿山含月，风吹磬出林。祖师携只履，去路杳难寻。

卷 573_75 【元日女道士受箓】

贾岛

元日更新夜，斋身称净衣。数星连斗出，万里断云飞。
霜下磬声在，月高坛影微。立听师语了，左肘系符归。

卷 573_76 【重与彭兵曹】

贾岛

故人在城里，休寄海边书。渐去老不远，别来情岂疏。
砚冰催腊日，山雀到贫居。每有平戎计，官家别敕除。

卷 573_77 【赠庄上人】

贾岛

不语焚香坐，心知道已成。流年衰此世，定力见他生。
暮雪余春冷，寒灯续昼明。寻常五侯至，敢望下阶迎。

卷 573_78 【落第东归逢僧伯阳】

贾岛

相逢须语笑，人世别离频。晓至长侵月，思乡动隔春。
见僧心暂静，从俗事多违。宇宙诗名小，山河客路新。
翠桐犹入爨，清镜未辞尘。逸足思奔骥，随群且退鳞。
宴乖红杏寺，愁在绿杨津。老病难为乐，开眉赖故人。

卷 573_79 【皇甫主簿期游山不及赴】

贾岛

休官匹马在，新意入山中。更住应难遂，前期恨不同。
集蝉苔树僻，留客雨堂空。深夜谁相访，惟当清净翁。

卷 573_80 【宿成湘林下】

贾岛

相访夕阳时，千株木未衰。石泉流出谷，山雨滴栖鸥。
漏向灯听数，酒因客寝迟。今宵不尽兴，更有月明期。

卷 573_81 【喜雍陶至】

贾岛

今朝笑语同，几日百忧中。鸟度剑门静，蛩归泸水空。
步霜吟菊畔，待月坐林东。且莫孤此兴，勿论穷与通。

卷 573_82 【酬胡遇】

贾岛

丽句传人口，科名立可图。移居见山烧，买树带巢乌。
游远风涛急，吟清雪月孤。却思初识面，仍未有多须。

卷 573_83 【宿慈恩寺郁公房】

贾岛

病身来寄宿，自扫一床闲。反照临江磬，新秋过雨山。
竹阴移冷月，荷气带禅关。独住天台意，方从内请还。

卷 573_84 【送褚山人归日本】

贾岛

悬帆待秋水，去入杳冥间。东海几年别，中华此日还。
岸遥生白发，波尽露青山。隔水相思在，无书也是闲。

卷 573_85 【寄韩湘】

贾岛

过岭行多少，潮州涨满川。花开南去后，水冻北归前。
望鹭吟登阁，听猿泪滴船。相思堪面话，不著尺书传。

卷 573_86 【雨夜寄马戴】

贾岛

芳林杏花树，花落子西东。今夕曲江雨，寒催朔北风。
乡书沧海绝，隐路翠微通。寂寂相思际，孤缸残漏中。

卷 573_87 【喜无可上人游山回】

贾岛

一食复何如，寻山无定居。相逢新夏满，不见半年余。
听话龙潭雪，休传鸟道书。别来还似旧，白发日高梳。

卷 573_88 【寄毗陵彻公】

贾岛

身依吴寺老，黄叶几回看。早讲林霜在，孤禅隙月残。
井通潮浪远，钟与角声寒。已有南游约，谁言礼谒难。

卷 573_89 【送韦琼校书】

贾岛

宾佐兼归觐，此行江汉心。别离从阙下，道路向山阴。
孤屿消寒沫，空城滴夜霖。若邪溪畔寺，秋色共谁寻。

卷 573_90 【寄刘侍御】

贾岛

衣多苔藓痕，犹拟更趋门。自夏虽无病，经秋不过原。
积泉留岱鸟，叠岫隔巴猿。琴月西斋集，如今岂复言。

卷 573_91 【送穆少府知眉州】

贾岛

剑门倚青汉，君昔未曾过。日暮行人少，山深异鸟多。
猿啼和峡雨，栈尽到江波。一路白云里，飞泉洒薜萝。

卷 573_92 【二月晦日留别鄂中友人】

贾岛

立马柳花里，别君当酒酣。春风渐向北，云雁不飞南。
明晓日初一，今年月又三。鞭羸去暮色，远岳起烟岚。

卷 573_93 【送李校书赴吉期】

贾岛

筮算重重吉，良期讵可迁。不同牛女夜，是配凤凰年。
佩玉春风里，题章蜡烛前。诗书与箴训，夫哲又妻贤。

卷 573_94 【宿孤馆】

贾岛

落日投村戍，愁生为客途。寒山晴后绿，秋月夜来孤。
橘树千株在，渔家一半无。自知风水静，舟系岸边芦。

卷 573_95 【哭宗密禅师】

贾岛

鸟道雪岑巔，师亡谁去禅。几尘增灭后，树色改生前。
层塔当松吹，残踪傍野泉。唯嗟听经虎，时到坏庵边。

卷 573_96 【宿山寺】

贾岛

众岫耸寒色，精庐向此分。流星透疏木，走月逆行云。
绝顶人来少，高松鹤不群。一僧年八十，世事未曾闻。

卷 573_97 【送友人如边】

贾岛

去日重阳后，前程菊正芳。行车辗秋岳，落叶坠寒霜。
云入汉天白，风高碛色黄。蒲轮待恐晚，求荐向诸方。

卷 573_98 【题竹谷上人院】

贾岛

禅庭高鸟道，回望极川原。樵径连峰顶，石泉通竹根。
木深犹积雪，山浅未闻猿。欲别尘中苦，愿师贻一言。

卷 573_99 【京北原作】

贾岛

登原见城阙，策蹇思炎天。日午路中客，槐花风处蝉。
远山秦木上，清渭汉陵前。何事居人世，皆从名利牵。

卷 573_100 【寄江上人】

贾岛

紫阁旧房在，新家中岳东。烟波千里隔，消息一朝通。
寒日汀洲路，秋晴岛屿风。分明杜陵叶，别后两经红。

卷 573_101 【送僧归太白山】

贾岛

坚冰连夏处，太白接青天。云塞石房路，峰明雨外巅。
夜禅临虎穴，寒漱漱龙泉。后会不期日，相逢应信缘。

卷 573_102 【暮过山村】

贾岛

数里闻寒水，山家少四邻。怪禽啼旷野，落日恐行人。
初月未终夕，边烽不过秦。萧条桑柘外，烟火渐相亲。

卷 573_103 【鹭鸶】

贾岛

求鱼未得食，沙岸往来行。岛月独栖影，暮天寒过声。
堕巢因木折，失侣遇弦惊。频向烟霄望，吾知尔去程。

卷 573_104 【内道场僧弘绍】

贾岛

麟德燃香请，长安春几回。夜闲同像寂，昼定为吾开。
讲罢松根老，经浮海水来。六年双足履，只步院中苔。

卷 573_105 【蒋亭和蔡湘州】

贾岛

蒋宅为亭榭，蔡城东郭门。潭连秦相井，松老汉朝根。
已积苍苔遍，何曾旧径存。高斋无事后，时复一携尊。

卷 573_106 【光州王建使君水亭作】

贾岛

楚水临轩积，澄鲜一亩余。柳根连岸尽，荷叶出萍初。
极浦清相似，幽禽到不虚。夕阳庭际眺，槐雨滴疏疏。

卷 573_107 【留别光州王使君建】

贾岛

杜陵千里外，期在末秋归。既见林花落，须防木叶飞。
楚从何地尽，淮隔数峰微。回首余霞失，斜阳照客衣。

卷 573_108 【宿姚合宅寄张司业籍】

贾岛

闲宵因集会，柱史话先生。身爱无一事，心期往四明。
松枝影摇动，石磬响寒清。谁伴南斋宿，月高霜满城。

卷 573_109 【哭张籍】

贾岛

精灵归恍惚，石磬韵曾闻。即日是前古，谁人耕此坟。
旧游孤棹远，故域九江分。本欲蓬瀛去，餐芝御白云。

卷 573_110 【灵准上人院】

贾岛

掩扉当太白，腊数等松椿。禁漏来遥夜，山泉落近邻。
经声终卷晓，草色几芽春。海内知名士，交游准上人。

卷 573_111 【寄柳舍人宗元】

贾岛

格与功俱造，何人意不降。一宵三梦柳，孤泊九秋江。
擢第名重列，冲天字几双。誓为仙者仆，侧执驭风幢。

卷 573_112 【送玄岩上人归西蜀】

贾岛

玉垒山中寺，幽深胜概多。药成彭祖捣，顶受七轮摩。
去腊催今夏，流光等逝波。会当依粪扫，五岳遍头陀。

卷 573_113 【寄宋州田中丞】

贾岛

古郡近南徐，关河万里余。相思深夜后，未答去秋书。
自别知音少，难忘识面初。旧山期已久，门掩数畦蔬。

卷 573_114 【送朱休归剑南】

贾岛

剑南归受贺，太学赋声雄。山路长江岸，朝阳十月中。
芽新抽雪茗，枝重集猿枫。卓氏琴台废，深芜想径通。

卷 573_115 【寄长武朱尚书】

贾岛

不日即登坛，枪旗一万竿。角吹边月没，鼓绝爆雷残。
中国今如此，西荒可取难。白衣思请谒，徒步在长安。

卷 573_116 【送皇甫侍御】

贾岛

晓钟催早期，自是赴嘉招。舟泊湘江阔，田收楚泽遥。
雁惊起衰草，猿渴下寒条。来使黔南日，时应问寂寥。

卷 573_117 【郊居即事】

贾岛

住此园林久，其如未是家。叶书传野意，檐溜煮胡茶。
雨后逢行鹭，更深听远蛙。自然还往里，多是爱烟霞。

卷 573_118 【夜集姚合宅期可公不至】

贾岛

公堂秋雨夜，已是念园林。何事疾病日，重论山水心。
孤灯明腊后，微雪下更深。释子乖来约，泉西寒磬音。

卷 573_119 【喜李余自蜀至】

贾岛

迢递岷峨外，西南驿路高。几程寻嶮栈，独宿听寒涛。
白鸟飞还立，青猿断更号。往来从此过，词体近风骚。

卷 573_120 【王侍御南原庄】

贾岛

买得足云地，新栽药数窠。峰头盘一径，原下注双河。
春寺闲眠久，晴台独上多。南斋宿雨后，仍许重来麽。

卷 573_121 【送康秀才】

贾岛

俱为落第年，相识落花前。酒泻两三盏，诗吟十数篇。
行岐逢塞雨，嘶马上津船。树影高堂下，回时应有蝉。

卷 573_122 【送僧】

贾岛

此生披衲过，在世得身闲。日午游都市，天寒往华山。
言归文字外，意出有无间。仙掌云边树，巢禽时出关。

卷 573_123 【寄魏少府】

贾岛

来时乖面别，终日使人惭。易记卷中句，难忘灯下谈。
湿苔粘树瘦，瀑布溅房庵。音信如相惠，移居古井南。

卷 573_124 【原居即事言怀赠孙员外】

贾岛

出入土门偏，秋深石色泉。径通原上草，地接水中莲。
采菌依余枿，拾薪逢刈田。镊擗白发断，兵阻尺书传。
避路来华省，抄诗上彩笺。高斋久不到，犹喜未经年。

卷 573_125 【登楼】

贾岛

秋日登高望，凉风吹海初。山川明已久，河汉没无余。
远近涯寥夐，高低中太虚。赋因王阁笔，思比谢游疏。

卷 573_126 【上乐使君救康成公】

贾岛

曾梦诸侯笑，康囚议脱枷。千根池里藕，一朵火中花。

卷 573_127 【昆明池泛舟】

贾岛

一枝青竹榜，泛泛绿萍里。不见钓鱼人，渐入秋塘水。

卷 573_128 【送僧】

贾岛

大内曾持论，天南化俗行。旧房山雪在，春草岳阳生。

晓了莲经义，堪任宝盖迎。王侯皆护法，何寺讲钟鸣。

卷 573_129 【送刘知新往襄阳】

贾岛

此别诚堪恨，荆襄是旧游。眼光悬欲落，心绪乱难收。
花木三层寺，烟波五相楼。因君两地去，长使梦悠悠。

卷 573_130 【寄慈恩寺郁上人】

贾岛

中秋期夕望，虚室省相容。北斗生清漏，南山出碧重。
露寒鸠宿竹，鸿过月圆钟。此夜情应切，衡阳旧住峰。

第五百七十四卷

卷 574_1 【送饶州张使君】

贾岛

终南云雨连城阙，去路西江白浪头。
滁上郡斋离昨日，鄱阳农事劝今秋。
道心生向前朝寺，文思来因静夜楼。
借问泊帆干谒者，谁人曾听峡猿愁。

卷 574_2 【观冬设上东川杨尚书】

贾岛

匏革奏冬非独乐，军城未晓启重门。
何时却入三台贵，此日空知八座尊。
罗绮舞中收雨点，貔貅阊外卷云根。
逐迁属吏随宾列，拨棹扁舟不忘恩。

卷 574_3 【巴兴作】

贾岛

三年未省闻鸿叫，九月何曾见草枯。
寒暑气均思白社，

星辰位正忆皇都。苏卿持节终还汉，葛相行师自渡泸。
乡味朔山林果别，北归期挂海帆孤。

卷 574_4 【早蝉】

贾岛

早蝉孤抱芳槐叶，噪向残阳意度秋。也任一声催我老，
堪听两耳畏吟休。得非下第无高韵，须是青山隐白头。
若问此心嗟叹否，天人不可怨而尤。

卷 574_5 【投元郎中】

贾岛

心在潇湘归未期，卷中多是得名诗。高台聊望清秋色，
片水堪留白鹭鹭。省宿有时闻急雨，朝回尽日伴禅师。
旧文去岁曾将献，蒙与人来说始知。

卷 574_6 【阮籍啸台】

贾岛

如闻长啸春风里，荆棘丛边访旧踪。

地接苏门山近远，荒台突兀抵高峰。

卷 574_7 【滕校书使院小池】

贾岛

小池谁见凿时初，走水南来十里余。
楼上日斜吹暮角，院中人出锁游鱼。

卷 574_8 【送陕府王建司马】

贾岛

司马虽然听晓钟，尚犹高枕恣疏慵。请诗僧过三门水，
卖药人归五老峰。移舫绿阴深处息，登楼凉夜此时逢。
杜陵惆怅临相饯，未寝月前多屐踪。

卷 574_9 【上谷旅夜】

贾岛

世难那堪恨旅游，龙钟更是对穷秋。故园千里数行泪，
邻杵一声终夜愁。月到寒窗空皓晶，风翻落叶更飕飕。
此心不向常人说，倚识平津万户侯。

卷 574_10 【寄无得头陀】

贾岛

夏腊今应三十余，不离树下冢间居。貌堪良匠抽毫写，
行称高僧续传书。落涧水声来远远，当空月色自如如。
白衣只在青门里，心每相亲迹且疏。

卷 574_11 【崔卿池上双白鹭】

贾岛

鹭雏相逐出深笼，顶各有丝茎数同。洒石多霜移足冷，
隔城远树挂巢空。其如尽在滩声外，何似双飞浦色中。
见此池潭卿自凿，清冷太液底潜通。

卷 574_12 【送胡道士】

贾岛

短褐身披满渍苔，灵溪深处观门开。却从城里移琴去，
许到山中寄药来。临水古坛秋醮罢，宿杉幽鸟夜飞回。
丹梯愿逐真人上，日夕归心白发催。

卷 574_13 【寄韩潮州愈】

贾岛

此心曾与木兰舟，直到天南潮水头。隔岭篇章来华岳，
出关书信过泷流。峰悬驿路残云断，海浸城根老树秋。
一夕瘴烟风卷尽，月明初上浪西楼。

卷 574_14 【酬张籍王建】

贾岛

疏林荒宅古坡前，久住还因太守怜。渐老更思深处隐，
多闲数得上方眠。鼠抛贫屋收田日，雁度寒江拟雪天。
身是龙钟应是分，水曹芸阁枉来篇。

卷 574_15 【逢博陵故人彭兵曹】

贾岛

曲阳分散会京华，见说三年住海涯。别后解餐蓬蘽子，
向前未识牧丹花。偶逢日者教求禄，终傍泉声拟置家。
蹋雪携琴相就宿，夜深开户斗牛斜。

卷 574_16 【赠牛山人】

贾岛

二十年中饵茯苓，致书半是老君经。东都旧住商人宅，
南国新修道士亭。凿石养峰休买蜜，坐山秤药不争星。
古来隐者多能卜，欲就先生问丙丁。

卷 574_17 【送于中丞使回纥册立】

贾岛

君立天骄发使车，册文字字著金书。渐通青冢乡山尽，
欲达皇情译语初。调角寒城边色动，下霜秋磧雁行疏。
旌旗来往几多日，应向途中见岁除。

卷 574_18 【送刘侍御重使江西】

贾岛

时当苦热远行人，石壁飞泉溅马身。又到钟陵知务大，
还浮湓浦属秋新。早程猿叫云深极，宿馆禽惊叶动频。
前者已闻廉使荐，兼言有画静边尘。

卷 574_19 【赠圆上人】

贾岛

诵经千纸得为僧，麈尾持行不拂蝇。古塔月高闻咒水，
新坛日午见烧灯。一双童子浇红药，百八真珠贯彩绳。
且说近来心里事，仇雠相对似亲朋。

卷 574_20 【处州李使君改任遂州因寄赠】

贾岛

庭树几株阴入户，主人何在客闻蝉。钥开原上高楼锁，
瓶汲池东古井泉。趁静野禽曾后到，休吟邻叟始安眠。
仙都山水谁能忆，西去风涛书满船。

卷 574_21 【酬慈恩寺文郁上人】

贾岛

袈裟影入禁池清，犹忆乡山近赤城。篱落罅间寒蟹过，
莓苔石上晚蛩行。期登野阁闲应甚，阻宿山房疾未平。
闻说又寻南岳去，无端诗思忽然生。

卷 574_22 【访鉴玄师侄】

贾岛

维摩青石讲初休，缘访亲宗到普州。
我有军持凭弟子，岳阳溪里汲寒流。

卷 574_23 【夜坐】

贾岛

蟋蟀渐多秋不浅，蟾蜍已没夜应深。
三更两鬓几枝雪，一念双峰四祖心。

卷 574_24 【送别】

贾岛

门外便伸千里别，无车不得到河梁。
高楼直上百余尺，今日为君南望长。

卷 574_25 【闻蝉感怀】

贾岛

新蝉忽发最高枝，不觉立听无限时。
正遇友人来告别，一心分作两般悲。

卷 574_26 【夏夜上谷宿开元寺】

贾岛

诗成一夜月中题，便卧松风到曙鸡。
带月时闻山鸟语，郡城知近武陵溪。

卷 574_27 【送于总持归京】

贾岛

出家初隶何方寺，上国西明御水东。
却见旧房阶下树，别来二十一春风。

卷 574_28 【崔卿池上鹤】

贾岛

月中时叫叶纷纷，不异洞庭霜夜闻。
翎羽如今从放长，犹能飞起向孤云。

卷 574_29 【登田中丞高亭】

贾岛

高亭林表迥嵯峨，独坐秋宵不寝多。
玉兔玉人歌里出，白云难似莫相和。

卷 574_30 【友人婚杨氏催妆】

贾岛

不知今夕是何夕，催促阳台近镜台。
谁道芙蓉水中种，青铜镜里一枝开。

卷 574_31 【酬朱侍御望月见寄】

贾岛

他寝此时吾不寝，近秋三五日逢晴。
相思唯有霜台月，望尽孤光见却生。

卷 574_32 【题韦云叟草堂】

贾岛

新起此堂开北窗，当窗山隔一重江。
白茅草苫重重密，爱此秋天夜雨凉。

卷 574_33 【和韩吏部泛南溪】

贾岛

溪里晚从池岸出，石泉秋急夜深闻。
木兰船共山人上，月映渡头零落云。

卷 574_34 【方镜】

贾岛

背如刀截机头锦，面似升量涧底泉。
铜雀台南秋日后，照来照去已三年。

卷 574_35 【酬姚合】

贾岛

黍穗豆苗侵古道，晴原午后早秋时。
故人相忆僧来说，杨柳无风蝉满枝。

卷 574_36 【送灵应上人】

贾岛

遍参尊宿游方久，名岳奇峰问此公。
五月半间看瀑布，青城山里白云中。

卷 574_37 【赠丘先生】

贾岛

常言吃药全胜饭，华岳松边采茯神。
不遣髭须一茎白，拟为白日上升人。

卷 574_38 【渡桑干】

贾岛

客舍并州已十霜，归心日夜忆咸阳。
无端更渡桑干水，却望并州是故乡。

卷 574_39 【夜期啸客吕逸人不至】

贾岛

逸人期宿石床中，遣我开扉对晚空。
不知何处啸秋月，闲著松门一夜风。

卷 574_40 【夜集乌行中所居】

贾岛

环炉促席复持杯，松院双扉向月开。
座上同声半先达，名山独入此心来。

卷 574_41 【赠梁浦秀才斑竹拄杖】

贾岛

拣得林中最细枝，结根石上长身迟。
莫嫌滴沥红斑少，恰似湘妃泪尽时。

卷 574_42 【寻石瓮寺上方】

贾岛

野寺入时春雪后，崎岖得到此房前。
老僧不出迎朝客，已住上方三十年。

卷 574_43 【早秋寄题天竺灵隐寺】

贾岛

峰前峰后寺新秋，绝顶高窗见沃洲。人在定中闻蟋蟀，
鹤从栖处挂猕猴。山钟夜渡空江水，汀月寒生古石楼。
心忆悬帆身未遂，谢公此地昔年游。

卷 574_44 【黎阳寄姚合】

贾岛

魏都城里曾游熟，才子斋中止泊多。去日绿杨垂紫陌，
归时白草夹黄河。新诗不觉千回咏，古镜曾经几度磨。
惆怅心思滑台北，满杯浓酒与愁和。

卷 574_45 【送崔约秀才】

贾岛

归宁仿佛三千里，月向船窗见几宵。野鼠独偷高树果，
前山渐见短禾苗。更深栅锁淮波疾，苇动风生雨气遥。
重入石头城下寺，南朝杉老未干焦。

卷 574_46 【咏怀】

贾岛

纵把书看未省勤，一生生计只长贫。可能在世无成事，
不觉离家作老人。中岳深林秋独往，南原多草夜无邻。
经年抱疾谁来问，野鸟相过啄木频。

卷 574_47 【夏日寄高洗马】

贾岛

三十年来长在客，两三行泪忽然垂。白衣苍鬓经过懒，
赤日朱门偃息迟。花发应耽新熟酒，草颠还写早朝诗。
不缘马死西州去，画角堪听是晓吹。

卷 574_48 【送周判官元范赴越】

贾岛

原下相逢便别离，蝉鸣关路使回时。过淮渐有悬帆兴，
到越应将坠叶期。城上秋山生菊早，驿西寒渡落潮迟。
已曾几遍随旌旆，去谒荒郊大禹祠。

卷 574_49 【送罗少府归牛渚】

贾岛

作尉长安始三日，忽思牛渚梦天台。楚山远色独归去，
灞水空流相送回。霜覆鹤身松子落，月分萤影石房开。
白云多处应频到，寒涧泠泠漱古苔。

卷 574_50 【题童真上人】

贾岛

江上修持积岁年，滩声未拟住潺湲。誓从五十身披衲，
便向三千界坐禅。月峡青城那有滞，天台庐岳岂无缘。
昨宵忽梦游沧海，万里波涛在目前。

卷 574_51 【赠温观主】

贾岛

一别罗浮竟未还，观深廊古院多关。君来几日行虚洞，
仙去空坛在远山。胎息存思当黑处，井华悬绠取朝间。
弊庐道室虽邻近，自乐冬阳炙背闲。

卷 574_52 【贺庞少尹除太常少卿】

贾岛

太白山前终日见，十旬假满拟秋寻。中峰绝顶非无路，
北阙除书阻入林。朝谒此时闲野屐，宿斋何处止鸣砧。
省中石蹬陪随步，唯赏烟霞不厌深。

卷 574_53 【上邠宁刑司徒】

贾岛

箭头破帖浑无敌，杖底敲球远有声。马走千蹄朝万乘，
地分三郡拥双旌。春风欲尽山花发，晓角初吹客梦惊。
不是邢公来镇此，长安西北未能行。

卷 574_54 【欲游嵩岳留别李少尹益】

贾岛

孤策迟回洛水湄，孤禽嘹唳幸人知。嵩岳望中常待我，
河梁欲上未题诗。新秋爱月愁多雨，古观逢仙看尽棋。
微眇此来将敢问，凤凰何日定归池。

卷 574_55 【病鹖吟】

贾岛

俊鸟还投高处栖，腾身戛戛下云梯。有时透雾凌空去，
无事随风入草迷。迅疾月边捎玉兔，迟回日里拂金鸡。
不缘毛羽遭零落，焉肯雄心向尔低。

卷 574_56 【赠僧】

贾岛

从来多是游山水，省泊禅舟月下涛。初过石桥年尚少，
久辞天柱腊应高。青松带雪悬铜锡，白发如霜落铁刀。
常恐画工援笔写，身长七尺有眉毫。

卷 574_57 【赠翰林】

贾岛

清重无过知内制，从前礼绝外庭人。看花在外多随驾，
召宴无时不及身。马自赐来骑觉稳，诗缘见彻语长新。
应怜独向名场苦，曾十余年浪过春。

卷 574_58 【颂德上贾常侍】

贾岛

边臣说使朝天子，发语轰然激夏雷。高节羽书期独传，
分符绛郡滞长材。啁啾鸟恐鹰鹞起，流散人归父母来。
自顾此身无所立，恭谈祖德朵颐开。

卷 574_59 【田将军书院】

贾岛

满庭花木半新栽，石自平湖远岸来。笋迸邻家还长竹，
地经山雨几层苔。井当深夜泉微上，阁入高秋户尽开。
行背曲江谁到此，琴书锁著未朝回。

卷 574_60 【投庞少尹】

贾岛

闭户息机搔白首，中庭一树有清阴。年年不改风尘趣，
日日转多泉石心。病起望山台上立，觉来听雨烛前吟。
庞公相识元和岁，眷分依依直至今。

卷 574_61 【夏夜登南楼】

贾岛

水岸寒楼带月跻，夏林初见岳阳溪。
一点新萤报秋信，不知何处是菩提。

卷 574_62 【题青龙寺】

贾岛

碣石山人一轴诗，终南山北数人知。
拟看青龙寺里月，待无一点夜云时。

卷 574_63 【赠李文通】

贾岛

营当万胜冈头下，誓立千年不朽功。
天子手擎新钺斧，谏官请赠李文通。

卷 574_64 【题虢州三堂赠吴郎中】

贾岛

无穷草树昔谁栽，新起临湖白石台。半岸泥沙孤鹤立，
三堂风雨四门开。荷翻团露惊秋近，柳转斜阳过水来。
昨夜北楼堪朗咏，虢城初锁月裴回。

卷 574_65 【送僧】

贾岛

池上时时松雪落，焚香烟起见孤灯。
静夜忆谁来对坐，曲江南岸寺中僧。

卷 574_66 【三月晦日赠刘评事】

贾岛

三月正当三十日，风光别我苦吟身。
共君今夜不须睡，未到晓钟犹是春。

卷 574_67 【送张道者】

贾岛

新岁抱琴何处去，洛阳三十六峰西。
生来未识山人面，不得一听乌夜啼。

卷 574_68 【题鱼尊师院】

贾岛

老子堂前花万树，先生曾见几回春。
夜煎白石平明吃，不拟教人哭此身。

卷 574_69 【宿村家亭子】

贾岛

床头枕是溪中石，井底泉通竹下池。
宿客未眠过夜半，独闻山雨到来时。

卷 574_70 【送称上人】

贾岛

归蜀拟从巫峡过，何时得入旧房禅。
寺中来后谁身化，起塔栽松向野田。

卷 574_71 【杨秘书新居】

贾岛

城角新居邻静寺，时从新阁上经楼。
南山泉入宫中去，先向诗人门外流。

卷 574_72 【听乐山人弹易水】

贾岛

朱丝弦底燕泉急，燕将云孙白日弹。
嬴氏归山陵已掘，声声犹带发冲冠。

卷 574_73 【经苏秦墓】

贾岛

沙埋古篆折碑文，六国兴亡事系君。
今日凄凉无处说，乱山秋尽有寒云。

卷 574_74 【题戴胜】

贾岛

星点花冠道士衣，紫阳宫女化身飞。
能传上界春消息，若到蓬山莫放归。

卷 574_75 【题隐者居】

贾岛

虽有柴门常不关，片云孤木伴身闲。
犹嫌住久人知处，见拟移家更上山。

卷 574_76 【哭孟东野】

贾岛

兰无香气鹤无声，哭尽秋天月不明。
自从东野先生死，侧近云山得散行。

卷 574_77 【过京索先生坟】

贾岛

京索先生三尺坟，秋风漠漠吐寒云。
从来有恨君多哭，今日何人更哭君。

卷 574_78 【客思】

贾岛

促织声尖尖似针，更深刺著旅人心。
独言独语月明里，惊觉眠童与宿禽。

卷 574_79 【盐池院观鹿】

贾岛

条峰五老势相连，此鹿来从若个边。
别有野麋人不见，一生长饮白云泉。

卷 574_80 【黄鹄下太液池】

贾岛

高飞空外鹄，下向禁中池。岸印行踪浅，波摇立影危。
来从千里岛，舞拂万年枝。踉跄孤风起，裴回水沫移。
幽音清露滴，野性白云随。太液无弹射，灵禽翅不垂。

卷 574_81 【代旧将】

贾岛

旧事说如梦，谁当信老夫。战场几处在，部曲一人无。
落日收病马，晴天晒阵图。犹希圣朝用，自镊白髭须。

卷 574_82 【老将】

贾岛

胆壮乱须白，金疮蠹百骸。旌旗犹入梦，歌舞不开怀。
燕雀来鹰架，尘埃满箭靶。自夸勋业重，开府是官阶。

卷 574_83 【春行】

贾岛

去去行人远，尘随马不穷。旅情斜日后，春色早烟中。
流水穿空馆，闲花发故宫。旧乡千里思，池上绿杨风。

卷 574_84 【题郑常侍厅前竹】

贾岛

绿竹临诗酒，婵娟思不穷。乱枝低积雪，繁叶亚寒风。
萧飒疑泉过，萦回有径通。侵庭根出土，隔壁笋成丛。
疏影纱窗外，清音宝瑟中。卷帘终日看，欹枕几秋同。
万顷歌王子，千竿伴阮公。露光怜片片，雨润爱濛濛。
嶰谷蛮湖北，湘川灞水东。何如轩槛侧，苍翠袅长空。

卷 574_85 【早行】

贾岛

早起赴前程，邻鸡尚未鸣。主人灯下别，羸马暗中行。
蹋石新霜滑，穿林宿鸟惊。远山钟动后，曙色渐分明。

卷 574_86 【送人南归】

贾岛

分手向天涯，迢迢泛海波。虽然南地远，见说北人多。
山暖花常发，秋深雁不过。炎方饶胜事，此去莫蹉跎。

卷 574_87 【送人南游】

贾岛

此别天涯远，孤舟泛海中。夜行常认火，帆去每因风。
蛮国人多富，炎方语不同。雁飞难度岭，书信若为通。

卷 574_88 【送道者】

贾岛

独向山中见，今朝又别离。一心无挂住，万里独何之。
到处绝烟火，逢人话古时。此行无弟子，白犬自相随。

卷 574_89 【风蝉】

贾岛

风蝉旦夕鸣，伴叶送新声。故里客归尽，水边身独行。
噪轩高树合，惊枕暮山横。听处无人见，尘埃满甌生。

卷 574_90 【清明日园林寄友人】

贾岛

今日清明节，园林胜事偏。晴风吹柳絮，新火起厨烟。
杜草开三径，文章忆二贤。几时能命驾，对酒落花前。

卷 574_91 【上杜驸马】

贾岛

玉山突兀压乾坤，出得朱门入戟门。妻是九重天子女，
身为一品令公孙。鸳鸯殿里参皇后，龙凤堂前贺至尊。
今日澧阳非久驻，伫为霖雨拜新恩。

卷 574_92 【莲峰歌】

贾岛

锦砾潺湲玉溪水，晓来微雨藤花紫。冉冉山鸡红尾长，
一声樵斧惊飞起。松刺梳空石差齿，烟香风软人参蕊。
阳崖一梦伴云根，仙菌灵芝梦魂里。

卷 574_93 【壮士吟】

贾岛

壮士不曾悲，悲即无回期。如何易水上，未歌先泪垂。

卷 574_94 【题兴化园亭】

贾岛

破却千家作一池，不栽桃李种蔷薇。
蔷薇花落秋风起，荆棘满庭君始知。

卷 574_95 【竹】

贾岛

篱外清阴接药栏，晓风交戛碧琅玕。
子猷没后知音少，粉节霜筠漫岁寒。

卷 574_96 【李斯井】

贾岛

井存上蔡南门外，置此井时来相秦。
断绠数寻垂古甃，取将寒水是何人。

卷 574_97 【题诗后】

贾岛

二句三年得，一吟双泪流。知音如不赏，归卧故山秋。

卷 574_98 【送友人之南陵】

贾岛

莫叹徒劳向宦途，不群气岸有谁如。南陵暂掌仇香印，
北阙终行贾谊书。好趁江山寻胜境，莫辞韦杜别幽居。
少年跃马同心使，免得诗中道跨驴。

卷 574_99 【寻人不遇】

贾岛

闻说到扬州，吹箫有旧游。人来多不见，莫是上迷楼。

卷 574_100 【寻隐者不遇】

贾岛

松下问童子，言师采药去。只在此山中，云深不知处。

卷 574_101 【行次汉上】

贾岛

习家池沼草萋萋，岚树光中信马蹄。
汉主庙前湘水碧，一声风角夕阳低。

卷 574_102 【马嵬】

贾岛

长川几处树青青，孤驿危楼对翠屏。
一自上皇惆怅后，至今来往马蹄腥。

卷 574_103 【冬夜送人】

贾岛

平明走马上村桥，花落梅溪雪未消。
日短天寒愁送客，楚山无限路迢迢。

卷 574_104 【句】

贾岛

晴风吹柳絮，新火起厨烟。

长江风送客，孤馆雨留人。

古岸崩将尽，平沙长未休。

不如牛与羊，犹得日暮归。

第五百七十五卷

卷 575_1 【鸡鸣埭曲】

温庭筠

南朝天子射雉时，银河耿耿星参差。铜壶漏断梦初觉，
宝马尘高人不寐。鱼跃莲东荡宫沼，濛濛御柳悬栖鸟。
红妆万户镜中春，碧树一声天下晓。盘踞势穷三百年，
朱方杀气成愁烟。彗星拂地浪连海，战鼓渡江尘涨天。
绣龙画雉填宫井，野火风驱烧九鼎。殿巢江燕砌生蒿，
十二金人霜炯炯。芊绵平绿台城基，暖色春容荒古陂。
宁知玉树后庭曲，留待野棠如雪枝。

卷 575_2 【织锦词】

温庭筠

丁东细漏侵琼瑟，影转高梧月初出。簇簇金梭万缕红，
鸳鸯艳锦初成匹。锦中百结皆同心，蕊乱云盘相间深。
此意欲传传不得，玫瑰作柱朱弦琴。为君裁破合欢被，
星斗迢迢共千里。象尺熏炉未觉秋，碧池已有新莲子。

卷 575_3 【夜宴谣】

温庭筠

长钗坠发双蜻蜓，碧尽山斜开画屏。虬须公子五侯客，
一饮千钟如建瓴。鸾咽姁唱圆无节，眉敛湘烟袖回雪。
清夜恩情四座同，莫令沟水东西别。亭亭蜡泪香珠残，
暗露晓风罗幕寒。飘飘戟带俨相次，二十四枝龙画竿。
裂管萦弦共繁曲，芳樽细浪倾春醪。高楼客散杏花多，
脉脉新蟾如瞪目。

卷 575_4 【莲浦谣】

温庭筠

鸣桡轧轧溪溶溶，废绿平烟吴苑东。水清莲媚两相向，
镜里见愁愁更红。白马金鞭大堤上，西江日夕多风浪。
荷心有露似骊珠，不是真圆亦摇荡。

卷 575_5 【郭处士击瓠歌】

温庭筠

佶栗金虬石潭古，勺陂潋滟幽修语。湘君宝马上神云，

碎佩丛铃满烟雨。吾闻三十六宫花离离，软风吹春星斗稀。
玉晨冷磬破昏梦，天露未干香著衣。兰钗委坠垂云发，
小响丁当逐回雪。晴碧烟滋重叠山，罗屏半掩桃花月。
太平天子驻云车，龙炉勃郁双蟠拏。宫中近臣抱扇立，
侍女低鬟落翠花。乱珠触续正跳荡，倾头不觉金乌斜。
我亦为君长叹息，缄情远寄愁无色。莫沾香梦绿杨丝。
千里春风正无力。

卷 575_6 【遐水谣】

温庭筠

天兵九月渡遐水，马踏沙鸣惊雁起。杀气空高万里情，
塞寒如箭伤眸子。狼烟堡上霜漫漫，枯叶号风天地干。
犀带鼠裘无暖色，清光炯冷黄金鞍。虏尘如雾昏亭障，
陇首年年汉飞将。麟阁无名期未归，楼中思妇徒相望。

卷 575_7 【晓仙谣】

温庭筠

玉妃唤月归海宫，月色澹白涵春空。银河欲转星靺鞨，
碧浪叠山埋早红。宫花有露如新泪，小苑丛丛入寒翠。
绮阁空传唱漏声，网轩未辨凌云字。遥遥珠帐连湘烟，
鹤扇如霜金骨仙。碧箫曲尽彩霞动，下视九州皆悄然。

秦王女骑红尾凤，半空回首晨鸡弄。雾盖狂尘亿兆家，
世人犹作牵情梦。

卷 575_8 【锦城曲】

温庭筠

蜀山攒黛留晴雪，簌笋蕨芽萦九折。江风吹巧剪霞绡，
花上千枝杜鹃血。杜鹃飞入岩下丛，夜叫思归山月中。
巴水漾情情不尽，文君织得春机红。怨魄未归芳草死，
江头学种相思子。树成寄与望乡人，白帝荒城五千里。

卷 575_9 【生谿屏风歌】

温庭筠

玉墀暗接昆仑井，井上无人金索冷。画壁阴森九子堂，
阶前细月铺花影。绣屏银鸭香蓊蒙，天上梦归花绕丛。
宜男漫作后庭草，不似樱桃千子红。

卷 575_10 【嘲春风】

温庭筠

春风何处好，别殿饶芳草。苒袅转鸾旗，萋萋吹雉葆。

扬芳历九门，澹荡入兰荪。争奈白团扇，时时偷主恩。

卷 575_11 【舞衣曲】

温庭筠

藕肠纤缕抽轻春，烟机漠漠娇娥颦。金梭淅沥透空薄，
剪落交刀吹断云。张家公子夜闻雨，夜向兰堂思楚舞。
蝉衫麟带压愁香，偷得莺簧锁金缕。管含兰气娇语悲，
胡槽雪腕鸳鸯丝。芙蓉力弱应难定，杨柳风多不自持，
回颦笑语西窗客，星斗寥寥波脉脉。不逐秦王卷象床，
满楼明月梨花白。

卷 575_12 【张静婉采莲歌】

温庭筠

兰膏坠发红玉春，燕钗拖颈抛盘云。城边杨柳向娇晚，
门前沟水波粼粼。麒麟公子朝天客，珂马珰珰度春陌。
掌中无力舞衣轻，剪断蛟绡破春碧。抱月飘烟一尺腰，
麝脐龙髓怜娇娆。秋罗拂水碎光动，露重花多香不销。
鸂鶒交交塘水满，绿芒如粟莲茎短。一夜西风送雨来，
粉痕零落愁红浅。船头折藕丝暗牵，藕根莲子相留连。
郎心似月月未缺，十五十六清光圆。

卷 575_13 【湘宫人歌】

温庭筠

池塘芳草湿，夜半东风起。生绿画罗屏，金壶贮春水。
黄粉楚宫人，芳花玉刻鳞。娟娟照棋烛，不语两含嚬。

卷 575_14 【黄昙子歌】

温庭筠

参差绿蒲短，摇艳云塘满。红潋荡融融，莺翁鸂鶒暖。
菱芊小成路，马上修蛾懒。罗衫裊回风，点粉金鹂卵。

卷 575_15 【鹧鸪词】

温庭筠

蜡烟如纛新蟾满，门外平沙草芽短。黑头丞相九天归。
夜听飞琼吹朔管。情远气调兰蕙薰，天香瑞彩含絪縕。
皓然纤指都揭血，日暖碧霄无片云。含商咀徵双幽咽，
软縠疏罗共萧屑。不尽长圆叠翠愁，柳风吹破澄潭月。
鸣梭淅沥金丝蕊，恨语殷勤陇头水。汉将营前万里沙，
更深一一霜鸿起。十二楼前花正繁，交枝簇蒂连壁门。

景阳宫女正愁绝，莫使此声催断魂。

卷 575_16 【照影曲】

温庭筠

景阳妆罢琼窗暖，欲照澄明香步懒。桥上衣多抱彩云，
金鳞不动春塘满。黄印额山轻为尘，翠鳞红稚俱含嚬。
桃花百媚如欲语，曾为无双今两身。

卷 575_17 【拂舞词】

温庭筠

黄河怒浪连天来，大响沄沄如殷雷。龙伯驱风不敢上，
百川喷雪高崔嵬。二十三弦何太哀，请公勿渡立徘徊。
下有狂蛟锯为尾，裂帆截棹磨霜齿。神椎凿石塞神潭，
白马趋渚赤尘起。公乎跃马扬玉鞭，灭没高蹄日千里。

卷 575_18 【太液池歌】

温庭筠

腥鲜龙气连清防，花风漾漾吹细光。叠澜不定照天井，

倒影荡摇晴翠长。平碧浅春生绿塘，云容雨态连青苍。
夜深银汉通柏梁，二十八宿朝玉堂。

卷 575_19 【雉场歌】

温庭筠

菱叶萋萋接烟曙，鸡鸣埭上梨花露。彩仗锵锵已合围，
绣翎白颈遥相妒。雕尾扇张金缕高，碎铃素拂骊驹豪。
绿场红迹未相接，箭发铜牙伤彩毛。麦陇桑阴小山晚，
六虬归去凝笳远。城头却望几含情，青亩春芜连石苑。

卷 575_20 【雍台歌】

温庭筠

太子池南楼百尺，入窗新树疏帘隔。黄金铺首画钩陈，
羽葆停幢拂交戟。盘纤阑楯临高台，帐殿临流鸾扇开。
早雁惊鸣细波起，映花卤簿龙飞回。

卷 575_21 【吴苑行】

温庭筠

锦雉双飞梅结子，平春远绿窗中起。吴江澹画水连空，

三尺屏风隔千里。小苑有门红扇开，天丝舞蝶共徘徊。
绮户雕楹长若此，韶光岁岁如归来。

卷 575_22 【常林欢歌】

温庭筠

宜城酒熟花覆桥，沙晴绿鸭鸣咬咬。秣桑绕舍麦如尾，
幽轧鸣机双燕巢。马声特特荆门道，蜜水扬光色如草。
锦荐金炉梦正长，东家咿喔鸡鸣早。

卷 575_23 【塞寒行】

温庭筠

燕弓弦劲霜封瓦，朴簌寒雕睇平野，一点黄尘起雁喧，
白龙堆下千蹄马。河源怒浊风如刀，剪断朔云天更高。
晚出榆关逐征北，惊沙飞迸冲貂袍。心许凌烟名不灭，
年年锦字伤离别。彩毫一画竟何荣，空使青楼泪成血。

卷 575_24 【湖阴词】

温庭筠

祖龙黄须珊瑚鞭，铁骢金面青连钱。虎髯拔剑欲成梦，

日压贼营如血鲜。海旗风急惊眠起，甲重光摇照湖水。
苍黄追骑尘外归，森索妖星阵前死。五陵愁碧春萋萋，
霸川玉马空中嘶。羽书如电入青琐，雪腕如槌催画鞞。
白虬天子金煌铓，高临帝座回龙章。吴波不动楚山晚，
花压阑干春昼长。

卷 575_25 【蒋侯神歌】

温庭筠

楚神铁马金鸣珂，夜动蛟潭生素波。商风刮水报西帝，
庙前古树蟠白蛇。吴王赤斧斫云阵，画堂列壁丛霜刃。
巫娥传意托悲丝，铎语琅琅理双鬓。湘烟刷翠湘山斜，
东方日出飞神鸦。青云自有黑龙子，潘妃莫结丁香花。

卷 575_26 【汉皇迎春词】

温庭筠

春草芊芊晴扫烟，宫城大锦红殷鲜。海日初融照仙掌，
淮王小队纓铃响。猎猎东风焰赤旗，画神金甲葱龙网。
钜公步辇迎句芒，复道扫尘燕髻长。豹尾竿前赵飞燕，
柳风吹尽眉间黄。碧草含情杏花喜，上林莺啭游丝起。
宝马摇环万骑归，恩光暗入帘栊里。

第五百七十六卷

卷 576_1 【兰塘词】

温庭筠

塘水汪汪鳬唼喋，忆上江南木兰楫。绣颈金须荡倒光，
团团皱绿鸡头叶。露凝荷卷珠净圆，紫菱刺短浮根缠。
小姑归晚红妆浅，镜里芙蓉照水鲜。东沟潏潏劳回首，
欲寄一杯琼液酒。知道无郎却有情，长教月照相思柳。

卷 576_2 【晚归曲】

温庭筠

格格水禽飞带波，孤光斜起夕阳多。湖西山浅似相笑，
菱刺惹衣攒黛蛾。青丝系船向江木，兰芽出土吴江曲。
水极晴摇泛滟红，草平春染烟绵绿。玉鞭骑马杨叛儿，
刻金作凤光参差。丁丁暖漏滴花影，催入景阳人不知。
弯堤弱柳遥相瞩，雀扇团圆掩香玉。莲塘艇子归不归，
柳暗桑秣闻布谷。

卷 576_3 【故城曲】

温庭筠

漠漠沙堤烟，堤西雉子斑。雉声何角角，麦秀桑阴闲。
游丝荡平绿，明灭时相续。白马金络头，东风故城曲。
故城殷贵嫔，曾占未来春。自从香骨化，飞作马蹄尘。

卷 576_4 【昆明池水战词】

温庭筠

汪汪积水光连空，重叠细纹晴漾红。赤帝龙孙鳞甲怒，
临流一盼生阴风。鼙鼓三声报天子，雕旌兽舰凌波起。
雷吼涛惊白石山，石鲸眼裂蟠蛟死。溟池海浦俱喧豗。
青帜白旌相次来。箭羽枪缨三百万，踏翻西海生尘埃。
茂陵仙去菱花老，唼唼游鱼近烟岛。渺莽残阳钓艇归，
绿头江鸭眠沙草。

卷 576_5 【谢公墅歌】

温庭筠

朱雀航南绕香陌，谢郎东墅连春碧。鸠眠高柳日方融，

绮榭飘飘紫庭客。文楸方罫花参差，心阵未成星满池。
四座无喧梧竹静，金蝉玉柄俱持颐。对局含情见千里，
都城已得长蛇尾。江南王气系疏襟，未许苻坚过淮水。

卷 576_6 【罩鱼歌】

温庭筠

朝罩罩城南，暮罩罩城西。两浆鸣幽幽，莲子相高低。
持罩入深水，金鳞大如手。鱼尾迸圆波，千珠落湘藕。
风飐飐，雨离离，菱尖茭刺鸂鶒飞。水连网眼白如影，
淅沥篷声寒点微。楚岸有花花盖屋，金塘柳色前溪曲。
悠溶杳若去无穷，五色澄潭鸭头绿。

卷 576_7 【春洲曲】

温庭筠

韶光染色如蛾翠，绿湿红鲜水容媚。苏小慵多兰渚闲，
融融浦日鹄鶑寐。紫骝蹀躞金衔嘶，岸上扬鞭烟草迷。
门外平桥连柳堤，归来晚树黄莺啼。

卷 576_8 【台城晓朝曲】

温庭筠

司马门前火千炬，阑干星斗天将曙。朱网龕髻丞相车，
晓随叠鼓朝天去。博山镜树香_三茸，袅袅浮航金画龙。
大江敛势避辰极，两阙深严烟翠浓。

卷 576_9 【走马楼三更曲】

温庭筠

春姿暖气昏神沼，李树拳枝紫芽小。玉皇夜入未央宫，
长火千条照栖鸟。马过平桥通画堂，虎幡龙戟风飘扬。
帘间清唱报寒点，丙舍无人遗烬香。

卷 576_10 【达摩支曲】

温庭筠

捣麝成尘香不灭，拗莲作寸丝难绝。红泪文姬洛水春，
白头苏武天山雪。君不见无愁高纬花漫漫，
漳浦宴余清露寒。一旦臣僚共囚虏，欲吹羌管先洊澜。
旧臣头鬓霜华早，可惜雄心醉中老。万古春归梦不归，

邺城风雨连天草。

卷 576_11 【阳春曲】

温庭筠

云母空窗晓烟薄，香昏龙气凝晖阁。霏霏雾雨杏花天，
帘外春威著罗幕。曲阑伏槛金麒麟，沙苑芳郊连翠茵。
厩马何能啮芳草，路人不敢随流尘。

卷 576_12 【湘东宴曲】

温庭筠

湘东夜宴金貂人，楚女含情娇翠嚬。玉管将吹插钿带，
锦囊斜拂双麒麟。重城漏断孤帆去，唯恐琼签报天曙。
万户沈沈碧树圆，云飞雨散知何处。欲上香车俱脉脉，
清歌响断银屏隔。堤外红尘蜡炬归，楼前澹月连江白。

卷 576_13 【东郊行】

温庭筠

斗鸡台下东西道，柳覆班骓蝶萦草。垅霭韶容锁澹愁，

青筐叶尽蚕应老。绿渚幽香生白蘋，差差小浪吹鱼鳞。
王孙骑马有归意，林彩着空如细尘。安得人生各相守，
烧船破栈休驰走。世上方应无别离，路傍更长千株柳。

卷 576_14 【水仙谣】

温庭筠

水客夜骑红鲤鱼，赤鸾双鹤蓬瀛书。轻尘不起雨新霁，
万里孤光含碧虚。露魄冠轻见云发，寒丝七炷香泉咽。
夜深天碧乱山姿，光碎平波满船月。

卷 576_15 【东峰歌】

温庭筠

锦砾潺湲玉溪水，晓来微雨藤花紫。冉冉山鸡红尾长，
一声樵斧惊飞起。松刺梳空石差齿，烟香风软人参蕊。
阳崖一梦伴云根，仙菌灵芝梦魂里。

卷 576_16 【会昌丙寅丰岁歌】

温庭筠

丙寅岁，休牛马，风如吹烟，日如渥赭。九重天子调天下，

春绿将年到西野。西野翁，生儿童，门前好树青^二茸。
^二茸单衣麦田路，村南娶妇桃花红。新姑车右及门柱，
粉项韩凭双扇中。喜气自能成岁丰，农祥尔物来争功。

卷 576_17 【碌碌古词】

温庭筠

左亦不碌碌，右亦不碌碌。野草自根肥，羸牛生健犊。
融蜡作杏蒂，男儿不恋家。春风破红意，女颊如桃花。
忠言未见信，巧语翻咨嗟。一鞘无两刃，徒劳油壁车。

卷 576_18 【春野行】

温庭筠

草浅浅，春如剪。花压李娘愁，饥蚕欲成茧。
东城年少气堂堂，金丸惊起双鸳鸯。含羞更问卫公子，
月到枕前春梦长。

卷 576_19 【醉歌】

温庭筠

檐柳初黄燕新乳，晓碧芊绵过微雨。树色深含台榭情，

莺声巧作烟花主。锦袍公子陈杯觞，拨醅百瓮春酒香。
入门下马问谁在，降阶握手登华堂。临邛美人连山眉，
低抱琵琶含怨思。朔风绕指我先笑，明月入怀君自知。
劝君莫惜金樽酒，年少须臾如覆手。辛勤到老慕簪瓢，
于我悠悠竟何有。洛阳卢仝称文房，妻子脚秃春黄粮。
阿耆光颜不识字，指麾豪俊如驱羊。天犀压断朱鼯鼠，
瑞锦惊飞金凤凰。其余岂足沾牙齿，欲用何能报天子。
弩马垂头抢暝尘，骅骝一日行千里。但有沉冥醉客家，
支颐瞪目持流霞。唯恐南国风雨落，碧芜狼藉棠梨花。

卷 576_20 【江南曲】

温庭筠

妾家白蘋浦，日上芙蓉楫。轧轧摇桨声，移舟入茭叶。
溪长茭叶深，作底难相寻。避郎郎不见，鸂鶒自浮沉。
拾萍萍无根，采莲莲有子。不作浮萍生，宁为藕花死。
岸傍骑马郎，乌帽紫游缰。含愁复含笑，回首问横塘。
妾住金陵浦，门前朱雀航。流苏持作帐，芙蓉持作梁。
出入金犊幃，兄弟侍中郎。前年学歌舞，定得郎相许。
连娟眉绕山，依约腰如杵。凤管悲若咽，鸾弦娇欲语。
扇薄露红铅，罗轻压金缕。明月西南楼，珠帘玳瑁钩。
横波巧能笑，弯蛾不识愁。花开子留树，草长根依土。
早闻金沟远，底事归郎许。不学杨白花，朝朝泪如雨。

卷 576_21 【堂堂曲】

温庭筠

钱唐岸上春如织，淼淼寒潮带晴色。淮南游客马连嘶，
碧草迷人归不得。风飘客意如吹烟。纤指殷勤伤雁弦。
一曲堂堂红烛筵，长鲸泻酒如飞泉。

卷 576_22 【惜春词】

温庭筠

百舌问花花不语，低回似恨横塘雨。蜂争粉蕊蝶分香，
不似垂杨惜金缕。愿君留得长妖韶，莫逐东风还荡摇。
秦女含嚬向烟月，愁红带露空迢迢。

卷 576_23 【春愁曲】

温庭筠

红丝穿露珠帘冷，百尺哑哑下纤纟。远翠愁山入卧屏，
两重云母空烘影。凉簪坠发春眠重，玉兔温香柳如梦。
锦叠空床委堕红，飏飏扫尾双金凤。蜂喧蝶驻俱悠扬，
柳拂赤阑纤草长。觉后梨花委平绿，春风和雨吹池塘。

卷 576_24 【苏小小歌】

温庭筠

买莲莫破券，买酒莫解金。酒里春容抱离恨，
水中莲子怀芳心。吴宫女儿腰似束，家在钱唐小江曲。
一自檀郎逐便风，门前春水年年绿。

卷 576_25 【春江花月夜词】

温庭筠

玉树歌阑海云黑，花庭忽作青芜国。秦淮有水水无情，
还向金陵漾春色。杨家二世安九重，不御华芝嫌六龙。
百幅锦帆风力满，连天展尽金芙蓉。珠翠丁星复明灭，
龙头劈浪哀笳发。千里涵空澄水魂，万枝破鼻飘香雪。
漏转霞高沧海西，颇黎枕上闻天鸡。蛮弦代写曲如语，
一醉昏昏天下迷。四方倾动烟尘起，犹在浓香梦魂里。
后主荒宫有晓莺，飞来只隔西江水。

卷 576_26 【懊恼曲】

温庭筠

藕丝作线难胜针，蕊粉染黄那得深。玉白兰芳不相顾，

青楼一笑轻千金。莫言自古皆如此，健剑荆钟铅绕指。
三秋庭绿尽迎霜，惟有荷花守红死。庐江小吏朱斑轮，
柳缕吐芽香玉春。两股金钗已相许，不令独作空成尘。
悠悠楚水流如马，恨紫愁红满平野。野土千年怨不平，
至今烧作鸳鸯瓦。

卷 576_27 【三洲词】

温庭筠

团圆莫作波中月，洁白莫为枝上雪。月随波动碎潋潋，
雪似梅花不堪折。李娘十六青丝发，画带双花为君结。
门前有路轻别离，唯恐归来旧香灭。

第五百七十七卷

卷 577_1 【春晓曲】

温庭筠

家临长信往来道，乳燕双双拂烟草。油壁车轻金犢肥，
流苏帐晓春鸡早。笼中娇鸟暖犹睡，帘外落花闲不扫。
衰桃一树近前池，似惜红颜镜中老。

卷 577_2 【猎骑辞】

温庭筠

早辞平展殿，夕奉湘南宴。香兔抱微烟，重鳞叠轻扇。
蚕饥使君马，雁避将军箭。宝柱惜离弦，流黄悲赤县。
理钗低舞鬓，换袖回歌面。晚柳未如丝，春花已如霰。
所嗟故里曲，不及青楼宴。

卷 577_3 【西州词】

温庭筠

悠悠复悠悠，昨日下西州。西州风色好，遥见武昌楼。
武昌何郁郁，侬家定无匹。小妇被流黄，登楼抚瑶瑟。
朱弦繁复轻，素手直凄清。一弹三四解，掩抑似含情。
南楼登且望，西江广复平。艇子摇两桨，催过石头城。
门前乌臼树，惨澹天将曙。鸂鶒飞复还，郎随早帆去。
回头语同伴，定复负情依。去帆不安幅，作抵使西风。
他日相寻索，莫作西州客。西州人不归，春草年年碧。

卷 577_4 【烧歌】

温庭筠

起来望南山，山火烧山田。微红夕如灭，短焰复相连。
差差向岩石，冉冉凌青壁。低随回风尽，远照檐茅赤。
邻翁能楚言，倚插欲潸然。自言楚越俗，烧畚为早田。
豆苗虫促促，篱上花当屋。废栈豕归栏，广场鸡啄粟。
新年春雨晴，处处赛神声。持钱就人卜，敲瓦隔林鸣。
卜得山上卦，归来桑枣下。吹火向白茅，腰镰映赭蔗。
风驱柵叶烟，柵树连平山。迸星拂霞外，飞烬落阶前。
仰面呻复嚏，鸦娘咒丰岁。谁知苍翠容，尽作官家税。

卷 577_5 【长安寺】

温庭筠

仁祠写露宫，长安佳气浓。烟树含葱蒨，金刹映_三茸。
绣户香焚象，珠网玉盘龙。宝题斜翡翠，天井倒芙蓉。
幡长回远吹，窗虚含晓风。游骑迷青锁，归鸟思华钟。
云拱承跗迤，羽葆背花重。所嗟莲社客，轻荡不相从。

卷 577_6 【和沈参军招友生观芙蓉池】

温庭筠

桂栋坐清晓，瑶琴商凤丝。况闻楚泽香，适与秋风期。
遂从棹萍客，静啸烟草湄。倒影回澹荡，愁红媚涟漪。
湘茎久鲜涩，宿雨增离披。而我江海意，楚游动梦思。
北渚水云叶，南塘烟雾枝。岂亡台榭芳，独与鸥鸟知。
珠坠鱼迸浅，影多鳧泛迟。落英不可攀，返照昏澄陂。

卷 577_7 【寓怀】

温庭筠

诚足不顾得，妄矜徒有言。语斯谅未尽，隐显何悠然。

洵彼都邑盛，眷惟车马喧。自期尊客卿，非意干王孙。
衔知有贞爵，处实非厚颜。苟无海岱气，奚取壶浆恩。
唯丝南山杨，适我松菊香。鹏鹄诚未忆，谁谓凌风翔。

卷 577_8 【余昔自西滨得兰数本，移艺于庭，亦既逾岁，而芄然蕃殖，自余游者未始以芳草为遇矣。因悲夫物有厌常而反，不若混然者有之焉，遂寄情于此】

温庭筠

寓赏本殊致，意幽非我情。吾常有流浅，外物无重轻。
各言艺幽深，彼美香素茎。岂为赏者设，自保孤根生。
易地无赤株，丽土亦同荣。赏际林壑近，泛余烟露清。
余怀既郁陶，尔类徒纵横。妍蚩苟不信，宠辱何为惊。
贞隐谅无迹，激时犹拣名。幽丛霜绿晚，岂必怀归耕。

卷 577_9 【秋日】

温庭筠

爽气变昏旦，神皋遍原隰。烟华久荡摇，石涧仍清急。
柳暗山犬吠，蒲荒水禽立。菊花明欲迷，枣叶光如湿。
天籁思林岭，车尘倦都邑。譟张夙所违，悔吝何由入。
芳草秋可藉，幽泉晓堪汲。牧羊烧外鸣，林果雨中拾。
复此遂闲旷，翛然脱羁紲。田收鸟雀喧，气肃龙蛇蛰。

佳节足丰穰，良朋阻游集。沉机日寂寥，葆素常呼吸。
投迹倦攸往，放怀志所执。良时有东笛，吾将事蓑笠。

卷 577_10 【七夕】

温庭筠

鸣机札札停金梭，芙蓉澹荡生池波。神轩红粉陈香罗，
凤低蝉薄愁双蛾。微光奕奕凌天河，鸾咽鹤唳飘飖歌。
弯桥销尽愁奈何，天气骀荡云陂陀。平明花木有秋意，
露湿彩盘蛛网多。

卷 577_11 【酬友人】

温庭筠

辞荣亦素尚，倦游非夙心。宁复思金籍，独此卧烟林。
闲云无定貌，佳树有余阴。坐久茝荷发，钓阑茭苇深。
游鱼自摇漾，浴鸟故浮沉。唯君清露夕，一为洒烦襟。

卷 577_12 【观舞妓】

温庭筠

朔音悲嘒管，瑶踏动芳尘。总袖时增怨，听破复含嚬。

凝腰倚风软，花题照锦春。朱弦固凄紧，琼树亦迷人。

卷 577_13 【边笳曲】

温庭筠

朔管迎秋动，雕阴雁来早。上郡隐黄云，天山吹白草。
嘶马悲寒磧，朝阳照霜堡。江南戍客心，门外芙蓉老。

卷 577_14 【经西坞偶题】

温庭筠

摇摇弱柳黄鹂啼，芳草无情人自迷。日影明灭金色鲤，
杏花唼喋青头鸡。微红奈蒂惹峰粉，洁白芹芽穿燕泥。
借问含嚔向何事，昔年曾到武陵溪。

卷 577_15 【金虎台】

温庭筠

碧草连金虎，青苔蔽石麟。皓齿芳尘起，纤腰玉树春。
倚瑟红铅湿，分香翠黛嚔。谁言奉陵寝，相顾复沾巾。

卷 577_16 【侠客行】

温庭筠

欲出鸿都门，阴云蔽城阙。宝剑黯如水，微红湿余血。
白马夜频惊，三更霸陵雪。

卷 577_17 【咏晓】

温庭筠

虫歇纱窗静，鸦散碧梧寒。稍惊朝珮动，犹传清漏残。
乱珠凝烛泪，微红上露盘。褰衣复理鬓，余润拂芝兰。

卷 577_18 【芙蓉】

温庭筠

刺茎澹荡碧，花片参差红。吴歌秋水冷，湘庙夜云空。
浓艳香露里，美人青镜中。南楼未归客，一夕练塘东。

卷 577_19 【敕勒歌塞北】

温庭筠

敕勒金帟壁，阴山无岁华。帐外风飘雪，营前月照沙。
羌儿吹玉管，胡姬踏锦花。却笑江南客，梅落不归家。

卷 577_20 【邯郸郭公词】

温庭筠

金笳悲故曲，玉座积深尘。言是邯郸伎，不见邺城人。
青苔竟埋骨，红粉自伤神。唯有漳河柳，还向旧营春。

卷 577_21 【古意】

温庭筠

莫莫复莫莫，丝萝缘涧壑。散木无斧斤，纤茎得依托。
枝低浴鸟歇，根静悬泉落。不虑见春迟，空伤致身错。

卷 577_22 【齐宫】

温庭筠

白马杂金饰，言从雕辇回。粉香随笑度，鬓态伴愁来。
远水斜如剪，青莎绿似裁。所恨章华日，冉冉下层台。

卷 577_23 【春日】

温庭筠

柳岸杏花稀，梅梁乳燕飞。美人鸾镜笑，嘶马雁门归。
楚宫云影薄，台城心赏违。从来千里恨，边色满戎衣。

卷 577_24 【咏春幡】

温庭筠

闲庭见早梅，花影为谁栽。碧烟随刃落，蝉鬓觉春来。
代郡嘶金勒，梵声悲镜台。玉钗风不定，香步独徘徊。

卷 577_25 【陈宫词】

温庭筠

鸡鸣人草草，香辇出宫花。妓语细腰转，马嘶金面斜。
早莺随彩仗，惊雉避凝笳。淅沥湘风外，红轮映曙霞。

卷 577_26 【春日野行】

温庭筠

骑马踏烟莎，青春奈怨何。蝶翎朝粉尽，鸦背夕阳多。
柳艳欺芳带，山愁萦翠蛾。别情无处说，方寸是星河。

卷 577_27 【咏嚢】

温庭筠

毛羽敛愁翠，黛娇攒艳春。恨容偏落泪，低态定思人。
枕上梦随月，扇边歌绕尘。玉钩鸾不住，波浅石磷磷。

卷 577_28 【中书令裴公挽歌词二首】

温庭筠

王俭风华首，萧何社稷臣。丹阳布衣客，蓬渚白头人。
铭勒燕山暮，碑沉汉水春。从今虚醉饱，无复污车茵。

箭下妖星落，风前杀气回。国香荀令去，楼月庾公来。
玉玺终无虑，金滕意不开。空嗟荐贤路，芳草满燕台。

卷 577_29 【唐庄恪太子挽歌词二首】

温庭筠

叠鼓辞宫殿，悲笳降杳冥。影离云外日，光灭火前星。
邺客瞻秦苑，商公下汉庭。依依陵树色，空绕古原青。

东府虚容卫，西园寄梦思。凤悬吹曲夜，鸡断问安时。
尘陌都人恨，霜郊赍马悲。唯余埋璧地，烟草近丹墀。

卷 577_30 【秘书刘尚书挽歌词二首】

温庭筠

王笔活鸾凤，谢诗生芙蓉。学筵开绛帐，谈柄发洪钟。

粉署见飞鹏，玉山猜卧龙。遗风丽清韵，萧散九原松。

麈尾近良玉，鹤裘吹素丝。坏陵殷浩谪，春墅谢安棋。
京口贵公子，襄阳诸女儿。折花兼踏月，多唱柳郎词。

卷 577_31 【太子西池二首】

温庭筠

梨花雪压枝，莺啭柳如丝。懒逐妆成晓，春融梦觉迟。
鬓轻全作影，颦浅未成眉。莫信张公子，窗间断暗期。

花红兰紫茎，愁草雨新晴。柳占三春色，莺偷百鸟声。
日长嫌辇重，风暖觉衣轻。薄暮香尘起，长杨落照明。

卷 577_32 【西陵道士茶歌】

温庭筠

乳窦泫泫通石脉，绿尘愁草春江色。润花入井水味香，
山月当人松影直。仙翁白扇霜鸟翎，拂坛夜读黄庭经。
疏香皓齿有余味，更觉鹤心通杳冥。

卷 577_33 【过西堡塞北】

温庭筠

浅草干河阔，丛棘废城高。白马犀匕首，黑裘金佩刀。
霜清彻兔目，风急吹雕毛。一经何用厄，日暮涕沾袍。

第五百七十八卷

卷 578_1 【送李亿东归】

温庭筠

黄山远隔秦树，紫禁斜通渭城。别路青青柳弱，
前溪漠漠苔生。和风澹荡归客，落月殷勤早莺。
灞上金樽未饮，宴歌已有余声。

卷 578_2 【开圣寺】

温庭筠

路分谿石夹烟丛，十里萧萧古树风。出寺马嘶秋色里，
向陵鸦乱夕阳中。竹间泉落山厨静，塔下僧归影殿空。
犹有南朝旧碑在，耻将兴废问休公。

卷 578_3 【赠蜀府将】

温庭筠

十年分散剑关秋，万事皆随锦水流。志气已曾明汉节，

功名犹自滞吴钩。雕边认箭寒云重，马上听笳塞草愁。
今日逢君倍惆怅，灌婴韩信尽封侯。

卷 578_4 【西江贻钓叟戛生】

温庭筠

晴江如镜月如钩，泛滟苍茫送客愁。衣泪潜生竹枝曲，
春潮遥上木兰舟。事随云去身难到，梦逐烟销水自流。
昨日欢娱竟何在，一枝梅谢楚江头。

卷 578_5 【寄清源寺僧】

温庭筠

石路无尘竹径开，昔年曾伴戴颙来。窗间半偈闻钟后，
松下残棋送客回。帘向玉峰藏夜雪，砌因蓝水长秋苔。
白莲社里如相问，为说游人是姓雷。

卷 578_6 【重游圭峰宗密禅师精庐】

温庭筠

百尺青崖三尺坟，微言已绝杳难闻。戴颙今日称居士，

支遁他年识领军。暂对杉松如结社，偶同麋鹿自成群。
故山弟子空回首，葱岭唯应见宋云。

卷 578_7 【题李处士幽居】

温庭筠

水玉簪头白角巾，瑶琴寂历拂轻尘。浓阴似帐红薇晚，
细雨如烟碧草春。隔竹见笼疑有鹤，卷帘看画静无人。
南山自是忘年友，谷口徒称郑子真。

卷 578_8 【利州南渡】

温庭筠

澹然空水对斜晖，曲岛苍茫接翠微，波上马嘶看棹去，
柳边人歇待船归。数丛沙草群鸥散，万顷江田一鹭飞。
谁解乘舟寻范蠡，五湖烟水独忘机。

卷 578_9 【赠李将军】

温庭筠

谁言荀美爱功勋，年少登坛众所闻。曾以能书称内史，

又因明易号将军。金沟故事春长在，玉轴遗文火半焚。
不学龙骧画山水，醉乡无迹似闲云。

卷 578_10 【寒食日作】

温庭筠

红深绿暗径相交，抱暖含芳披紫袍。彩索平时墙婉婉，
轻球落处晚寥梢，窗中草色妒鸡卵，盘上芹泥憎燕巢。
自有玉楼春意，不能骑马度烟郊。

卷 578_11 【李羽处士寄新酝走笔戏酬】

温庭筠

高谈有伴还成薮，沉醉无期即是乡。已恨流莺欺谢客，
更将浮蚁与刘郎。檐前柳色分张绿，窗外花枝借助香。
所恨玳筵红烛夜，草玄寥落近回塘。

卷 578_12 【郊居秋日有怀一二知己】

温庭筠

稻田鳬雁满晴沙，钓渚归来一径斜。门带果林招邑吏，

井分蔬圃属邻家。皋原寂历垂禾穗，桑竹参差映豆花。
自笑谩怀经济策，不将心事许烟霞。

卷 578_13 【题友人池亭】

温庭筠

月榭风亭绕曲池，粉垣回互瓦参差。侵帘片白摇翻影，
落镜愁红写倒枝。鸂鶒刷毛花荡漾，鹭鸶拳足雪离披。
山翁醉后如相忆，羽扇清樽我自知。

卷 578_14 【南湖】

温庭筠

湖上微风入槛凉，翻翻菱荇满回塘。野船著岸偎春草，
水鸟带波飞夕阳。芦叶有声疑雾雨，浪花无际似潇湘。
飘然篷艇东归客，尽日相看忆楚乡。

卷 578_15 【赠袁司录】

温庭筠

一朝辞满有心期，花发杨园雪压枝。刘尹故人谙往事，

谢郎诸弟得新知。金钗醉就胡姬画，玉管闲留洛客吹。
记得襄阳耆旧语，不堪风景岷山碑。

卷 578_16 【题西明寺僧院】

温庭筠

曾识匡山远法师，低松片石对前墀。为寻名画来过院，
因访闲人得看棋。新雁参差云碧处，寒鸦辽乱叶红时。
自知终有张华识，不向沧洲理钓丝。

卷 578_17 【偶题】

温庭筠

微风和暖日鲜明，草色迷人向渭城。吴客卷帘闲不语，
楚娥攀树独含情。红垂果蒂樱桃重，黄染花丛蝶粉轻。
自恨青楼无近信，不将心事许卿卿。

卷 578_18 【寄湘阴阎少府乞钓轮子】

温庭筠

钓轮形与月轮同，独茧和烟影似空。若向三湘逢雁信，

莫辞千里寄渔翁。篷声夜滴松江雨，菱叶秋传镜水风。
终日垂钓还有意，尺书多在锦鳞中。

卷 578_19 【哭王元裕】

温庭筠

闻说萧郎逐逝川，伯牙因此绝清弦。柳边犹忆青骢影，
坟上俄生碧草烟。篋里诗书疑谢后，梦中风貌似潘前。
他时若到相寻处，碧树红楼自宛然。

卷 578_20 【法云寺双桧】

温庭筠

晋朝名辈此离群，想对浓阴去住分。题处尚寻王内史，
画时应是顾将军。长廊夜静声疑雨，古殿秋深影胜云。
一下南台到人世，晓泉清籁更难闻。

卷 578_21 【送陈嘏之侯官兼简李常侍】

温庭筠

纵得步兵无绿蚁，不缘句漏有丹砂。殷勤为报同袍友，

我亦无心似海槎。春服照尘连草色，夜船闻雨滴芦花。
梅仙自是青云客，莫羨相如却到家。

卷 578_22 【春日野行】

温庭筠

雨涨西塘金堤斜，碧草芊芊晴吐芽。野岸明媚山芍药，
水田叫噪官虾蟆。镜中有浪动菱蔓，陌上无风飘柳花。
何事轻桡句溪客，绿萍方好不归家。

卷 578_23 【溪上行】

温庭筠

绿塘漾漾烟濛濛，张翰此来情不穷。雪羽褰褰立倒影，
金鳞拨刺跳晴空。风翻荷叶一向白，雨湿蓼花千穗红。
心羡夕阳波上客，片时归梦钓船中。

卷 578_24 【投翰林萧舍人】

温庭筠

人间鹓鹭杏难从，独恨金扉直九重。万象晚归仁寿镜，

百花春隔景阳钟。紫微芒动词初出，红烛香残诰未封。
每过朱门爱庭树，一枝何日许相容。

卷 578_25 【春日偶作】

温庭筠

西园一曲艳阳歌，扰扰车尘负薜萝。自欲放怀犹未得，
不知经世竟如何。夜闻猛雨判花尽，寒恋重衾觉梦多。
钓渚别来应更好，春风还为起微波。

卷 578_26 【春暮宴罢寄宋寿先辈】

温庭筠

斜掩朱门花外钟，晓莺时节好相逢。窗间桃蕊宿妆在，
雨后牡丹春睡浓。苏小风姿迷下蔡，马卿才调似临邛。
谁怜芳草生三径，参佐桥西陆士龙。

卷 578_27 【马嵬驿】

温庭筠

穆满曾为物外游，六龙经此暂淹留。返魂无验青烟灭，

埋血空生碧草愁。香辇却归长乐殿，晓钟还下景阳楼。
甘泉不复重相见，谁道文成是故侯。

卷 578_28 【和道溪君别业】

温庭筠

积润初销碧草新，凤阳晴日带雕轮。风飘弱柳平桥晚，
雪点寒梅小苑春。屏上楼台陈后主，镜中金翠李夫人。
花房透露红珠落，蛱蝶双飞护粉尘。

卷 578_29 【奉天西佛寺】

温庭筠

忆昔狂童犯顺年，玉虬闲暇出甘泉。宗臣欲舞千钧剑，
追骑犹观七宝鞭。星背紫垣终扫地，日归黄道却当天。
至今南顿诸耆旧，犹指榛芜作弄田。

卷 578_30 【题望苑驿】

温庭筠

弱柳千条杏一枝，半含春雨半垂丝。景阳寒井人难到，

长乐晨钟鸟自知。花影至今通博望，树名从此号相思。
分明十二楼前月，不向西陵照盛姬。

卷 578_31 【寄分司元庶子兼呈元处士】

温庭筠

闭门高卧莫长嗟，水木凝晖属谢家。缙岭参差残晓雪，
洛波清浅露晴沙。刘公春尽芜菁色，华廐愁深苜蓿花。
月榭知君还怅望，碧霄烟阔雁行斜。

卷 578_32 【题柳】

温庭筠

杨柳千条拂面丝，绿烟金穗不胜吹。香随静婉歌尘起，
影伴娇娆舞袖垂。羌管一声何处曲，流莺百啭最高枝。
千门九陌花如雪，飞过宫墙两自知。

卷 578_33 【和友人悼亡】

温庭筠

玉貌潘郎泪满衣，画罗轻鬓雨霏微。红兰委露愁难尽，

白马朝天望不归。宝镜尘昏鸾影在，钿筝弦断雁行稀。
春来多少伤心事，碧草侵阶粉蝶飞。

卷 578_34 【李羽处士故里】

温庭筠

柳不成丝草带烟，海槎东去鹤归天。愁肠断处春何限，
病眼开时月正圆。花若有情还怅望，水应无事莫潺湲。
终知此恨销难尽，辜负南华第一篇。

卷 578_35 【却经商山寄昔同行入】

温庭筠

曾道逍遥第一篇，尔来无处不恬然。便同南郭能忘象，
兼笑东林学坐禅。人事转新花烂熳，客程依旧水潺湲，
若教犹作当时意，应有垂丝在鬓边。

卷 578_36 【池塘七夕】

温庭筠

月出西南露气秋，绮罗河汉在斜沟。杨家绣作鸳鸯幔，

张氏金为翡翠钩。香烛有花妨宿燕，画屏无睡待牵牛。
万家砧杵三篙水，一夕横塘似旧游。

卷 578_37 【偶游】

温庭筠

曲巷斜临一水间，小门终日不开关。红珠斗帐樱桃熟，
金尾屏风孔雀闲。云髻几迷芳草蝶，额黄无限夕阳山。
与君便是鸳鸯侣，休向人间觅往还。

卷 578_38 【寄河南杜少尹】

温庭筠

十载归来鬓未凋，玳簪珠履见常僚。岂关名利分荣路，
自有才华作庆霄。鸟影参差经上苑，骑声断续过中桥。
夕阳亭畔山如画，应念田歌正寂寥。

卷 578_39 【赠知音】

温庭筠

翠羽花冠碧树鸡，未明先向短墙啼。窗间谢女青蛾敛，

门外萧郎白马嘶。星汉渐移庭竹影，露珠犹缀野花迷。
景阳宫里钟初动，不语垂鞭上柳堤。

卷 578_40 【过陈琳墓】

温庭筠

曾于青史见遗文，今日飘蓬过古坟。词客有灵应识我，
霸才无主始怜君。石麟埋没藏春草，铜雀荒凉对暮云。
莫怪临风倍惆怅，欲将书剑学从军。

卷 578_41 【题崔公池亭旧游】

温庭筠

皎镜方塘菡萏秋，此来重见采莲舟。谁能不逐当年乐，
还恐添成异日愁。红艳影多风袅袅，碧空云断水悠悠。
檐前依旧青山色，尽日无人独上楼。

卷 578_42 【回中作】

温庭筠

苍莽寒空远色愁，呜呜戍角上高楼。吴姬怨思吹双管，

燕客悲歌别五侯。千里关山边草暮，一星烽火朔云秋。
夜来霜重西风起，陇水无声冻不流。

卷 578_43 【西江上送渔父】

温庭筠

却逐严光向若耶，钓轮菱棹寄年华。三秋梅雨愁枫叶，
一夜篷舟宿苇花。不见水云应有梦，偶随鸥鹭便成家。
白蘋风起楼船暮，江燕双双五两斜。

卷 578_44 【经故秘书崔监扬州南塘旧居】

温庭筠

昔年曾识范安成，松竹风姿鹤性情。西掖曙河横漏响，
北山秋月照江声。乘舟觅吏经舆县，为酒求官得步兵。
千顷水流通故墅，至今留得谢公名。

卷 578_45 【七夕】

温庭筠

鹊归燕去两悠悠，青琐西南月似钩。天上岁时星右转，

世间离别水东流。金风入树千门夜，银汉横空万象秋。
苏小横塘通桂楫，未应清浅隔牵牛。

卷 578_46 【题韦筹博士草堂】

温庭筠

玄晏先生已白头，不随鸂鶒狎群鸥。元卿谢免开三径，
平仲朝归卧一裘。醉后独知殷甲子，病来犹作晋春秋。
沧浪未濯尘缨在，野水无情处处流。

卷 578_47 【和友人题壁】

温庭筠

冲尚犹来出范围，肯将经世作风徽。三台位缺严陵卧，
百战功高范蠡归。自欲一鸣惊鹤寝，不应孤愤学牛衣。
西州未有看棋暇，涧户何由得掩扉。

卷 578_48 【春日将欲东归寄新及第苗绅先辈】

温庭筠

几年辛苦与君同，得丧悲欢尽是空。犹喜故人先折桂，

自怜羁客尚飘蓬。三春月照千山道，十日花开一夜风。
知有杏园无路入，马前惆怅满枝红。

卷 578_49 【经李征君故居】

温庭筠

露浓烟重草萋萋，树映阑干柳拂堤。一院落花无客醉，
五更残月有莺啼。芳筵想像情难尽，故榭荒凉路已迷。
惆怅羸骖往来惯，每经门巷亦长嘶。

卷 578_50 【送崔郎中赴幕】

温庭筠

一别黔巫似断弦，故交东去更凄然。心游目送三千里，
雨散云飞二十年。发迹岂劳天上桂，属词还得幕中莲。
相思休话长安远，江月随人处处圆。

卷 578_51 【经旧游】

温庭筠

珠箔金钩对彩桥，昔年于此见娇娆。香灯怅望飞琼鬓，

凉月殷勤碧玉箫。屏倚故窗山六扇，柳垂寒砌露千条。
坏墙经雨苍苔遍，拾得当时旧翠翘。

卷 578_52 【老君庙】

温庭筠

紫气氤氲捧半岩，莲峰仙掌共巉巉。庙前晚色连寒水，
天外斜阳带远帆。百二关山扶玉座，五千文字闋瑶缄。
自怜金骨无人识，知有飞龟在石函。

卷 578_53 【过五丈原】

温庭筠

铁马云雕久绝尘，柳阴高压汉营春。天晴杀气屯关右，
夜半妖星照渭滨。下国卧龙空误主，中原逐鹿不因人。
象床锦帐无言语，从此谯周是老臣。

卷 578_54 【和友人伤歌姬】

温庭筠

月缺花残莫怆然，花须终发月终圆。更能何事销芳念，

亦有浓华委逝川。一曲艳歌留婉转，九原春草妒婵娟。
王孙莫学多情客，自古多情损少年。

卷 578_55 【山中与诸道友夜坐闻边防不宁因示同志】

温庭筠

龙砂铁马犯烟尘，迹近群鸥意倍亲。风卷蓬根屯戊己，
月移松影守庚申。稻粱岂足为经济，岩壑何尝是隐沦。
心许故人知此意，古来知者竟谁人。

卷 578_56 【秘书省有贺监知章草题诗，笔力遒健，风尚高远，拂尘寻玩，因有此作】

温庭筠

越溪渔客贺知章，任达怜才爱酒狂。鸂鶒苇花随钓艇，
蛤蜊菰菜梦横塘。几年凉月拘华省，一宿秋风忆故乡。
荣路脱身终自得，福庭回首莫相忘。出笼鸾鹤归辽海，
落笔龙蛇满坏墙。李白死来无醉客，可怜神彩吊残阳。

卷 578_57 【题裴晋公林亭】

温庭筠

谢傅林亭暑气微，山丘零落閤音微。东山终为苍生起，

南浦虚言白首归。池凤已传春水浴，渚禽犹带夕阳飞。
悠然到此忘情处，一日何妨有万几。

第五百七十九卷

卷 579_1 【车驾西游因而有作】

温庭筠

宣曲长杨瑞气凝，上林狐兔待秋鹰。
谁将词赋陪雕辇，寂寞相如卧茂林。

卷 579_2 【伤温德彝】

温庭筠

昔年戎虏犯榆关，一败龙城匹马还。
侯印不闻封李广，他人丘垄似天山。

卷 579_3 【赠少年】

温庭筠

江海相逢客恨多，秋风叶下洞庭波。

酒酣夜别淮阴市，月照高楼一曲歌。

卷 579_4 【赠郑征君家匡山首春与丞相赞皇公游止】

温庭筠

一抛兰棹逐燕鸿，曾向江湖识谢公。
每到朱门还怅望，故山多在画屏中。

卷 579_5 【夏中病痼作】

温庭筠

山鬼扬威正气愁，便辞珍簪袭狐裘。
西窗一夕悲人事，团扇无情不待秋。

卷 579_6 【题友人居】

温庭筠

尽日松堂看画图，绮疏岑寂似清都。
若教烟水无鸥鸟，张翰何由到五湖。

卷 579_7 【题李相公敕赐锦屏风】

温庭筠

丰沛曾为社稷臣，赐书名画墨犹新。
几人同保山河誓，犹自栖栖九陌尘。

卷 579_8 【蔡中郎坟】

温庭筠

古坟零落野花春，闻说中郎有后身。
今日爱才非昔日，莫抛心力作词人。

卷 579_9 【元处士池上】

温庭筠

蓼穗菱丛思蠃蚶，水萤江鸟满烟蒲。
愁红一片风前落，池上秋波似五湖。

卷 579_10 【华阴韦氏林亭】

温庭筠

自有林亭不得闲，陌尘宫树是非间。
终南长在茅檐外，别向人间看华山。

卷 579_11 【寄裴生乞钓钩】

温庭筠

一随菱棹谒王侯，深愧移文负钓舟。
今日太湖风色好，却将诗句乞鱼钩。

卷 579_12 【长安春晚二首】

温庭筠

曲江春半日迟迟，正是王孙怅望时。
杏花落尽不归去，江上东风吹柳丝。

四方无事太平年，万象鲜明禁火前。
九重细雨惹春色，轻染龙池杨柳烟。

卷 579_13 【三月十八日雪中作】

温庭筠

芍药蔷薇语早梅，不知谁是艳阳才。
今朝领得春风意，不复饶君雪里开。

卷 579_14 【咸阳值雨】

温庭筠

咸阳桥上雨如悬，万点空濛隔钓船。
还似洞庭春水色，晓云将入岳阳天。

卷 579_15 【弹箏人】

温庭筠

天宝年中事玉皇，曾将新曲教宁王。
钿蝉金雁今零落，一曲伊州泪万行。

卷 579_16 【瑶瑟怨】

温庭筠

冰簟银床梦不成，碧天如水夜云轻。
雁声远过潇湘去，十二楼中月自明。

卷 579_17 【题端正树】

温庭筠

路傍佳树碧云愁，曾侍金舆幸驿楼。
草木荣枯似人事，绿阴寂寞汉陵秋。

卷 579_18 【渭上题三首】

温庭筠

吕公荣达子陵归，万古烟波绕钓矶。
桥上一通名利迹，至今江鸟背人飞。

目极云霄思浩然，风帆一片水连天。
轻桡便是东归路，不肯忘机作钓船。

烟水何曾息世机，暂时相向亦依依。
所嗟白首磻溪叟，一下渔舟更不归。

卷 579_19 【经故翰林袁学士居】

温庭筠

剑逐惊波玉委尘，谢安门下更何人。
西州城外花千树，尽是羊昙醉后春。

卷 579_20 【题城南杜邠公林亭】

温庭筠

卓氏垆前金线柳，隋家堤畔锦帆风。
贪为两地分霖雨，不见池莲照水红。

卷 579_21 【夜看牡丹】

温庭筠

高低深浅一阑红，把火殷勤绕露丛。
希逸近来成懒病，不能容易向春风。

卷 579_22 【宿城南亡友别墅】

温庭筠

水流花落叹浮生，又伴游人宿杜城。
还似昔年残梦里，透帘斜月独闻莺。

卷 579_23 【过分水岭】

温庭筠

溪水无情似有情，入山三日得同行。
岭头便是分头处，惜别潺湲一夜声。

卷 579_24 【鄠杜郊居】

温庭筠

槿篱芳援近樵家，垄麦青青一径斜。
寂寞游人寒食后，夜来风雨送梨花。

卷 579_25 【题河中紫极宫】

温庭筠

昔年曾伴玉真游，每到仙宫即是秋。
曼倩不归花落尽，满丛烟露月当楼。

卷 579_26 【四皓】

温庭筠

商於甬里便成功，一寸沉机万古同。
但得戚姬甘定分，不应真有紫芝翁。

卷 579_27 【赠张炼师】

温庭筠

丹溪药尽变金骨，清洛月寒吹玉笙。
他日隐居无访处，碧桃花发水纵横。

第五百八十卷

卷 580_1 【病中书怀呈友人】

温庭筠

逸足皆先路，穷郊独向隅。顽童逃广柳，羸马卧平芜。
黄卷嗟谁问，朱弦偶自娱。鹿鸣皆缀士，雌伏竟非夫。
采地荒遗野，爰田失故都。亡羊犹博塞，牧马倦呼卢。
奕世参周禄，承家学鲁儒。功庸留剑舄，铭戒在盘盂。
经济怀良画，行藏识远图。未能鸣楚玉，空欲握隋珠。
定为鱼缘木，曾因兔守株。五车堆缥帙，三径阖绳枢。
适与群英集，将期善价沽。叶龙图天矫，燕鼠笑胡卢。
赋分知前定，寒心畏厚诬。蹊尘追庆忌，操剑学班输。
文园陪多士，神州试大巫。对虽希鼓瑟，名亦滥吹竽。
正使猜奔竞，何尝计有无。辍谈虚访觅，王霸竟揶揄。
市义虚焚券，关讥谩弃繻。至言今信矣，微尚亦悲夫。
白雪调歌响，清风乐舞雩。胁肩难黽勉，搔首易嗟吁。
角胜非能者，推贤见射乎。兕觥增恐竦，杯水失锱铢。
粉堞收丹采，金觥隐仆姑。垂囊羞尽爵，扬觝辱弯弧。
虎拙休言画，龙希莫学屠。转蓬随款段，耘草辟墁垆。
受业乡名郑，藏机谷号愚。质文精等贯，琴筑韵相须。
筑室连中野，诛茅接上腴。萼花纶虎落，松瘦斗栾栌。

静语莺相对，闲眠鹤浪俱。蕊多劳蝶翅，香酷坠蜂须。
芳草迷三岛，澄波似五湖。跃鱼翻藻荇，愁鹭睡葭芦。
暝渚藏鸂鶒，幽屏卧鹧鸪。苦辛随艺殖，甘旨仰樵苏。
笑语空怀橘，穷愁亦据梧。尚能甘半菽，非敢薄生刍。
钓石封苍藓，芳蹊艳绛跗。树兰畦缭绕，穿竹路萦纡。
机杼非桑女，林园异木奴。横竿窥赤鲤，持翳望青鸬。
泮水思芹味，琅琊得稻租。杖轻藜拥肿，衣破苴披敷。
芳意忧鶗鴂，愁声觉蟋蟀。短檐喧语燕，高木堕饥鼯。
事迫离幽墅，贫牵犯畏途。爱憎防杜挚，悲叹似杨朱。
旅食常过卫，羁游欲渡泸。塞歌伤督护，边角思单于。
堡戍标枪槊，关河锁舳舻。威容尊大树，刑法避秋荼。
远目穷千里，归心寄九衢。寝甘诚系滞，浆馈贵睢盱。
怀刺名先远，干时道自孤。齿牙频激发，簪笏尚崎岖。
莲府侯门贵，霜台帝命俞。骥蹄初蹏景，鹏翅欲抟扶。
寓直回骢马，分曹对暝乌。百神歆仿佛，孤竹韵含胡。
凤阙分班立，鹓行竦剑趋。触邪承密勿，持法奉訏谟。
鸣玉锵登降，衡牙响曳娄。祀亲和氏璧，香近博山炉。
瑞景森琼树，轻水莹玉壶。豸冠簪铁柱，螭首对金铺。
内史书千卷，将军画一厨。眼明惊气象，心死伏规模。
岂意观文物，保劳琢碣砮。草肥牧腰褭，苔涩淬昆吾。
乡思巢枝鸟，年华过隙驹。衔恩空抱影，酬德未捐躯。
时辈推良友，家声继令图。致身伤短翮，骧首顾疲驢。
班马方齐骛，陈雷亦并驱。昔皆言尔志，今亦畏吾徒。
有气干牛斗，无人辩辘轳。客来斟绿蚁，妻试踏青蚨。
积毁方销骨，微瑕惧掩瑜。蛇予犹转战，鱼服自囚拘。
欲就欺人事，何能遁鬼诛。是非迷觉梦，行役议秦吴。
凛冽风埃惨，萧条草木枯。低徊伤志气，蒙犯变肌肤。

旅雁唯闻叫，饥鹰不待呼。梦梭抛促织，心茧学蜘蛛。
宁复机难料，庸非信未孚。激扬衔箭虎，疑惧听冰狐。
处己将营窟，论心若合符。浪言辉棣萼，何所托葭莩。
乔木能求友，危巢莫吓雏。风华飘领袖，诗礼拜衾繻。
欹枕情何苦，同舟道岂殊。放怀亲蕙芷，收迹异桑榆。
赠远聊攀柳，栽书欲截蒲。瞻风无限泪，回首更踟蹰。

卷 580_2 【感旧陈情五十韵献淮南李仆射】

温庭筠

嵇绍垂髫日，山涛筮仕年。琴樽陈席上，纨绮拜床前。
邻里才三徙，云霄已九迁。感深情恻恻，言发泪潺湲。
忆昔龙图盛，方今鹤羽全。桂枝香可袭，杨叶旧频穿。
玉籍标人瑞，金丹化地仙。赋成攒笔写，歌出满城传。
既矫排虚翮，将持造物权。万灵思鼓铸，群品待陶甄。
视草丝纶出，持纲雨露悬。法行黄道内，居近翠华边。
书迹临汤鼎，吟声接舜弦。白麻红烛夜，清漏紫微天。
雷电随神笔，鱼龙落彩笺。闲宵陪雍时，清暑在甘泉。
耿介非持禄，优游是养贤。冰清临百粤，风靡化三川。
委寄崇推毂，威仪压控弦。梁园提榼骑，淮水换戎旃。
照日青油湿，迎风锦帐鲜。黛蛾陈二八，珠履列三千。
舞转回红袖，歌愁敛翠钿。满堂开照曜，分座俨婵娟。
油额芙蓉帐，香尘玳瑁筵。绣旗随影合，金阵似波旋。
缙幕深回互，朱门暗接连。彩虬蟠画戟，花马立金鞭。
有客将谁托，无媒窃自怜。抑扬中散曲，漂泊孝廉船。

未展干时策，徒抛负郭田。转蓬犹邈尔，怀橘更潸然。
投足乖蹊径，冥心向简编。未知鱼跃地，空愧鹿鸣篇。
稷下期方至，漳滨病未痊。定非笼外鸟，真是壳中蝉。
蕙径邻幽澹，荆扉兴静便。草堂苔点点，蔬圃水溅溅。
钓罢溪云重，樵归涧月圆。懒多成宿疾，愁甚似春眠。
木直终难怨，膏明只自煎。郑乡空健美，陈榻未招延。
旅食逢春尽，羁游为事牵。宦无毛义檄，婚乏阮修钱。
冉弱营中柳，披敷幕下莲。傥能容委质，非敢望差肩。
涩剑犹堪淬，余朱或可研。从师当鼓篋，穷理久忘筌。
折简能荣瘁，遣簪莫弃捐。韶光如见借，寒谷变风烟。

卷 580_3 【题翠微寺二十二韵】

温庭筠

邠土初成邑，虞宾竟让王。乾符初得位，天弩夜收铓。
偃息齐三代，优游念四方。万灵扶正寝，千嶂抱重冈。
幽石归阶陛，乔柯入栋梁。火云如沃雪，汤殿似含霜。
涧籁添仙曲，岩花借御香。野麋陪兽舞，林鸟逐鹓行。
镜写三秦色，窗摇八水光。问云征楚女，疑粉试何郎。
兰芷承雕辇，杉萝入画堂。受朝松露晓，颁朔桂烟凉。
岚湿金铺外，溪鸣锦幄傍。倚丝忧汉祖，持璧告秦皇。
短景催风驭，长星属羽觞。储君犹问竖，元老已登床。
鹤盖趋平乐，鸡人下建章。龙髯悲满眼，螭首泪沾裳。
叠鼓严灵仗，吹笙送夕阳。断泉辞剑佩，昏日伴旂常。
遗庙青莲在，颓垣碧草芳。无因奏韶濩，流涕对幽篁。

卷 580_4 【过孔北海墓二十韵】

温庭筠

抚事如神遇，临风独涕零。墓平春草绿，碑折古苔青。
珪玉埋英气，山河孕炳灵。发言惊辨囿，搢翰动文星。
蕴策期干世，持权欲反经。激扬思壮志，流落叹颓龄。
恶木人皆息，贪泉我独醒。轮辕无匠石，刀几有庖丁。
碌碌迷藏器，规规守挈瓶。愤容凌鼎镬，公议动朝廷。
故国将辞宠，危邦竟缓刑。钝工磨白璧，凡石砺青萍。
揭日昭东夏，抟风滞北溟。后尘遵轨辙，前席咏仪型。
木秀当忧悴，弦伤不底宁。矜夸遭斥鷃，光彩困飞萤。
白羽留谈柄，清风袭德馨。鸾凰婴雪刃，狼虎犯云屏。
兰蕙荒遗址，榛芜蔽旧垠。辘轳近沂水，何事恋明庭。

卷 580_5 【过华清宫二十二韵】

温庭筠

忆昔开元日，承平事胜游。贵妃专宠幸，天子富春秋。
月白霓裳殿，风干羯鼓楼。斗鸡花蔽膝，骑马玉搔头。
绣毂千门妓，金鞍万户侯。薄云欹雀扇，轻雪犯貂裘。
过客闻韶濩，居人识冕旒。气和春不觉，烟暖霁难收。
涩浪和琼甃，晴阳上彩旒。卷衣轻鬓懒，窥镜澹蛾羞。
屏掩芙蓉帐，帘褰玳瑁钩。重瞳分渭曲，纤手指神州。

御案迷萱草，天袍妒石榴。深岩藏浴凤，鲜隰媚潜虬。
不料邯郸虱，俄成即墨牛。剑锋挥太皞，旗焰拂蚩尤。
内嬖陪行在，孤臣预坐筹。瑶簪遗翡翠，霜仗驻骅骝。
艳笑双飞断，香魂一哭休。早梅悲蜀道，高树隔昭丘。
朱阁重霄近，苍崖万古愁。至今汤殿水，呜咽县前流。

卷 580_6 【洞户二十二韵】

温庭筠

洞户连珠网，方疏隐碧浔。烛盘烟坠烬，帘压月通阴。
粉白仙郎署，霜清玉女砧。醉乡高窈窕，棋阵静愔愔。
素手琉璃扇，玄髻玳瑁簪。昔邪看寄迹，栀子咏同心。
树列千秋胜，楼悬七夕针。旧词翻白纈，新赋换黄金。
喉鹤调蛮鼓，惊蝉应宝琴。舞疑繁易度，歌转断难寻。
露委花相妒，风欹柳不禁。桥弯双表迥，池涨一篙深。
清跸传恢囿，黄旗幸上林。神鹰参翰苑，天马破蹄涔。
武库方题品，文园有好音。朱茎殊菌蠢，丹桂欲萧森。
黼帐回瑶席，华灯对锦衾。画图惊走兽，书帖得来禽。
河曙秦楼映，山晴魏阙临。绿囊逢赵后，青锁见王沈。
任达嫌孤愤，疏慵倦九箴。若为南遁客，犹作卧龙吟。